



R. BIBL. NAZ.
Vitt. Emanuele III.

RACCOLTA
VILLAROSA

A

275

NAPOLI

Racc. villosa

A 275



533459
DE VITA,
ET MORIBUS
S. IGNATII
LOJOLÆ,
QUI SOCIETATEM JESU
FUNDAVIT.

LIBRI III.


Auctore Joanne Petro Maffejo,
Presbytero Societatis ejusdem.



VERONÆ, MDCCXIX.

In Nova Typog. Petri Ant. Berni
Bibl. in Via Leonum. *Sup. Per.*





Illustriss. atque Eruditiss. Viro

OTTOLINO

O T T O L I N O

CUSTOZIÆ COMITI.

Petrus Antonius Bernus S. P. D.

Primum hoc laboris mei rudimentum eo jure sub tuis prodit auspiciis, quo jure meas esse partes jam pridem duxi, ut, prima quæque observantiæ erga te meæ palam faciendæ quum sese obtulisset occasio, eam neque remitterem, neque indiligenter arriperem. Belle factum, quod hilaris animadverti, ut a me inscriptum tibi opusculum illud exiret, quod tantopere ho-

a 2

norem



norem auget clarissimæ illius Societatis ,
cui præclaram primæ ætatis discipli-
nâ, & potissima Sapientiæ tuæ rudimen-
ta, & pietatis libentissime refers acce-
pta : quodque simul, quum multorum per
manus circumferendum omnino sit, stu-
dii erga te mei significationem daturum
est multis. Belle factum, quod tempori
fors etiam tulit, ut ad Virum politi ap-
prime sermonis, Romanæque facun-
diæ peritum libellus is deferretur, qui
quum cæteris omnibus, tum ea præci-
pue laude habetur insignis. Quanquam,
si hoc, quidquid est, officii tam sæpe sit
persolvendum, quam sæpe hoc ad te
nomine spectare intelligo; nullum erit
perfecto librorum genus, si modo vulga-
res expunxeris, in quo emittendo parti-
me lege non sentiam obstrictum iri. Etsi
enim eximia sine ulla controversia laus
est, a teneris, ut ita dicam, unguiculis
ornatissime dicendi artem te calluisse; ut
natum te ad eloquentiam una vox omni-
um, unus tunc sensus fuerit; quis igno-
rat tamen, eam ipsius adolescentiæ tuæ,
atq; adeo pueritiæ, nam inde usq; juvat
repetere, neque unam exstitisse, neque
præcipuam? Habet illa quidem recorda-
tio delectationem, quum mentem subit,
Senis, atque Florentiæ, quas Urbes duo
præclara Italiæ lumina incoluisti. quum
Pa-

Patres doctissimos in nobili Ptolemæo Collegio felices pueritiæ ejusdem tuæ institutores discipulus felix audires, tuam hanc bene dicendi facultatem crebris diu sermonibus usurpatam: sed quid hoc ad illam rerum peritiā, quam in hominem id ætatis cadere vix contingit? Quam quidem in Te peritiā jam tum fulsisse, si quis post sexcentos, quos habet, testes adhuc, & præcones desiderat; næ ille non recte intelligens, eloquentiam sine doctrina haberi posse arbitrat. Hoc autem quum rationi adversatur maxime; tum e regione Eloquentium Magistro opponitur: cui si experto credimus, (a) Ex rerum cognitione efflorescat, & redundet oportet oratio. Sed quando sensim, nec contra votum, immensum laudum tuarum pelagus ingressus sum; ac vela pro nata re aliquando impune licet expandere; quod ad illam attinet portenti similem in ætate illa orationis facilitatem, ubertatem, atque elegantiam, tametsi præsens instituti sermonis ratio vix patitur, tamen volo mihi silentium imponere, unum illud adjiciens, dum cæteri hominum, ut adagium habet, dicendo dicere discunt, tibi, quum dicere primum cœpisti, reliquum prope nihil

a 3
 (a) De Orat. lib. I.

fuisse, quod disceres. Venio itaque lubens ad majora: & quidem brevitatis gratia non ad ea, quæ in palæstris gessisti, quum Florentiæ tantos necdum ephebus in Philosophia fecisti processus, quantos illa tua coram amplissimo bonarum Artium Patrono Francisco Maria Mediceo Serenissimo Principe, Romanæ Purpuræ honore insignito, & coram pertracto (quæ rei celebritas erat, & expectatio) nobilium, ac sapientium hominum agmine frequentissimo memorabilis disputatio inter lætam omnium admurmurationem ostendit: quum adolescens exinde Romæ (unde utinam non discessisses!) ea prius Divinarum rerum, arcanorumque intelligentia mentem imbuisi, quam videretur ætas non posse capere; mox absolutissimam, siquis unquam alius, utriusque Romani Juris notitiam, & laureæ duplicis honorem es consecutus. Ad illam venio universæ literaturæ incredibilem copiam, qua, in ea adhuc studia, in quibus eras, incumbens, præditus repente, ac quodammodo confertus apparuisti: ut latuerit profecto, cætera eruditionis suppellex qua industria, qua methodo, quo labore, quo tempore parta sit, atque parata. Sed

Flo-

Floriferis (a) ut apes in saltibus
omnia libant ,

*sic tu cum magno Lucretio aurea semper
omnia depascebaris, sive ea ex ore erudi-
tissimorum attenta aure perciperes. sive
ex divite librorum penu sollicita perquisi-
tione depromeres. Sic humaniores, seve-
rioresq; Musas non alio atque alio colen-
tem tempore, in omni studiorum genere te*

-- -- (b) ardens evexit ad æthera
virtus :

*ut qui cuncta sciendi te cupidum tam
rite probaveras ; nihil propemodum ne-
sciens merito factus sis . Ea quidem
profecto per Urbem fama percrebuit : &
continuo quotquot inibi eruditorum ho-
minum cœtus erant sive Dogmatum , si-
ve Legum , sive Sacræ , ac profanæ
antiquitatis , uno verbo , gravioribus
quibusvis studiis addicti ; certatim ocu-
los in te conjecerunt : teque in suorum nu-
merum avidè retulerunt . Quod quidem
quum singularem in te sublimioris cu-
jusque , lectiorisque doctrinæ abun-
dantiam suspici comprobavit ; tum
aliunde non defuerunt , quibus per-
spicuum fieret , adhuc inter tantas
occupationes , easque perpetuas , ad
mansuetiores tamen Musas identidem
te reverti . Commodum hic recensерem*



(a) Lucr. lib.6. (b) Vir. Æn. l. 6.

& habitas coram summo Ecclesiæ Mo-
 deratore, coram Eminentissimo Principe
 Petro Cardinali Ottobono, aliisque
 Purpuratis Patribus elegantissimas ora-
 tiones, in quibus tota, quanta est, ar-
 tis oratoriæ dignitas, ac venustas
 elucet; & ea carmina, quæ etsi non
 (a) multa dies, & multa litura coër-
 cuit; quum nunquam pangerentur
 improbo, ut fit, labore, sæpius etiam
 extempore funderentur; castigata ta-
 men ad unguem, ut ille volebat, ne-
 mini non visa sunt. Sed quid multa?
 illos appello præ cæteris (b) cantare
 peritos Arcades, illos (absit invidia
 verbo) rei literariæ universæ repara-
 tores; qui ad opus suum tantæ molis,
 quum maxime proveheretur, socium te
 quoque acciri opportunum duxerunt,
 indicantes hoc uno satis quam honori-
 fice de te sentirent. Verum, ut pauci
 solent, & loqui & scribere te consue-
 visse, illud maxime argumento est,
 quod Arcades ipsi, ubi vel Rhetorum
 pompa, vel Musarum lepore opus esset,
 in tanta disertissimorum hominum fre-
 quentia, in tanto æmulationis ardore
 sæpe tibi cum paucis negotium dede-
 rint. Sane vix non quotannis decre-
 tum

(a) Hor. de Arte Poetica.

(b) Virg. Ecl. 10.

tum est, ut illustriores artes, atq; in primis
utiles verbis exornares amplissimis,
recurrentibus in Capitolio illius Aca-
demie solenniis, in qua optimi, Sapien-
tissimique Pontificis munificentia ali-
quando tandem toto plaudente Orbe

Ingeniis (a) patuit campus, cer-
tusque merenti

Stat. favor:

-- -- (b) despectaque Musæ
Colla. levant.

Post hæc omnia, quæ alterius omni-
no stylum desiderant; dubitet jam,
siquis potest, quæ tui existimatio apud
omnes, qui cultus fuerit. Unus mihi
sit instar omnium Card. Norisius, ma-
gnus illud Augustinianæ Familie,
Veronensis Urbis, Ecclesiæ totius orna-
mentum; cui versari tecum, & collo-
qui in deliciis erat: quique propterea,
quos nocturna diurna que manu versa-
bar electissimos libros, eos ad illa,
quæ tibi undiq; collegisti, pretiosa volu-
mina, moriens transferri voluit, amo-
ris erga te sui perenne pignus, ac
monumentum. Cujus exemplo tota te
Urbs ut adamaret, egregia indole tua,
raris animi, atque ingenii dotibus effe-
ctum

(a) Claud. de Conf. Mal. Theod.

(b) Id. lib. 2. de laud. Stil.

• *Sum est : quibus eos precipue demerui-
sti, queis aut scientiæ sublimitas, aut
munerum amplitudo, aut Insularum
etiam decus, ac Purpuræ summam di-
gnitatem pariunt, & nominis majesta-
tem. Et mirabimur, quum confir-
mata jam ætate a nostratibus id
tibi honoris prestari cernimus, quod
tua tibi Romæ adolescentia promeruit?
Nostrates quum dico, non omnes tan-
tum designo tui nominis jure studiosos
concives tuos : sed totam longelateque
circumjectam regionem animo lustrans,
complures ubique noto spectatissimos
viros, non nullos etiam inter ipsos,
qui scriptis nomen suum ab interitu
jam vindicarunt. Quos tu uno hoc
exemplo indigens (liceat enim, quam in
aliis desidero, nimiam fortassis in eo
perstringere modestiam tuam) utinam
aliquando adduci possis ut imiteris : &
quo te posterī fortasse temporis spes
non allicit ; Patriæ saltem amor, ut
alios quosdam, invitet : quod ni-
si in animum aliquando induxeris,
quum possis, ut etiam velis ; flagitato-
res molestos, atque acres te semper
noveris habiturum. At enim occupata
opera, animoque impedito qui potes-
res tanta suscipi? Quis enim nescit te
præter ea, quæ e re fidei sunt, & Ec-
clesiæ,*

clesiæ, quum in iis hic numereris, qui de gravissimis ipsius causis ad Sacrum Tribunal delatis suffragium ferunt; præter ea, quæ tuorum, qui innumeri sunt, causa non respuis; tot insuper habere negotia, quot eruditis viris non paucis, etiam regione nonnunquam diffitis, vel in naturæ arcanis, vel, in Sacris Doctrinis, vel in Legum interpretatione, vel in qualibet eruditionis parte difficultatem creant, ac laborem? Verum me quidem iudice quæ opera jugiter hæc omnia præstas, eadem prope & aliorum voto fieri satis omnino posset, si ea solum collecta aliquando prodirent, quæ sparsim vel ore tenus doctissime differis, vel perituris Epistolis copiose consignas. Eorum ego verbis hic loquor, quibus vel per tuæ consuetudinis usuram, vel per datas ultro citroque literas, suavitatem frui licet ingenii tui. Apud quos modo quam invitum offendo, dum novam, eamque uberimam laudum tuarum segetem intactam relinquo, in qua luculentissime alterius triumpharet oratio! Sed præterquam quod & tu laudum impatiens es (& tamen quis de te loquens a laudibus temperet?) & mihi nihil antiquius quam ut perspectæ voluntati tuæ morem geram; in volumen abiret epistola, si, quæ talia
occur.

occurrunt , cuncta vel cursim animus esset attingere . Patientia tua nimium fortasse quantum abusus videor : neque enim tu is es , cui bonas horas in his legendis male perdere liceat . Ad hæc , propositum mihi initio nihil aliud erat , quam ut munusculum hoc & recepto more ,

(ἔθος (*a*) ᾧ ἐγχεονίζον εἰς νόμον τελεῖ)

(Nam (*a*) mos vetustus obtinet legis locum)

& multis præterea nominibus debitum , mei erga te grati animi quaecunque pignus exstaret . Hoc , quod factum est certe , tum prospere factum intelligam , si plenum hoc studii officium , ut auguror , benigne respexeris , & ea simul vota , quibus D. O. M. tibi semper volo propitium . Quo nimirum & ego incomparabili beneficentia tua fretus , atque , ut esse jandudum cæpi munitus , ad hunc , qui e Manibus jam revocatur , literarum decorem conferre aliquid valeam ; & Tu hac etiam in parte bene mereri de literis possis , ut nunquam non meditaris . Vale .

(*a*) Greg. Naz. carm. de vita sua .



D E

S. IGNATII

LOJOLÆ

VITA, ET MORIBUS.

LIBER PRIMUS.

Ortus ejus, & educatio.

Cap. I.

IN ea HISPANIÆ regione ,
quæ ad Pyrenæum pertinet, ac
vulgi sermone Guipuzcoa nomi-
natur, in primis clara est Lojo-
larum familia. Ejus familiæ princeps
Bertramus, Ognis, & Lojolæ domi-
nus, quæ loca sunt in finibus urbis
Aspeithiæ, in matrimonium ducta
Marina Sone, æque clari generis fœ-
mina, quinque suscepit ex ea filias,
filios octo, quorum minimus natu
A fuit

fuit IGNATIUS, is, quem Societas JESU parentem agnoscit; cuius de vita & moribus, quæ nobis fuerint comperta, in unius Dei gratiam gloriamque, literis mandare decrevimus. Hisce ergo parentibus natus IGNATIUS est anno post Virginis partum MCDXCI. regnantibus in Hispania Ferdinando, & Elisabetha, cognomento Catholicis. Ac de prima ipsius pueritia id unum constat, haud ita severa disciplina educatum a suis fuisse; atque ab ipsis incunabulis, ut in opulenta domo, profanos admodum hausisse spiritus: deinde literis vixdum a limine salutatis, quum esset eximia, & animi, & corporis indole, continuo in Ferdinandi regiam a patre missum, veteri Hispaniæ more; quo in Regno principum liberi ea fere conditione, ac jure nascuntur, ut maximus ætate duntaxat in patrimonio, imperioque succedat; reliqui, sive ad acuendam gentis industriam, sive ad familiæ splendorem in uno capite retinendum, portiuncula quadam hæreditatis aspersi, quæ tenuem in victum, cultumque sit satis, vel studijs doctrinæ, militiæve dant operam, vel aulae, Regumque præsidio ad opes,
glo-

gloriamque nituntur. Hic ille quum in ephēbīshonorariis Regi aliquandiu ministrasset, aulicis inbutus moribus, ad Antonium Manricum sese contulit Najarensum Ducem, ex iis, quos in Hispania Magnates appellant; quocum Lojolejæ genti necessitudo vetus intercedebat. Atque apud hunc domi forisque in honore habitus, rei militaris tyrocinia posuit: & quod iis ferme usu venit, qui nondum cœlestes delicias degustarunt, id ipsum IGNATIO contigit, ut ardenti laudis humanæ studio, & communis consuetudinis impetu abreptus, quum esset in corporis ornatu elegantissimus, equorumque, & armorum usu præcelleret; quod sibi datum fuerat temporis ad negotiationem salutis æternæ, id ille miserabiliter, ut plerique mortalium, partim in factionum, rixarumque periculis, partim in amatoria vesania, & cætera seculi vanitate consumeret. Veruntamen inter ejusmodi vitia, & cæcos errores præclara quædam emicabant bonæ, ac religiosæ mentis indicia. Primū enim in tanta licentia militari, tamque corruptis hominum moribus, quamvis animo consternatus esset inter-

4 S. IGNATII VITÆ

dum , & multis undique cinctus angustiiis; nulla tamen ipsius atrocior unquam audita vox est , quales multæ a nefariis hominibus in Deum , ac Dei providentiam vulgo jactantur. Nec solum ab omni verborum impietate semper abhorruit; sed etiam sacra omnia , sacrorumque Antistites naturæ perpetuo instinctu admodum religiose reveritus est. Erat præterea intactus ab avaritiæ sordibus , & a lucri cupiditate vehementer alienus: quod cum alias , tum vero in expugnatione urbis Najaræ , quæ in Cantabriæ finibus est , perspici potuit , quâ quum ob defectionis crimen Dux militi diripiendam dedisset; IGNATIUS , quamvis ad ipsum victoriæ pars non exigua pertineret , tamen nec præsentis prædæ dulcedine , nec cæterorum exemplo adduci potuit , ut sese alienæ rei contactu pollueret; non Christiano solum , sed etiam ingenuo homine id indignum existimans. Quæ ipsius altitudo animi in privatis quoque dissidiis , ac simultatibus eminebat; ut siquando ex certamine dignitatis (ut fit) ad manus , pugnamque venisset , si locus reconciliationi daretur , illico una cum
armis

LIBER PRIMUS. 3

armis odium omne deponeret, & cum inimicis in gratiam planè bona rediret fide. Neque vero eidem in magnis, arduisque negotiis, vel capefendis alacritas, vel gerendis consilium, & cautio deerat; quocirca, inter quosdam Cantabriæ populos gravi orta seditione, legatus ad eos a Duce Najaræ, brevi controversias omnes magno partis utriusque consensu, & approbatione diremit: ac licet juvenis admodum esset ætate, in agendo tamen, tractandisque hominum ingeniis jam tum senilis quædam in eo maturitas apparebat; prorsus, ut negotium nullum ferme susceperit, quod non ad optatum exitum sua lenitate, ac virtute perduxerit. Quanquam ob imperitiam rerum divinarum hæc tam egregia animi bona, & quasi talenta non optime collocabat interdum; ad hominum videlicet gratiam, ac sui ipsius incrementa iis artibus utens, quas ad unius Dei honorem, & gloriam omninò referri oportuerat.

Conversio ejus ad Christum.
Cap. II.

HUNC maxime in modum adolescentia, atque ipso ætatis flore consumpto, quum annum ageret jam nonum circiter, & vigesimum, a miserabili errore, certoque æternæ vitæ periculo in rectum salutis iter summo Dei beneficio revocatus est. Tota autem ejus conversionis ratio fuit ejusmodi. Ardebat eo tempore Hispania intestini belli tumultibus; quam nactus occasionem Franciscus Galliarum Rex, Navarræ Vasconum, quæ Guipuzcoam attingit, Henrico Alibreto cognato suo recuperandæ (cujus pater ex eo Regno Ferdinandi Catholici armis olim exactus fuerat) Andreæ Foxium, cognomento Asparotum, cum exercitu jussit in eas regiones impetum facere, qui celeritate usus, quum aliquot loca improvise adventu cepisset; quumque nobilitas Henrici cupida ad Gallum sese quotidie adjungeret; Najaræ Dux, qui Navarræ summo cum imperio præerat, ejus rei fama commotus, in ulteriorem Hispaniam ad auxilia contrahenda profectus

etusest, IGNATIO, paucisq; præter-
 ea Pompelone custodiæ causâ relictis.
 Ac cæteri quidem, appropinquante
 Gallorum exercitu, magnitudine pe-
 destrium, & equestrium copiarum ex-
 territi, & simul diffisi oppidanorum
 animis, tempori cedere, & ur-
 bem relinquere omnino decreverant:
 IGNATIUS vero multis verbis ho-
 mines ab eo consilio revocare conatus,
 ubi se nihil proficere hortando perspe-
 xit, ardentibus oculis detestatus igna-
 viam perfidiamque, spectantibus o-
 mnibus in arcem solus introiit, paratus
 illam cum aliquot in eo præsidio reli-
 ctis omni ope tueri. Quo virtutis exē-
 plo permotus alius quidam IGNA-
 TII in studio bellicæ laudis æmulus,
 eandem aleam subiit: reliquis vero sa-
 lus, quam aut fides, aut gloria fuit an-
 tiquior. Ventum deinde in consilium
 est a custodibus de summa rei: quum-
 que in tanta propugnatorum paucita-
 te contra tantas hostium copias nega-
 rent plerique locum obtineri posse
 diutius, ac seniorum præsertim sen-
 tentiæ ad profectiorem inclinarent;
 IGNATIUS, quo erat animi, &
 corporis robore, quam acerrime
 sese rursus opposuit, remq; disjecit.

8 *S. IGNATII VITÆ*

Interea Galli, resistente nemine, propius ad urbem accedunt, & magna civium voluntate admissi, castris ad arcem positis, Præfectum præsidii ad colloquium evocant. Ille, accepta fide, cum tribus duntaxat egreditur, in quibus erat **IGNATIUS**; qui quum ab hostibus proponi conditiones iniquiores vidisset; exarsit nimirum, easque conditiones tam acri, ac vehementi oratione commilitonibus dissuasit, ut ad extrema omnia perpetienda potius, quam arcem deferendam cunctos accenderit. Nec mora; Galli, omisso colloquio, acrius instare, tormentis mœnia quaterere, atque diruere; undique ascensum tentare: Hispani contra, **IGNATII** præsertim exemplo, atque adhortationibus incitati, fortiter sese defendere, subeuntem hostem gladiis, telis, contis arcerere; quoad **IGNATIO** ante alios dimicanti, globi vi excussus e muro lapis lævam haud ita graviter læsit tibiam; globus vero ipse, quanquam impetu refracto, subsiliens, dextram adeo labefactavit, atque confregit, ut e vestigio semianimis alienata mente corruerit. Tum vero debilitati animis cæteri, & deditio facta. **IGNATIUM**

TIUM porro stratum, vel ad colligendam clementiæ famam, vel etiam virtutem in hoste admirati Galli benigne suscipiunt, & in urbem ex arce translatum, in pristino hospitio collocant, medicisque adhibitis, & rebus omnibus necessariis diligenter curant. Huic Gallorum benignitati pro sua animi magnitudine egregie respondit IGNATIUS, quippe tantum aberat, ut eos odisset, a quibus in illam calamitatem, vitæque discrimen erat adductus, ut quum in lecto decumberet, singulos blande, comiterque compellans, omnia fere sua in eos amoris causa diviserit; atque hunc clypeo, illum pugione, alium thorace donarit. Interjectis deinde aliquot diebus, quum gravius laboraret, quam ut brevi tempore sanari posse videretur; ad cæteram humanitatem illud etiam additum a Gallis, ut IGNATIUM lectica Lojoram usque (neque enim longe aberat) deportandum curarent, qui peramanter a suis acceptus, quum, ingravescente in dies morbo, periculosius ægrotaret, accersiti confestim undique medici, crure inspecto, severe pronunciant, ossa illa, sive id prioris chirurgi vitio, sive

sive itineris agitatione contigerit, nequaquam esse bene locata: neque vero, nisi ea coagmentatione denuo resoluta, frustisque suo loco repositis, posse ullo modo fieri ut coalescât. Quam acerba denunciatione IGNATIUS minime exterritus, non modo statim æquo animo sese paratum ostendit ad omnia subeunda, sed etiam inter ipsam curationem, quamvis esset asperrima, nullum aliud indicium dedit doloris, nisi ut coactos in pugnū digitos valde constringeret. Ex eo die morbus majorem in modum est auctus; quumque jam IGNATIUS omnes fere cibos, haustusque stomacho fastidiente respueret, aliaque in eo cernerentur lethalia signa, suorum admonitu, sacris, quæ ad expiandum animum pertinent, rite procuratis, ipso B. Petri Apostoli pervigilio, cunctis mœrentibus, eo deductus est, ut medici prorsus actum affirmarent, nisi ante mediam eam noctē vis morbi remitteret. Venerabatur jandudum IGNATIUS præcipuo quodam cultu Principem Apostolorum: quin etiam ejus laudes militariter olim carmine Hispanico celebraverat: cujus profecto pietatis fructum non exiguū

guum tulit; siquidem illa ipsa decre-
 toria nocte per quietem videre sibi
 visus est eundem Apostolum, opta-
 tam sibi valetudinem divinitus affe-
 rentem: nec sane in irritum ea visio
 recidit; quippe continuo levare dolo-
 ribus, ciboque refici est cœptus. Jam-
 que Dei beneficio periculum mor-
 tis evaserat, magnaue suorum gratu-
 latione melius habebat in dies: quum
 repente animadvertit os quoddam ge-
 nu sub ipso fœdius prominere: quod,
 quoniam præter cætera incommo-
 da impedimento etiam sibi videbat
 fore, quo minus graphice quam so-
 leret, ac vellet, ocreatus incederet;
 ut erat idem, & patientiæ militari,
 & urbanæ munditiæ, & elegantiae
 apprime deditus, percontatus est me-
 dicos, possetne ullo pacto deformitas
 tolli; qui quum respondissent posse
 utique, sed dolore omnium, quos ad
 eam diem sensisset, maximo, & acer-
 bissimo; propterea quod in eam sedem
 fragmenta jam firmiter coaluerant:
 non dubitavit IGNATIUS ingenti
 omnium, vel admiratione, vel metu,
 concinnum, ac decorum corporis ha-
 bitum anteferre manifesto vitæ dis-
 crimini: secarique de sententia me-

dicorum os iussit, clariore etiam, quam antea, fortitudinis, ac patientiæ documento; quandoquidem in ea carnificina (quæ quo lentior, eo fuit horribilior) non modo ligari, tene-
rive se non est passus, verum etiam
iis qui aderant, pavore propemodum
exsanguibus, ab omni prorsus queri-
monia, gemituque se ipse continuit.
Post hæc doloribus magna jam ex par-
te mitigatis, nondum tamen gres-
su recuperato, nec pedibus ad insisten-
dum idoneis, interea, dum jacentis
corpus terrestres medici perfanare co-
nantur, ejusdem animi vulnera cura-
re medicus cœlestis aggreditur. Quum
enim affixus lectulo **IGNATIUS** fal-
lendi temporis causa profanum quem-
piam librum poposcisset ex iis, quos
antea per otium lectitare consueve-
rat; divino planè consilio factum est,
nullus ut eo tempore domi liber esset
ejusmodi: at vero longe meliores alij
duo reperti sunt Hispanico sermone
conscripti; quorum alterius, **Vita**
CHRISTI, alterius (quo selecta vir-
tutum exempla cōtinebantur) Sancto-
rum flores, erat inscriptio. Ea vide-
licet lectio salutis initium attulit ho-
mini. Dum enim oblatos sibi libros,
variis

variis locis, quasi aliud agens, delibat, sensim capi cœptus est pulchritudine eorum, quæ scripta reperiebat; atque adeo inter ipsam lectionem, ubi quidpiam insigne cognoverat, subsistere, secum ipse deliberans: Quid si præclarum hoc Sancti Dominici facinus, quid si hoc Sancti Francisci Deo fretus aggrediar? Neque vero, quum hæc, & alia sibi multa proponeret, res occurrebat ulla tam ardua, tamque difficilis, quam non perficere sese posse generosa quadam alacritate confideret. Quæ quum apud se diutius agitaasset, emergebant rursus rerum inanium voluntates, & secularia desideria, quorum sese nonnullis adeo manciparat, ut dum eorum, vel adipiscendi rationem exquirat, vel potiundi spem animo concipit, plures interim horas per imprudentiam in ea cogitatione defixus hæreret. Jamque priora illa propemodum exciderant, accensosque nuper igniculos pietatis, voluptatum illecebræ, & perniciofarum fluxarum blandimenta restinxerant; quum periclitanti servulo divina bonitas opem celeriter afferebat, ex eorum videlicet recordatione, quæ legerat, meliorem ei mentem, & consilia

filia saniora submittens, atque in hac item commentatione tandiu morabatur, donec interventu cujuscpiam, alia mentem, animumque converteret. Hac ille vicissitudine, & quasi conflictu dies aliquot mirum in modum exagitatus, quum in ejus pectore voluptas, & virtus pene ex æquo certarent; contrarias in partes magna sua perturbatione distrahebatur, incertus animi, hancine viam, an illam, quum primum posset, insisteret. Veruntamen inter alternas fluctuantis animi propensiones illud intererat, quod blandis illis rerum fluxarum imaginibus, quandiu præsentes obversabantur, tandiu titillabatur IGNATII mens: abeuntibus vero, succedebat illico amarus quidam torpor, & ægritudo, & sibi met displicentis animi tædium. At contra præclari illi ad Christianam laudem impetus, cogitationesque de adæquanda vigilantia, & sobrietate Sanctorum, de votivis peregrinationibus, de victu, cultuque in primis horrido, & aspero; non modo quum aderant, animum insolita quadam jucunditate mulcebant; sed in recessu quoque tristitia subeunte nulla, securum hilaremque præ-

præstabant. Sedenim tantum hoc ille discrimen, seculi tenebris obcæcatus adhuc, hebesque ad subtiliora hominis interni judicia, quasi ignotum quidpiam præteribat, quoad clariore demum oborta sibi luce, mentis aciem accuratius in eam varietatem cœpit intendere: ac deniq; non sine admiratione quadam animadvertit, ab illis cogitationibus, ut erant inanes ipsæ, sic se jejunum, & aridum; ab his autem velut a pabulo salutari, lætum vegetumque discedere: liquidoque perspexit, fucata, & insidiosa voluptas quantum a vero, & solido gaudio, ac suavitate distaret. Atque hanc primam de intimis animi sensibus, motibusque ratiocinationem habuisse fertur **IGNATIUS**: ad quam ubi maior deinde rerum divinarum usus accessit, tantam in spirituum discretione (quæ cōsummatae sapientiæ virtus est) solertiam, atque peritiam est consecutus, ut egregia etiam illius generis præcepta in eo libro, qui Exercitiorum appellatur, posteritati reliquerit. His ergo observationibus, & assiduis librorum monitis lethali animæ verno excitatus, antea actæ vitæ peccata, & infinitam in se Dei clem-

tiam

tiam aliquando cœpit agnoscere: nec solum de mutandis in posterum moribus, verum etiam de expiandis omniratione delictis, placandoque numine, serio cogitare. Atque in hanc deliberationem ingressus, denuo sese ad CHRISTI Domini, Sanctorumque sectanda vestigia occulto quodam instinctu acriter sentiebat impelli, & eorum præcipue, qui in se ipsi quam maxime duri, ac severi extitissent: artium quippe spiritualium, & Christianæ Philosophiæ rudis, & ignarus adhuc, omnem fere sanctitatis, & officii perfectionem in asperitate vitæ, & in voluntaria corporis afflictatione statuerat. Quocirca jam tum agitabat animo, simul atque per valetudinem liceret, nudis pedibus Hierosolymam petere, ac frequenti verberatione, longoque jejuniio tantas peccatorum pœnas ultro suscipere, quantas videlicet ab excelsso magnoque animo, salutare odium sui, & ardens divinæ gratiæ promerendæ studium exigebat. Jamque rectis euntem sensibus, & optima quæque expetentem, longe vehementius incitavit divina visio. Etenim nocte quadam vigilanti, augustissima specie,

ac

ac beatissimo lumine fulgens MA-
RIA Virgo una cum parvulo JESU,
non modo sese palam ostendit, verum
etiam incredibili benignitate spectan-
dam aliquandiu præbuit: quo viso
mirifice recreatus IGNATIUS, tan-
tū repente odium fastidiumque conce-
pit eorum, quæ apud cæcos mortales
prima putantur, ac præsertim quæ
cum inhonesta voluptate conjuncta
sunt; ut omnes rerum illarum, quam-
vis diuturno uso, ac vetustate corrobo-
ratas imagines; ex hominis memoria
confestim aspectus ille deterferit. Ac-
cessit ad hæc illud quoque non leve
Dei beneficium, quod ei in omnem
deinde vitam proprium, ac stabile
mansit: ut quotiescunque sublatis in
cælum oculis astra suspiceret (quod
sane sæpe faciebat, ac diu) mortalia
cuncta illi repente sordescerent; &
miro quodam æternæ patriæ deside-
rio raperetur.

*Ad Montem serratum religionis
causa proficiscitur.*

Cap. III.

INTEREA simul & animo, & cor-
pore convalescens, e lectulo surge-
re,

re, & intra cubiculi fines paulatim crura explicare, atque ingredi cœperat; nihilque longius ei videbatur, quam ut de cognatione sua, & de domo patris exire, & præteritæ vitæ peccata quam acerrime vindicare sibi liceret. Sed quia nondum erat ad iter faciendum idoneus, constituit interim præclarissimas quasq; CHRISTI Domini, Sanctorumque res gestas memoriæ causa describere: atque ad id ipsum exquisiti cujusdam nitoris, & elegantiae codice comparato, quæ de virtutum exemplis præcipue admirabatur, in eum codicem vario picturæ genere quam compositissimis, & quam clarissimis literis ordine referebat. Atque huic operi dum insistit ardentius, quanquam sua de instituendo novogenere vitæ consilia mortalium nulli aperuerat; hæc tamen tanta scribendi, ac legendi assiduitas, contentus corporis, frugalitatis amor & parsimoniae, sermo quotidianus non ad urbanitatem, vel ad ambitionem, ut antea, sed ad modestiam pietatemque compositus, hæc igitur, & alia non obscura immutati animi indicia celeriter illum domesticis prodiderunt. In iis Martinus Garzia

frater

frater natus maximus, qui, demortuo jam pridem Bertramo, in dominatu, rei que familiaris administratione successerat, suspicatus id, quod erat, **IGNATIUM** vel morbi vexatione, vel eorum, quæ legerat, admonitione compunctum, ac pertæsum vitæ prioris, novum aliquid ac magnum moliri, atque etiam fortasse nuncium rebus humanis velle remittere; commotus animo vehementer, hominem se vocat, variisque interrogationibus blande pertentans, ad extremum per communes parentes, perque fortunas omnes obtestatur, & obsecrat, videat etiam atque etiam quid agat, quo progrediatur, neu quid novi consilii capiat, quod vel ipsi munitum, & exploratum ad gloriam, & opes iter impediat, vel sempiternam Lojolejæ familiæ dedecoris notam inurat. Ad quæ **IGNATIUS** breviter, quo se quamprimum a fratre expediret, satis memorem fore sese respondit officii: & simul, quoniam de recuperata prope modum ejus valetudine ad Najaræ Ducem nuncii venerant, in oppido finitimo, cui Navarreto nomen est, eo tempore commorantem; veniam a fratre petiit, Ducis pro amicitia revifens-

visendi; ac per eam causam, duobus duntaxat assumtis famulis, eques in viam se dedit, ac brevi Navarretum pervenit incolumis. Ibi Duce amicisque ita salutatis, ut arcana consiliorum suorum quam accuratissime tegeret, simul etiam certa pecuniæ summa in usus pios insumta, Barcinonem petere, ut Hierosolymas inde contenderet, famulosque dimittere statuit, quo liberius, remotis arbitris, in suum sævire corpus, & debita vitæ licentius actæ supplicia a semetipso posset exigere. Solus ergo per summam dissimulationem Navarreto profectus, primum omnium religionis causa celeberrimam Beatæ Virginis ædem adire decrevit, quæ in Monte ferrato a Monachis Benedictinis incolitur, estque Barcinonem e Navarra petentibus minime devia. Deinde reputans apud animum suum partim voluptates, quibus antea indulserat, partim etiam periculosum, & grave bellum, quod sibi rursus a carnis illecebris, atque ab inferioris animæ viribus imminebat; omni ratione se contra domestici hostis insidias muniendum est arbitratus. Ergo non solum institutam, ex quo die

Lo-

Lojola discesserat, consuetudinem obfirmato retinuit animo, ut singulis noctibus pœnæ nomine se acerrime verberaret, sed etiam ratus nullum continentiae præsidium posse firmitus inveniri, quam Dei Matris, ejusdemque Virginis perpetuæ patrocinium, recenti præsertim illius in se clementia, ac benignitate invitatus, in ejus maxime clientelam, fidemque confugit, ac studio virtutis incensus, illico fecit, ut eidem Virgini sacratissimæ sese irrevocabili voto castitatis obstringeret. Quod religiosi animi obsequium, & sacrificium pro sua infinita bonitate ratum, & gratum Deus ipse videtur habuisse; quandoquidem Beatissima Virgine deprecante videlicet, ex eo tempore ad extremum usque diem IGNATIUS plane omni sensu libidinis caruit. Cæterum quo facilius omnes intelligant, quam sit periculosum, & anceps in Christianæ Philosophiæ curriculo sine rectore, ac magistro versari; non omittere hoc loco, quod ambulanti in fervore spiritus per eos ipsos dies IGNATIO contigit. Erant eo tempore in Hispaniæ finibus Maurorū multæ reliquæ: quos nefariæ superstitioni Ma-

ho-

hometis addictos, Ferdinandus Catholicus haud ita pridem e suo pepulerat regno. Ex ea igitur sæce quidam insidens mulo, IGNATIUM forte affecutus, comitem sese illi adjunxit: ac nonnulla primum (ut fit) de itinere sciscitantur; variis deinde sermonibus eo deventum est, ut de singulari *MARIÆ* virginitate differerent. Quamquam nefarius ille ante partum quidem integram illibatamque fuisse fateretur, a partu vero nequaquam; contra IGNATIUS ab ejusmodi errore quibuscunque poterat rationibus hominē revocare contenderet: post multam altercationem magis magisque obstinatus impius ille, quum oblatam sibi veritatis lucem intueri nollet; repente non sine rabie quadam subditis mulo calcaribus, antecessit, seque celeriter ex IGNATII conspectu proripuit. Quo facto vehementius irritatus IGNATIUS, parū abfuit quin citato gressu persequeretur abeuntem, & pugione confoderet; facinus indignum existimans, non tam contemptum relictumque superbe se, quam de summa castimonia, & sanctitate Reginæ Angelorum ausum fuisse vilissimum caput ore polluto de-

detrahere: quumque militari etiam
tum spiritu Religionis officiique mo-
menta perpenderet, sese vix pietati
satisfacturum putabat, si tantas blas-
phemias pateretur inultas, neque ab
impuro dæmonis mancipio pœnas pe-
tulantis linguæ reposceret. Verunta-
men incitatum jam generosi pectoris
impetum retardabat suspicio latentis
in tam speciosa cogitatione piaculi,
metusque probabilis, ne per hanc
animadversionem, & cœleste numen,
& eam ipsam, quam defendere co-
nabatur, Virginem offenderet. Quum
igitur multa secum agitasset, motu
corporis pariter atque animo varius,
ad extremum, fane quam præcipiti
consilio, statuit ad bivium usque pro-
cedere, unde Maurum ex habito col-
loquio ad proximum pagum noverat
divertisse. In eo bivio laxatis omnino
mulæ, qua vehebatur, habenis, ita
de re tota interpretari, ut si bestia
ipsa per se Mauri vestigiis insisteret,
non dubitaret, quin accepta futura
esset ultio Majestati divine: sin minus,
pro certo putaret nequaquam id a se
officii Deum, Beatamque Virginem
postulare. Hac ille mente processit
ad bivium: quumque pagus ille, quem
dixi-

diximus, abesset diverticulo passuum non amplius XL. via facili, ac spatiosa, plane divinitus factum est, ut sponte sua jumentum angustiore via Barcinonem versus iter arriperet. Atque hunc in modum IGNATIUS in re tam gravi, nullo pia ipsius studia regente periclitatus, lethalis noxæ crimen feliciter effugit, quam sapientius. Inde progressus ad vicum a Monte ferrato haud longe distantem, de peregrinatione Hierosolymitana, deque asperiore vita quamprimum ineunda mire sollicitus, viatorium ibi coemit ornatum, sparteos videlicet calceos, talarum e sacco tunicam, funemque pro balteo, tornatilem baculum, & in usum aquæ cucurbitam. Quæ omnia, ut CHRISTI paupertatem non erubescere, & perversam recti verecundiam deponere paulatim assuesceret, suspensa propalam ex ephippiis ad monte usque lætus advexit.

*Acta ejus in Monte ferrato.
Cap. IV.*

QUO simul atque pervenit, Templum ingressus, ac Numine salutato, nihil antiquius habuit, quam

quam ut per sacram totius anteaetæ
 vitæ confessionem contractas animi
 sordes elueret: qua confessione in pri-
 mis fideliter atque accurate de scripto
 peracta per triduum, summa deinde
 cum veneratione ad Sacramentum al-
 taris accessit. Contulit etiam cum
 eodem patre, qui sibi confitenti aures
 dederat, omnia sua consilia cogita-
 tionesque de imitatione Sanctorum,
 quæ ad eam usque diem prorsus ne-
 mini patefecerat. Præterea quidquid
 habuit pecuniæ, totum id in CHRI-
 STI Domini gratiam pauperibus be-
 nigne divisit. Dein silentio noctis
 ejus, cui dies festus Angelicæ salu-
 tationis illuxit, pretiosa vestimenta,
 quibus erat ornatus, quam occultis-
 sime potuit, pannoso cuidam ex in-
 fima plebe largitus, confestim optato
 illo sacco sese alacer induit, ac fune
 præcinxit: dextro pedi, quod ex re-
 liquiis morbi singulis etiam tum no-
 ctibus intumesceret, calceum indu-
 xit e sparto; sinistrum utique nudum
 relinquere, & capite item nudo pror-
 sus decrevit incedere. Sed quia non
 ignorabat plurimos pallio tenus esse
 Philosophos, vestemque facilius mul-
 to mutari quam mentem; omni ope

B

sibi

sibi enitendum existimavit, ut illa exterioris amictus insignia ad intimos animi sensus occulta quadam affinitate pertingerent: quumque accepisset in more positum olim fuisse, ut nobiles equites antequam in ordines referrentur, in sacris ædibus noctem unam armati excubarent (quod in Hispania pervigilium armorum appellant) militarem illum ritum ad rudimenta Christianæ perfectionis in semetipso transferre constituit. Igitur gladio, ac pugione, quibus antea mundo meruerat, e tholo suspensis, novo instructus armorum genere, totam eam noctem pervigil ante aram sanctissimæ Virginis modo stans, modo nixus genibus, præteritorum veniam demisse precari, divino cultui devovere sese, ac Beatam præcipue Dei Matrem intenta supplicatione propitiare non destitit. Atque hunc in modum Christianæ militiæ nomen ex animo dedit IGNATIUS anno post Christum natū M.D.XXII. quo ferme ipso tempore, ut a multis non sine admiratione quidem animadversum est, Martinus Luther infamis hæresiarcha, magnis in Germania motibus excitatis, jussus a Carolo quin-

quinto Imperatore adesse Vormatiæ, male pressum ad eam diem virus opinionum suarum effudit in illo conventu palam, sedique Apostolicæ, & Catholicæ veritati nefarium atque impium bellum temulentus indixit: ut satis appareat, quum maxime furiam illam contra omnia divina, & humana jura, legesque sacratas obarmaret Satanas; tum ex altera parte, præter alia militantis Ecclesiæ robora, novum etiam hunc ducem excitatum divinæ providentiæ nutu, quem CHRISTUS Imperator, & ipsum, & sectatores ipsius, obligatos religionis arctissimæ sacramento, adactosque nominatim in verba Romani Pontificis, furori, ac libidini hæreticæ pravitatis opponeret.

*Ardores ejusdem in studio
pœnitentiæ. Cap. V.*

SAcra igitur vigilia, quemadmodum dicebamus, exacta, quo celebritatem hominum, famamque sanctitatis vitaret IGNATIUS, nondum certa luce, relicto monachis jumento, pedes ipse, obvoluto etiam tum fasciis altero crure claudicans, per

summum laborem a Monte ferrato
 discessit, & e via militari paullo post
 deflexit primum ad deserta in vicino
 loca, dein ad oppidum Barcinonensis
 agri Minoreffam (hodie Manresam
 vulgus appellat) novem fere milli-
 bus passuum a Monte ferrato: ubi an-
 tequam longinquæ, & periculosæ pe-
 regrinationi Hierosolymitanæ sese
 committeret, sæviente præsertim
 Barcinone per id tempus pestilentia,
 devio, & obscuro loco aliquandiu
 delitescere, & humilitatis Christia-
 næ, quæ cæterarum est parens cu-
 stosque virtutum, solida jacere fun-
 damenta decreverat. Interea mendi-
 cus ille, quem IGNATIUS pridie
 suis vestimentis induerat, quum ex in-
 solito ornatu in furti suspicionem ve-
 nisset, illico a loci magistratibus com-
 prehenditur, & divinam humanam-
 que frustra implorans fidem in vincula
 conjicitur. Quumque inter quæstio-
 nem ea sibi a viro quodam nobili clam
 donata jurejurando affirmaret, no-
 tasque corporis, ignarus nominis,
 ederet; conquiritur extemplo dili-
 genter IGNATIUS. Quum nusquam
 appareret, mittitur ad eum insequen-
 dum festine viator; qui ægre proceden-

dentem facile consecutus, quærit ex eo num cui quidpiam in Monte serrato donaverit. Ad eam vocem, id, quod erat, suspicatus IGNATIUS, substitit; coactusque innocentis periculo, pauperi cuidam vestimenta sese pridie largitum esse confessus est: quumque viator porro instaret, quis tu, aut cujas? nullum omnino ad ea verbum IGNATIUS reddidit; sed itinere cœpto perrexit tacitus, casum infantis apud se miserans, ac semetipsum incusans, qui ne benefacere quidem sine ipsius, cui benefaceret, damno, vel certe discrimine, didicisset. Ut igitur Minoressam accessit, oppidum ingressus quo dicebamus amictu, ad publicum infimæ plebis hospitium precario sese contulit: ibique sanctæ paupertatis, ac penitentiae studio, inter egentes ac sordidos, quam exsequemur vitam, exorsus est. Victum ostiatim precibus infimis emendicare quotidie; totam hebdomadam, excepto die Dominico, jejunare; in ipso cibatu simplici pane contentus, atque ubi sitis urgeret, aqua profluente; somni parcissimus humo nuda cubare; auctoque supplicio, singulis diebus ter sese flagellis quam

acerrime cædere. Ad hæc horas quotidie septenas genibus nixus in oratione vocali persistere; nam ejus, quæ mentalis dicitur, usum, & consuetudinem adhuc ignorabat. Præterea sacrificio matutino, Vesperarum, & Completorii officiis attentissima cura semper intererat. Obibat etiam octavo quoque die sacra Confessionis, & Eucharistiæ mysteria. Et quoniam superioribus annis (ut diximus) & humanæ laudis famæque appetentior, & munditiarum, ornatusque fuerat studiosior; ut vitium utriusque diligentia pari neglectu rependeret, natalium suorum generisque splendorem, nequis illi honos haberetur, studiose celare, & capillum, quem pro ejus seculi more promissum impensius comere, curareque consueverat, relinquere cœpit impexum, & squalidum: quin etiam ungues ipsos excrecere per diuturnam incuriam pati: atque in hoc tam aspero, tamque horrido vitæ instituto, constanter id omne refugere, quod ullam posset afflictæ carni delectationem aut levamen afferre. Itaque quum esset decoro vultu, & egregia totius corporis firmitate; detractis paullatim viri-

viribus, omnis ille vigor accerrimi bellatoris, & forma viridis juventæ prorsus elanguit.

Molestia scrupulorum, & tentationes ejusdem. Cap. VI.

EJusmodi vitæ cursum aliquandiu secutus IGNATIUS magno animi fructu sine ulla offensione tenuerat, nondum graviora prælia, & occultas dæmonum artes expertus, quibus incauta mens hominum ad præclara tendentium, si præsertim suis viribus ipsi confidant, facile in fraudem inducitur: quum repente quædam illi objicitur species, cujus, quamvis identidem apparentis, formam & figuram satis explicare non posset, multis distincta luminibus, & grato quodam splendore collucens, quod spectrum diabolicum postea, ut dicemus, agnovit: iisdemque fere diebus cum se illuvie, & squalore oblitum animadverteret, atrox illa cogitatio nec opinantem invasit: Quæ, malum, ratio te, miser, impulit, ut, relicta patria, cognatis amicisque potentibus, pedore, ac dira macie deformatus, tristissimo & obsoletissimo vestitu, vel

stipem in triviis corrogares, vel inter infimas plebis minutæ quisquiliis lateres inglorius? nonne intermissa militiæ honoratæ stipendia, dulcissimosque æqualium convictus, & pristinæ fortunæ cultum victumque, majore cum tua tuique sanguinis dignitate repeteres? Hæc, & alia id genus ubi animo vehementer objecta; auctorem sensit IGNATIUS illico: & quamvis initio paullisper ea recordatione commotus, tamen ut se collegit, illam ita constanter ab se rejecit, ac repulit, ut ultro etiam familiarius quam antea, sese cœtibus atque colloquiis egentium & mendicorum infereret. Qua submissione victus princeps auctorque superbiæ, rursus IGNATIO templum ingredienti ad officia divina celebranda, quibus mira cum attentione, ac perseverantia quotidie dabat operam, ut diximus; incepti operis molem, ac difficultatem ita repræsentavit, quasi ejus ærumnas, & incommoda miserans diceret: hem infelix IGNATI, annis utique septuaginta, quot ætas tua recipit, in tantis tibi laboribus, in tanta vitæ asperitate degendum est: quos tu, præsertim urgente senio,

nio, tolerare qui poteris? Tum ille fortiter, nec sine contemptu: Quasi vero, inquit, mihi tu vel unius diei spatium præstare possis. Hæc duo prima post conversionem **IGNATIUS** de summa rerum certamina subiit: quorum utroque turpiter superatus humani generis hostis, ubi se irruptione, & aperta vi nihil proficere intelligit, longe diversa bellandi ratione, dolo, cuniculisque grassari constituit. Neque abnuit **CHRISTUS**, pugnarum ejusmodi justissimus arbiter, qui ut neminem supra id quod potest, oppugnari permittit, sic militibus suis, quos gratiæ divinæ præsidio, & liberæ voluntatis arbitrio ad omnem virtutem exercet, ne, parta semel victoria, per otium torpeant, novam in dies gloriosi triumphi materiam deesse non patitur. Est igitur in dæmonis artibus, quas ad bonorum perniciem assidue meditatur, illa vel pessima; ut quos ita videt studio virtutis, ac religionis addictos, ut inde terrestrium vel bonorum spe, vel commodorum, & voluptatum illecebris avelli non possint; hos per speciem ipsiusmet honesti, quod adamarunt, ad immoderatam in ediam, & carnis ma-

cerationem acrioribus incitamentis impellat, eisdemque præteriti temporis piacula reputantes, ac cœlestis iræ servili metuperculosos, in singula momenta misero quodam angore sollicitet. Id autem eo consilio, ut vel plane defecti viribus, per causam recuperandæ valetudinis paulatim ad concordiam atque ad ignaviam delabantur; vel assidua scrupulorum agitati molestia, dum seipsum calumniari non desinunt, si minus inertia, certe defatigatione, ac lassitudine ab incepto desistant. Cujus utriusque cladis utinam ne tam multa nobis quotidie exempla suppeterent. Hæc igitur eadem fraus IGNATIUM quoque in discrimen adduxit. Obtinuerat ille (quemadmodum dicebamus) ex quo sese ad CHRISTUM adjunxit, in summa vitæ austeritate perpetuam animi tranquillitatem atque lætitiā: quam ne ex quotidiana copia vilem duceret, neu suis ipse meritis per insolentiam adscriberet; ab iis, quas diximus, tentationibus cœpit illi Pater cœlestis universam repente subtrahere, sic, ut interdum quum maxime gaudens exultaret in Domino, tunc subito nulla præcedente significatione, pror-

prorsus exui nudarique se omni gaudio, & jucunditate sentiret: nec jam in precibus, neque in psalmis, neque in cæteris, quibus assueverat, pietatis officiis ullam inveniret omnino delectationem aut requiem. Idque quum ei frequenter accideret, attonitus rei novitate, animo suspenso, ac mire sollicito, causas ejus varietatis, & immutationis inquirere, ac dubitare apud se, rectene confessionem in Monte ferrato, quam diximus, peregisset? quidquamne omisisset, quod ad integram criminum accusationem attineret? ac proinde num idcirco fortasse Deum adhuc iratum experiretur? Quæ ille dum anxius agit, arrepta occasione diabolus perturbandi hominis, deque suo statu dejiciendi, hanc ipsam suspicionem atque formidinem institit incutere. Ex eo tempore tyro vanis agitari terroribus, dies noctesque fletibus jungere, nullam capere partem quietis. Itaque dum amissam recuperare conscientiae pacem, & hærentem visceribus pestem omni ratione conatur evellere; non satis habuit peccata vetera, quorum de confessione ambigebat, iterum, ite-

rumque apud sacerdotem exponere; sed etiam cujusdam concionatoris monitu, qui Minorellæ per eos dies agebat, totius vitæ noxas, quotquot revocare in memoriam potuit, in libellum relatas, quod ad Montem feratum antea fecerat, quam accuratissime rursus explicuit. Sed (quod sæpe contingit) quod sibi adjumento fore putabat, id erat ei contrarium maxime. Siquidem ipsa commemoratione rerum, quas aliquando oblivisci oportuerat, fiebat ut etiam si quid ipsa die mitigatum fuerat, recrudesceret. Nec jam tantummodo superiorum annorum delicta occupatum animum amarissima superstitione torquebant, sed etiam præsentis temporis cura, pavorque ne invisæ **CHRISTO** sua essent studia, neu Dominum suis omnibus dictis, factis cogitatis offenderet. Quocirca multis jam rebus frustra tentatis, unum duntaxat occurrebat illi remedium, nec sane spernendum, ut sacerdos pro potestate omnino sibi posthac ejusmodi suspicionibus, ac recordationibus interdiceret. Sed id ipsum consilii ad eum deferre non audebat, perversa videlicet ratiocinatione delusus, ac
veri-

veritus ne sibi minus ea medicina prodesset, cujus auctor ipsemet extitisset. Inter has ergo curas, gravi pressus moestitia quum ita jaceret, ut nulla jam res mitigare dolorem posse videretur; invasit hominem atrox, & sæva cogitatio, uti ad luctus miseriaeque finiendas, e fenestra cubiculi (Dominicanorum hospitio tum forte utebatur) semetipsum præcipitem daret. Quam ille cogitationem ope divina quum acerrime repulisset, subiit animum firmitas, & constantia cujusdam anachoretæ, quem in Patrum historia legerat, impetrandi gratia nescio quid, quod vehementer optaret, omni cibo tandiu abstinuisse, quoad per eam abstinentiam propitiato numine, voti compositus existeret. Et quanquam periculosa admodum ea ratio videbatur, metusque suberat, ne tam audaci incepto Deum irritaret potius, quam reconciliaret sibi; tamen tota re apud se diu multumque agitata, ne quid omnino intentatum relinqueret, illum ipsum rigorem perseverantis inediae sine ulla dubitatione experiri constituit, atque ita experiri, ut nihil interea de quotidiana precatione, verberibus, & cætera corporis.

ris maceratione remitteret. Dies igitur unus, duo, tres, quatuor, nec tamen aut linqui animo, aut molestia liberari. Itaque ad septimum usque diem obfirmata mente jejunium extendit, extendissetque porro, ni sacerdos idem, cui sua non modo vitia, sed etiam bona, & intimos omnes animi recessus ac latebras divino quodam instinctu nudas, & apertas habebat; pro imperio vetuisset eum longius progredi, minis insuper additis, ni paruisset, illum a sacra corporis CHRISTI communione prohibendi. Hac igitur tam severa denunciatione deterritus, cibum sumfit IGNATIUS, & illo quidem ac postero die fuit illi quies: tertio vero eadem illa peccata rursus occurfare memoriæ. Quarum cogitationum initia dum admittit incautius, ac species (ut fit) speciem adducit, sensim in pristinos fluctus, æstusque sollicitudinum revolutus, quum ex una parte prorsus instaurandum confessionis mysterium judicaret, ex altera vero id sibi non modo non profuisse, verum etiam nocuisse antea cerneret; ex vehementi fluctuatione tam grave tædium præsentis miseriæ mentem ejus

ejus invasit, non quidem ut de morte oppetenda, sed ut de abjicienda severiore disciplina, & seculi commodis repetendis magno quodam impetu cogitaverit. Verum in tantis tenebris, ac procellis nutanti, & in magnum adducto periculum peropportune tunc radius divinæ bonitatis affulsit; cujus beneficio diabolica discussa caligine, totius tentationis exordia progressusque attente considerans, liquido comperit omnes illos conscientiae stimulos, vanasque suspiciones a malo spiritu fraudulenter immissas: ac proinde sine ulla dubitatione constituit præteritæ vitæ labes, quod ad confessionem attineret, perpetua oblivione conterere. Atque in hunc modum singulari Dei beneficio, non modo infelicem illam sui calumniandi miseriam, ac poenam evasit ipse, verum etiam alios curandi, qui eadem ægritudine laborarent, miram a patre luminum facultatem, & scientiam est consecutus.

Ignatii profectus in spiritu.

Cap. VII.

HISCE igitur periculis perfunctus
IGNATIUS, ac veluti avulsus
 ab

ab ubere, majores quotidie efficiebat in solida virtute processus. Et quo acrior ac diuturnior probatio fuerat, eo magis idoneus evasit ad nova omnipotentis Dei charismata capienda: in quibus fuit illud eximium. Quum enim religionis causa ædem Paulli Apostoli extra oppidum peteret, & in ipso itinere ad Rubricatum amnem, qui Minoressam interfluit, constitisset; nec opinanti repente divina quædam oborta lux est tanta, tamque mirifica, ut momento pene temporis, nullo magistro, quamplurima clare perspexerit non solum de fidei Christianæ mysteriis, verum etiam de aliis vel subtilissimis Philosophorum quæstionibus, atque decretis: quasi nitidissimo quodam in speculo perspicue cerneret ea, quæ post multam, accuratamque lectionem, maximosque labores ac vigilias, vix demum solent homines intelligentia comprehendere: atque in eo cœlesti prorsus intuitu non sine summa animi voluptate diutius acquievit. Quo tanto, tamque insigni accepto beneficio, quum ad agendas Dominogratias accessisset ad Crucem in propinquo defixam; oranti sese denuo in
aere

aere spectrum illud objecit, de quo diximus antea, sed (quæ nimirum virtus, ac potestas est Crucis) nequaquam pari splendore, vel pulchritudine. Itaque, quod suspicatus pridem **IGNATIUS** fuerat, tum denique clare perspexit esse dæmonium: eodemque deinde sæpius apparente, tantum abest ut moveretur, ut illud etiam baculo per contemptum abigeret. Atque ejus fere generis per id tempus plane divinitus alia multa percepit. Quodam die, dum indicta publica supplicatione, Minoressæ religiosum agmen instruitur, & **IGNATIUS** interim Beatissimæ Virgini psallit insistens gradibus templi Dominici; subito in Deum ita rapta mens ejus est, quasi per apposita quædam, & maxime illustria symbola Trinitatis ipsius Numen augustissimum cerne-retur distinctum personis, unum essentia. Qua visione tanto gaudio est delibutus, ut neque in ipso mox agmine lacrymis & singultui crebro temperare valuerit; neque vero totum eum diem alia ulla de re, nisi de sanctissimo illo fidei Christianæ mysterio disputare: idque tanta simi-lium & exemplorum varietate & copia,

copia, ut cuncti obstupefcerent. Quin etiam per eos ipsos dies non dubitavit homo literarum propemodum ignarus, librum de Trinitate conscribere quoquo potuit stylo: usque adeo cœlestes typi, quos diximus, in ejus memoria, atque intelligentia divinas illas rerum altissimarum notiones impresserant. Ac licet antea quoque & monadem in triade, & in monade triadem sanctissime coleret, suasque, & naturæ divinæ communiter, & separatim singulis personis preces, hymnosque persolveret; ab hoc tamen raptu longe studiosior, & ardentior evasit in eodem officio pietatis, eamque laudabilem consuetudinem ad extremum usque vitæ retinuit, sic, ut præcipuam caperet voluptatem, & proprio quodam sensu rerum cœlestium afficeretur, quotiescunque Sanctissimæ Trinitati sacra perageret. Neque vero fuit hic finis mirabilium visionum: siquidem rursus per significationes arcanas, & mystica quædam exempla oblatus est ejus menti modus ipse, quem in hujus universitatis molitione summus ille rerum opifex tenuit: quas illustrationes atque doctrinas, ut omnino
vires

vires naturales excedunt, sic postea negabat IGNATIUS posse verbis adumbrari, nedum exprimi. Præterea quum sacrificio Missæ in eodem templo Dominicano interesset, dum a Sacerdote de more hostia salutaris attollitur, apertissime vidit IGNATIUS illa specie CHRISTUM Deum eundem & hominem verissime contineri. Factum est etiam aliquando (idque ipsimet, qui interfuere, testati sunt) ut alienatus a sensibus, a Completorio Sabbati ad alterum usque proximi Sabbati Completorium in altissimo quodam excessu perstiterit: qua ipsa hora, multis adstantibus, qui rei totius eventum attente expectabant, quasi e profundo somno excitatus, repente sustulit oculos, IESUM perquam suaviter invocans. Atque interim piū quidam homines mortuum rati, utique terræ mandassent, nisi contemplati omnia diligentius, ac per tentato corpore, latentem in eo vitam ex tenui cordis palpitatione sensissent. Ad hæc intento precationi, sese non semel tum CHRISTUS Dominus, tum Virgo Mater ostendit. Quibus, & aliis id genus clementiæ divinæ subsidiis in recta fide usque

usque adeo confirmatus est, ut etiam si nulla exstitissent Christianæ religionis monumenta, vel testimonia, nequaquam tamen dubitasset, ex iis tantummodo, quæ Deo sibi aperiente cognoverat, mortem pro defensione catholicæ veritatis oppetere. Et qui paullo ante vix vocalis nosset orationis usum, paucis mensibus tantam rerum spiritualium peritiam, ac tantam Dei familiaritatem est nactus, ut quidam, ejus omnia, vel dicta, vel facta, curiose observantes, intempesta nocte supplicantem animadvertierint (elevante spiritu sarcinam corporis) quatuor circiter cubitis à terra sublimem: & quidem ex consortio sermonis Domini (quod de Moyse scriptum legimus) tota facie mirum in modum radiante.

*De studio, collato ad proximos
adjuvandos. Cap. VIII.*

QUÆ omnia, quanquam egregia, atque expetenda per se; tamen eo pluris erant in IGNATIO facienda, quo magis erant cum aliorum fructu, & utilitate conjuncta. Nam in cæteris ornamentis, ac beneficiis,

ficiis, quæ in eum Deus plena manu congeffit, illud equidem vel præcipuum duxerim, quod in tanto perfectionis ardore non dedit illi spiritum solitudinis, animumve uni sibi vacantem, sed Christianæ propagandæ fidei cupidissimum, ac mire studiosum divinæ gloriæ, salutisque communis. Quum igitur acta ejus in Monte ferrato (quânquam ea ipse occultissima voluerat esse) institutamque vitæ asperitatem, ac sanctimoniam vicinis locis fama vulgaret, ac nobilitatem viri præcipue, rumor (ut fit) etiam in majus attolleret; ingens hominum concursus ad eum fieri cœptus, partim visendi gratia, partim etiam consulendi: quos ille ut omni conatu quamacerrime ad CHRISTUM adjungeret, neu squalor ille nimius, & diutina illuvies ad se adeuntibus terrorem incuteret, primum deponere fordes, & externum corporis habitum cœpit aliqua ex parte componere; deinde quum intelligeret difficilem in primis, & ancipitem esse curationem animorum; quo cautius, rectiusque in re tanta procederet, ope divina suppliciter etiam atque etiam implorata, suæ

suæ conversionis originem, ac seriem, variasque tentationum procellas ac tenebras, & subsecutam mox tranquillitatem ac lucem quam accuratissime secum expendens: demum ex iis, quæ partim cœlesti Magistro dictante perceperat, partim etiam ipsemet experiendo cognorat, de fructuosa ratione meditandi, orandique, præclaras observationes, & saluberrima præcepta conscripsit. Qui liber, ut antea dictum est, Exercitiorum spiritualium titulo, tempore procedente deinceps ab eodem auctus, atque recognitus, & Romani Pontificis iudicio, ac testimonio comprobatus, ita multos omnis ætatis, atque ordinis homines, tum in eligendo genere vitæ, tum in componendis moribus, perturbationibusque sedandis, ac præsertim in retinenda constantia salutari, mirum in modum juit, juvatque quotidie: ut jure optimo videatur hoc non in postremis numerandum esse remediis, quæ divina bonitas hac hominum ætate, vel ad corrigenda sæculi vitia, vel ad renovandam veterem Ecclesiæ disciplinam clementer adhibuit. His ergo meditationibus, quos ad bonam perfectæ

fectæ virtutis frugem IGNATIUS reperiebat idoneos, paullatim, & quasi per gradus cœpit excolere : cæteros interim precibus monitisque, prout sese dabat occasio, a vitiorum fœditate deterrens, atque ad studium æternæ beatitudinis incitans : idque eo libentius, atque securius, quod communicandis iis, quæ a Domino acceperat, nihil interim sibi religionis, ac spiritus deperire sentiret. Nec solum venientes ad se benigno excipiebat alloquio ; sed etiam invitatus interdum ab aliis ad prandium, minime recusabat accedere : nimirum eo consilio, ut ex re, & ex tempore sumpta occasione, qui se in Dei gratiam terrestri pavissent cibo ; eosdem ipse vicissim spiritualibus epulis, & opportuna quapiam adhortatione reficeret. Atque in hunc fere modum, adjuvante Domino, permultos ad arctam salutis semitam, a via lata & spatiosa traduxit.

E gravi morbo periclitatur.

Cap. IX.

SEd in ejusmodi curam dum incumbit ardentius, nec tamen interea
fere

fere quidquam de assiduitate precandi, ac de quotidiana vitæ asperitate diminuit, morbum ex ingenti labore contraxit adeo periculofum, & gravem, ut sæviente atrociter febris proxime ad mortem accesserit. Quo tempore & oppidi magistratus periculo viri permoti, publice diverforium illi curarunt necessariis rebus instructum; & præter aliam amicorum turbam, honestæ matronæ, quæ vitandæ pestilentiae causa Barcinone sese eo receperant, certatim ægrotanti assidere, & nocturnas agere excubias, perinde quasi in unius vita salus omnium verteretur. Atque his populi officiis, ac pia sedulitate bonorum ereptus e præsentis vitæ discrimine, in id ipsam iterum ac tertio recidit ob eam causam, quod nondum plane confirmatis viribus (blandimenta videlicet carnis, & veteris hominis malitiam veritus) præpropere festinatione ad pristinas occupationes corporis animique redierat: quarum pondere oppressus, denique didicit ipse, aliisque deinde præcipere solitus est, imbecilla valetudine minuendos labores, curandumque tali tempore, ut quantum de consuetis exercitationibus

nibus infirmitas demat, tantum ad Dei gloriam, & proximorum ædificationem æquitas animi, & exemplum Christianæ fortitudinis addat. Vexabat idem etiam corpus debito somno ciboque fraudari, multis eo tempore doctus experimentis, ut moderata sobrietate vegetatur animus, sic immoderata vigilia vel inedia vires adeo frangi ac debilitari, ut mens, earum ministerio destituta, vix munere suo fungi, aut ad contemplationem rerum divinarum possit exsurgere. Vexatus igitur, ut dicebamus, diuturna, & periculosa ægrotatione demum ita convaluit, ut ex reliquiis morbi dolore stomachi molestissimo subinde cruciaretur: quapropter calceos induere, & panni crassioris tunica cinerea, & capitis tegumento contra sævitiam hyemis munire sese piorum hominum benignitate, precibusque coactus est.

De inanis gloriæ vitio superato.

Cap. X.

Accessit ad illa corporis ægrotantis incommoda gravis etiam animi cruciatus, ab importuna quadam

dam inanis gloriæ tentatione profectus. Dum enim, ingravescente morbo, conscientiam suam diligentius excutit, seq; ad extremum comparat mortis agonem; subiit illi repente se iustum esse, neque ullo pacto sibi de sempiterna beatitudine dubitandum. Cui suasioni dum resistere vi summa conatur, intelligens, ut quisque sibi maxime placet, ita Deo maxime displicere; diuturnum, & anceps intra sese certamen tanta tentatione, metuque sustinuit, ut miris modis quotidie torqueretur, maioremque ex offensionis divinæ formidine, quam ex ipsa grassantis morbi vehementia metum, ac sollicitudinem caperet. Versabat videlicet in omnes partes hominis animum dæmon callidus, CHRISTI permissu: & quem desperationis jaculis paullo ante superare nequiverat, eundem rursus nimis confidentiæ, ac vanitatis elatione supplantare, & evertere nitebatur. Sed contra ejusmodi cogitationes IGNATIUS & in ipso (ut diximus) morbo, & recuperata postmodum valetudine, quum diutius dimicaret; partim agendis identidem Domino gratiis, partim naturæ humanæ fragilitatem

tatem apud se reputando, denique divino præsidio detestabile hoc ingrati animi vitium ita debellavit, evulsi-
fitque radicitus, ut postea quotiescun-
que salus animarum, aut Dei gloria
postularet; sua non minus bona, quam
mala sine ulla prorsus cenodoxia ti-
tillatione palam, & ingenue expo-
meret.

De professione Hierosolymitana.
Cap. XI.

INTER hæc anni fere spatio exacto,
partim spiritualium rerum scientia
instructus, partim etiam arte qua-
dam, & consuetudine regularum
animarum imbutus, quum nihil vul-
gare, aut exiguum agigaret animo,
sed egregia quædam, & ardua in Dei
gloriam ab ipso conversionis initio
concepisset; Hierosolyman, quod
jandudum habebat in votis, pete-
re omnino constituit: non tam ut
CHRISTI Domini sacratissima in-
cunabula cerneret (tamen si id ipsum
vehementer optabat) quam ut in
convertendis ad Evangelii lucem infi-
delibus, qui ea tenent loca, vel operæ
C 2 pre-

pretium faceret, vel certe martyrii palmam, cujus avidissimus erat, acquireret. Sed hoc suum de prædicando Evangelio consilium, vitandæ scilicet humanæ laudis causa, nemini prorsus aperiebat: peregrinationis vero propositum quum necessario amicis patefecisset, multi primum id ei multis rationibus dissuadere, obtestari etiam, & orare ne populum ab se nuper e somno vitiorum excitatum ad studia virtutis pietatisque, repente desereret, neu se ipse, affecta præsertim valetudine, itineri tam longinquo, ac tam periculoso committeret. Deinde quum nec precibus, nec suasionibus eum de sententia demovere possent, instare saltem, & urgere, ne in comitatus abiret: multa posse in tam remotis, ignotisque sibi regionibus, ac tantarum rerum humanarum varietate contingere, quæ præsentem cujuscumque fidelis opem, solatiumque requirerent. Omnino probabilia videbantur afferre, & humano judicio rem æstimantibus etiam necessaria: nec vero deerant homines impigri, peritique linguarum, qui sese illi comites laboris, ac periculorum libenter offerrent. Verum IGNATIUS, quæ erat animi
alti-

altitudine, in cœlum semper intentus, atque a divina providentia usquequaque pendere mirabiliter cupiens, amicis omnia sua in eum studia profitentibus ita remisit, ut diceret, in præcipuis hominis Christiani virtutibus non modo fidem & charitatem esse, verum etiam spem. Ejus porro comparandæ gratia certum sibi esse non modo sine viatico, sed etiam sine comite iter id ingredi: quod clare perspiceret, si, qualia multa possunt homini accidere, peregrinanti præsertim, sibi quidpiam evenisset, fieri non posse, quin aliqua saltem ex parte comitis præsidio, fideique confideret: proinde quidquid in eo spei locasset, id utique ex ea detractum iri fiducia, quam totam in uno Deo clementissimo Parente, ac Rectore vellet esse repositam.

Navigat in Italiam.

Cap. XII.

HAC igitur mente sub initium anni M.D.XXIII. magno omnium dolore Minoressa profectus, venit Barcinonem, ut in Italiam ex eo

loco trajiceret. Quumque peropportune paratam ibi navem offendisset, egit cum navarcho suppliciter, ut se mendicum egentemque gratis admittere, ac transportare ne gravaretur. Cui naulum quidem ille se remissurum promisit; ea tamen conditione, ut nautici saltem panis, quod erat necessarium, secum inferret. Eo responso quum vehementer angeretur **IGNATIUS**, quod commeatus copiam, quamvis exiguam, cerneret inopiæ illius, quam sibi summam proposuerat, legibus adversari; post multas, anxiasque cogitationes totam rem denique permittere statuit arbitrio sacerdotis, quem sibi paucis illis diebus **Barcino** tum suæ conscientiae judicem, tum interpretem divinæ voluntatis elegerat. Ille, recognita, **IGNATIO** respondit, æqua postulare navarchum, proinde non resistendum esse: nec vero timendum, ne, si cibaria, tam vilia præsertim, ac necessaria, sibi paraverit, quidquam idcirco contra consilium perfectæ paupertatis admittat. Tum **IGNATIUS**, quamquam soluto vix dum religione animo, tamen partim sacerdotis impulsu, partim etiam metu occasionis ejus
amit-

amittendæ, emendicata de more pecunia, panes in navem imposuit, & ne quid præterea secum interret, paucos, qui superfuerant, nummos reliquit in ipso litore: deinde solutis anchoris, die quinta Cajetam non minus periculosa, quam celeri navigatione delatus, Romam pedibus iter intendit: ac prima nocte divertit ad villam militibus refertam; quibus nefaria quædam ac turpia molientibus tanto animi ardore, ac vociferatione se objecit, ut illi partim verborum pondere, partim constantiæ miraculo obstupefacti, a flagitioso conatu destiterint. Inde laboribus maximis, quum, sæviente per eos dies pestilentia, luridus ipse ac macilentus, tectis fere atque oppidis arceretur; denique in urbem Romam haud ita acriter custoditam, lassitudine ac fame pene confectus, introiit ipso dominico die Palmarum: quumque venerabundus religiosissima quæque loca obiisset, Hadriani VI. Pontificis Maximi pedes exosculatur. Mox paranti Venetias ire, ut in Palæstinam inde transmitteret; rursus Hispani amici nonnulli, qui Romæ eo ipso tempore versabantur; profecto-

tionem dissuadere, quum aliis rationibus, tum præcipue navigationis longæ, & infestæ periculis proponendis: quippe quum paullo ante per summum nominis Christiani æque damnum, ac dedecus, Turca Rhodum insulam expugnasset, quo nuntio videlicet omnis Italia cohorruerat. Sed quum IGNATIUS ab instituta peregrinatione nullo terrore posset abduci; illud saltem hortari, & orare institerunt, ne se daret in iter ejusmodi sine pecunia, tum in alios usus necessaria, tum utique ad naulum pro transmissione solvendum. Nam, ut Venetias emendicato victu pervenisset, quæ deinde ratio, quæ spes homini externo, & ignoto foret in tam remotas regiones trajetum nanciscendi gratuitum? proinde recte, amiceque suadentibus ne resisteret, juvarique se in CHRISTI gratiam aliquo saltem viatico pateretur. Quum hæc, & alia ejusmodi asseverantes pariter, ac miserantes ingererent; sæpius eadem iterando, cunctantem, ac tergiversantem denique perpulerunt, ut in ipso discessu aureos aliquot nummos acciperet. Quo ille subsidio oneratus verius quam instru-

structus, non multum processerat
 viæ, quum rem totam attente con-
 templans, seque ipse accusans gravi-
 ter, quod de fiducia divina humano
 metu se dejici, fixumque paupertatis
 propositum oblato auro passus esset
 infringi; parum absuit quin omnem
 pecuniam illico indignabundus abji-
 ceret: sed quia id prodigum, ac Deo
 ingratum fore videbatur, decrevit
 certe in obvios pauperes paullatim in-
 sumere. Quod quum alacriter præsti-
 titisset, brevi & nummis omnibus
 vacuus, & stimulis conscientiae liber
 evasit. Pergentem porro Venetias
 eadem, quæ supra memoravimus,
 incommoda, & difficultates itinere
 pene toto vexarunt. Sæviebat etiam
 tum locis aliquot fœda lues, atque
 contagio; dispositique custodes aditus
 oppidorum assidue tuebantur. IGNA-
 TIUM vero ex ipso corporis habitu
 vel in summa cœli temperie metuîs-
 se. Obsita erat squalore vestis, &
 horrida, color exsanguis, cavum ma-
 cie caput, conditi introrsum oculi,
 & inanes faucium sinus. Quocirca
 fiebat, non solum ut exclusus a di-
 versoriis omnibus, pernoctare sæpe
 cogeretur in publico, sed etiam ut

pallore & macie peremtum, rigentemque prætereuntes aliquando nonnulli, ceu monstrum quoddam, aut triste simulacrum, horrerent. Ipse vero linguæ imperitus, ignarus itinerum, quum præ defatigatione sæpe deficeret; ad Fossam tamen Clodiam, Deo adjuvante, pervenit, quo ex emporio brevis, & quotidianus Venetias trajectus est. Ibi certior factus a viatoribus, observari Venetiis omnia diligentissime, & e suspectis præsertim regionibus venientes accessu prohiberi; flexit inde itinere terrestri Patavium, quorundam consilium secutus, qui idipsum periculi metuentes, faciliorem sibi ex ea urbe Venetias transitum fore sperabant. Idemque IGNATIUM adjunctum sibi comitem, præ imbecillitate haud ita æquantem gradus, in campis circumpadanis repente destituunt, unius ope CHRISTI subnixum: qui sane pro sua infinita clementia laboranti servulo in tanta solitudine minime defuit, sed proxima nocte sese illi, quemadmodum antea sæpe fecerat, visendum obtulit: recreatumque mirifice, intra ipsa Patavina moenia **primum**, deinde Venetias sine ullo

erro-

errore, aut difficultate perduxit. Nemo quippe ex Patavinis custodibus ad portas, nemo ex Venetis exploratoribus ad insulas frequentiores appropinquantem (quum navim ingressi de more singulos vectores diligenter excuterent) IGNATIUM nulla munitum valetudinis tessera, ne appellavit quidem; mirantibus, cognita postmodum re, Clodianis desertoribus illis; quibus per adulterata videlicet symbola introitus in urbem utramque non sine magna vel sollicitudine, vel contentione patuerat. Venetiarum urbis, in recessu intimo sinus Hadriatici, ea regio, ac situs est, ut leniter stagnantes ex alto aquæ, illam ex omni parte circumluant. Ea inclytæ urbi & ad merces, copiasque invehendas opportuna receptacula, & contra hostiles incurfus, munimenta firmissima sunt. Ex iis porro æstuariis majores minoresque euripi totam urbem interkursantes, variis mæandris, ac flexibus ita distinguunt, ut, quot in partes pedibus, in totidem fere mari aditus sit: egregio sane vel artis, vel naturæ miraculo. Inde vicorum, insularum, ac pontium ingens numerus: ut, qui

diutius ibi versati non sunt, viarum, locorumque imo varietate, modo similitudine sæpe fallantur. Sed contra ejusmodi ambages certum, paratunque remedium est maxima multitudo cymbarum, quæ usquequaque dispersæ, nominatim ad omnia & publica & privata loca quemlibet haud ita magna mercede trajiciant. IGNATIUS navi Patavina ex iis, quæ per Medoacum flumen assidue commeant, in area Marciana sub noctem expositus, quum neque vias ad publica xenodochia nosset, nec portitori conducendo suppeterent nummi; assuetus longo jam usu male cubare, sub porticu Procuratoria, quam appellant, intendentibus jam se tenebris, vacuum opificis cujusdam fulcrum elegit, in quo fessos artus utcunque reficeret. Tenet fama, literisque multorum est memoriæ traditum, dum ille ibi noctem exigeret, vicinum Senatorem M. Antonium Trivisanum (quem ipsi multo deinde post, ejusdem civitatis Principem vidimus) cœlesti voce excitatum, increpitumque, quod in multa veste, mollique strato decumberet ipse, quum interim Dei famulus peregrinus non longe

ge a vestibulo illius, ædium jaceret in publico pauper, & omni humana ope, ac solatio destitutus: itaque ingenti metu, & horrore perfusum prosiliisse confestim, & quæsitum diligenter **IGNATIUM** excepisse perhonorifice. Sed ille postridie quum in amicū veterem Cantabrum incidisset, a lautiore hospitio se ad eum familiariter transtulit.

Navigat in Palestinam.

Cap. XIII.

UBI quum aliquandiu moraretur in omnem navigandi occasionem intentus; ecce tibi novæ amicorum pugnæ (quos illi ubivis brevi conciliabat cognita viri virtus, atque modestia) eum variis terroribus ab instituta peregrinatione revocare conantium; quibus ille, Deo fretus, ita resistebat, ut diceret pro certo habere se, ut cætera cuncta deficerent, vel una solummodo tabula, quo cupiebat, utique perventurum. Nec eum fefellit bonitatis divinæ fiducia. Quum enim eo anno formidine Turcarum, ut diximus, solito minor esset in Judæam peregrinantium numerus, & quotquot erant, simul omnes paullo
ante

ante solvissent; desperata jam a cæteris re, IGNATIUS repente fit certior, navem in Cyprum parari Patriocio Veneto, Prætori ejusdem insulæ designato: quumque inde non ignoraret brevem, atque facilem esse trajetum in Palæstinam; nullo adhibito deprecatore, quum tamen multi nec aspernandi suppeterent, ad Venetorum Ducem Andream Grittum adiit ipsemet, insigni non minus humanitate, quam prudentia Principem; ac Deo favente, facile ab eodem impetravit, ut gratis in Cyprum usque deveheretur. Sed interea dum prætoria ornatur navis, in febrim IGNATIUS incidit; factumque divinitus est, probandæ scilicet ejus constantiæ causa, ut quo die pharmacum hauserat, eo ipso nautæ signum profectionis ediderint. Qua re minimè conturbatus IGNATIUS, veniam petit ab hospite; qui pertinaciter ipsum etiam atque etiam retinere conatus quum nihil omnino proficeret, consulitur medicus: ille vero sine cunctatione respondet, hominem ad interitum ruere. Attamen IGNATIUS nihilo magis immutatus, & cœlestis nimirum medici ductum secutus, felici sane consilio

filio (quod tamen, admirandum potius, quam imitandum aliis duxerim) fluctuante etiam tum in stomacho portione, conscendit: factumque est Dei beneficio, ut, ora soluta, inter navigandum, ex ipsa maris agitatione tantam vim pestiferi, ac vitii humoris evomeret, ut morbo plane levatum sese celeriter senserit. Recuperata valetudine, institit suo more quoscunque poterat, factis dictisque ad virtutem & pietatem adhortari. Quumque in eadem navi per summam impudentiam committi gravia quædam flagitia comperisset; non dubitavit apertum dedecus detestari palam: & impuros illos homines tanta orationis acrimonia reprehendere, ut ii, facta cum nautis conjuratione, molestum sibi monitorem in deserta quadam insula exponere, atque ab suo conspectu & consuetudine procul amovere decreverint: quam rem odorati e vectoribus quidam Hispani, ad IGNATIUM pro amicitia detulere, suadentes etiam atque etiam, ut in loquendo cautior esset, sibi que consuleret: sed ille nihilominus turpiter peccantes objurgare perrexit, divinæ providentiæ ope subnixus: cujus bene-

beneficio factum est, ut ad insulam sceleris destinatam appropinquantes nautæ adverso repente vento rejecti, volentes nolentes IGNATIUM in Cyprum usque pervexerint: ubi quum stare ad salinas peregrinam navem, de qua supra diximus, audisset, illuc itinere terrestri se contulit; in eamque gratis admissus, nihilo plus viatici secum intulit, quam in priores intulerat, CHRISTO uno videlicet fretus: qui tota illa navigatione sese illi non semel ostendit, eumque magnopere confirmavit: ac denique incolumem ad portum Palæstinæ perduxit.

*Palæstinæ loca Sancta perlustrat.
Cap. XIV.*

INde cum cætera peregrinorum turba progressus, ut ad conspectum sacratissimæ urbis est ventum, incredibilem ex ipso illius intuitu cepit animo voluptatem: ac deinceps partim in comitatu, partim etiam solus loca illa Christi Domini, Mariæ Virginis, & Apostolorum nobilitata vestigiis, eximio quodam ani-

mi

mi fructu venerabundus haud semel obiit: modo inclyti quondam templi reliquias, modo sepulchra Prophetarum intuens: hic nascentis, & vagientis, illic docentis, & miracula patrantis Filii Dei monimenta considerans. Ubi vero ad loca ejusdem acerbissimis pœnis insignia, & morientis in cruce sanguine consecrata, atque ad defuncti sepulcrum accederet; effusus in lacrymas, humo pia oscula imprimere, immortales agere Domino gratias, incredibili quadam spiritus dulcedine & suavitate compleri. Ad hæc antiquum Beatissimæ Virginis domicilium, itemque locum instituto primum Eucharistiæ mysterio, & Sancti Spiritus adventu memorandum, & alia ejusmodi quamplurima, quæ per otium deinde reviferet; a mystagogo quam accuratissime addiscere. Erat IGNATIO iamdudum deliberatum, ut diximus, in angustiis illis Judææ sedibus pedem figere, atque ad convertendos ad Evangelii lucem infideles toto pectore incumbere: quod non reperiret, vel ubi sanctius in terris vitam degeret, vel in quo munere fructuosius operam collocaret. Neque, plurimis jam experi-

perimentis divinæ bonitati confidere, & in diem, parvoque vivere assuetum, rerum, quæ ad corpus pertinent, habebat cura ulla sollicitum. Id vero laborabat unum, fragilitatis humanæ videlicet conscius, ne spiritui quotidie deficienti, & noxarum sordes aliquas contrahenti, opportuna sacræ poenitentiae ablutio, & cœlestis panis alimenta deessent. Quam ad rem idoneum ratus ministerium Fratrum e Franciscana familia, qui loca illa religiosa tuentur, & peregrinis advenientibus præsto solent esse; adit ille ad custodem cœnobii, ac literas ei, quas ex Italia commendatitias attulerat, reddit: & quod ad conversionem infidelium attinet, nihil ei suorum consiliorum impertit; voluntatem vero suam in eisdem sedibus commorandi habitandique demonstrat: rogat proinde, uti se Fratres duntaxat recto recipiant, sibi-que Confessionis & Eucharistiæ sacramenta ministrent: se, quæ ad victum cultumque spectent, nullo prorsus eorum incommodo curaturum. Custos, partim commendatione amicorum, partim postulati moderatione permotus, bene sperare jubet

bet IGNATIUM, ita tamen, ut rem in adventum Provincialis Ministri differret, qui per eos dies in Bethleem oppido versabatur. Nec dubitavit IGNATIUS quin &que facilem Provinciale esset habiturus, atque Custodem habuerat. Itaque quum reditus jam peregrinorum instaret, literas ad amicos in Occidentem scribere aggressus est, quibus eos de suo statu faceret certiores. Quum igitur maxime scriberet, quod in posterum diem peregriniserat indicta profectio, ecce tibi a Custode nuntius, adesse Provinciale, & IGNATIUM accersere. Ad quem bonæ spei plenus quum extemplo adiisset, collaudat ille primo piam hominis voluntatem; sed re apud se diligentius deliberata, videri sibi ait satius, ut recedat: idque quum alias ob causas, tum vero quod ante id tempus nonnulli eodem studio, accensi, dum securius vagantur, a Turcis excepti, vel misere periissent, vel certe in acerbæ servitutis calamitatem incidissent; quos deinde propter officium, ac vicinitatem Franciscani Fratres non sine magno cœnobii detrimento redimere cogeantur: proinde in diem insequentem cum cæteris

ris peregrinis ad iter accingeret. Ad
 quæ quum ita respondisset IGNA-
 TIUS, ut sibi certum fixumque esse
 affirmaret, Hierosolymis omnino re-
 stare; simulque modeste significaret
 se, quamvis aliter sentiente Provincia-
 li, hequaquam, nisi aliqua oblata
 religione, a proposito recessurum;
 tum ille potestatem se a summo Pon-
 tifice habere subjunxit sacris interdi-
 cendi, si quis, invito se, ibidem re-
 manere conatus esset: jamque pote-
 statis ejus diploma proferre paranti,
 confestim IGNATIUS, ut omnia ec-
 clesiastica jura, & imperia valde re-
 verebatur, nihil prolato opus esse re-
 spondit, credere se, quæ diceret; & quo-
 niam ita juberet, dicto audientem fo-
 re. Dum igitur ad hospitium tendit
 mœrens, ut se ad reditum compa-
 ret; acris illum incessit repente cupi-
 ditas monti Oliveti illius celeberrimi
 revisendi, quo in summo cernun-
 tur adhuc JESU CHRISTI ascen-
 dentis in cœlum expressa vestigia: ac
 ne quis forte in tantis temporis angu-
 stiis impedimento sibi esset, re nemini
 patefacta, & (quod periculosius est)
 nullo propter inopiam Turca secum
 adhibito ex iis, qui mercede condu-
 ctj,

Et, peregrinis in ea regione præsidio
 sunt; solus ad montem excurrit: quum-
 que a custodibus non admitteretur,
 cultellum e calamaria theca detra-
 ctum mercedis loco iis dedit, sacri
 montis cacumen subiit alacer, & di-
 vinorum pedum notas multa cum
 prece, & ingenti gaudio veneratus,
 ad Bethphage properavit ubi dum
 singula curiose perlustrat, subiit illius
 animum subito, minus diligenter in
 Oliveti fastigio sese animadvertisse,
 utra ex cœli plaga dextrum, utra sini-
 strum esset CHRISTI vestigium:
 qua dubitatione, quasi quibusdam
 calcaribus incitatus, illico ad Mon-
 tem recurrit, adnotavitque intentis
 oculis vel minutissima quæque sic,
 ut locus in posterum dubitationi non
 esset: usque adeo inexplebile studium
 sacrosancta illa redemptionis humanæ
 monimenta, & incunabula Christia-
 næ religionis penitus etiam atque
 etiam cognoscendi, recondique men-
 tem ejus invaserat. Interea quum ab-
 esset diutius, nec in turba peregrino-
 rum appareret, ad Franciscanos defer-
 tur desiderari ex eo numero IGNA-
 TIUM. Franciscani suspicati id, quod
 erat, ac veriti ne per eam solitudinem
 IGNA-

IGNATIUS in aliquod vitæ, vel servitutis discrimen incurreret; Armenium quendam in eo cœnobio ministrantem, ad illum perquirendum celeriter mittunt: qui descendenti ex Oliveto commodum IGNATIO factus obviam, fuste primum, ac truci vultu acriter minitari, ac temeritatem asperere admodum increpare; deinde immissa manu & brachio ferocius apprehensum ad diversorium trahere minime sane renitentem, quin etiam novo cœlestis gaudii rore perfusum, quod inter eas contumelias Christum sibi præsentem, & usque ad hospitium præeuntem, incredibili quodam genere consolationis adspiceret.

In Hispaniam redit.

Cap. XV.

UT igitur postera dies illuxit, cum reliquo peregrinorum agmine IGNATIUS abiit præ desiderio tristior, & relictam provinciam sine fine respiciens: nec tamen, quoniam præfenti necessitate vultus inde recederet, de muniendo in posterum sibi quandoque reditu, ac mansione desperans

sperans. Quumque primo trajectu Cyprum tenuisset incolumis, tres ibi onerarias in Italiam paratas offendit: quarum una erat Veneti mercatoris maxima, & omnibus rebus instructa; altera minor, sed bene firma, Turcarum; tertia Christianorum, parva, & male compacta, Ac cæteri peregrini, quod tempus erat hibernum, & obnoxium tempestatibus, pro se quisque tendere, ac certa mercede pacisci, ut in primâ illam ascenderent: quumque IGNATIUS propter egestatem a navarcho repudiaretur, iidem illum enixe precari, ut hominem sibi notum probum, atque adeo sanctum ne recusaret admittere. Quibus ille non minus amare, quam inepte facetus: atqui sancto nihil opus est (inquit) navi: calcabit æquora multorum exemplo. Neque unquam exorari se passus est: sed magno ei stetit cavillus, & contumacia. Quum enim IGNATIUS inde per contemptum exclusus, facile obtinuisset iisdem deprecatoribus, ut in illam debilem gratis admitteretur; quumque simul omnia navigia vento secundo solvissent; repente cooritur atrox adeo, ac sæva tempestas, ut Turcica navis in omnium

minium conspectu miserandum in modum fluctibus hausta, nullo prorsus evadente, perierit; Veneta vero in scopulos illisa, naufragium fecerit, salvis tamen hominibus: tertia tantum, qua vehebatur IGNATIUS, minime valida, ventis ac fluctibus diu multumque agitata, altero denique mense in Apuliam lacera, ac valde fessa pervenit: quo ex loco ipse deinde Venetias petiit, tam longa, & periculosa navigatione mire vexatus. Etenim studio paupertatis, quæ fuit illi semper omnibus commodis, & emolumentis antiquior, nudis cruribus, hyeme sæviante conscenderat, femoralibus tantum e tela, concisaque ad humeros aploide, ac scissili tunica brevior semianictus, quum e cælo densa caderet nix, ac tristi gelu cuncta inhorrescerent. Atque ad has cœli injurias accedebant quotidiana vitæ discrimina, vigilæque, & cætera maris incommoda: quibus ille pene confectus quum Venetias pervenisset Januario mense anni M.D.XXIV. ab hospite Cantabro clementer acceptus, nummisque aliquot ad iter faciendum, atque ad fovendum stomachum nimio frigore languentem panni quodam frusto

frusto donatus, Ferrariam venit. Ibi maximum urbis templum ingressus dum religiose Numen adorat, mendicusquidam ex iis, qui sacrarum ædium vestibula conterunt, precationi apprime intentum intuitus, confestim ad illum accedit, manumque ad stipem porrigit supplex: cui quum **IGNATIUS** ex ea, quam habebat, pecunia, nummulum hilari vultu dedisset, atque is (ut fit) rem ad cæteros pauperes detulisset; alius, aliisque deinceps ad **IGNATIUM** accurrere: quos ille quum se per **CHRISTUM** obsecrantes frustrari fas esse vix duceret, a minoribus nūmis ad majores paulatim progressus, brevi totā crumenam ita penitus exhaustit, ut sibi deinde ad cibum illo die capiendum ostiatim emendicare necesse fuerit. Quam rem pauperes iidem mox conspicati, & maxima quadam admiratione correpti, sanctum, sanctum illico exclamant. Quibus plausibus vocibusque nequaquam inflatus ipse, quum uno bonæ conscientiae testimonio niteretur, Genuam inde sine ulla cunctatione profectus est. Grave per id tempus inter Christianos Reges vigeat bellum, & præcipua

D quæque

quæque Cifalpinæ Galliæ loca vel Hispanicis, vel Gallicis præfidiis tenebantur : quumque ob id ipsum valde infesta cædibus ac latrociniis itinera esse constaret; admonitus a bonis quibusdam viris IGNATIUS est, ut per occultos tramites a via regia declinaret, ni cum ingenui vitæ periculo in manus militum vellet incidere. At ille, quem ardens odium sui, & amor imitandæ CHRISTI patientiæ intrepidum redderet, recta nihilominus ire perrexit: neque ita multum viæ processerat, quum ad oppidum nescio quod in stationes circumfidentium Hispanorum incurrit, qui tam periculoso ac suspicioso tempore exploratorem sine dubio rati, comprehensum IGNATIUM, & in domunculam quandam seductum, blande primum interrogant; deinde omni vestimento, & ipsis denique calceis ferociter exuunt, singulas partes proterve simul, & curiose pertractant, num quid ad obsessos, vel nuntii, vel literarum afferat, diligenter exquirunt. Quum nihileorum, quæ putaverant, neque percunctando elicerent, neque perscrutando invenirent; ira commoti, atqui te prefecto sistemus,

in-

inquirunt, & confessionem, quam pertinaciter suppressis, exprimemus. Quum nihil recnsaret **IGNATIUS**, ac tantummodo peteret, ut sua se tunica tectum incedere paterentur; illi vero, ludibri, & ignominia causa brachatum per media castra, vulgo inspectante, atque irridente, perdunt. Quam ille tam insignem contumeliam excepit, ac subiit alacer, quum aliis nominibus, tum praecipue quod interea sibi species quaedam est objecta **CHRISTI** Domini, quum a Pilato per mediam urbem ad Herodis tribunalia missus esset, ab eo per summam injuriam, atque indignitatem spreto, & illusi, & universo irridente, ac sibilante populo, per hominum ora semel iterumque traducti: cujus opprobrii se quoque factum esse utcunque participem, mirifice laetabatur. Sed ubi ad Praefecti diversorium appropinquavit; repentino quodam timore perfusus, coepit subito cogitare apud se, quonam modo ipsum alloqueretur. Etenim **IGNATIUS**, quod olim in Regia sermonis flosculos, & verborum elegantiam nimium studiose captasset, ad eam vanitatem expiandam, consulto post conversio-

nem instituerat rudi & agresti sermone cum ipsis quoque Dynastis, ac Principibus agere, & quo magis vulgo contemneretur, omne liberalioris educationis, & nobilitatis indicium studiosè celare. Tum igitur subiit illius animum, expediretne tali tempore quidpiam de suscepta seu tarditate, seu rusticitate deponere. Sed quum rem totam accuratius intuens, ab humano timore profectam animadvertisset; usque adeo in semetipsum animo concitatus est, ut nulla habitatione periculi, non modo, mutata consuetudine, ad orationis lenocinia non descendere, sed nullum prorsus, neque gestus neque verborum honorem habere Præfecto decreverit. Quæ res cuipiam fortasse temeritatis potius, quam consilii videatur esse: sed utique servorum Dei, præsertim in ipso fervore pœnitentiæ, facta vel dicta ad communem sensum, ac normam exigenda non sunt. Quum igitur coram illo stetisset, ut erat, seminudus & squalidus, ne apertò quidem capite, oculos humi defigit. Multa, ac varia sciscitanti nullam omnino reddit vocem. Tantum ad illam interrogationem: esne speculator?

lator? non esse, respondit: idque ob
 eam causam, ne, si nihil contradixis-
 set, silentio ipso, quod ajunt, rem
 affirmasse, & merito quæsitorem in
 suam perniciem efferasse videretur.
 Tum ille insanum ratus **IGNATI-**
UM, acriter milites increpat, quod in
 conspectum suum, non bene cognita re,
 dementem adduxerint, & simul, abi-
 gite hunc, inquit, liberumque di-
 mittite. Qua reprehensione magis
 magisque irritati, quum adversus Du-
 cem hiscere non auderent, sui dolo-
 ris pœnas ab innocente **IGNATIO**
 repetunt. Nec modo jurgia, & probra
 certatim ingerere, sed etiam impetu
 facto, pugnis, cubitis, calcibus ho-
 minis latera, faciemque contundere,
 mirabiliter in ipso verberum dolore
 lætantis, quod aliquid innoxio sibi ad
CHRISTI Domini exemplum per-
 peti contigisset. Quumque verberan-
 do, & conviciando fessi denique de-
 stitissent; miseratus alius quidam mi-
 les excepit exanimem, ac fovit: ci-
 boque recreatum insequenti luce tu-
 tum abire permisit. Sed antequam
 Genuam accederet, rursus in stativa
 Gallorum incidit, verum eventu ad-
 modum dispari. Siquidem Dux, ut
 cum

eum in Guipuzcoa natum audivit, Vasco ipse eidem regioni finitimus, quasi popularem clementer agnovit, ac benigne tractari a militibus jussu postridie dimisit incolumem. Inde quum Genuam pervenisset, Rodericum Portundum ibi offendit Cantabrum, Hispaniensi classi præpositum, in Ferdinandi quondam regia sibi notum, cujus beneficio dum Barcinonem trajicitur, nihilo pacatiori usus est mari, quam terra paullo ante usus fuerat. Etenim a piratis conspecta navis, qui valida per eos dies classe infestum habebant mare Ligusticum, ingenti nautarum labore, metuque manus insectantium effugit.

*Barcinone ad studia literarum
aggreditur. Cap. XVI.*

INterea IGNATIUM Hierosolymitana commoratione prohibitum, gravis coquebat cura, quid ageret, quodnam potissimū vitæ genus eligeret. Ac multa secum agitati venerat illi dudum in mentem cœnobium aliquod ingredi maxime dissolutum, ut ibi, dum lapsam religionis disciplinam & verbo, & exemplo conaretur ad
ve-

veterum instituta redigere; & cæteris aliqua re prodesset, & ipse interea (quod necessario futurum videbat) ab iis, qui restringi se nollent, multa pro CHRISTI nomine pateretur. Sed incertus num id maxime ad DEI gloriam pertineret, quam videlicet unam in omni actione spectare consueverat; multa ac diligenti prece, & jejuniis explorat Numinis voluntatem: ac diu perplexus, in eam denique mentem sese divinitus plane sensit impelli, ut sine dubitatione statueret primum operam suam qualis qualis esset, nequaquam intra unius familiæ cancellos includere; deinde, quo latius pateret utilitas ac fructus animorum, ejusdem consilii, ac propositi idoneos aliquot adlegere socios, atque adiutores; postremo ut sine hominum admiratione versari in adjuvando hominibus posset, ad Sancti Spiritus unctionem doctrinæ quoque subsidium, ac literarum cognitionem adjungere; præsertim quod ea commendatione facultatem etiam repetendæ, atque obtinendæ Hierosolymitanæ provinciæ (cujus illi cura vivebat in pectore) facile se ab Ecclesiasticis Magistratibus aliquando

impetraturum sperabat. Et quidem, quod ad literarum studia pertinet, quum nondum intelligeret quam illa sibi totum hominem fere vindicent; ratus posse interim se animis quoque adjuvandis vacare, Minorellam ad gregem illum suum reverti decreverat: ubi & sparsa in hominum mentibus pietatis virtutisque semina ad bonam frugem perducere, & Cisterciensis cujusdam monachi, spectatæ sanctitatis ac doctrinæ viri, tum consuetudine perfrui, tum industria erudiri magnopere cupiebat. Sed quum illum contra quam putarat, demortuum reperisset; Barcinonem sibi studiorum idoneam sedem putavit fore, propter eam maxime causam, quod, quum paupertatem perpetuo colere, nihilque ab domo sua & cognatis accipere decrevisset; in ea urbe multos habebat spirituali necessitudine sibi conjunctos: in iis Ardebalum quendam peritum, ut locis ac temporibus illis, ludimagistrum, & Elisabetham Rosellam primariam feminam: quorum alter operam illi gratuitam indocendo, altera in quotidianos usus quidquid opus esset, benigne detulerat, Ut igitur Barcinonem

nem revertit, seque Ardebalo dedit in disciplinam, repuerascere in gratiam CHRISTI matura jam ætate vir (quippe tertium circiter ac trigessimum agebat annum) & elementarius propemodum fieri non erubuit. Cæterum ad illa spinosa rudimenta grammaticæ capienda, ediscendasque verborum inflexiones & nominum, quum alia erant ei impedimento, tum illud præcipue, quod animum ad rerum cœlestium sensa concipienda longo jam usu promptum & agilem, si amandi vocabulum, vel alia quæpiam ejusmodi vox admonuisset eorum, quæ pie ac religiose cogitare, & commentari consueverat; subito pene abstractus a sensibus, in contemplationem divinæ charitatis, ac sempiternæ beatitudinis tota mente raperetur. Ex quo fiebat non solum, ut nihil novi mandare memoriæ posset; sed etiam, ut si quid antea impressum esset, id ipsum concursu novarum, & præstantiorum imaginum illico deleretur. Quam ipsam rem, quasi futura præfagiens, pro sua parte adjuvabat etiam vaser humani generis inimicus, eo maxime tempore crebra intelligentiæ lumina eidem

offerens, & recondita patefaciens scripturæ sacræ mysteria. Quod ille quum cerneret, quumque adhibito sæpe conatu evagationem hanc frustra cohibere tentasset; pro ea discretionē spirituum, quam diuturna exercitatione paraverat, facile sensit diaboli fraudem, sese a literarum studio revocare conantis. Ac quo consilio Barcinonem sese contulerat, id ipsum labore ac diligentia consequi majorem in modum exoptans, hanc iniit rationem ejus abigendæ molestiæ. Templum erat Beatæ Virginis, cui a Mari cognomen est, gymnasio proximum. In id templum, fuis rite ad Deum, eandemque Virginem precibus, Ardebalum pro amicitia acceperat; rem illi totam, ut erat, exponit; deinde se ad pedes abjicit homini, etiam atque etiam obtestans ne ab incepto desistat: se utique, modo sibi panis, & aqua non desit, in proximum biennium, & eo amplius, si opus fuerit, ad scholas frequentem esse venturum, seduloque daturum operam literis: petere, & rogare, ut ab se quotidie non minus quam a cæteris pensum exigat: cessantem, quasi quemlibet
unum

unum e grege puerorum, arbitrato suo & verbis, & plagis accipiat. Miratus viri humilitatem, ac probitatem Ardebalus, bonum animum jubet habere, suamque illi operam denuo pollicetur. Atque hac submissione victus denique dæmon abcessit, & importunis illustrationibus Dei beneficio recedentibus, operæ pretium IGNATIUS facere, & liberius in grammaticæ cognitione cœpit excurrere. Interea discendi mirabiliter avido, & omnia studiorum compendia perquirenti, suasere nonnulli, ad pietatem videlicet cum elegantiore doctrina jungendam, ut Erasmi Roterodami, qui ea tempestate Latinitatis auctor idoneus habebatur; Enchiridion militis Christiani studiose perlegeret. Quod ille facere quum cœpisset, celeriter sensit ea lectione spiritus fervorem in se, quasi frigida superfusa, restringui: consultoque per preces Deo, ita librum illum abiecit, ut neque in manus postea sumserit ipse; & multo post, Generalis creatus, omnia scriptoris illius opera in Societate JESU legi vetuerit: non quod singula heretico veneno infecta putaret; sed ne quis forte captus facetiis,

cetiis, ac dicacitate viri, sensim, ut fit, ab incorruptis ad vitiosa descenderet. Nec tamen eo tempore **IGNATIUS**, quanquam studio literarum adeo intentus, consueta charitatis officia, & studium poenitentiae omisit. Quinimo quum Barcinonem valentiore, quam inde abierat, stomacho revertisset, non ille quidem ad saccum rediit, neque orationi ita multum temporis tribuit; sed tamen vestitu admodum vili usus est, & calceos ad ostentationem vitandam ita perforavit, ut, soleis paullatim magis magisque discerptis, hyeme jam sæviente nudis humi plantis incederet: atque etiam subsecivis operis, erepto e scholasticis exercitationibus tempore institit pia passim colloquia ferere, plebem infimam doctrinae Christianae præceptis imbuere, quosdam etiam spiritualibus exercitiis ad virtutem ac perfectionem informare. Quarum rerum admiratione permoti præ cæteris viri quatuor, sese ad **IGNATII** ductum, atque institutum aggregarunt (quibus tamen, ut suo loco videbimus, in proposito constantia defuit.) Callistus quidam, qui auctore **IGNATIO** peregrinationem

Hic.

Hierosolymitanam nuper obierat; alterum Artiagam cognomento appellabant: tertius fuit e Gotholaniæ Proregis familia, nomine Cazeret; ad quos ultimo loco Joannes adolescens natione Gallus accessit. His ille sociis auctus, tametsi studiorum metam quamprimum attingere optabat, quo liberius omnem curam, atque operam in hominum salute consumeret; tamen, quod sibi nondum sat firma grammaticæ fundamenta jecisse videbatur, nunquam adduci potuit, ut ab Ardeali disciplina discederet (quamvis ad superiores artes vulgo idoneus haberetur) quoad insignis quidam Theologiæ Doctor, cui sese excutiendum examinandumque tradiderat; factò periculo, ad reliquorum sententiam accessit. Cujus auctoritatem, & judicium ne contemnere videretur, licet ipse sibi haud sane placeret, ad graviora studia Complutum una cum sociis abiit.

Ejusdem commemoratio Complutensis. Cap. XVII

IBI quum ad publicum xenodochium suo more divertisset; artium, ut
ap-

appellant, curriculum iniit non admodum felici successu: quippe qui eadem illa præpropera festinatione incitatus, nullo pene servato vel ordine, vel discrimine disciplinæ, multa, & varia uno eodemque tempore aggressus est: & in Logicis terminos, quos appellant, in Physicis Albertum, in Theologia Magistrum sententiarū (qui maxime libri tum in Hispania terebantur) evolvere, & plures quotidie in scholis audire cœpit interpretes; quæ res in speciem utilis, & compendiaria, vel maximo ei in id ipsum, quod properabat, impedimento fuit: Etenim, quod in rebus humanis fere fit, quum avide sequeretur omnia, nihil propemodum assequebatur: & ipsa varietas ac multitudo rerum tum intelligentiæ tenebras, tum vero memoriæ perturbationem, & confusionem afferebat. Ad hæc illud etiam accedebat incommodi, quod in summa paupertate non solum ex emendicato vivebat ipse cum suis; verum etiam aliorum inopiam, ac difficultates conquisitis undique eleemosynis, magno labore & corporis & animi, sublevabat. Præterea, quod ejus cursum vel maxime retardavit
in

in literis , tanta cupiditate ardebat errantes animas ad bonam mentem , atque ad legem Evangelicam revocandi ; ut se , quamvis alieno tum tempore , continere non posset , quominus & in scholasticorum circulis de vera virtute , ac pietate sermones injiceret ; & in triviis pueros , plebemque fidei Christianæ præceptionibus erudiret ; & omnium ordinum homines passim ad cultum Dei , studiumque religionis acri , ac vehementi oratione incitaret . Quibus adhortationibus commoti multi quum ad sanitatem , & officium redirent , & crebris , altisque suspiriis veram cordis contritionem , ac pœnitentiam testarentur ; ab imperitis quibusdam IGNATIUS in suspicionem , & crimen veneficii vocari est cœptus ; quasi homines oratione sua cardiacos redderet . Præterea quum insignes quædam in populo repente morum , ac vitæ mutationes existerent , & major in dies hominum concursus ad IGNATIUM fieret ; brevi rem ad sacros Inquisitores Toletum pertulit rumor . Gliscebatur eo maxime tempore apud Germanos Lutheriana pestis , manabatque malum quotidie latius . Quin
etiam

etiam in Hispania ipsa infani conatus eorum , qui sese Illuminatos ferebant ; paullo ante magistratum diligentia oppressi fuerant . Quocirca Quæsitores in omne ejusmodi contagionis periculum excubantes animo, atque ex hac hominum frequentia, & inusitato agendi genere veriti nequod novum incendium existeret ; Complutum celeriter advolant , in IGNATII doctrinam ac mores diligenter æque ac dissimulanter inquirunt. Quum nihil neque in dictis, neque in factis a recta fide alienum invenirent, IGNATIUM ne appellant quidem; tota re delegata Vicario Archiepiscopi Joanni Figheroæ, qui deinde Regio consilio præfuit; Toletum ipsi ad sua tribunalia revertuntur. Neque ita multo post Vicarius ipse, magis usurpandi juris causa, quam quod rem ulla animadversione dignam putaret, ad IGNATII diversorium adit quiete, & pauca quædam ab eo percunctatus, ad extremum exponit, inquitum in ipsius, & sociorum vitam esse acriter, neque inventum quidpiam vitiosum : proinde more suo animarum saluti operam darent, cum eo tamen, ut non uno, eodemque

que omnes habitu incederent ; ne tali tempore novam aliquam sectam inducere viderentur . Nativi coloris lanea veste cuncti utebantur . Jussit ille IGNATIUM, & Artiagam nigro, Callistum, & Cazerem rufo colore distinguere, adolescentem Gallum nihil mutare. Nec recusavit IGNATIUS, ut erat magistratibus apprime obediens. Interjecto deinde quatuor fere mensium spatio, quum nihil de instituta docendi ratione remitterent, nec persuadere sibi Vicarius posset, homines idiotas, in iis tractandis, quæ ad Christianæ fidei dogmata pertinent, nusquam labi ; rursus in eos clam institit quærere . Sed quum nihilo minus sana cuncta reperisset ; rem totam sine ullo judicii tumultu suppressit . Nec tamen ita multo post Vicarius idem tertiam in IGNATIUM quæstionem exercuit, quorundam calumniis, ac suspicione compulsus . Confluebat ad novum doctorem audiendum, ut diximus, populi turba promiscua . In iis feminæ duæ honesto loco natæ, grandis natu mater, & filia forma eleganti . Hæ publicis IGNATII adhortationibus incitatæ, ut est sexus ad pietatem propensus,

pensus, adeo exarsere, ut cuncta Hispaniæ valetudinaria peragrarè, & in CHRISTI Domini gratiam toto vitæ suæ tempore pauperibus ministrare decreverint. Hoc animi propositum IGNATIO quum aperuissent; dissuasit ille magnopere, quum alias ob causas, tum ne cuius oculos animumq; sollicitaret ad spectus adolescentulæ: non deesse Compluti pauperes, quos officii causa, si vellent, inviserent: posse etiam operam dare sacro Euchariستيæ ferculo prosequendo, & alia id genus obire permulta, utriusque sexui, alterius etiam ætati magis congruentia. Quibus rationibus, & simul auctoritate viri deterritæ, cogitatam quidem illæ deposuere provinciam; veruntamen eadem agitatæ spiritus vi, temperare sibi postea nequiverunt, quominus, inconsulto, atque in scio prorsus IGNATIO, pedibus, ac mendicantium specie aliud genus peregrinationis longæ, difficilisque susciperent. Giennium in Bætica est urbs, quam nonnulli Mentefam Oretanorum falso putarunt; sacro Sudario in primis visenda, in quo crucem sibi met bajulantis expressa CHRISTI Domini adoratur effigies. Ad id Sudarium

rium venerandum, pedibus, ut dictum est, paucis admodum consciis, profectæ duodecim ferme dierum itinere, quum in urbe non apparerent; admiratio primum affinium, ac vicinorum orta; deinde ubi a familiaribus cognitum est peregrinantium habitu petiisse Giennium, varie pro suo quisque sensu rem interpretari. Nonnulli probare factum, plerique reprehendere, quod eo loco feminæ sine comitibus, nullo apparatu se in iter periculosum dedissent. Doctor vero Cirolius, cujus in tutela erant mulieres; auctorem ejus consilii suspicatus **IGNATIUM**, vehementer excaudit, facinus indignum exclamans, hominem externum, & ignotum, in aliena patria suis concionibus cuncta miscere, & ipsas matres familias a cura domesticarum rerum avocare, nobiles vero puellas in pudicitiae discrimen adducere. Atque his querimoniis Vicarium perpulit, ut **IGNATIUM** in carcerem, misso repente viatore, conjiceret. Erat æstivum anni tempus, & satis laxa custodia. Itaque ad eum totis jam illis finibus celebrem, vel spectandi, vel audiendi causa plurimi ventitabant. Quibus ille securitate

mi-

mirabili tum Christianæ doctrinæ rudimenta, tum etiam, ubi res exigeret, spiritualium exercitationum præcepta more suo tradebat. Georgius quidem Naverius insignis ea tempestate doctor, & magna apud Carolum Cæsarem gratia, quum ad eum visendum accessisset; animi magnitudinem, & dicendi vim admiratus, ut primum ad suos domum revertit, hodierna die vidi Paullum (inquit) in vinculis. Jamque septimumdecimum diem ibi transegerat non solum innoxius, verum etiam prorsus ignarus cujus criminis nomine accerferetur; quum ejus interrogandi gratia (multa quippe ad eum ab iniquis delata fuerant) Vicarius ipse cum scriba publico in carcerem venit. Ac primum (ut fit) variis quæstionibus versare in omnes partes IGNATII animum; deinde, quoniam Regis prohibiti edictis, tamen Hispania fere tota ementito corporis habitu cultuque Judæi multi versantur, maleficum genus hominum, & valde Christianis inimicum; sciscitatur ex eo Vicarius, observetne Sabbata. Cui ille, utique in honorem Beatæ Mariæ Virginis (inquit) nam cæteroquin & Judæi-

COS

cos ritus ignoro, & vero Judæum patria mea fert nullum. Postremo, nostin, ait, mulieres quasdam duas, matrem, & filiam? Quum IGNATIUS annuisset; nunquid auctor illis fuisti (adjungit) peregrinandi Giennium? Nihil vero minus, ait IGNATIUS: quinimo credas mihi jurato velim, ejusmodi concursationes & itinera in universum utrique dissuasisse me: &, si profectæ sunt, me ignaro, atque adeo invito, profectas. Tum hilari vultu Vicarius, humeros IGNATII leniter apprehendens: atqui ob id ipsum, inquit, in custodiam te scito fuisse conjectum. His ita peractis, ac tota serie quæstionis per scribam in commentarios relata, Vicarius abiit. Interea, peregrinatione confecta, secundo & quadagesimo deniq; die mulieres revertuntur. Equibus IGNATII innocentia clare perspecta, venit in carcerem scriba, & Vicarii sententiâ IGNATIO recitat; qua primum jubebatur ipse cum sociis cæterorum scholasticorum habitu incedere; deinde quadriennii præfiniebatur spatium sacrae Theologiæ cognoscendæ, ante quod exactum spatium de fidei Christianæ mysteriis ad populum verba nef-

fa-

facerent. Quibus auditis, quod ad habitum pertinet, nihil sane recusabat IGNATIUS, dummodo in id ipsum egenti sibi necessaria præberentur: illam vero temporis finitionem ægre admodum tulit, quod ea re sibi viam ad procurandam animorum salutem obstrui cerneret. Itaque sine ulla dubitatione Salmanticam ad sua prosequenda studia migrare constituit, quum septimum non amplius mensem Compluti moratus, inter eas ipsas difficultates, & occupationes, non nihil tamen e Logicis, Physicisque, & ex ipsis Theologiæ fontibus degustasset. Sed interim, ad gloriam Dei, ne quid in doctrina moribusque suis resideret infamiæ, Toletanum Archiepiscopum (cujus in diœcesi Complutum est) sibi ex itinere adeundum, totamque ei rem gestam, & omnem consiliorum suorum rationem explicandam existimavit. Is erat Alfonsus Fonseca, morabaturque eo tempore Pintia. A quo benigne acceptus, animatusque ad cœpta strenue promovenda, necnon instructus viatico, Salmanticam venit, quo comites jam ante præceserant. Quorum ille diversorum

rium ignorans, primum omnium sacramædem ingreditur; ubi orantem conspicata pia quædam mulier, instinctu videlicet Numinis, ultro ad eum accessit; & sciscitata nomen, ad socios jam sibi notos læta perduxit. Verum IGNATIO ne Salmanticæ quidē quieto esse diutius licuit. Quum enim quod supererat a studiis otii, in cohortandis ad virtutem ac pietatem, & privatim & publice non modo plebejis, verum etiam principibus viris infunderet; neque vero, adjuvante Domino, frustra operam collocaret; omnium in se oculos repente convertit, urbemque totam celeriter ejus nominis fama pervasit. Erat omnino inusitata res, & ipsa novitate valde mirabilis; laicos homines, & externa re nulla differentes a cæteris (etenim eos Figheroa suo sumtu Compluti scholasticorum vestimentis ornarat) Apostolico ac pastoralis propemodum munere fungi palam, & Sacerdotes ipsos ad partes suas rite obeundas accendere. Et quum ejusmodi vitæ genus valde probarent, suspicerentque permulti; tum vero non deerant, qui totam rem secus interpretarentur, ac diligenter

gentius cautiufque examinandam putarent. In iis Dominicani fratres e Divi Stephani præclaro cœnobio, quanquam eorum pro potestate non erat ejufmodi quæftio; tamen, quo erant charitatis ardore, fat fuum rati, quod communem ad rem totius Ecclefie pertineret; **IGNATIUM** noscere, fpiritumque ipfius, & doctrinæ genus, & vitæinftitutum expendere omnino conftituunt. Interim ignarus hujufce confilii **IGNATIUS** confeffarium ex ipfo cœnobio fibi delegerat. Is igitur confeffarius advenâ juffu Vicarii (nam Prior, feu Cœnobiarcha tum aberat) in proximum Dominicum diem ad prandium invitat; nec renuenti, fac (inquit) paratus accedas: quærenda ex te non pauca. Ac nihilo minus, ubi dies advenit, fine cunctatione promiffa fecit **IGNATIUS**. Exceptus eft cum uno e comitibus Callisto, comiter. Sublatis deinde menfis, utrumque Vicarius cum eodem confeffario, & alio e Fratribus in facellum quoddam feducit. Confident omnes. Tum blando vultu Vicarius **IGNATIUM** intuens, gaudere fe admodum inquit, ac valde probare, quod ille
cum

cum sociis Apostolicum in morem
 peregrinando populos doceat , at-
 que ad cultum Dei , ac studium pie-
 tatis impellat . Veruntamen avere
 se nosse quibus maxime literis ope-
 ram dederint . Quum , id quod erat ,
 IGNATIUS minime doctos fate-
 retur esse ; quid igitur , inquit ,
 expertes doctrinæ conciones de re-
 bus divinis habetis ? Nos vero ne-
 quaquam concionamur , ait IGNA-
 TIUS ; verum de virtutis pulchritudi-
 ne , de vitii fœditate , quum occasio sese
 dat , familiariter , & ex æquo loco dis-
 ferimus : atque homines ad odium pec-
 catorum , amoremque probitatishorta-
 mur . A dea Vicarius : sed utique de vir-
 tutibus vitiiisque sine liberalium arti-
 um cognitione disputari non potest , vel
 a magistris , & libris accepta , vel infusa
 divinitus : vos vero neque literis ,
 neque Doctoribus operam dedistis ,
 ut ipsi fatemini : restat igitur , ut a
 Spiritu Sancto vobis hæc tradita sint .
 Atqui hoc ipsum est de Spiritu San-
 cto , quod maxime quærimus . Tum
 IGNATIUS , ut peti se vidit repen-
 tino dilemmate ; quum aliquantulum
 substitisset : de his , inquit , hætenus .
 Quum nihilominus instaret ille , ac

E

Spi-

Spiritus Sancti verbo hominem urgeret; oppressus IGNATIUS tam perseveranti interrogatione, in eodem tamen gradu constantiæ perstitit, seque nihil præterea responsurum affirmavit, nisi quibus legitime interrogandi jus esset. Quo loco Vicarius: Itane vero? inquit. Quum novæ impostorum sectæ quotidie pullulent, & in errorem ac fraudem ita multos inducant; vos in reddenda vestræ doctrinæ ratione tergiversamini? Atqui efficiam ut omnino reddatis. Triduum deinde intra sacros cœnobii fines detinentur: atque humanissime tractantur a Fratribus. Eo spatio exacto, ecce tibi a Baccalaureo Fria Vicario Salmanticensis Episcopi Notarius ambos perducit in carcerem, includitque separato a reliqua reorum turba conclavi, mirum in modum squalido, ac per vetusto, odorisque teterrimi: cujus tectum medium stipēs ligneus fulciebat, ac stipiti ferrea catena erat affixa dodrantium longitudine circiter novem, bifida ad extremum serie. Huic ergo catenæ altero utrumque pede adstringunt, sic, ut nusquam alter sine altero progredi, aut loco pene movere se posset. Igitur tota ea nocte

nocte per summum corporis incommodum nulla capta quiete, in hymnis & canticis perstitere. Postridie, ut per urbem vulgata resest, continuo boni viri complures cum stragulis culcitrisque, & ciborum apparatu adfuerunt; quorum benignitate recreatus **IGNATIUS**, ac paullo clementius haberi deinde in ea custodia cœptus est. Itaque, ut ante Compluti, sic eo tempore concursus ingens hominum ad eum fieri. Ad quos ille admirabili tranquillitate de contemptu rerum humanarum, de futuro extremo judicio, deque sempiternis præmiis, atque suppliciis diserebat. In iis Francisco Mendozæ (qui postea S.R.E. Cardinalis, & Episcopus Burgenfis est mortuus) miseranti casum ipsius, & amice ex eo quærenti, graviterne ferret custodiam, & vincula: **Tantumne malum tibi videtur esse carcer?** inquit **IGNATIUS**: atqui scito, urbe Salmantica tota non ita multas esse compedes manicasve, quin ego plures **CHRISTI** Domini causa vehementer exoptem. Interea Baccalaureus Frias ad carcerem accedit, **IGNATIUM**, & Callistum diversos interrogat, ac variis percun-

stationibus, quales haberi a Judicibus solent; utriusque sensus, & animum diligenter explorat. Quum illi congruentia responderent, nec modo sibi, sed etiam inter se mire constarent; denique librum Exercitiorum, de quo inaudierat, poscit: nec recusat IGNATIUS: quin etiam sibi præterea essetres in eadem urbe socios aperit, editque diversorii nomen, ac notas, quibus inveniri sine errore possint: neque vero supersedit ille, missis lictoribus, eos in carcerem tradere inferiorem, nequod iis colloquium cum IGNATIO, neu qua communicatio consiliorum esset. Post hæc ablatum Exercitiorum librum & ipsemet accurate perlegit, & examinandum præterea tradidit tribus Theologiæ doctoribus: qui dum singula diligenter expendunt, accidit interea res ad innocentiam IGNATII & sociorū declarandam non levis momenti. Quum enim cæteri, qui in vinculis tenebantur, per negligentiam custodum effracto carcere omnes repente dilapsi essent; IGNATIUS comitesque soli in summa fugiendi licentia postridie ibidem inventi sunt: & cunctis admirantibus approbantibusque confestim in amplam

plam domum, & commodam inde magistratum jussu traducti. Citatus præterea IGNATIUS ad Baccalauræum, & reliquos libri sui recognitores, quum & de Exercitiorum ratione, & de præcipuis fidei Christianæ mysterijs multa ex eo quærerentur; paucis, ac demisse præfatus, neque se vacasse admodum literis, & quæcunque sentiret, diceretve, Ecclesiastico judicio, & censuræ cuncta submittere: ad singulas quæstiones de Sanctissima Trinitate, de Incarnatione Domini, de Sacramento Eucharistiæ, aliasque complures ita respondit, ut Judices ipsi pene obstupescerent. Præterea e jure canonico proponitur ei difficilis quidam nodus; quem ipse, quum item responsa Doctorum se ignorare dixisset, illico solvit egregie. Postremo jussus primum Decalogi præceptum, uti consueverat ad populum, sic ibidem repente explicare; in eam sententiam usque adeo varie, & copiose dixit, ut omnem illis præterea interrogandi cupiditatem exemerit. His rebus ita peractis, quum dies vinculo- rum esset secundus jam & vigesimus, una cum sociis evocatur ad judicium sententiam audiendam, cujus erat

summa, innoxios eos, & ab omni hæretica labe intactos videri, ac proinde posse arbitrato suo in adjuvandos homines, ac plebem erudiendam incumbere: tantum ne intra quadriennium in Theologiæ studio exactum, quæ cogitatio lethali, quæ veniali crimine teneretur (qui locus in toto pene jure Pontificio, ac Theologia difficillimus est) auderent ipsi per se definire, atque statuere: id autem propterea quod in Exercitiorum libro signa quædam tradita viderant iudices ad peccata capitalia a venialibus dignoscenda: quæ tamen, quod nihil continerent a recta fide alienum, nominatim improbare non audebant. Recitata sententia, quum honorifice tractatum ab se IGNATIUM putarent iudices: ille vero suis rebus e conscientia apprime confidens, vehementer indoluit, ab iis, quos veræ, & Catholicæ fidei tutores, ac præfides agnoscebat, nullo in suis neque dictis neque scriptis deprehenso vitio, tamen in re tanta, tamque necessaria sibi silentium imponi: atque iter ad excolendos, ac pro viribus adjuvandos homines impediri. Quæ ipsa res inclinatum jam ante animum ejus

im-

impulit, uti satius judicaret ex hisce difficultatibus, quas in Hispania objici sibi subinde videbat, ad scholas Parisienses in Galliam ultro sese transferre: ubi tum ob suam novitatem, & ejus linguæ inscitiam sibi minus interim negotii putabat fore; tum propter illius Academiæ celebritatem, atque frequentiam non defuturos deinde, quos ad suum institutum, atque ad Apostolica vestigia sectanda perliceret.

Lutetiam profisciscitur.
Cap. XVIII.

ET quoniam ad iter adeo longinquum, & anceps non idem erat socii animus; atque etiam, ut maxime incolumes eo pervenissent, incertum erat, apud ignotas nationes quam copiam in studiis literarum degendi essent habituri; communicato cum iis consilio, statuit IGNATIUS antecedere solus ipse Lutetiam: & si quidem res facultatem habitura videretur, ut eos ibidem alere posset, ipsos evocare per literas; sin minus, tota de re facere certiores:

ut, quanquam diversis locis, eadem tamen conjunctione animorum, emenso interim Philosophiæ, ac Theologiæ curriculo, intermissam ad tempus consuetudinem, Deo volente, deinde repeterent. Rebus igitur ita compositis, quanquam e præcipua Salmanticensi nobilitate multis ægre ferentibus, ac majorem in modum renitentibus, vigesimo circiter die quam e custodia exierat, in viam se dedit IGNATIUS, onustum libris asellum præ se agens, ac Barcinonem devenit. Hic vero, ut inter veteres amicos ac familiares, omni ope certandum illi fuit, ut se a lacrymis, atque a complexu charorum avelleret, etiam atque etiam deprecantium, ne patriam cum externa regione mutaret, neu se tali tempore in manifestum vitæ periculum ultro dimitteret. Vigebat adhuc bellum inter Hispanos Gallosque, & circa regni utriusque præcipue limites infesta latrociniis loca, & recentes multorum cædes ad metum proponebantur. Sed ille nec terrore, nec precibus de suscepto consilio demoveri se passus, certe illud recusare non potuit, quominus, tum ad sumptus itineris,

neris, tum ad necessaria Parisiis comparanda, nummorum aliquid partim in numerato, partim in nominibus ab Elisabetha Rosella, & aliis quibusdam amicis acciperet. Quibus ille subsidiis, ac præcipue divinæ bonitatis ope munitus, hyeme summa, pedibus, ut solebat, nullo duce, vel comite, inde profectus est sub initium anni 1528. quumque Januarium totum in itinere posuisset; Februario mense Lutetiam sospes introiit. Ibi, quod ad studia pertinet, respiciens perexiguum præteriti temporis fructum, rationibus suis accurate subductis, ad Dei gloriam statuit in literas toto pectore incumbere. Quumque experiendo jam cognovisset, eam esse humanæ mentis imbecillitatem, ut in plura uno eodemque tempore vix, atque ægre sufficiat, damnata priore festinatione, in posterum, compendiis omissis, regia via procedere, & studiorum suorum novum initium ordiri decrevit. Igitur ad Montis acuti collegium itare quotidie, ibique inter procacium puerorum greges, matura jam ætate vir, grammaticæ rudimenta repetere non dedignatus est. Simul etiam de stato precati-

nis tempore, & vexatione corpusculi, quo plus otii, ac virium studio superesset, multum imminuit: sic tamen, ut illa præcipue tria nunquam omiserit; primum, ut quotidie sacrificio Missæ religiose interesset; alterum, ut octavo quoque die post poenitentiae Sacramentum cœlesti pane sese reficeret; extremum, ut bis quotidie sua ejus diei dicta, facta, cogitata quam diligentissime recognosceret, conferensque hodiernum cum hesterno die, hebdomadam cum hebdomada, mensemque cum mense, suos in spiritu vel progressus, vel regressus perquam accurate exploraret, atque perpenderet. Procuracionem quoque alienæ salutis, & institutam consuetudinem agendi cum proximis tantisper, dum literis, ac præsertim philosophiæ vacaret, aliqua ex parte remisit, nunquam tamen omnino deposuit,

*Extremæ Inopiæ incommoda
superat Cap. XIX.*

JAM vero, satis usu ipso edoctus, quantum detrimentum studiis afferat mendicitas, & cura tolerandæ
in

in singulos dies vitæ ; & nihilominus optans CHRISTI Domini , & Apostolorum exemplo nihil prorsus in hoc seculo possidere , piorum benignitate , ac facultatibus totam rem ita moderari constituit , ut neque in diem , ut antea ; precario victitaret , & nihil idcirco de voluntariæ paupertatis proposito , meritoque perderet . Sed ea res primis utique mensibus minime cessit illi e sententia . Quum enim sese in Hispanorum al quot contubernium contulisset , qui plurimi Parthis ipso belli tempore versabantur , & exactam e syngrapha Barcinonensi pecuniam cuidam ex eadem natione custodiendam dedisset ; eam ille clam suos in usus non optima fide convertit : quumque postea reddendo non esset , reliquis jam nummis insumtis IGNA-TIUS , & a locupletibus amicis , quorum ope adjuvari posset , longo intervallo disjunctus , tanta subito rerum omnium inopia oppressus est ; ut ei cibum ostiatim quæritare quotidie , & in hospitem Sancti Jacobi domum , infimis precibus exorato ejus loci præfecto , demigrare necesse fuerit gravi sane incommodo . Quippe Lu-

tetia Parisiorum, urbs in primis Europæ totius & magnitudine, & celebritate visenda, trifariam est divisa. Partem unam, quam Sequana fluvius insulam efficit, Regia vetere, foro, & tribunalibus nobilem, vulgo Civitatem appellant. Altera, quæ novam Regiam continet, Oppidum dicitur. Tertia pars, jam inde a Carolo Magna dicata Musis, Universitas nominatur. In hac præter cæteram incolarum turbam scholastici maxime inhabitant; ac numerantur ibi collegia permulta libero aditu, cum suis unumquodque liberalium artium discipulis, & doctoribus, & præfecto collegii, quem Primarium vocant, Igitur ex ea vicinitate in Sancti Jacobi hospitium, quod procul inde est in suburbio, extrema necessitate compulsus IGNATIUS, in tanto locorum intervallo, quum aliis afflictabatur incommodis, tum vero quod, quum ante lucem in Academia inciperent scholæ, nec nisi nocte desinerent; ipse illius hospitii legibus nec mane ante solis ortum egredi poterat, & vespere ante occasum regredi cogebatur; sic, ut intereundum, & redeundum, quamvis industrio, ac vigilant

lanti discipulo, multum & de magistri dictatis, & de tota scholarum exercitatione deperiret. Cui tanto detrimento quum in præsentia nullū aliud remedium occurreret, consilium cepit more scholasticorum egentium ea conditione locandi operam suam alicui ex Academiae primariis, doctoribusve; ut, quod sibi a rebus domesticis otii superesset, id totū in scholastica disciplina, studiisque doctrinae consumeret. Sed magis magisque probante Deo constantiam, & patientiam viri, conditionem ejusmodi, quamvis magna adhibita diligentia, nactus est nullam. Itaque dejectus hac spe, quum id ærumnosæ vitæ genus aliquandiu tolerasset; & quos in Hispania reliquerat socios, de statu rerum suarum per literas monuisset, hortatus uti ibidem ex condito curriculum studiorum absolverent; rationem iniit multo commodiorem, ut indictis vacationum feriis, in Belgium, atque interdum etiam in Angliam, sive Britanniam, ad Hispanos negotiatores excurreret: quorum benignitate quum facile obtinuisset annuam pecuniæ summam Lutetiæ toto studiorum tempore certis pen-

so-

sionibusexigendam, commodius multo cœpit in liberalium disciplinarum cognitione versari. Quumque octodecim fere menses latinæ linguæ tribuisset in Montis acuti collegio; in collegium, cui a Sancta Barbara nomen est, ad philosophiæ studia transit alacritate mirabili: ac primum occurrentes denuo rerum cœlestium importunas imagines, quanquam eximia cum animi delectatione conjunctas, eadem spiritus constantia, qua superiores illas, iterum ab se rejecit, ac repulit; deinde magistris attente audiendis, multa, ac diligenti eorum quæ audierat, commentatione, quotidianis denique gymnasii exercitationibus triennio, & mensibus sex (quod spatium temporis curriculo philosophiæ in Academia illa tribuitur) ita profecit, ut honorifico magistri judicio ac testimonio (is erat Joannes Penna Philosophus) post consueta certamina, ritu solenni, laurea, cæterisque doctrinæ insignibus decoratus sit. Post hæc in cœnobii Dominiciani gymnasio sacram Theologiam aggressus est, ingenti sane labore, & industria; quum præter cæteras lucubrationes, hyeme sæ-

vien-

viente, quotidie mane ante lucem ad scholas, quæ illa circiter hora ibi habebantur, accederet. Atque ex eo studio tantum, Deo adjuvante, percepit, quod satis esset ad fidei, doctrinæque suæ rationem, sine suspitione ulla novitatis, ex Patrum decretis, atque auctoritate reddendam.

*Varie propter CHRISTUM
exercetur. Cap. XX.*

NEque vero, quamvis interim a plebis catechesi, atque a publicis actionibus abstineret; idcirco tamen, quoad per scholas licitum est, ab adiungendis ad CHRISTUM hominibus, animandisque ad studium veræ laudis, & gloriæ destitit. Quapropter multi nec infimæ sortis viri, privatis ipsius colloquiis, ac monitis incitati, partim, castigato vetere luxu, Christianæ disciplinæ severitatem induerunt; partim etiam solenni voto varia Religiosorum instituta professi sunt; partim denique ingenti Academiæ totius admiratione, in Christi gratiam pecunia egentibus distributa, pauperem vitam agere, atque adeo ad conculcandum peni-

penitus omnem seculi fastum , & expianda superbiæ crimina , palam per vicos , & compita manum ad stipem ipsi porrigere , victumque palam emendicare cœperunt . Quos tamen amici , rem indigne ferentes , quum neque precibus , neque minis a proposito revocare valuissent ; facta manu denique , ab hospitali domo Sancti Jacobi , quo sese contulerant , vi , armisque in pristinum Academiae diversorium ad sua proseguenda studia retraxerunt . IGNATIUS vero tantam ejusmodi rerum invidiam subiit , ut præter cæteras injurias , & maledicta , falsis etiam criminationibus ad sacrum Inquisitorem semel iterumque delatus sit . Is erat ea tempestate Matthæus Ori , ex Dominicana familia Theologiæ Magister , tum eruditione , tum probitate conspicuus ; qui accusatorum fraude comperta , IGNATIUM non absolvit modo , sed etiã miris ornavit laudibus : ipsumque Exercitiorum librum , qui præcipue in suspicionem , crimenque vocabatur , tantum absuit ut damnaret ; ut sibi etiam ejusdem exemplũ IGNATII permissu desumeret . Præterea absolutionis , ac sententiæ formu-

mulam, publici scribæ chirographo, & signo munitam, quam contra iniquorum calumnias, quodocunque opus esset, proferret, tametsi minus gratum id potentibus quibusdam viris fore videbat, IGNATIO petenti concessit. Neque vero pro CHRISTI nomine solum hac falsæ accusationis procella defunctus IGNATIUS est: sed eorum ipsorum opera, qui illum deinde vel maxime dilexerunt; virgarum quoque publice periculum adiit. Mos est Parisiis in scholasticos improbos, ac seditiosos, ad sanciendam Academiae disciplinam, hunc fere in modum animadvertere. Dissimulato consilio, ad condictam diem in aulam collegii Primarius, Magistrique nodosa instructi virga conveniunt; comprehensumque repente noxium, & in medio confesso nudatum, certo plagarum numero singuli afficiunt. Id supplicii genus Lutetiæ tum ad sensum corporis peracerbum est, tum vero ad ignominiam ac dedecus longe turpissimum: deque ipsius loci nomine aula vulgo appellatur. Hunc igitur cruciatum, ac notam maleficis constitutam, IGNATIO infonti, quod condiscipulos festis præcipue diebus

a schola

a schola ad Oratorium, & sacra mysteria confessionis, altarisque traduceret; vehementer iratus Magister ipse Joannes Penna paraverat, Jacobo Govea Lusitano, collegii Primario, in suam sententiam facile adducto; quippe qui jam ante privatim erat infensus **IGNATIO**, quod familiarem quendam suum Amatorem nomine, severioris vitæ præceptionibus imbuisset, atque (ut pietatem fere interpretantur homines) infatuasset abductum a curis inanibus, & jucundo convictu amicorum, atque a pristina consuetudine. Ut igitur dicta supplicio dies illuxit; adventans jam ad scholas, ab amico fideli mature monetur **IGNATIUS**, ne intra collegii septa utique illo die inferat pedem; concitatos in eum esse omnium animos; poenas aulae daturum extemplo, ni caveat. Ad cujus rei nuncium ancipiti deliberatione distractus **IGNATIUS**, quod & pro **CHRISTI** nomine verbera, & contumelias perpeti mirifice optabat; & supplicii apud homines adeo turpis infamia, metuebat ne complures e juventute, ipsius opera jam ad meliora conversos, necdum in bono stabiles, a sua consuetudine, atque auctori-

auctoritate avocaret, iterque sibi ad alios etiam deinceps CHRISTO lucrificiendos abrumperet; totam rem ad ipsius Goveæ arbitrium, judiciumque rejicere statuit: quod ille, recognita, decrevisset, id ex divina maxime gloria, & voluntate futurum: neque de ejusmodi sententia ullis amici denunciationibus, precibusve demoveri se passus, quanquam horrenti poenæ imminentis acerbicatem, & renitenti, carni vim fortiter intulit: ingressusque collegium, & recta Goveam petens nondum e cubiculo egressum, placido, ac sereno vultu, & altam animi pacem, ac securitatem indicante: *Si meæ mihi (inquit) existimationis, & incolumitatis, quam divinæ gloriæ, salutisque animorum cura prior esset, ac potior; nequaquam hodierno die pedem intra fines hujusce collegii posuisssem. Neque enim antequam buc venirem, ignarus eram, Govea, quantum e vestra omnium indignatione dedetoris, quam acerba tormenta me maneant. Sed quoniam nihil omnino mihi vel ad meritum optabilius, vel ad veram dignitatem præclarior duco, quam CHRISTI Domini causa tam gravia, tamque multa pro me*
per

perfuncti, vicissim probra, plagas. mortem denique perpeti; idcirco nimirum ad scholas accessi, & ultro memet in tantum & corporis, & famæ discrimen objeci. Verum enimvero mihi non modo quid votis meis, ac desiderio, sed etiam quid proximorum rationibus, & sempiternæ salutis conducatur, charitatis lege considerandum est. Multos habeo adolescentes Dei beneficio nuper e cæno flagitiorum emersos, ac vixdum avulsos ab improborum pestilenti consortio. Hos ego vereor ne, si me in tam honesto conventu publice vapulasse constiterit; a meo sermone, congressuque protinus avocet infamiæ metus: ac proinde, ut sunt flexibiles hominum voluntates, ad eadem illa saxa, quibus paullo ante adhæserant, ingenti dæmonum gaudio, & fervor ætatis, & pravi consuetudinis æstus abripiat. Simul etiam (verum, ut fatear) tui me, Govea, Doctorisque mei Pennæ miseret, qui Christianam pietatem, ac fidem sacramento professi cæterisque ad exemplum justitiæ, virtutisque præpositi, CHRISTI famulum, CHRISTI causam agentem adeo acerbè insectamini. Et qui, qua pœna lex affici jubet eos, qui scholasticos depravare, magistris illudere, seditiones conflare,

flare voluerint; eadem dignum judicatis eum, qui juventutem a vitiis, doctores a jurgiis, Academiam a tumultibus vindicare conatur. Quæ quoniam mecum ipse reputans, non levis momenti ducebam esse; quanquam cupidus inimicorum odit vel meo sanguine explendi; tamen pro nostra necessitudine, deesse nolui, quominus eadem tibi quoque, integra etiamnum re, consideranda proponerem. Mibi, ut dixi, pro CHRISTI nomine vexari, ac torqueri optatissimum est: jamque si videtur, sponte ad patibulum pergo. Tu, Lutetiæ Parisiorum, a Sanctæ Barbaræ collegio, in ejusmodi causa tale documentum vel pietatis, vel equitatis dari an expediat, pro tua sapientia, ac religione constitue. Vixdum IGNATIUS dixerat, quum Govea, vir, & ni concitaretur aliunde, suo pte mitis ingenio, & tum instinctu divino valde compunctus, illico cœpta damnavit, ac majorem in modum detestatus est: apprehensûque amicissime IGNATIUM deduxit in aulam, quo jam collegæ cum reliqua turba parati convenerant. Ibi silentio indicto, repente contra omnium expectationem de IGNATII laudibus orationem instituit, viri fortitu-

fortitudinem, innocentiam, charitatem extollens, seipsum, & cæteros, qui innoxio periculum struxerant, vehementer accusans. Quam in sententiam quum multa dolenter, graviterque dixisset; ad extremum obortis lacrymis, ad IGNATII genua procidit; precatufque delicti veniam, & apud cæteros illum in admirationem, gratiamque restituit, & ipse in omni deinde vita IGNATIUM, & socios præcipuo amore, studioque complexus est.

De sociis ad Ignatium adjunctis.

Cap. XXI.

HAsce igitur, aliasque ejusmodi insectationes, atque pericula IGNATIUS Christi causa cōtraxit. Attamen idem plurimorum quoque sibi gratiam, ac benevolentiam optimis artibus peperit. Fuit enim in illo præter divinitus infusa charismata mirum etiam, atque efficax ingenium, & studium ad animos hominum demerendos. In Principum amicitias opportune insinuare sese, easdemque obsequio, & submissione tueri; pares facilitate, ac suavitate morum allicere; inferioribus & egentibus, auctoritate,

tate, opera, necnon e suis angustis, etiam pecunia præsto esse; morbo aliquo laborantes, vel cum valetudinis, & contagionis periculo adire, solarique amantissime; eorum quibuscum viveret, ageretve, vel difficultatem naturæ, & arrogantiam perpeti, vel ineptias, ac stultitiam, quoad ita res ferret, exorbere dissimulatione mirabili; ad aliorum arbitrium ac voluntatem, quibuscunque rebus honeste posset, semper accommodare se ac flectere; omnibus denique in CHRISTI gratiam omnia fieri. Ubi penitus in hominum sensus, ac voluntates irrepsit, tum demum officiis, ac benevolentia comprehensos occupatosque, pro suo quemque capto, sensim, & caute progrediens, Christianæ Religionis, & officii præceptionibus excolebat. Atque his ferme artibus, & simul sanctimonix, ac frugalitatis exemplo multos, ut diximus, a turpi ac flagitiosa vita non modo ad sobrietatem & continentiam, sed etiam ad contemptum rerum mortalium, atque ad salutaria consilia Christi convertit. Complures præterea hæreticos, grassante jam tum peste Lutheriana, tempestivis
dis

disputationibus , monitisque convi-
ctos, ad sacra Quæditorum tribunalia
volentes adduxit; & cum Sancta Ro-
mana Ecclesia in gratiam secreta
abjuratone restituit. Jam vero, quod
ei vel in primis propositum initio fue-
rat, ut aliquos ingenio doctrinaque
præstantes ad suum institutum, ac
vitæ rationem aggregaret; in idipsum
per Theologiæ maxime tempus incu-
buit: adjunxitque sibi, Deo bene ju-
vante, juvenes novem ex Academia
universa lectissimos. Quorum primus
fuit Petrus Faber Allobrox, pago Vil-
lareto Gebennensis diocælis humili
natus loco, sed egregie pius, quippe
qui duodecimo ætatis anno per sum-
mum sanctimonix studium virginita-
tem Deo voverat: idemque ad literas
a vita pastoralis traductus, tantum in-
genio, industriaque profecerat, ut
eum in locis Aristotelis difficiliori-
bus Magister ipse Penna consulere-
t. Hunc igitur IGNATIUS & studio-
rum & contubernii communione sibi
conjunctum, licet socium gloriosi
operis ipso initio destinasset; non ta-
men continuo illi rem aperuit, neque
ad tantam perfectionem impellere
confestim aggressus est: sed conscien-
tiam

excutere, & in seipsum quotidie diligenter inquirere primum edocuit; deinde ad totius anteaactæ vitæ noxas per sacram confessionem expiandas adduxit; postremo, quum jam philosophiæ curriculum exegisset, spiritualibus exercitationibus perpolivit, adeo propensum ad pœnitentiam, tantoque animi ardore succensum, ut hyeme summa concretum glacie flumen Sequanam plaustreis impune prementibus, in separata Jacobæi vici domuncula propositas meditationes, & quidem insidens nivi, sub dio peregerit: sexque ipsos dies omni prorsus cibo, potuque abstinuerit, inediam longius utique protracturus, nisi eum, re animadversa, consultoque suppliciter Deo, vetuisset **IGNATIUS**: & sane respōdit operi fructus. Quum enim antea in eligendo certo vitæ genere Faber mira animi sollicitudine, variisque scrupulorum molestiis adeo torque-retur, ut præ nimio angore sese in vias abdere solitudines, ibique radicibus herbarum victitare pene decerneret; ex hac spirituali exercitatione vocari se una cum **IGNATIO** ad animorum subsidium non dubie sentiens, tantam est pacem, ac tranquillitatem

F

con-

conscientiæ consecutus, ut ex vehementissima tanquam agitatione, ac falo, placidum tutumque portum se denique nactum esse profiteretur. Ex eodem contubernio Franciscus quoque Xaverius nobilis Cantaber, idemque non vulgari eruditione, quippe qui laurea magistrali donatus, Lutetiæ postmodum publicus Aristotelis interpretes exstiterit; quanquam principio ita non studiosus *IGNATIUS*, ut ejus pietatem (ut fit) etiam procaciter irrideret; tamen viri tum patientia, tum obsequiis adeo delinitus est, ut ad illius ductum arbitriumque sese omnino contulerit. Hunc & divitiarum affluentia, & vivido ingenio, & viribus corporis præferocem, admirabili prudentia, ac lenitate mansuefecit *IGNATIUS*, in eamque rerum humanarum despicientiam, & charitatis ardorem paullatim adduxit, ut inter ipsa Exercitia spiritualia, tum ad carnis macerationem quatuor dies jejunus omnino transegerit; tum vero, quod inter juvenum greges defultor eximius, corporis agilitate sibi nimium placuisset; ad ejus piaculum vanitatis membris valido fune perstrictis non sine acri sensu doloris, dies

dies aliquot in commentandi, orandique labore, atque attentione perstiterit. Hic est Xaverius ille, qui non multo deinde post, Joannis Lusitaniae Regis rogatu, ex auctoritate Pontificis Romani missus in Orientem, plenus Apostolico spiritu, tota India maritima summis laboribus, ac periculis peragrata, in ultimas Japoniorum terras Evangelii lumen primum intulit: atque ingenti infidelium numero ad Christum adjuncto, multis clarus miraculis in ipso aditu Sinarum excessit e vita. Porro Xaverium & Fabrum imitati sunt Jacobus Laines Saguntinus, qui deinde Societati nostrae proximus ab IGNATIO praefuit, vir de Christiana Republica in primis optime meritus; & Alfonsus Salmeron Toletanus, Graecis & Latinis literis admodum eruditus: uterque confecto Compluti Philosophiae curriculo, Parisiosque partim Theologiae causa, partim etiam IGNATII noscendi gratia profecti: cujus de laudibus jam tum in Hispania constanti hominum sermone multa cognoverant. Accessit ad hos etiam Nicolaus Bobadilla Palentinus, doctus juvenis, & phi-

Iosophiam publice professus in oppi-
 do Hispaniæ Pintia , itemque præ-
 stanti indole Simon Rodericus Lu-
 sitanus, & post aliquanto Claudius
 Jajus Gebennensis, & Joannes Codu-
 rius Ebredunensis, Paschasiusque
 Broetus Ambianensis, Fabri præ-
 cipue (cujus jam erat nomen Pa-
 risiis celebre) monitis, & exem-
 plo permoti. Hi omnes, impulsu
 plane divino, quum alter alterius
 consilium ignorarent, post exactis-
 simam totius vitæ confessionem spi-
 ritualibus exercitiis ab **IGNATIO**
 perquam diligenter exculti, vehemen-
 ti quadam spiritus motione sese, non
 quidem in umbram, ac solitudinem,
 sed in solem, ac pulverem evocari ad
 prælia Domini prælianda senserunt:
 nec fuit e novem ullus fere, quin ad
 propitiandum cœleste Numen, ejus-
 que voluntatem suppliciter exquiren-
 dam, præter cæteram abstinentiam, &
 incommoda voluntaria, tridui ut mi-
 nimum totius inedia sponte pertu-
 lerit, nimis audaci fortasse consilio;
 nisi eos & multorum exempla, &
 fervor simul ætatis, ac pietatis excu-
 set. Hosce igitur socios Dei beneficio
 nactus **IGNATIUS** (quorū tres erāt
 su-

superstites, hæc scribente me, Salmeron, Rodericus, & Bodadilla) quod jandiu moliebatur, & agitabat animo, re ipsa aggredi primo quoque tempore statuit; ut Hierosolymas Pontificis maximi permissu repeteret, gentesque finitimas Christiana quondam religione præstantes, deinde Mahometis nefaria superstitione deceptas, vel a miserabili errore ad veritatem Evangelii revocaret, vel certe (quod erat proximum) sanguinem ac vitam in causa tam pia, tamque gloriosa profunderet. Neque sane difficile fuit cæteros, jam sponte currentes, & Dei amore incensos in eandem sententiam, & propositum adducere: & quia plerique Theologiæ studia nondum absolverant; ne interim conceptus ardor animi refrigeret, & simul ut ipsorum eo gratius divinæ majestati obsequium esset, quo majorem sibi met ipsi necessitatem servitutis, ac religionis imposuissent; implorato Beatissimæ Virginis patrocinio, ac S. Dionysij Areopagitæ, cujus in tutela Parisii sunt, in æde suburbana, quæ Mons Martyrum dicitur, sub Confessionis & Eucharistiæ mysteria voto sese obstrin-

xere singuli, eimensis Theologiæ spat-
 tiis, continuo mortalibus rebus nun-
 cium remittendi, atque in pauper-
 tate perpetua serviendi gloriæ divi-
 næ, salutique animorum: ac nomi-
 natim, ad constitutam diem Hiero-
 solymam eo consilio navigandi, ut in
 conversionem infidelium toto pectore
 incumberent, palmamque martyrii
 studiose captarent. Id consilium si-
 qua re impediretur, anni circumactō
 spatio denique Romam adirent; suam-
 que operam summo Pontifici CHRI-
 STI Vicario ad spirituale proximo-
 rum auxilium sine ulla vel præmi-
 i pactione, vel temporum aut locorum
 exceptione deferrent. Id votum in
 eo templo vovere ingenti consensu, &
 alacritate anno post CHRISTUM
 natum M.D.XXXIV. decimo octavo
 Calen. Septembris, quo die Assum-
 tionis Mariæ Virginis anniversaria
 gratulatio celebratur. Idemque vo-
 tum eodem loco, dieque pariter anno
 proximo, ac tertio renovarunt: atq; ea
 res tum ad conspirationem ac vincu-
 lum animorum, tum ad confirmandas
 in suscepto consilio mentes omnium
 mirifice valuit. Incendebant præterea
 studium alter alterius omni genere of-
 ficii,

ficii & charitatis, duce ac moderatore simul IGNATIO, quem omnes ut parentem eundem, & unice diligebant, & valde reverebantur. Ac primum spirituales modo apud hunc, modo apud illum agitare cœtus; ibiq; suavissima de rebus divinis habere colloquia, & sese mutuo ad Christianam laudem, & decus hortari; deinde in studiorum difficultatibus, locisque obscurioribus adjuvare inter se; & lucubrationes quisque suas, lumenque doctrinæ & ingenii, quum res exigeret, in commune conferre; præterea invicem sibi omnibus in rebus adesse certatim; deniq; a frequenti Sacramentorum usu, & assiduitate precandi, meditandi; nullo pacto recedere. Quibus rebus & varias dæmonum insidias tentationesque conantium eos ab incepto revocare, vicerunt; & brevi tanta coaluere concordia, ut, quanquam e diversis, nec non infensis inter se orti nationibus, gratia tamen superante naturam, intra eosdem alti parietes, atque adeo ex uno propemodum omnes utero in lucem editi viderentur.

Libri Primis Finis.



DE S. IGNATII

L O J O L Æ

VITA, ET MORIBUS

LIBER SECUNDUS.



Æger Hispaniam repetit .
Cap. I.

INTEREA IGNATIUS
 gravi morbo , partim e maxi-
 mus laboribus , vigiliisque , par-
 tim etiam e Parisiensis cœli gravitate
 contracto, vexatusq; subinde stomachi
 jampridem affecti doloribus acer-
 bissimis, post multa remedia incassum
 adhibita, jubetur a medicis ad patrium
 solum, & incunabula se referre; quod
 unum

unum ad inveteratas corporis ægri-
tudines certissimū perfugium vulgo ar-
bitrantur. Nec recusavit ille, non tam
valetudinis ratione, vel desiderio suo-
rum adductus, quam duabus aliis ma-
xime causis; primum, ut quibus olim
in regionibus malo publico juve-
nilis licentiæ, ac vanitatis ipsemet
specimen exstitisset, ibidem ad spiri-
tualem ædificationem vicissim aliqua
Christianæ humilitatis, atque mo-
destiæ documenta præberet: popu-
laresque suos & verbo, & exemplo
ad studium pœnitentiæ salutaris ac-
cenderet. Deinde ut, quoniam fociis
aliquæ erant in Hispania rei familia-
ris tricæ; eas eodem itinere, atque
opera ipse expediret: neque per eam
causam illi vel avocarentur a studiis,
vel recenti etiam tum vocatione, &
expeditionis tam arduæ tamque la-
boriosæ consilio, patriæ dulcedinis,
ac domesticæ tentationis, qua nulla
fere periculosior est, aleam subire co-
gerentur. Simul etiam, e relictis olim
in Hispania fociis, cogitabat, si quem
in proposito constantem inveniret,
secum in eandem expeditionem edu-
cere. Cæterum ne quid e suo discessu
res Parisiensis caperet detrimenti,

primum commilitones ad perseverantiam, ac fidem paucis adhortatus, Petrum Fabrum & annis, & vocatione antiquissimum, illis præposuit; cui interim obtemperarent, quem parentis ducerent loco. Deinde tempus certum edixit, iisdem approbantibus, quo tempore cuncti, rebus omnibus, præter viaticum & necessaria scripta, ex voto abdicatis, navigaturi Hierosolymas Italiam peterent; seque jam antegressum Venetias convenirent. Dicta profectio dies est 8. Calêdas Februarii, anno M.D.XXXVII ineunte, qua die Apostoli Paulli conversio beata recolitur. His ita constitutis, anno M.D. XXXV. per autumnii tempus ipse non sine lacrymis, mutique amoris magna significatione singulos in digressu complexus, quum vellet de more pedibus, quam ægro corpore, proficisci, coëmto a sociis equo. uti coactus est: brevique, partim ex ipsa vectione, locorumque mutatione, partim etiam e studiorum intermissione morbo levatus, Pyrenæo superato, Guipuzcoam provinciam attigit. Lojolæ rerum potiebatur eo tempore, Garzia defuncto, Bertramus stirpis maximus.

Is

Is de patruī adventu festine præmonitus ab iis, qui hominem ad Aquas Augustas, quam hodie Bajonam appellant, in transitu agnoverant, ex templo, quod regni limes latrociniis infestus esset; armatos homines ad eum excipiendum, tuendumque dimiserat: atq; hos primum IGNATIUS in Guipuzcoæ finibus, deinde etiam, quæ jam tunc erat fama de sanctitate viri, clericos omnes agmine composito ad oppidum Aspeithiam honoris causa obvios habuit. Quumque ab iis, & ab ingenti præterea gratulantium turba deduceretur ad ædes paternas; ille, ut ostenderet quantopere ab ejusmodi fastu pompæ abhorreret, ut primum potuit, ex eo comitatu sese proripiens, ad publicam hospitallem domum divertit, victumq; continuo emendicare ostiatim cœpit, fratris filio cognatisque frementibus, eamque rem (ut fere depravata sunt Christianorum quoque judicia, & pauci ex animo crucem amplexantur) summi dedecoris, atque ignominiae loco sibi ducentibus. Deinde, quanquam invitis iisdem, institit plebem Christianæ doctrinæ rudimentis imbuere, privatisque colloquiis eos, qui ad se

ventitabant, e peccatorum veterno
 excitare: festis vero diebus etiam
 conciones habere, tanta hominum fre-
 quentia, ut, quum eos templa non
 caperent, in agrum prodire necessario
 cogeretur: vulgoque arbores audiendi
 causa conscenderent. Et sane operæ
 fructus egregius Dei beneficio consti-
 tit. Complures ad virtutem, ac Dei
 cultum a vitæ pravitate conversi,
 multæ sublata discordiæ, & odia in-
 veterata restincta, contra aleatores
 lata publice lex, poenæque propositæ:
 institutum præterea, ut preces pro
 salute quotidie funderentur eorum
 omnium, quibus lethalis noxæ pia-
 culo obstrictis, in singula momenta
 exitialis exitus immineret: itemque
 ut ex Ecclesiæ Romanæ consuetudine
 salutationis Angelicæ signum daretur
 mane, meridie, & vespere. Jam vero
 gravia quædam vitia, quæ uon in
 populum modo, sed etiam in sacerdo-
 tes irreperant; magna ex parte cor-
 recta. Denique morbo incurabili af-
 fectis, & extrema pressis inopia, ne
 vel oppido errarent, vel strati passim
 in compitis cœlum miserabili questu
 complerent; publico sumtu consul-
 tum. Atque hæc leges, moresque
 custo-

custodiendi, ne (quod fere fit) bene-
 cepta propediem obsolescerent; cu-
 ram, & munus Lojoleja familia, pla-
 cata postmodum IGNATIO, sibi de-
 sumsit. Qui quum in eo xenodochio
 aliquandiu ita versatus esset, ut satis
 appareret ipsum exemplo CHRISTI
 Domini laboribus, & paupertate mul-
 to magis quam otio, & rerum affluen-
 tia delectari; ad extremum quotidianis
 propinquorum precibus exoratus, ne
 cognationi aut nihil omnino dedisse;
 aut etiam inimicitias palam denun-
 ciasse videretur, in paternam domum
 ex hospitali se transtulit: ibique ali-
 quot moratus dies, restituta domesti-
 ca disciplina, cunctis ad officium ac
 pietatem animatis; valentior multo,
 quam Lutetia disceserat, ad socio-
 rum expedienda negotia proficisci
 constituit. Atque hic novum ecce ti-
 bi certamen IGNATIUM inter &
 cognatos exoritur; quum ille paupe-
 ris habitu prorsus, & pedes iter facere
 destinasset animo: illi contra, quo-
 niam quidem eum apud se diutius
 retinere non possent; certe non nisi
 bene comitatum, & pecunia instru-
 ctum abire permetterent. Verum
 certaminis denique is fuit exitus, ut
 IGNA-

IGNATIUS, ne frustra diutius tenderet, ad viæ modicum in speciem deduci se passus, brevi domum & famulos & cætera cuncta remiserit, pedibusq; porro perrexerit, Gallicano equo ministris valetudinarii jam ante relicto: quem illi deinde in **IGNATII** memoriam veluti sacrum, & immunem ab opere, vagari in pascuis ad extremum usque senium permisere. **IGNATIUS** igitur Navarra primum, deinde Castella peragrata, mandatisque recentium sociorum exhaustis, de veterum statu, ac voluntate cognoscere nequaquam omisit: verum illi partim expectationis, ac moræ tædio victi, partim etiam aspero virtutis itinere fatigati, in alia fere omnia dudum abierant. Joannes tantum Gallus, ne de animi salute periclitaretur, monasticæ se addixerat vitæ. Callistus ab animorum cura ad pecuniæ lucrum studio repente converso, in Indiam navigaverat, unde aliquanto post bene nummatus ingenti omnium admiratione, qui eum antea norant, Salmanticam rediit. Cazeris quum Segoviam patriam petiisset, mollioris vitæ commodis, & domesticorum consuetudine delinitus, otio ac

voluptati sese dediderat. Artiaga vero curriculum honoris, & ambitionis ingressus, & e Commendatario factus Episcopus, quum aliquandiu in eo dignitatis gradu vixisset; ad extremum ægrotus, epota per imprudentiam veneni laguncula (quum duæ starent, altera salubris aquæ, altera sublimati, quod appellatur, medicamenti) miserabili genere lethi defunctus est.

Venetias ingenti labore contendit. Cap. II.

IGNATIUS ergo quum in Italiam properaret, & hosce, quos dixi, socios tam longe lateque dispersos in unum redigendi, atque ad pristina revocandi consilia spes nulla se ostenderet; occulta Dei judicia secum expendens, fufis pro ipsorum salute ad Superos precibus, Valentiam venit: ubi videlicet navem stare paratam audierat. Ibi dissuadentibus multis, ne se tali tempore mari committeret; quod præter cæteras difficultates, etiam nobilis archipirata, Ænobarbus loca opportuna, & litorum flexus valida obsideret classe; nullis terroribus de sententia decessit IGNATIUS. Et navis prædones quidem effugit; veruntamen fœdis-

fima

sima tempestate coorta, clavo diffrac-
 to, fusisque armamentis, quum jam
 de salute vectores, nautæque omnino
 desperassent; lacera, & quassata flu-
 ctibus Genuensem portum ægerrime
 tenuit. Atque hæc tanta maris in-
 commoda non sane levius terrestris
 itineris discrimen excepit. Quum enim
 solus, ignarusque regionum IGNA-
 TIUS per Apennini tramites Æmi-
 liam peteret, viam ingressus initio
 spatiosam, sed in arctum deinde magis
 magisque coeuntem; studio proceden-
 di sensim in eas penetravit angustias,
 unde sese expedire humana ope vix
 posset. Primo igitur solícite vesti-
 gium facere; deinde quum neque pro-
 gredi, neque jam regredi tutum esset,
 in exilitate salebrosa, & horrenda
 crepidine, torrente rapido minaciter
 subterfluente; hæsit aliquantisper
 stupenti similis, ubi repente sese tot
 periculis cinctum animadvertit. Sed
 ad extremum fidenter implorato di-
 vino auxilio, quod unum reliquum
 esse videbatur; humi procubuit, &
 genibus, manibusque reptando qua-
 drupedis instar, ac prominentia mo-
 do saxa, modo e faxis enata virgulta
 prensando, tandem evasit labore,
 quos

quos ad eam diem pertulisset, omnium maximo. Inde per immensæ altitudinis invias rupes, ac solitudines diu errabundus, quum ad radices montium denique devenisset; omnia rursum offendit partim nivium tabe, partim etiam hibernis imbribus impedita. Quumque nihilominus urgeret progrediendi necessitas; via teterrima (& est mollis & cretosus ager, ac semitæ per horum temporum incuriam exiguo munimento, nec ullis ut olim, stratæ lapidibus) cum profundo, ac tenaci limo diu multumque luctatus, ad Bononiæ portas tandem aliquando pervenit. Atque hic, ne quid deesset ad probandam æquitatem, ac patientiam viri, ad cæteras misérias illud etiam ludibrium accessit; ut in ipso urbis introitu e ponticulo in fossam, limo cænofo margine lubricante, decideret: emerfusque luto deformatus, ac madidus, ab iis, qui tum aderant, non sine joco, & facetiis (ut sunt procacia in alienis malis hominum ingenia) rideretur. Sed ille nimirum identidem exerceri se a Patre cœlesti prudenter intelligens, & ingratiarum actione persistens, sole siccatis utcunque vesti-

vestibus, lassitudine, ac fame confectus quum urbis magnam partem frustra emendicando perambulasset, in collegium Hispanicę nationis demum exceptus, ibique dies aliquot clementer est habitus. Inde quum itinere jam facili & certo Venetias pervenisset, exacta pecunia, quam illi per trapezitaseadem Elisabetha Rosella benigne curaverat; interea dum socios e Gallia præstolatur, in varia pietatis opera ex instituto cœpit incumbere. Nec sane frustra; siquidem complures omnium ordinum homines partim Christianę doctrinę præceptionibus imbuit, partim ab impura, & flagitiosa vita ad castum Dei timorem, studiumque virtutis eodem Deo adjuvante convertit. Quibusdam etiam primariis viris tum patriciis indidem, tum externis, prava animi affectione ac vitio laborantibus, non sine copioso fructu, spiritualium Exercitiorum expertæ virtutis medicinam adhibuit. In iis Didacum Guiam, & Stephanum germanos fratres e præcipua nobilitate Cantabrię, sibi quondam Compluti familiariter notos, ac tum Hierosolymis redeuntes, earundem commentationum

num beneficio tantam ad rerum divinarum intelligentiam, & humanarum contemptum adduxit; ut omnibus divitiis, & honoribus abdicatis, CHRISTI consilia omnino sequi decreverint. Atque hos imitatus est postmodum Baccalaureus Hozius item Hispanus, Theologiæ peritus: qui quum ad easdem cōmentationes peragendas valde propensus esset, veruntamen ex quibusdam iniquorum sermonibus haberet suspectam IGNATII doctrinam, ac dogmata; demum de IGNATIO exercendum, atque colendum ita commisit; ut multos in cubiculum, quo secessit, secum afferret libros, quibus IGNATII dicta scriptaque ad sanctorum Patrum, & Conciliorum trutinam expenderet. Sed ubi appositas ab IGNATIO epulas gustavit; tantum absuit, ut in iis veneni deprehenderit quidquam; ut etiam ardenti quodam rerum cœlestium amore inflammatus, mortalibus commodis nuncium sponte remiserit: atque ultro ad IGNATII voluntatem, & vitæ rationes adhæserit. Ex Veneta vero nobilitate in primis eo secessu, ac meditatione profecit Petrus Contarenus Zachariæ filius, is qui

qui multo post, magna cum integritate, ac sanctimoniarum laude Paphensem Episcopatum administravit. Sed & aliorum ex IGNATII consuetudine insignis vitæ morumque mutatio est consecuta. Quæ, quoniam nec ab obscuris hominibus, & in oculis celeberrimæ civitatis fiebant; brevi ut aliis locis antea, sic tum Venetiis IGNATII pietas in crimen, invidiamque vocari cœpta, non ferente diabolo tantam sibi prædam e faucibus eripi: statimque vulgatum ab ejusdem emissariis est, IGNATIUM pravitatis hæreticæ semel iterumque convictum in Hispania, elapsum e custodia, in Galliam profugisse: ac proinde ejus effigiem ab Hispanis Inquisitoribus ignominiarum causa publice concrematam. Eundem Parisiis novas res molientem, inficientemque perniciosæ doctrinæ labe scholasticos, ubi delatum suum nomen ad sacra tribunalia odoratus fuisset; fuga prævertisse lictorum manus, & consilia Magistratuum. Quas criminationes IGNATIUS quum nō modo in vulgus iniquorum opera sparsas, verum etiam ad Legatum Apostolicum Hieronymum Verallum, qui deinde

S.R.

LIBER SECUNDUS. 141

S. R. E. Cardinalis fuit, delatas inaudisset; non tam de sua, quam de sociorum existimatione sollicitus, ultro ad Legatum adiit, & acriter institit, ut eorum criminum quæstio exerceretur. Quod ita factum, & veritate comperta, honorifice a Legato est absolutus, incumbente in ejus causæ cognitionem Gaspare Docto, Legati assecla: qui ex eo tempore **IGNATIUM** unice dilexit, ac sacratissimæ domui Lauretanæ deinde præpositus, in Societatem universam plurima egregiæ voluntatis officia contulit.

*Venetias ad Ignatium socii
veniunt. Cap. III.*

DUm hæc in Italia gerit **IGNATIUS**, interim bello inter Christianos ingravescente Reges, cum exercitu formidabili Cæsar per Insu-
brū, & Allobrogum fines in Galliam irruerat. Ea fuit sociis **IGNATI**
II causa & profectionis maturandæ, & itineris per Thuringiam, seu Lotharingiam, atque Germaniam, sane incommodo anni tempore faciendi. Igitur pecunia, rebusque omnibus præter viaticum,

cum, & scripta, in CHRISTI Domini gratiam distributis, mense Novembri, anno circiter post discessum IGNATII, suo quisque baculo innixi pedites viam capeffunt: & quidem tanta cum alacritate, ac fervore spiritus, ut ne a Jacobo quidem Laine viribus nondum e recenti morbo recuperatis, extorqueri potuerit quominus & pedibus ambularet, ut reliqui, & inter ambulandum insuper invalida membra discruciaret hispida in primis & horrenti cilicio. Vestitus erat omnium, ut peregrinorum & pauperum, nequaquam elaboratus & ad modestiam submissionemque compositus. Pendebat e scapulis mantica ex corio, in qua sacra Biblia, & Breviarium asservabantur, & scripta, quæ diximus. Rosaria vero ad Catholicam fidem vel inter ipsos hæreticos profitendam, palam gestabant e collo suspensa. Hospitium ingressi, primum omnium nullo adstantium respectu, nixi omnes genibus Deo gratias agebant; eundem in egressu pariter sibi propitium precabantur. Sobria, & frugalis erat mensa; oratio, ac meditatio non solum in diversoriis, verum etiam in ipso itinere plurima.

Sa-

LIBER SECUNDUS. 143

Sacerdotibus, qui tres erant, sacrificantibus, cæteri quotidie cœlesti reficiebantur pane. Sermo, nisi de rebus divinis, aut necessariis, fere nullus. In decernendo, si quid in deliberationem incideret, mirâ concordia; in superandis viarum difficultatibus, periculisque summa constantia, & æquitas animi. Autumnales pluvias tota fere Gallia pertulerunt: occurrere mox Alpes pene obstructæ nivibus: multa fuere subinde famis, frigoris, defatigationis incommoda subeunda: nihil se illis objecit tam arduum, aut tam extimescendum, quod eorum quenquam a conceptâ religione, officioque deduceret. Atque hac disciplinæ, pacisque custodia quum omnibus, per quorum fines transierant, populis, bonus odor in CHRISTO fuissent; cunctis non catholicis modo, sed etiam hæreticis novum, ac religiosum agmen magna cum approbatione mirantibus, ad tertium idus Januarias anni M.D.XXXVII. Venetias ingenti omnium gaudio, & mutua gratulatione sospites ad IGNATIUM pervenerunt. Atque ubi paululum e longa contentione, ac lassitudine quietis est captum; statim Hierosoly-

solymitanæ provinciæ consilia renovantur. Primum omnium, rati gratiora Superis fore sua studia, si ad ea summi totius Ecclesiæ Pastoris auctoritas, & consensus accederet; simul atque hyems remitteret, tunc vel maxime sæva, Romam ire constituunt, & a Pontifice maximo jus tum ad sacros ordines titulo voluntariæ paupertatis; tum ad mansionem Hierosolymitanam, & prædicationem Evangelii sine ullo interdicti metu suppliciter petere. Interea Venetiis ne cessarent, atque adeo ut quædam quasi rudimenta futuræ militiæ ponerent, publicis valetudinariis inter se distributis, ægros, ac pauperes omni ope adjuvare institerunt: Confessionis, & Eucharistiæ sacramenta gratis ministrare, qui per sacerdotium poterant: cæteri solari jacentes, afflictos mœrentesque spe cœlestium bonorum erigere, adesse animam agentibus, cunctos denique ad patientiam, fidemque adhortari: nec modo spiritualibus officiis fungi certatim; sed ne vilissima quidem ac servilia, corporibus pauperum curandis, defugere ministeria: sternere lectulos; everrere for-

sordes; purgare scaphia; cadavera defunctorum rite curata humi condere; interdium pariter, nocturne omnibus præsto esse tanta cum alacritate, ac diligentia, ut cuncti obstupescerent: vulgatoque rumore, principes etiam viri ad spectaculum convenirent. Quibus in officiis quum aliorum omnium, tum Xaverii præcipue charitas, ac virtus enituit. Is quum in quendam incidisset morbo gallico misere deformatum, atque ad ejus adspectum exhorruisset; ut ea re infringi, ac debilitari sensit charitatem in proximum; ita repente in semetipsum excanduit egregius CHRISTI miles; ut manantem saniem ex ulceribus purulentis (cujus rei vel mentione aures delicatæ refugiant) obfirmato animo semel iterumque non dubitarit exfugere. Qua re non modo seipsum in præsentia præclare vicit; sed etiam in omne tempus propriam quandam, atque perpetuam in elephantiacos, atque ulcerosos clementiam, & misericordiam est consecutus: quam deinde ubicunque terrarum fuit, quotiescunque se dedit occasio, diligenter exercuit. Quidam etiam e socio-
rum numero, pauperem lepra toto

corpore coopertum quum præfectus nosocomii non admitteret, in suum lectum accepit ipse: quumque mane surrexisset, cunctis ingemiscientibus, eadem ipse quoque morbi fœditate correptus; postridie non sine miraculo prorsus illæsus, atque intactus apparuit. Hæc & alia ejusmodi veræ pietatis, & officii documenta quum in ea urbe dedissent (quorum ibi grata in multos annos deinde memoria viguit) appetente jam vere, uti condixerant, Romam cuncti fere præter **IGNATIUM**, discessere. Ipse tum ad parta in Domino retinenda, tum ad expedienda, quæ ad navigationem pertinerent, ibidem interea substitit. Atque illi quidem eadem fere disciplina, quam supra diximus, iisdemque imbrium difficultatibus, iter ingressi; ad superiorem parsimoniam, ac frugalitatem illud etiam addidere, ut neque ullo prorsus viatico, divinæ tantum providentiæ, bonitatisque fiducia, Romam usque contenderent: & quia tum Ceneralium, seu Quadragesimæ tempuserat; quotidie, quanquam in tantis laboribus, ritu catholico jejunarent. Nec sane defuit illis & exercendæ spei, & **CHRISTI**

STI Domini inopiam, ac perseverantiam aliqua saltem ex parte imitandi materies : acciditque aliquando ut, quum panis duntaxat frustulum singuli mane sumsisissent ; imbre densissimo stagnantibus late campis , ut alicubi pectore tenuis aqua pertingeret ; nullo preterea cibo, millia passuum ferme triginta nudis pedibus uno die peregerint : & quidem incredibili non modo tranquillitate animi, sed etiam hilaritate psallentes . Diversoriis vero quum propter inopiam excluderentur, & ad publica xenodochia de more confugerent ; quamvis oppido lassi, tamen iis, quæ supra diximus, charitatis muneribus fungebantur : seque ipsi domare, ac vincere magis magisque nitebantur in dies . Sane Ravennæ quidam ex iis quum hospitalis lectuli sordes, ac manantia tabe stragula nauseabundus vitasset; quæ prima deinde occasio data est suimet puniendi , non pretermisit . In pago nescio quo pauper phthiriasi consumtus e vita migraverat . Quum in eum pagum nostri venissent, distributisque cubilibus nullum jam superesset, nisi quod phthiriacum foverat ; Pater ille amissam nuper pal-

nam recuperare vehementer lexoptans, nudus illico per summum animi ardorem easdem subiit ledices: ibique sese identidem versans, quum ingentes animalium greges ea tota pavisset nocte; ad sudorem usque defatigatus, non leves ab se prioris fastidii, ac deliciarum pœnas exegit. Denique sanctam Urbem ingressi, ut sacra Apostolorum limina, & præcipuæ religionis templa caste obierunt; a Petro Ortizio Hispano, Cæsaris procuratore ad Pontificem maximum introducuntur. Is erat eo tempore Paullus III. e gente Farnesia, cujus nomini plurimum utique nostra Societas debet. Consueverat autem super mensam non fabulatores, aut mimos inducere, sed præstantes Philosophos, atque Theologos: & ipsemet veritatis indagandæ, atque illustrandæ causa ponere, de quo inter se disputarent. Ea erat gravissimi senis, & prudentissimi Principis oblectatio. Ad has ergo disputationes post pedum oscula Patres adhibiti, quum egregium quæ Christianæ humilitatis, atque modestiæ, quæ eruditionis, & ingenii specimen præbuisent; non modo quæ volebant de sacerdotio, deque Hiero-

soly-

folymitana provincia, libente atque approbante Pontifice, impetrarunt; sed insuper pecunia ab eodem instructi, & fausta cum prece dimissi sunt. Ad quam deinde pecuniā quum e nationis maxime Hispanicæ collatione accessisset, quod aureorum amplius ducentorum summam expleret; focii ne quid ex eo viatico præterquam in usum votivæ navigationis attingerent; apud mensarios pecunia omni deposita, & Romæ victum emendicantes, admirabile dedere spectaculum iis, qui coram Pontifice differentes illos audierant: & deinde, quemadmodum venerant, sic Venetias prorsus egentes, ac vacui reverterunt.

Sacris initiatur Ignatius: & de rebus ab eodem, & sociis in Veneta ditione gestis.

Cap. IV.

POST hæc, diligenti adhibita præparatione, quum ad ejusdem Legati Veralli pedes perpetuæ paupertatis, & castimonie nuncupassent vota; divini amoris igne succensi, mirante, ac majorem in modum approbante populo, sese denuo ad pristinos illos

labores, & assidua pauperum ministeria retulerunt. Deinde in exitu mensis Junii Divi Joannis Baptistæ die natali IGNATIUS, & reliqui per omnes ordinum gradus ad apicem sacerdotii a Vincentio Negosantio Fanensi, Arbensium Episcopo evecti sunt, tanta non modo ipsorum, sed etiam ipsius Episcopi lætitia, & animi voluptate, ut se inter ejusmodi cæremonias nihil unquam simile sensisse affirmaret. Interea Patribus neque in eam diem ulla fuerat in Palæstinam transmittendi facultas; & eo ipso tempore quum grave bellum ex fœdere Christianorum Principum, Venetos inter, & Solymanum Turcam exarsisset; sublato repente, commercio, omnis non modo peregrinorum sed etiam institorum navigatio conquievit: ut satis appareat, cœleste Numen iratum gentibus iis, quæ creditum sibi regnum Dei per summum olim scelus, negligentiamque amittere; Apostolicum hunc, devotumque sibi manipulum in alias longe nationes, atque provincias justo jam ante judicio destinasse. Itaque propter eam, quam dixi, causam spe trajectiendi sublata, quanquam voti
reli-

religione soluti videri propemodum poterant; tamen, ne quis omnino scrupulus animis insideret, finem anni vertentis, uti Parisiis ante decreverant, prorsus exspectare, seque interim tum ad sacerdotii primitias divinæ majestati libandas omni diligentia comparare; tum etiam post multam præcationem, & abstinentiam, proximis operam ex instituto navare constituunt. Id quo liberius, atque commodius facerent, ex tantæ urbis celebritate, ac frequentia in finitima ejusdem ditionis oppida alio, atque alio recepere sese; ut, si forte (quod tamen in præsentia vix fieri poterat) bello sedato, præter opinionem transitus patuisset; e propinquo Venetias cuncti simul accurrerent. Franciscus ergo Xaverius, & Salmeron ad Montem Celsum (id vico nomen ab urbe Patavio millibus passuum fere xv.) secessere; Joannes Codurius, & Hozius Tarvisium; Claudius Jajus, & Simon Rodericus Basfanum, oppidum agri Patavini; Paschasius, & Bobadilla Veronam; **IGNATIUS** vero, Faber, & Laines, quum Vicetiam petiissent, hanc vitæ rationem iniere. Erat extra urbem

muncula ruinosæ, & deserta, nullis foribus, aut fenestrarum obicibus, vento cuilibet pervia. Id sibi diversorium, necui molestiam exhiberent, atque ut ab urbano strepitu remoti liberius uni Deo vacarent; memores insuper stabuli, quod Regem ipsum Angelorum nostra causa nascentem olim exceperat; unanimes delegerunt, quotidianis muneribus ita inter se distributis, ut unus ad custodiã diversorii, & paucula victus ministeria remaneret (qui ferme erat IGNATIUS, quod propter nimiam lacrymarum copiam graviter ex oculis laboraret) reliqui duo urbem ingressi, cibum in singulos dies emendicarent: quod ab ea functione superesset otii, totum, id omnes cœlestium rerum contemplationi, & prædicationi tribuerent. In hoc vitæ genere quum quadraginta jam dies non minori cœlestium donorum copia, & animorum voluptate, quam corporum vexatione, & carnis incommodo perstitissent; quanto nimium spatio temporis, CHRISTUM ipsum Dominum, ac Magistrum, antequam turbæ sese committeret, abstinuisset cibo, & in eremo cum bestiis latitasse meminerant; ad
 eos

eos revifendos Tarvifio repente Codurius adfuit . Cujus accessu læ i , quum spiritus vehementiam ex ea solitudine , affiduitate precandi , jejuniisque conceptam , diutius cohibere non possent ; ad CHRISTI gloriam ex umbra in arenam prodire , & quæ divinitus acceperant bona , cum proximis communicare constituunt . Nec mora : Vicetiam ingressi , descriptis inter se celeberrimis oppidi partibus , eadem omnes hora de rebus divinis ad populum dicere incipiunt , nullo prorsus aut loci apparatu , aut pompa verborum . In triviis , plateisve , prout cuique locus obtigerat , defumto ex aliqua forte officina scamno pro suggestu utebantur . Populum elata voce , & in gyrum acto supra verticem pileo ad concionem invitabant . Sermo , ut peregrinorum , & hospitem , ex variis linguis fere mistus , ac minime proprius . Veruntamen is erat orationis impetus , adeo graves , ac veræ sententiæ , tanta in omni gestu , atque habitu pietas , denique is ardor in oculis emicabat ; ut peritissimus quisque rerum æstimator hos demum esse Christianos concionatores , germanosque præcones Evangelii

gelii dictitaret : multi etiam , qui rei novitate illecti cum cæteris initio per jocum , lasciviamque ludibundi confluxerant ; prudentissimis eorum præceptis , & dicendi gravitate permoti , deposita paullatim petulantia longe alii , quam accesserant , dimissa concione recederent. Quod si quis deinde seorsum ad Patres adiret veritatis , & officii studiosior ; hunc vero humanissime acceptum , pro ipsius ingenio privatis institutionibus ad omnem virtutem , ac religionem informabant . Illud vero præcipue rem adjuvabat , quod neque inanes plausus , ut diximus , sacata oratione captarent ; neque inter ipsam concionem , aut ubi peroratum esset , quanquam in summa rerum omnium inopia , quidquam a circumfusa multitudine vel peterent ipsi , vel etiam ultro delatum acciperent . Brevique constare cœpit , paupere tecto , ciboque contentos ; & ab omni avaritia , & vanitate abhorrentes ; non aures populi scalpere ; sed vulneribus omni ratione mederi : nec suum potius , quam Dei , proximorumque negotium agere . Neque haud sane dissimilis fuit cæterorum Patrum in sua cujusque pro-

provincia probitas, & industria, ut etiam aliqui ex magnis laboribus, & incommodis extremum adierint vitæ discrimen. Neque ita multo post, quum evocati ab IGNATIO, ut de rebus communibus agerent, cuncti Vicetiam convenissent; tanta animorum inclinatio, ac benevolentia populi Vicetini erga peregrinos apparuit; ut qua nuper in urbe tribus duntaxat cibarii panis, ac fere mucidi quotidiana vix circuitione colligebatur, quod satis esset ad vitam ægerrime tolerandam; in eadem ipsis jam undecim ex voluntariis civium eleemosinis omnia ad victum cultumque necessaria large, ac benigne suppetere. Ibidem igitur primas divinæ majestati hostias immolavere novi sacerdotes, uno IGNATIO excepto, quippe qui ad se comparandum amplius adhuc temporis sibi sumferat: & Romæ postea sacrificandi fecit initium ad ipsum Præsepe, & incubula CHRISTI Domini, quæ in æde sacratissima Beatæ Mariæ ad Nives religiose coluntur.

*Ignatio Romam appropinquantī
CHRISTUS apparet: &
unde Societati JESU
nomen inditum fuerit.
Cap. V.*

ET quoniam expeditioni transmarinæ præfinitum anni spatium erat in exitu, & infestum adhuc classibus mare; quid proinde agendum esset, Patres inter se deliberant: nec dubium fuit, quin, uti Lutetiæ voverant, cuncti sese ad fidei Catholicæ propagationem, & animarum auxilium, Sedis Apostolicæ cultui, & Romani Pontificis obsequio manciparent. Cujus officii procuratio (quoniam satis id esse videbatur) IGNATIO, & duobus primariis Patribus, Fabro, & Laini mandata est: Romam adirent, & (quod bene verteret) CHRISTI Vicario hæc sociorum studia, ac vota quamprimum exponerent. Interea reliqui, ne conceptus & diuturna meditatione, & sacrificiis fervor, ac spiritus evanesceret; non modo seipsi diligentissime custodire, sed etiam præsidii divini fiducia proximis omni ratione opitulari decernunt.

Ac

Ac præcipuis urbibus inter se descri-
 ptis, præsertim in quibus literarum
 studia florere, & frequentissimam ju-
 ventutem versari cognoverant; Co-
 durius, Hoziusque Patavium, Ro-
 dericus, & Jajus Ferrariam, Xaverius,
 & Bobadilla Bononiam, Paschasius,
 & Salmeron Senas profecti, eadem
 ferme ratione, quam paullo ante
 Vicetiæ adhibitam diximus, & pri-
 vatim, & publice cum hominibus
 agere, eosque e lethali flagitiorum
 veterno excitare, atque ad contem-
 tum rerum mortalium, & cogita-
 tionem futuræ seculi omni conatu,
 atque artificio impellere, atque ad-
 hortari cœperunt. Quumque ipsa no-
 vitate rei omnium in se oculos, at-
 que ora vertissent, paucis mensibus,
 Deo adspirante, non modo id effe-
 cere, quod maxime optabant, ut ma-
 gni animorum motus, & insignes ad
CHRISTUM conversiones existe-
 rent; sed etiam, quod minime labo-
 rabant, ut ipsorum nomen, ac fama
 Italiã fere totam ingenticum admir-
 muratione pervaderet. At **IGNA-
 TIUS** Romam, duobus, quos dixi co-
 mitibus, recta contendens, & ab eo-
 rum altero quotidie corpus **CHRIS-
 TI**

STI religiose, casteque suscipiens, MARIA Virgine potissimum præfide, atque adjutrice, sese ad sacrum suo tempore faciendum, ac multa pro CHRISTI nomine subeunda, dies noctesque simul intenta quadam animi cura, simul inæstimabili spiritus dulcedine, & nova divini luminis copia præparabat. Etenim ex quo primum Hierosolymis rediens ad litterarum studia in CHRISTI gratiam animum adjecerat; de rerum cœlestium contemplatione, ut diximus, non sine magna difficultate remiserat multum: seque ipse Domini charitate spirituali consolationi, deliciisque sponte subduxerat. Sed studiorum exacto curriculo, deinceps & Venetiis, & in Vicetino secessu, & in hoc, de quo dicebamus, itinere tam crebra divinitus lumina, tam liquidas animi voluptates, eadem scilicet Virgine favente, percepit; ut in antiquum statum illum Minoreffanum (quem postea ob singularem & eximiam illius temporis in se Dei benignitatem religioso joco primitivam suam Ecclesiam appellare consueverat) non solum ex integro, sed etiam cum fenore sibi restitutus esse videre-

re-

retur . Sed præter cætera, quæ , quod mortalem naturam exsuperant , verbis exsequi difficillimum est ; quo die Romam accessit , rese ei contigit vel ad memoriam posteritatis insignis, vel ad confirmandum in proposito **IGNATIUM**, cæterosque haud mediocriter efficax . Etenim orandi causa non longe ab Urbe templum ingressus, qualia passim imposita militari viæ cernuntur ; statimque , ut sæpe solebat , abstracto a sensibus , atque alta quadam animi contemplatione defixo clarissima in luce per speciem illi sese Deus Pater ostendit , **JESU** Filio bajulanti crucem, & crudelissimis affecto suppliciis præsentem **IGNATIUM**, sociosque commendans: quos ille quum in fidem, ac patrocinium libentissime recepisset, ad **IGNATIUM** placido, & sereno vultu conversus, hæc ipsa effari verba dignatus est : **EGO VOBIS ROMÆ PROPITIUS ERO** . Quo tanto, tamque divino solatio mirum in modum erectus , & confirmatus **IGNATIUS**, ac socios deinde compellans: quid nobis, ait, Romæ futurum sit fratres , in crucemne, an in rotam agi nos velit Deus, ignoro . Unum scio, quidquid eveniat , **Jesum Christum**

no-

nobis propitium fore: ac simul totius visionis ordinem exposuit. Quæ res non in præsentia tantum illos insolita quadam lætitia, & voluptate perfudit; sed etiam in posterum contra omnes difficultates, atque pericula magnopere corroboravit, ac muniit: atque idipsum vel in primis fuit causæ, cur IGNATIUS confirmatæ postmodum Societati salutare potissimum JESU nomen indiderit. Quam tamen deinde verbo, scriptoque minimam vocare solitus est; quod reliquis Religiosorum familiis (quas item Societates JESU licet optimo jure appellare) cunctis omnino tum de splendore, tum de antiquitate concederet.

*Ignatius Romæ Christianæ rei
dat operam: in Casinati
monte animam Hozii
cælum intrantem
videt.*

Cap. VI.

Igitur tam secunda Numinis voluntate, tamque liberali promisso mirum

rum in modum læti, sic tamen, ut non sine mysterio CHRISTUM Dominum crucifixi maxime habitu apparuisse apud se reputarent, cum gratiarum actione, ac prece sanctam Urbem ingressi, nihil antiquius habere, quam ut viatici nomine sibi numeratam anno priorē pecuniam, quoniam quidem navigationis consilia in irritum cecidissent; prorsus ad nummum iisdem, a quibus acceperant, redderent: quæ, utpote sacra, in alios pietatis usus, & opera expendere. Deinde, quemadmodum ante convenerant suam, & reliquorum operam Pontifici Maximo in Apostolicis præcipue functionibus, citra honoris titulos, & dignitatis insignia, detulere. Neque aspernatus est pia Patrum studia Christi Vicarius: atque in præsentia, donec ejusmodi aliqua sese offerret occasio, iussit Faber & Laines in almo Sapientiæ Gymnasio sacras literas profiteri. Quo munere dum alter in Bibliis explicandis, alter in scholastica Theologia, ut appellant, pari cum eruditionis, ac pietatis laude perfunguntur, atque etiam sæpe coram ipso Pontifice de gravibus rerum

di-

divinarum quæstionibus disputant; interim IGNATIUS proximorum salutem de more operam navabat quum aliis artibus, tum vero spiritualibus præsertim exercitationibus, quippe ad curandas perturbationes admodum efficaci, virtutisque jampridem expertæ remedio: quibus ille per eos dies præter cæteram turbam insignes aliquot viros diligenter excoluit. In iis Gasparem Contarenum Cardinalem, gravissimum Senatorem, eundemque temporibus illis (quod ejus varia monimenta præclare testantur) ingenii & doctrinæ facile principem. Is IGNATII prudentia, & consuetudine usque adeo captus est, tantumque ejus præceptis, consiliisque profecit; ut qualem dudum optaverat animi regendi, moderandique magistrum, denique sese Dei beneficio nactum esse affirmaret. Idemque tradita sibi Exercitia (quod exemplum apud hæredes hodieque aservari perhibent) sua ipse manu perquam accurate descripsit. Hunc imitatus Cæsaris procurator (de quo supra dictum est) Petrus Ortizius Theologiæ doctor insignis, easdem exercitationes ad CHRISTI Domini gloriam, & suam

suam salutem omnino experiri constituit. Id quo liberius simul, & fructuosius faceret, procuratione interim vicariis delegata, cum paucis quotidianæ vitæ administris, & **IGNATIO** Præceptore in montem Casinatem secessit: quo in monte antiquissimum, & nobilissimum cernitur Sancti Benedicti cœnobium. Ibi, remotis arbitris, maxima diligentia dies ipsos quadraginta piæ meditationi ex **IGNATII** præscripto vacavit: idque tanto cum animi fructu, tantaque accessione virtutis, ut quanquam Christianam philosophiam multo ante professus, tamen se tum demum vere philosophari cœpisse fateretur. Accusarum abfuit, quin grandis jam natus, & Imperatoris Legatus, illico mortalibus rebus abjectis, magno animo sese ad laboriosum **IGNATII** vitæ genus adjungeret. Sed quum id neque per ætatem liceret, neque per incepta negotia; certe quod proximum fuit, egregie præstitit, ut & santimonix, ac pietatis exemplo in posterum sui ordinis hominibus præluce-
ret, & Societatem deinde nostram quibuscunque posset rebus, perquam studiose ornaret, atque defenderet. Non
omit-

omittenda videtur hoc loco res memorabilis, quæ **IGNATIO** in illa Cafinati commoratione divinitus accidit. Dum enim pro salute Baccalaurei Hozii, quem graviter ægrotare cognoverat, Domino supplicaret; repente vidit in spiritu (quod ipsum ibidem Divo Benedicto fertur olim in obitu Germani Episcopi contigisse) animam focii luce clarissima radiantem, deducantibus Angelis in sublimem ferri, atque ipsa demum cœli beatissima regna conscendere. Eidemque **IGNATIO** paullo post, quum ad aram sacrificaturus accederet, in ipso Missæ introitu, Sanctis omnibus rite appellandis, lucidissimum cœlestium agmen subito apparuit sic, ut in iis Hozium eximio fulgore micantem sine ulla dubitatione dignosceret. Qua ex utraque visione tanto est gaudio delibutus, ut multos dies præ dulcedine lacrymis temperare nequiverit. Huic Hozio Patavium (ut diximus) provincia nuper obtigerat. Ubi dum in officio singulari cum industria, & fide versatur, ex ipsa rei novitate suspectus, & conjectus in carcerem ab Antistite Patavino, moxque ab eodem dimissus perhonorifice fuerat.

fuerat. Quumque acrius denuo in proximorum salutem incubuisset; e magnis diurnis, nocturnisque laboribus lethali morbo correptus, ex hac vitamigraverat, quum aliismiræ cujusdā sanctimonix relictis indiciis, tum vero quod qui ante obitum subniger fuisset, ac vultu deformior, in ejusdem demortui facie tantus repente nitor, ac venustas apparuit; ut eo spectaculo Codurius consors provincix animum exsaturare, & præ læticia fletum cohibere non posset. Hujus igitur tam felici exitu majorem in modum gavissus **IGNATIUS**, e Casinate Romam una cum Ortizio peracta commentatione regrediens; obvium habuit in itinere Franciscum Stratam Hispanum, preclaræ indolis juvenem, sibi antea non ignotum: qui quum e cujusdam principis viri familia, pertæsus aulicæ vitæ, militandi causa Neapolim peteret; uno **IGNATII** congressu, atque sermone (quæ hominis erat in dicendo vis) a seculi stipendiis ad **CHRISTI** vexilla facili negotio traduci se passus est: ac variis deinde locis, ejusdem **IGNATII** missu, & Societati nostræ, & rei Christianæ universæ concionator egregius haud
me-

mediocriter profuit. Hoc igitur auctus commilitone Romam IGNATIUS revertit : ad quem deinceps aliquot etiam alii rebus gerendis idonei divino impulsu paucis diebus adjuncti sunt.

Romam Patres universi conveniunt : veterem plebis erudiendæ morem & frequentem usum Confessionis , & Eucharistiæ restitunt . Cap. VII.

QUÆ dum ardens CHRISTI amore diligenter agit IGNATIUS, interim Patres cæteri, sua quisque provincia bene gesta, Romam (uti decreverant) circa mediam Quadragesimam convenere. Is fuit annus post CHRISTUM natum M.D.XXXVIII. Tecto recepti sunt a Quirino Garzonio cive Romano, ad villam Minimorum Fratrum cœnobio proximam. Ibi in summa omnes egestate precario victitantes, cœmuni consilio ad rem Christianam pro viribus adjuvandam aggressi, permissuq; Antistitem varia Urbis templa sortiti, concionibus primum civitatem ad omne officium, atque virtutem

tutem vehementer accendere; deinde etiam veteri Ecclesiæ instituto plebem, puerosque Christiana catechesi (quæ jandiu obsoleverat) vicatim erudire institerunt. Ac licet pijs eorum studiis dæmon omni conatu se opponeret; tamen partim exemplo vitæ, partim assiduitate dicendi, hortandique, quum alia multa propediem afsecuti sunt, tum vero præcipue ut sacræ Confessionis, & Eucharistiæ frequens usus (quo nihil est humano generi salutaris) diaboli fraude jampridem extinctus, magno utique Christianæ Reipub. commodo in principe, magistraque orbis terrarum Ecclesiæ revivisceret. Ex quo deinde paulatim effectum est, iisdem scilicet adiutoribus, non solum ut in Italia, Gallia, Hispania, cæterisque catholicis Europæ regionibus, verum etiam ut in ipsa India, atque adeo in ultimis terris, ubi paullo ante ferales dæmonum dapes, & nefaria sacra viguerant, jam nunc, ingenti bonorum gaudio, per pœnitentiæ sacramentum frequenter elutis animi fordibus, divina passim convivia celebrentur.

*Falsis criminibus circumvenitur
 Ignatius, & absolvitur.
 Cap. VIII.*

QUÆ nimirum satanas futura præfagiens, ipsis rerum initiis per se, suosque satellites obviam ire non distulit. Augustinus quidam erat ex Eremitana familia concionator prorsus indignus eo nomine, atque ordine. Is Lutheris impii sectator occultus, per ambages identidem pernicioſa dogmata spargebat e pulpito: ac miris artibus auditores a recta in Deum fide, atque a Romani Pontificis auctoritate sensim abducere conabatur. Id autem eo fidentius, quod per eos forte dies Pontifex aberat, maximis de rebus, quæ ad salutem Ecclesiæ pertinebant, in fines Galliarum Narbonensis Nicæam usque profectus. Hanc rem odorati Patribus quidam, ne ad perniciem animorum latius manaret; communi consilio totam ipsi cognoscere, atque investigare non dubitant: ad eum concionatorem audiendum cum cætera multitudine semel iterumque conveniunt: quæ ratio disputandi sit, qui

qui scopus totius orationis, diligenter attendunt. Neque vero, peritos dogmatum, quæ per id tempus in controversiam vocabantur, diabolici ministri fefellit astus, ac latens lupi sub ovæ pelle rapacitas. Itaque satis jam comperta, atque explorata re, primum ex Evangelii præceptis privatim ad hominem adeunt: quid ad se delatum, quid auribus ipsimet suis deinde perceperint, iis potissimum verbis exponunt, quibus non de populi modo salute sese, verum etiam de ipsius, qui populum pestifera contagione inficeret, pro Christiana charitate sollicitos esse demonstrent: rogant, hortantur, denunciant, prava dogmata corrigat, ambigue dicta, quæque ad contemptum Sedis Apostolicæ, & Ecclesiasticarum traditionum, ac rituum facile trahi possint, ad Conciliorum decreta, normamque sinceræ fidei quamprimum interpretetur: utique a depravanda Romana civitate, atque a perturbando ipso veritatis fonte in posterum abstineat. Ille (qui factus hæreticorum est) homines nimirum idiotas ex habiturus, eorum dicta primo elevare, & eludere; deinde ubi se variis argueri,

H

ac

ac premi argumentis, & rationibus vidit; versante animum simul ira, metuque, pauca præfatus, quæ ad occultandam in præsentia improbitatem valerent; cum inanibus promissis Dei famulos ab se dimisit. Deinde ut se a timore collegit, diabolicis actus furis, & amicorum opibus fretus, quos ille sibi multos, potentesque paraverat; ad institutam agendi consuetudinem pari scelere, atque impudentia rediit. Quod ubi sensere Patres, in re tam atroci, tamque periculosa nequaquam lenibus rati opus esse remediis, consilium cepere dignum hominibus divinæ gloriæ studiosis, dignum sacræ Theologiæ Doctoribus; ut improbi concionatoris mendacia palam, & ex superiore loco suis ipsi concionibus refutarent. Id ergo quum facere instituissent, bonis majorem in modum approbantibus; cognita re, Lutherianus vehementer excanduit; vocatissime ad se confestim amicis rabiem, doloremque suum impertiit, etiam atque etiam obtestans, ne tantam, ac tam insignem injuriam inultam esse paterentur. Illi & eadem laborantes opinionum insania, & magistri ignominia valde commoti, facta conspiratio-

tione, IGNATIUM, & socios omni dolo per fas ac nefas evertere, nec modo fama, sed etiam, si res procedat, vita spoliare constituunt. Primum igitur tota Urbe fictis criminibus dissi-
 sipant, IGNATIUM sociosque omni scelerum genere coopertos, tum in Hispania, tum in Gallia, quin etiam nuper Venetiis falsæ religionis, & probri, flagitiique damnatos, & elapsos e iudicum manibus, ad corruppendam juventutem specie pietatis Romam se contulisse: ibi, quod bonis artibus nequeant, id alios criminando, accusandoque per summam injuriam quærere, ut sibi apud imperitum vulgus famam sanctitatis, eruditionisque concilient. Quum aures nacti secundas, hæc, & alia id genus quam appositissime ad veritatis imaginem & per se ipsi, & per emissarios oppido sererent; tantam in invidiam, & odium brevi servos Dei adduxerunt, ut eos multi jam quasi facinorosos, ac fugitivos horrerent: ipsorumque congressum, & consuetudinem vulgo refugerent. Quumque jam res e sententia flueret; læti successu adversarii, præterea promissis ingentibus onerant, subornantque,

quī iisdem fere nominibus, quæ sparsa in vulgus fuerant; apud Urbis Præfectum insonites accuset. Has vero partes inexprabili scelere sibi desumfit Michaël Hispanus quidam, qui jam ante Parisiis in IGNATIUM debacchatus, ac deinde singularibus ab eodem IGNATIO lucrandi fratris mirabiliter cupido provocatus officiis, egregiam viri beneficiā (ut ferre fit) minime vulgari perfidia, atque impietate rependit: atque ut IGNATIUM, & socios familiariter nove-
rat, confectis quam maxime ad similitudinem veri criminibus, apud Præfectum sane magnā in suspicionem cunctos adduxit. Omnino res erat insigni infamia: nec modo in Urbe vulgi sermonibus terebatur; sed apud exterās quoque nationes, atque provinciās adversariorum nunciis, ac literis percrebuerat, IGNATIANOS cum suo capite, denique manifestorum scelerum, hæresisque convictos teneri: videlicet, ut quas noxii variis locis efugissent pœnas; eas justo Dei iudicio Romæ in celeberrimo totius orbis terræ theatro persolverent. Interea IGNATIUS totius machinationis nequaquā ignarus, fretusque tum præ-
claro

claro conscientiae testimonio, tum etiam CHRISTI promissis, qui se illi Romae propitium spononderat fore, omnes inimicorum impetus, totamque belli procellam invicto animo sustinebat: Deumque una cum sociis pro adversariorum salute precabatur assidue. Jamque causae dicendae tempus appropinquabat; quum incidit in ejus manus epistola, quam antea Michaël, recentibus quibusdam IGNATII meritis delinitus (quippe vel ferrea pectora interdum patientia, & charitate flectuntur) ad amicum nescio quem summa cum IGNATII, & sociorum laude perscripserat. Ea videlicet epistola delationis causam jugulavit. Nanque ubi judicii advenit dies, citato ad tribunal IGNATIO, multa in ejus vitam, ac mores improbe mentitus est Michaël. Ad quæ quum IGNATIUS admodum sedate respondisset; prolata ad extremum epistola, ac recitata, institit ab adversario querere nunquid earum rerum meminisset? num chirographum agnosceret? Tum ille re inopinata perculsus, victusque conscientia repente pallefcere, titubare, frigido sudore perfluere. Quod ubi animadvertit

Præfectus (is erat Benedictus Con-
versinus, vir prudens, & in causis
cognoscendis apprime versatus) con-
fessim suspicatus coitionem, ac do-
lum, data opera Michaëlem diligen-
ter interrogat; quumque non obscuris
vestigiiis ad ipsa fraudis cubilia per-
venisset; severum calumniæ vindi-
cem sese præbuit: ac multis verbis
increpitum calumniatorem (quan-
quam IGNATIO pro ipsius periculo
deprecante) insuper multavit exilio,
Post hæc IGNATIUS flagitare, & ur-
gere, uti conspiracy nesciæ prin-
cipes, quæ privatim in circulis, cœ-
tibusque jactarant, eadem coram Præ-
fecto palam, ac legitime expone-
rent, ut sibi diluendi crimina, & se
sociosque purgandi copia fieret. Misso
igitur viatore, vadimonium obire co-
guntur. At illi veteratores, & calli-
di, & quum in foro, judiciisque diu
multumque versati, tum etiam recen-
ti Michaëlis malo facti cautiores, ubi
ad tribunal adfuere, per summam dis-
simulationem se de IGNATIO ac
sociis & sentire quam optime, & ad
eam diem sensisse respondent: neque
ullum esse crimen, quod ipsi quidem
in eorum vitam, moresque conjiciant
Atque

Atque hæc , & alia ejusmodi coram
 judice : rati nimirum fore , ut IGNA-
 TIUS præclare secum actum existi-
 mans , quod imminens calumniæ peri-
 culū evasisset ; tam illustri præsertim ac-
 cepta satisfactione , proinde quiesce-
 ret . At ille multa , ac magna , quæ
 ad juvandam Ecclesiam pertinerent ,
 mente , ac cogitatione complexus ,
 veritusque ne , si quid suspicionis in-
 commodæ , aut si qua dedecoris nota
 nascenti Societati adhæresceret ; vel
 omnes in posterum ipsius conatus ir-
 ritos redderet , vel certe magnum re-
 bus gerendis impedimentum afferret ;
 a Præfecto etiam atque etiam pos-
 tulare , ne fictæ adversariorum pa-
 linodiæ fidem haberet : eos quippe
 alia tum sermonibus , tum per epi-
 stolas longe , lateque vulgasse ac quæ
 tunc ad tempus accommodata , judi-
 cii metu perterriti dixerint : quæ nisi
 a magistratibus rite cognita , & quæ-
 sita publice coarguantur ; malo vide-
 licet publico per summum nefas hæsu-
 ram in Societate magnam infamiam .
 Proinde jure se postulare , ut in sua
 dicta , vitamque omnem diligenter
 inquirat ; se suosque ad causam usque
 cognitam in vinculis habeat ; ac prout

re ipsa compererit , ita pronunciet .
 Hæc igitur , & alia id genus IGNA-
 TIUS . Contra adversarii , veriti ne , si
 quæstio perageretur , ingenti suo pe-
 riculo , ac damno paterent ipsorum
 artes , atque mendacia ; per se , suosque
 omni ope contendere , ac niti , ut
 Præfectus ab instituta cognitione de-
 sisteret . Jamque , utpote qui pluri-
 mum opibus , & gratia poterant , in
 suam sententiam non modo Præfe-
 ctum , sed Legatum etiam , qui Urbi
 pro Pontifice , summo cum imperio
 præerat , Cardinalem Neapolitanum
 adduxerant . Quin etiam ex ipsismet
 IGNATII sociis non deerant , qui ad-
 versariis jam a suscepta actione de-
 territis , & sponte cedentibus non
 ultra instandum , vitandas lites , paci,
 & quieti consulendum esse censerent .
 At vero IGNATIUS in posterum
 longe prospiciens , eoque judicio non
 tam suam , quam CHRISTI Domini
 causam agi prudenter animadvertens ,
 nullis neque minis , neque promissis ,
 nec suasionibus de sententia deduci
 se passus est . Quumque omni ad eam
 rem conatu non semel adhibito , pro-
 pter adversariorum gratiam , atque
 potentiam nihil plane proficeret ; non
 dubi-

dubitavit, consulto per sacrificia, precesque Deo, ad ipsiusmet Pontificis maximi fidem, opemque confugere: qui Nicæa per eos dies, adulta æstate redierat, & in Tusculano secessu valetudinis causa morabatur. Facili ergo ad Principem aditu, quo die venit, admissus IGNATIUS, Latino sermone (quippe qui nondum satis Italice nosset) eidem ex fide retulit, quo consilio a militari vita sese ad animorum auxilium, atque ad literarum studia transtulisset; ac dum rem Christianam pro virili parte administrat, quoties, quot locis, quibusve nominibus accusatus & absolutus fuisset. Nuper etiam ab Hierosolymitana peregrinatione bello prohibitum (quod Pontifex ipse non ignoraret) se, cæterosque ejusdem instituti, laborisque socios, qui se, vitamque suam ad Christianæ religionis amplificationem Sedi Apostolicæ mancipassent; quum maxime in Urbe Roma populum docere insistant; paratique in omnem quamvis arduam, atque longinquam expeditionem, ejusdem Pontificis reditum, nutumque avide præstolantur; circumventos repente iniquorum infidiis,

H s

diis,

diis , & summam in invidiam non modo in Urbe , sed etiam apud remotas nationes adductos , ne id quidem a magistratibus obtinere possent , ut , jacta in suos mores , vitamque crimina in cognitionem vocentur . Sibi quidem propriæ utilitatis , & nominis rationem (quamvis ea per se negligenda non sit) minus antiquam esse ; sed quoniam eodem judicio , & ipsorum existimatio , & animarum salus agatur (omnium enim , qui ad rem publicam accedant , rationes , non veritate solum , sed etiam fama niti) petere se , & orare , ne gravetur pro sua sapientia , ac potestate perficere , ut Præfectus Urbis inchoatam quæstionem primo quoque tempore peragat : ne in Urbe totius æquitatis parente , contra paucorum factionem , opesque , nullum inopiæ , ac solitudini præsidium fuisse videatur . Sub hæc audita Pontifex bono esse animo jubet IGNATIUM , & collaudata (quod antea fecerat) ipsius & sociorum industria , & pietate , Præfecto per codicillos imperat , judicium utique reddat IGNATIO , causam rite cognoscat , ferat-

feratque pro veritate sententiam. Equidem hoc loco adesse mihi animis velim eos, qui Deum res humanas negligentem circa cœli cardines otia-ri, non minus inepte, quam impie fabulantur. Ex iis quippe, quæ consecuta sunt, nemo sanus paternam cœlestis Numinis curam, ac providentiam in suos non clare perspi-
ciat. Quum enim tota adversariorum actio ea maxime calumnia niteretur, **IGNATIUM**, sociosque variis locis jure damnatos, ambustosque judicii flamma per dolum effugisse; quumque longum, & operosum esset, nemine præsertim necessaria in eam rem im-
pendia subcunte, ex tam remotis, disjunctisque provinciis rei gestæ se-riem literis consignatam, testibusque firmatam ex forensi formula petere; plane divinitus factum est, ut quot-
quot in Italia, Gallia, Hispania **IGNATII** judices exstitissent, sub ipsum ferendæ sententiæ tempus Ro-
mam fere omnes, alius alia de causa, convenerint. Joannes Figheroa, quon-
dā Archiepiscopi Toletani Vicarius, is, qui Compluti primum de **IGNA-TII** fama, capiteque cognorat; gravi-
bus de causis Neapolim a Cæsare
H 6 mis-

missus, in reditu commodum Romæ
substitit. Venerat eodem e Gallia
Parisiensis Inquisitor Matthæus Ori
Dominicanus; apud quem IGNA-
TIUS, ut supra dictum est, semel ite-
rumque ab improbis fuerat accusatus.
Denique in tempore Gaspar etiam
Doctus a Venetiis adfuit; qui habi-
tæ in ea urbe in IGNATIUM quæ-
stioni præfuerat. Hi omnes in judi-
cium adducti, adversariorum com-
menta detexere, cum summa testifica-
tione virtutis, ac pietatis IGNATII.
Præterea literæ civitatum, apud quas
Italia tota Patres aliquandiu vixe-
rant; per idem tempus allatæ, magnum
pondus ad illustranda ipsorum meri-
ta, & refellendas iniquorum calu-
mnias attulere. Jam vero Hercules
quoque, secundus hoc nomine Dux
Ferrariensium, qui Patribus familia-
riter usus, iisdemque peccata ritu
Christiano confessus, ex eorum etiam
manibus corpus Domini sumserat;
libentissime fecit non modo, ut per
epistolam, sed etiam ut per legatum
perspectæ ipsorum innocentia, ac san-
ctitati debitum testimonium, laudes-
que tribueret. Quibus rebus adductus
Urbis Præfectus, urgente præsertim
Pon.

Pontificis jussu, quanquam adversariis omni studio contra nitentibus; denique sua sententia IGNATIUM, & socios omni non modo culpa, sed etiam culpæ suspitione liberavit verbis amplissimis: ejusque sententiæ ad vindicandam insontium famam varias in provincias testato descripta exempla dimissa. Quibus ex rebus dici vix potest quantum Patribus ubique honoris, & existimationis accesserit. Atque hac maxime ratione diu suppressa atque occultata veritas extulit aliquando sese, ac malitia superata, processit in medium: quæque machinamenta diabolus ad teneram adhuc Societatem deformandam, atque adeo præfocandam artificiose paraverat; ea ipsa, moderante rem Numine, in ejus maxime decus, & incrementa cessere. At vero insidiatorum longe dissimilis fuit exitus. Nanque admister consceleratæ calumniæ Michaël, fraude patefacta (quemadmodum dicebamus) in exsilium actus est: e duobus vero (quos nominare hoc loco necesse non est) unus paullo post judicium gravi correptus morbo, semet acriter, ac dolenter incusans cum insigni facinoris detestatione diem obiit; alter

alter, quum deinde manifestis hæreticarum opinionum indiciis teneretur; mature sibi fuga consuluit, effigiemque suam pro se iudicibus cremandam reliquit; tertius eodem nomine comprehensus, & cognita causa, perpetuo addictus carceri, ad extremum tandem morte jam imminente, resistit: eidemque animam agenti quidam e Societate ad ultimum usque spiritum assedit; quæque illi tempori tribui solent, pietatis & charitatis officia præstitit. Porro Lutherianus ille concionator, qui totam conspirationem scelusque conflarat; intra catholicorum castra per fraudem aliquandiu versatus, quum religionis, ac pudicitiae simulationem ultra sustinere non posset; larva deposita, palam fidei, & continentiae bellum indixit, atque ad optata hæreticorum lustra popinasque se contulit.

*Ignatius, & cæteri Patres de
constituenda Societate de-
liberant. Cap. IX.*

HAC igitur falsæ accusationis procella IGNATIUS sociique defuncti, primum omnium (ut æquum erat

erat) ingentes & universi communit-
 ter , & singuli privatim egere divinæ
 clementiæ gratias; deinde , partim
 quod aliqui subinde ad IGNATIÏ in-
 stitutum aggregabantur; partim etiam
 quod inaudierant , aliquot e suo nu-
 mero varias in urbes, atque provincias
 jam tum rogatu Principum a sum-
 mo Pontifice destinari; visum est faci-
 endum, ut de stabilienda quam maxi-
 me ad Dei gloriam , salutemque ani-
 marum Societate primo quoque tem-
 pore inter se consulerent. Ad eam
 quippe diem , communitantum offi-
 cio , ac pietate ducti , sine certis & pro-
 priis legibus , ac magistratibus vixe-
 rant. Ergo precationibus , jejuniis ,
 & sacrificiis in eam rem quam accu-
 ratissime adhibitis , quotidianæ vitæ
 munera , laboresque ita partiti sunt ;
 ut diurna tempora Dei verbo , con-
 suetisque functionibus , nocturna vero
 privatis inter se colloquiis , & neces-
 sariæ consultationi darent. Prima
 igitur nocte quæsitum est , utrum
 Pontificis jussu digressi , prout se da-
 ret occasio , suam quisque sine alio-
 rum consensu , vel respectu rem age-
 re , an potius , quanquam corporibus ,
 locisque disjuncti , animorum tamen
 con-

conspiratione, & meritorum commu-
 nione, ut adhuc fuerant, sic in po-
 sterum conjuncti esse deberent. Di-
 ctisque sine variatione sententiis, nul-
 lum fuit dubium, quin tam suavis,
 tamque arcta societas, Dei prorsus
 munere ex tam diversis moribus, lin-
 guisque coalita, omni conatu, stu-
 dioque retinenda foret: tum nequa
 Spiritui Sancto injuria fieret, a quo
 divinitus fuerant in eam consensio-
 nem adducti; tum vero ne concor-
 diæ, atque unitatis bonum amitte-
 retur: quo nihil est ad res magnas,
 atque arduas moliendas, & obstan-
 tia quæque perrumpenda valentius.
 Quum hæc, & alia multa in eam sen-
 tentiam ingenti alacritate, & gaudio
 spirituali pro se quisque dixisset; ma-
 gnopere incensis ad mutuam charita-
 tem, & benevolentiam animis, cœ-
 tus ille dimittitur. Proximo deinde
 confessu de religione relatum est;
 placeretne ad vota duo Paupertatis
 Castitatisque rite suscepta tertium
 perpetuæ item Obedientiæ adjunge-
 re, & e suo corpore eligere, qui cæ-
 teris ampla cum potestate præesset.
 In eam rem, quod majoris momenti
 videbatur esse, diem proferri placuit,

spa-

spatiumque seorsum singulis ad deliberandum dari, atque interim instauratis precationibus, & sacrificiis divinæ sapientiæ lumen, opemque diligenter exposci. Ut igitur ejus consultationis dies advenit, omnium in unum congruere sententiæ; quandoquidem CHRISTUM Dominum, ac Magistrum sibi pro viribus imitandum cuncti susceperant; quoniam ille sese perfectum, atque integrum holocaustum Deo Parenti pro salute humani generis obtulisset; prorsus oportere, ut ipsi quoque pro suo modulo Christum effingerent: ac quemadmodum singulorum corporis bona per voluntariam inopiam, corpus ipsum per castimoniam Deo immolatum esset; sic animus quoque ante cœlestes aras per obedientiam spiritualis victima caderet: præsertim quum hoc sacrificio nullum divinæ majestati gratius, aut suavius esse constaret. Ergo sine controversia diligendum videri, cui omnes in terris, tanquam CHRISTO parerent; cujus in verba jurarent; denique cujus sibi nutum, ac voluntatem instar divini cujusdam oraculi ducerent. His ita constitutis, deinceps quæsitum de
hujus

hujus ipsius potestate ; utrum certo dierum spatio definitam, an vero perpetuam esse oporteret . Perpetuam esse placuit omnibus: idque quum alias ob causas, quas commemorare hoc loco necesse non est; tum vero ut negotia graviora , quæ ad conficiendum non modo plenæ libertatis , verum etiam longi fere temporis indigent; leniter, & ex animi sui sententia posset ad exitum sine ulla trepidatione perducere . Additum ad hæc, ut Societatis candidati quum aliis experimentis , tum vero præcipue spiritualibus exercitationibus, peregrinatione, & infimis publici alicujus valetudinarii ministeriis probarentur. Itemque , ut quicumque Societatis instituta profiterentur ; ii ad tria solennia vota , quæ nobis cum aliis dicatis Deo familiis fere communia sunt, quartum nominatim adjungerent; quascunque ad fidelium, vel infidelium terras Christianæ rei causa Pontifici maximo ipsos mittere placuisset ; eo sine ulla tergiversatione, atque adeo sine ulla non modo mercede , sed ne viatici quidem petitione proficiscendi : ac simul concepta verborum formula sese obstringerent puerili ætati per
ca-

catechesim erudiendæ: quod hoc remedio nullum ferme efficacius foret ad intemeratam fidem tuendam, ac pravæ religionis prohibenda contagia. Atque hoc maxime quarto voto a cæteris religiosis minima Societas nostra distinguitur. Hæc igitur, & alia id genus nonnulla per eos dies ab **IGNATIO**, Patribusque decreta sunt: eidemque **IGNATIO** negotium datum, ut ea in summam redacta Pontifici maximo primum Apostolica auctoritate sancienda, atque approbanda proponeret; deinde ut eadem ipse postea per otium fufius explicaret, ordinaretque: & quam accommodatissimas ad Societatis vocationem, & spiritum leges, canonesque præscriberet.

*Patres in varia loca Pontificis
jussu discedunt.*

Cap. X.

SUB hæc ferme decreta Pontifex Maximus aliquot operarios ab **IGNATIO** in varias agri Ecclesiastici vineas postulavit. Id nostræ Societati fuit Apostolicæ peregrinatio-

tionis exordium . Ennio Verulano, Sanctæ Romanæ Ecclesiæ Cardinali , per eos dies cum amplissima potestate legatio Parmensis obvenerat. Huic Pontificis jussu legationis comites, & rerum spiritualium administri duo, Petrus Faber, & Jacobus Laines ab IGNATIO dati: Senas vero in Hetruriam Paschasius ad instaurandam sacri cujusdam cœnobii disciplinam ab eodem Pontifice missus est . In Ænariam, seu Inarimem insulam , pacificationis gratia non levis momenti, Nicolaus Bobadilla; Brixiam in Cenomanos ditionis Venetæ Claudius Jajus gravibus item de causis abiit. Ac per id ipsum tempus etiam in extremas terras primum Societati patuit aditus. Brasilicam oram, & præterea quidquid inter inaccessum olim Bonæ spei promontorium, ultimosque Sinas interjacet maritimi tractus , Indo, & Gange superato , Lusitani armatis classibus ante annos aliquot ingenti ausu, & labore, æque fortiter ac feliciter aperuerant. Neque Joannem hoc nomine tertium Lusitaniæ Regem, insigni virtute, ac pietate virum ulla magis angebat cura, quam ut barbaras illas
natio-

nationes a misera dæmonum servitute ad unius veri Dei notitiam, cultumque traduceret. Atque ob id ipsum, quos in ea mitteret loca præcones Evangelii, & moribus, & eruditione præstantes, tota Europa impendio conquirebat. Ejus rei conscius Jacobus Govea, is, qui Parisiis in ipso virgarum periculo singularem IGNATIUM fidem, virtutemque ingenti cum admiratione cognorat; procul dubio statuit, illum, & socios ad Indicam expeditionem fore quam accommodatissimos: quoniam quidem ab Hierosolymæ accessu bello impediti, quemadmodum audierat, in Italia substitissent. Neque tamen quidquam ejus consilii ratus impertiendum Regi, antequam ipsius IGNATII voluntatem explorasset; pro amicitia ad Regem scribit, quam libente Lusitanæ Rege, quam spatiosus bonorum industriæ, pietatique campus in India pateat. Sibi quidem, quando illum, & socios ab Hierosolymitana curatione arceat bellum, sanctissimis ipsorum studiis provinciam in primis aptam videri. Si conditio placeat; alio semet apud Regem totius negotii fore interpretem pollicetur. Ad

ea cum gratiarum actione rescripsit **IGNATIUS**, neque se, neque socios esse jam sui juris; quippe qui summo **CHRISTI** Vicario semetipsi perpetuo nexu Obedientiæ mancipassent. Proinde agendum esse cum Romano Pontifice. Quidquid ille iussisset, id vero sine mora facturos. Quo accepto responso Govea, quum facile speraret a Pontifice impetrari posse; rem totam Regi suo per literas aperit: ipsumque exemplar epistolæ **IGNATII** ad eum mittit cum summis illius, & sociorum laudibus, etiam atq; etiam suadens, ut ejusmodi virorum opera potissimum utatur: neu tam præclaram occasionem elabi patiatur e manibus, cui similem fortasse nullam sit in posterum habiturus. Haud incassum adhibita hortatio. Quippe Rex & sua sponte jam incitatus, & Goveæ talis viri monitis, & auctoritate permotus, confestim Petro Mascarenia suo apud Pontificem Maximum Oratori mandat mox in Lusitaniam redituro, det operam ut quam plurimos ex **IGNATII** disciplina secum deducat, Evangelii causa mittendos in Indiam, eaque de re cum **IGNATIO** quamprimum agat: si res
cum

cum illo minus procedat; omni conatu cum ipso Pontifice tranſigat: utique ne ſine tali comitatu revertatur ad ſe. Hoc tam ſevero mandato Legatus accepto ſine cunctatione **IGNATIUM** convenit; ac pauca præſatus (ut fit) conciliandæ benevolentiae, mandatum ſui Regis exponit: Patreſque minimum ſex in miſſionem Indicam poſtulat. Ad quem ille ſubmiſſa oratione, tam honorifico Regis de ſe iudicio gratias quum egiſſet; eadem ferme, quæ ad Goveam reſpondit: quod ab ſe petatur, totum id e ſummi Pontificis voluntate, imperioque pendere. Qui tamen, ſi quid ego ſentiam, quæris (inquit **IGNATIUS** unum, aut alterum fortaiſſe tibi conceſſerit, plures vèro nequaquã. At ille quum nihilominus in eodem poſtulado perſiſteret, Dei fidem, & hominum teſtans, nuſquam operam collocari fructuoſius poſſe; tum **IGNATIUS**, quaſi futura præſagiens, familiari, ac placido vultu: Deus, inquit, meliora, clariffime orator, quippe ſi e tam exiguo numero ſex unam duntaxat in provinciam demas, quantulum, quaſo, reliquo terrarum orbi ſupererit?

erit? Neque tamen idcirco ille ab incepto desistit. Quoniam IGNATIUM flecti posse diffidat, ad ipsum adit Pontificem; narrat quid sibi ab Rege mandatum sit; suppliciter etiam atq; etiam obsecrans; ne in tam honesta causa, tamque pia frustrari se, Regemque suum concepta peropportuni subsidii spe patiatur. Hic Pontifex, quanquam lætus ab urbe Roma potissimum, ut par erat, peti sacri Evangelii nuncios, & insuper, tanto Regi, tamque de Romana Ecclesia bene merito gratificari vehementer exoptans; tamen, ut in tali negotio, ne videlicet servis Dei ad omne paratis obsequium abuti pro potestate videretur (qua erat lenitate, ac sapientia vir) audito Legato, rem ipsam probavit; de numero ad arbitrium rejecit IGNATII. Is proinde (sane quam ægre ferente Mascarenia, neq; tamen aspernante, quod datum est) post multas in eam rem fusas ad Superos preces, quemadmodum antea significaverat, duos duntaxat glorioso muneri destinavit, Simonem Rodericum Lusitanum, & Nicolaum Bobadillam: qui quum idcirco Romam evocatus, graviter ischiade laboraret,

neque Legatus Regius maturo jam reditu, exspectare diutius posset; ægro Bobadillæ, sibi que vicem ereptam dolenti Franciscus Xaverius repente sufficitur. Erat omnino laboriosa provincia, iterque longinquum: & quum fere nullam in spem reditus, tum vero in apertum pene quotidie vitæ discrimen. Sed quæ alios ab ejusmodi consilio retardassent, ea ipsa incitamenta fuere Patribus; quum se quisque tali sorte præ cæteris beatum existimaret. Ac Simon quidem parata in Lusitaniam navi celeriter antecessit: ac deinde Regis Lusitanæ jussu, procerumque rogatu, quamvis invitus, in eadem provincia substitit. Xaverius autem, ubi delatum ad eum est, confestim exsiluit gaudio: datoque sibi tempore, vix quod satis esset ad laceram, attritamque tunicam resarciendam, & salutandos fratres, cum Legato postera die profectus est, immortales agens Domino gratias, quod se denique voti compotem effecisset. Perpetuas quippe clades pereuntium ex ignorance Dei in ultimis regionibus, animarum, jam ante miserari, & messis potissimum Indicæ magnitudinem crebris consueverat usurpare:

sermonibus. Quin etiam per quietem non semel erat sibi visus Æthiopem in humeros sustulisse usque adeo ponderosum, ut ipsa oneris magnitudine excitaretur e somno mire defatigatus, membrisque omnibus dolens: continuoque rem omnem Jacobo Laini patefaciebat ejusdem cubiculi socio. Hæc igitur fuere nostris hominibus Pontificiæ missionis initia: Patresque in varia deinceps loca profecti, majorem in modum aucta Societate, institutisque supplementi causa tota ferme Europa collegiis, domibusve, res eas Deo duce, atque adjutore gessere; quæ proprio, & quidem justo volumine ipsæ per se ad enarrandum indigeant.

*Ignatius plebi fame periclitanti
succurrit. Cap. XI.*

NEQVE vero IGNATIO, & cæteris, qui remanserant Romæ, negotium defuit. Erat annus a Virginis partu M.D.XXXVIII: insignis annonæ caritate, ac per hyemem præcipue tanta frugum inopia, ut passim jacentes in publico pauperes frigore, fameque confecti, miserandum

dum in modum expirarent : Quo spectaculo commotus **IGNATIUS**, tantæ calamitati sibi omni ope subveniendum putavit . Jamque e Garzonii villa cum suis in Urbis frequentiora loca migraverat , laxiore sibi ab amicis domo conductâ ad circum Flaminium , in ea regione , quæ Sancti Angeli ad forum Piscarium hodie dicitur . In ejus igitur domus ampla cœnatione fœno , stragulisque dispositis , & in pauperum alimenta eleemosynis undique corrogatis , in omnes partes dimisit , qui in id hospitium , ut quemque periclitantem extrema inopia invenissent , vel inter manus , prout res ferret , vel gestatoria sella deveherent . Quum strenue curaretur , adhibitis etiam , ubi opus esset , adjutoribus , bajulisque ; brevi numerus decumbentium ad quadringentos ascendit . Hic vero , eodem **IGNATIO** præside ac duce , Patrum fratrumque sese charitas , ac virtus exercuit . Diluculo quotidie linteati omnes ad imperia accipienda præsto aderant . Inde ad sua quisque officia discurrere sine ulla perturbatione , vel tumultu : alii recens illatos pauperes clementer exuere , & calida

elutis corporum sordibus, in lectulo collocare; alii assidere languentibus, eosdemque amicissimis consolari verbis. Hi cibos aut domi excoquere diligenter, aut aliunde missos instruere; illi fercula inferre, & longa inedia propemodum enectis pretiosa instillare liquamina: hi cubilia sternere; illi scopis pavimenta purgare: denique certatim omnes munere suo ita fungi, ut præclare testarentur, in minimis illis agnoscere se Regem regum, & Dominum dominantium. Neque vero corpora solum egentium, sed animi quoque eadem opera curabantur. Plurimi quippe rudes, Christianæ doctrinæ præceptis probe instituti, multi a turpi quæstu, fraudibusque deterriti, & quod caput est, sacra omnes confessione expiati, ac pane cœlesti longo intervallo resecti sunt. Deinde, ut aliqui convalescerent, succedentibus invicem aliis, cum tegumentis ad frigus arcendum, & certo pecuniæ subsidio dimittebantur. Ea res per Urbem vulgata, magnam populi benevolentiam conciliavit IGNATIO. Atque ad eam Christianæ humilitatis, charitatisque officinam visendam interdum promiscua turba, noctu vero etiam viri

ri principes ventitabant : ac tanta fuit exempli vis , ut quidam , quum præfentes non suppeterent sibi nummi ; depositis illico in usus pauperum vestimentis , domum seminudi reverterint . Alii etiam sancta æmulatione incitati , ejusdem conditionis homines , quorū non deerat passim copia , hospitio susceptos benigne curarunt . Multi præterea proceres , in gloriosi operis perfectionem , IGNATIO pecuniæ summam ultro detulere non levem . Qua in re Margaritæ Austriacæ Caroli V . filia , Octavio Farnesio nuptæ Placentinorum , & Parmensium hodie Duci , pietas , ac beneficentia vel in primis enituit . Atque ejus pecuniæ , quum IGNATIUS intelligeret se vel maxima eorum qui contulerant , voluntate , partem aliquam in suas , & suorum necessitates erogare posse ; tamen tanta fuit religione vir , ut ne obolum quidem , nisi in externorum pauperum commoda insumserit , relatis in codicem accurate nominibus , ut omnium prorsus ratio constaret . Atque hunc maxime in modum labor ad exactam usque hyemem secunda civitatis admurmuratione perductus . Ac vere demum ineunte , frumenta

I 3

partim

partim ab iis, qui supprefferant, sponte prolata; partim a magistratibus aliunde convecta sunt: Ea re non mediocriter annona laxavit: gravi-
que perfuncta periculo plebs, Deo
adjuvante, ad solitos quæstus, & opi-
ficia rediit.

*Confirmatur a Pontifice Maximo
Societas. Cap. XII.*

INterea quum ad IGNATIUM
studio religionis aliqui subinde se
adjungerent; nequaquam immemor
ille, quod ad Societatem confirman-
dam attinebat, negotii paullo ante sus-
cepti, quidquid a publicis occupatio-
nibus otii datum est, in eam ipsam rem
diligentissime contulit. Ac primum
totius instituti formulam (fusus postea
explicandam) ad certa capita di-
lucide redegit, ac breviter. Deinde
nactus opportunitatem, quod Pon-
tifex maximus per autumnii ferias e
turba, negotiisque Tibur sese recepe-
rat; eam formulam auctoritate Apo-
stolica sancendam eidem Pontifici
suppliciter obtulit per Gasparem
Contarenum Cardinalem, de quo
supra dictum est, ob egregiam virtu-
tem

tem, sapientiamque Principi in primis acceptum, nostrique Ordinis amicissimum. Quam ille ubi perlegit; confestim: Spiritus, inquit, Dei est hic. Ac multa præterea in eam sententiam adjunxit; quare confideret recentem hujusce manipuli ardorem tali tempore divinitus excitatum, afflictis Ecclesiæ rebus non levi tum præsidio, tum ornamento futurum. Veruntamen, ut in tanta re, ne minus consulte quidpiam statuisse videretur; totum negotium delegavit tribus viris e sacro Collegio Cardinalium: apud quos minimum loci fore putavit gratiæ. In iis fuit Bartholomæus Guidicionius Lucensis, vir divini, humanique juris apprime peritus, idemque novarum religionum adeo non amicus, ut de iis ad certum numerum redigendis librum etiam conscripsisset dicatur. Is, præjudicata jam causa, collegas nequaquam propensos in IGNATIUM facile in suam sententiam adduxit: certamque prope modum, confectamque rem consilio, & auctoritate sua pene discussit. Quod ubi sensit IGNATIUS; parum præsidii ratus in hominibus esse, ad opem divinam de more confugit:

ac præter jejunia , supplicationes , cæteraque ad Numen propitiandum adhiberi solita , cœlestes insuper hostias eo tantum nomine per se , & per amicos immolavit ad tria millia . Qua procuratione intra finem anni verentis quum cæterorum , tum præcipue Guidicionii ita immutata voluntas est ; ut quum de multitudine religionum cohibenda idem quod antea omnino sentiret ; huic tamen refragari se ultra negaret posse , divino videlicet monitu , & occulta spiritus operatione vehementer instinctus . Ita , qui diu valde anxios habuerat Patres , eorumque spem variis frustrationibus propemodum extinxerat ; idem una cum cæteris collegis repente placatus , ac favens , rem ultro suscepit , commendavitque Pontifici Tibure denuo commoranti : qui libentissimo animo & Societatem ipsam , & Societati inditum nomen rite , sancteque approbavit V. Non. Octobris , anno M.DXL. idque testatum voluit esse publicis literis eodem die , locoque datis : cum eo tamen , ut in universum focii ne plures sexaginta numerarentur . Ea videlicet fuit novellæ Societatis quædam quasi approbatio

Si-

Siquidem triennio post, quum variis locis, atque provinciis Deo adspirante constaret egregius operæ fructus; ab eodem Pontifice limes ille omnino sublatus est: liberumque IGNATIO, & successoribus relictum, cuilibet petenti Societatem dare. Quod item apparet diplomate dato pridie Idus Martias anno M.D.XLIII.

*Præpositus Generalis creatur
Ignatius. Cap. XIII.*

Igitur post multas difficultates approbata denique Societate, gratiæ primum (ut æquum erat) actæ Superis, quorum benignitate res bene, feliciterque vertisset; deinde, quoniam in dies a Pontifice missio Patribus imminebat; e suo corpore Præpositum Generalem (sic enim, qui cunctis præesset, appellare placuerat) primo quoque tempore deligere visum est. Societatis autem status per id tempus erat ejusmodi. Franciscus Xaverius, & Simon Rodericus in Lusitaniam erant profecti. Petrum Fabrum Cæsaris Legatus Ortizius ad Vormatiensem conventum Pontificis permissu in Germaniam adduxerat.

Jacobus Laines Parmæ, Claudius Jajus Brixiaë, Senis Paschasius agebant. In Brutios Nicolaus Bobadilla disceserat. Cum IGNATIO Romæ duoduntaxat e Patribus versabantur, Salmeron, & Codurius. Tyrones vero, qui nomen dederant Societati; partim apud IGNATIUM erant, partim studiorum causa ab eodem Parisios missi, necessaria ad bellum spirituale arma enixe parabant. Quidam etiam ad res domesticas componendas in Hispaniam profecti, & concionibus jam tum, & colloquiis, ingenti hominum approbatione, Societatis nomen longe lateque vulgaverant. Hoc Societatis statu, quum Præpositi eligendi tempus adesset; Patres, qui quidem in Italia erant, per literas moniti, quod rei Christianæ commodo facere possent, creandi Præpositi causa ad Urbem accederent; sub initium Quadragessimæ anni M.D.XLI. convenere omnes, uno demto Bobadilla: quem in oppido Bisiniano tum maxime res gerentem, abduci rursus ab opere Pontifex noluit. Is, & cæteri, qui longius aberant; suum quisque in scheda suffragium rite obsignatum, partim in discessu reliquerant Romæ; partim

partim deinde misere inclusum epistolis. Ac primum tridui supplicatio indicta, vetitumque inter ipsos de Præpositi electione colloquium est: Deinde coniectis in urnam schedulis, triduum insuper continuatæ preces: ac septimo denique die legitime extractis, recitatisque suffragiis, Præpositus declaratur **IGNATIUS**, nemine præter ipsum **IGNATIUM** discrepante: nanque is consulto, ne unum nominatim ex omnibus deligendo cæteros quodammodo notasse videretur; in schedula scripserat se ad eum accedere, in quem plurima suffragia convenirent, uno se duntaxat excepto. Igitur explorata jam Numinis voluntate, ad **IGNATIUM** venerabundi accurrunt Patres. At ille, parendi nimirum longe, quam imperandi cupidior, severo vultu jubet eos abstinere, negatque se munus viribus impar suis ulla ratione subiturum: multa que serio disputat, cur alium potius quemlibet sibi sufficere debeant. Sed videlicet quibus rebus putabat voluntates Patrum alio posse transferri; ex ipsæ vel maxime studia eorum incendebant: Nihil enim ad conciliandos homines æquè valet,

atque animi moderatio, atque submissio. Quo factum est, ut nihil eorum quæ ad munus detrectandum IGNATIUS afferebat, aliquandiu non modo ad animum admitterent; sed ne ad aures quidem. Sed post multam denique altercationem ægre IGNATIUS tenuit, ut amplius in tertium diem obsecratione protracta, rursus in suffragium iretur. Quo die quum idem prorsus omnium consensus exstaret, neque jam locus tergiversationi videretur esse; tum IGNATIUS: *Quandoquidem vos in me potissimum eligendo perstatis, inquit, ego autem, meæ conscius infirmitatis, vestro iudicio salva religione assentiri nequeo; reliquum est ut hujusce controversiæ arbitrum deligamus eum, qui mihi a confessionibus est: quoque, ut scitis, utor divinæ voluntatis interprete.* Is erat ante conditam Societatem Frater quidam Theodosius ex Ordine Minorum, cœnobii, quod ad Sancti Petri in Monte aureo, qui fuit olim Janiculus, appellatur.) Quod, ne frustra diutius tenderent Patres, eo facilius concedere, quod minime dubitabant, quin ipsorum suffragii prærogativam ille quoque sua sententia comprobaturus esset.

esset. Neque eos fefellit opinio. Quum enim rem totam ad eum detulisset **IGNATIUS**, imbecillitatem suam corporis, animique commemorans, dein etiam atque etiam obtestans, ut se tanto onere levatum vellet; ille, cognita re, tantum abfuit ut precibus **IGNATII** cederet; ut etiam objurgaverit hominem, quod tam explorata divina voluntate, Spiritui Sancto diutius restitisset: & simul, ne dissimulationi esset locus, ultro adiit Patres, ac de suo responso certiores fecit. Quibus rebus denique victus **IGNATIUS**, omni spe in uno Deo rei bene gerendæ reposita, dedit manus, diemque constituit x. Cal. Maji, quo die ad auxilium divinum implorandum, præcipua septem Urbis templa simul omnes obirent: & in Divi Pauli potissimum (quoniam ejus maxime Apostoli vestigia sequerentur) solenni professione suæ religionis vota susciperent. Ut igitur ea dies adfuit, in eo templo ad facellum Beatæ Virginis, ubi tum Eucharistia custodiebatur, quod facellum ad imos gradus est aræ maximæ; sub ipsam cœlestis panis communionē ipse primum, qui sacrificabat **IGNATIUS**,
tum

tum cæteri sua quisque vota clara voce de scripto ex Apostolici diplomatis formula nuncuparunt. Deinde sumto ex IGNATII manibus corpore Domini, post gratiarum actionem, sacratissima ejus ædis loca religiose quum adissent; circa aram maximam, sub qua Petri, & Pauli Apostolorum ossa condita sunt, cuncti consistunt; flentesque præ gaudio, & suavissime amplexantes inter se, gratulantur denuo Superis, quod cœptis adfuerint, suamque Societatem arctiori vinculo colligarint: deinde reliqua templa pari lætitia, ac pietate circumeunt. Quibus rebus ingenti omnium consensu, & conspiratione peractis, magistratum IGNATIUS iniit: ac primum omnium ad constituendam domesticam disciplinam adjecit animū, quæ digna tali instituto, digna Christianæ philosophiæ professoribus haberetur. Itaque ad cæteros provocandos, atque ad jacienda in tyronum animis veræ humilitatis fundamenta, in fordidis culinæ ministeriis aliquandiu versatus est ipse tanta cum alacritatem, ac diligentia, quasi tum primum ad suam ipsius emendationem vitæ spiritualis curriculum esset ingressus: neque

neque tamen interea gravioribus negotiis deerat, temporibus ita distributis, ut quantum liceret, utrique muneri satisfaceret. Accedebat adhæc summus paupertatis amor, summa in victu, cultuque frugalitas: præterea in singulorum officiis exigendis, erratisque puniendis admirabili mixta lenitate severitas; in sublevandis vero omnium & animi, & corporis necessitatibus cura, & vigilantia plusquam paterna. Quumque ad ea charitatis officia, prout res postulabat, opportunas insuper adhortationes & publice, & privatim adhiberet; haud sane difficile fuit in animos recentissimo tum Societatis spiritu sponte incensos officio, ac religione, eos mores, eamque vivendi rationem inducere; ut (si cœlestibus terrena comparare fas est) intra illa tecta, parietesque, angelorum in humanis corporibus quidam convictus videretur esse. Nullæ tum querimoniæ, nullæ detractiones, nulli susurri, quibus incommodæ suspiciones excitantur, & disjunguntur animi: sed acerrimum sui cuiusque depressendi, submittendique certamen; in superiorum jussis excipiendis, ex-

se-

sequendisque alacritas ingens; mirus in communicando, interpretandoque candor, atque simplicitas; oculorum, ac sensuum intenta custodia; studium precationis, ac solidæ virtutis ardens; quæque ex his rebus necessario provenit, admirabilis in magna nationum, ætatum, ingeniorum varietate concordia. Itaque conjectis, ut fit, omnium oculis in *Ordinem novum*, brevi non ad nostros tantum, verum ad cæteros etiam salutaris exempli manare utilitas cœpit. Adolescens quidam, egregiis naturæ adjumentis, e Septentrionali plaga Romam advenerat, non modo Lutheriana tæbe infectus ipse, verum etiam mire cupidus ejusdem longe lateque vulgandæ. Is quum ex occasione sese in hominum cœtus infereret, verbisque venenatis clericorum vitam, ac mores summam in invidiam vocaret primum, deinde abductis a sacerdotum reverentia mentibus, prava dogmata sensim instillare quotidie pergeret; patefacta re, jussu magistratum comprehenditur. Qui quum & ipsi per se, & sacræ Theologiæ magistris adhibitis, illum ab opinionum insania revocare frustra conati essent; nequid intentatum relin-

relinquerent, ætatem, & ingenium miserati, prius quam in eum lege ageretur, accersito **IGNATIO** rem totam exponunt. Quoniam ipsorum neque adhortationes, neque minæ proficiant; habeat illum aliquandiu apud se; videat etiam atque etiam, ut errantem oviculam ad Ecclesiæ caulas aliqua ratione traducat. Ille clementer acceptum hæreticum domum adducit. Neque vero sapientes iudices frustrata spes est; siquidem adolescens ab **IGNATIO** sociisque amicissime habitus, eorum dictis, factis, institutis accurate observandis paulatim affici, atque immutari Dei beneficio est cœptus: & quam antea respuerat medicinam, libentius in dies accipere: ac demum perseverantibus Patrum officiis, & diligentissima curatione, eo processit res, ut evulsis lethalium dogmatum fibris, priorem pertinaciam gemebundus agnosceret: nec ante a salutari incepto destitit, quam voluntaria abjuratione detestatus errores, ingenti bonorum tum admiratione, tum gaudio, cum Ecclesia sancta in gratiam rediit. Is deinde quærentibus viris, gravibus, cur, qui antea tot machinis oppugna-

tus

tus pervicacissime restitisset, IGNA-
TII denique, & Patrum hospitio, &
consuetudine vinci se passus esset; sine
cunctatione respondit se illorum non
tam disputationibus, argumentisque
(licet in eo quoque genere valerent
plurimum) quam spectatæ sanctitati,
virtutique cessisse: quod ita apud se
prope necessario statuisset, a tam
incorruptis moribus, a tanta pace,
atque concordia, a tam bonis operi-
bus rectam in Deum fidem abesse nul-
lo modo posse. Quæ res documento
esse potest hominibus nostris; licet ad
convertendas ad CHRISTUM ani-
mas ingenii, ac doctrinæ præsidia
requirantur; tamen conspecta vitæ,
morumque innocentia plus multo
quam literis, aut concertationibus
profici. Alius quidam filius familias,
desertis liberalibus studiis, ac repu-
diata omni disciplina, prorsus indo-
mitus, & effrænis, quum neque a pa-
rentibus jam, neque a magistris regi
ullo modo posset; IGNATIO tradi-
tur. Cujus lenitate, itemque cætero-
rum Patrum præceptis, atq; institutis
accuratissime excultus, posita paulla-
tim ferocia, petulantiaque, cunctis
admirantibus, ita pudicos, modestos-
que

que induit mores, ut vix minimum in illo vitium reprehenderes. Multi præterea omnium ætatum, atque ordinum, quos præceps in omnem licentiam natura, cupiditasque corruerat; IGNATIÏ consuetudine, exemplisque incitati, collegere sese: atque ad bonam frugem, Deo adjuvante, rediere.

Generalis Ignatius denuo Catechistæ munere fungitur.

Cap. XIV.

PER eos dies nomen Societati dederat e Pontificia familia Petrus Codatius Laudensis, vir honoratus, & opulento sacerdotio præditus. Is divino prorsus instinctu divitiis, & commodis omnibus propter CHRISTUM abdicatis, Marthæ munus in Societate sibi ultro depoposcit, & egregie præstitit, in alimenta Patrum (erat autem Urbe tota notissimus, & apud principes gratiosus) eleemosynis undique corrogandis. Quæ res IGNATIUM & socios magna molestia liberavit; quippe quos non spirituales proximorum salutem omni studio intentos, temporariæ curæ

curæ ad eam diem valde impedierant. Ejusdem Petri opera templum etiam proprium Societas nacta est Sanctæ Mariæ a Strata, non satis amplum illud quidem, aut commodum, sed tamen in celeberrima Urbis regione, & ad Societatis functiones in primis idonea: cujus loco, dum hæc scriberemus, Alexander Farnesius Cardinalis, Paulli III. Pontificis Maximi nepos, ædem nomini JESU magnificentissimam regio sumtu exstruebat. Ei templo deinde adjuncta domus est, quam hoc tempore Patres incolunt, Philippi Archinti beneficio, Salassiorum Episcopi, qui tum Pontificis vices in diœcesi Urbana gerebat, viri de Societate universa in primis optimæ meriti. In eo igitur templo IGNATIUS, professionis lege, sex & quadraginta diebus Christianæ catechæsi operam dedit e loco superiore, magna, & assidua non modo plebis, verum etiam præstantium virorum frequentia: prorsus ut quidam ex optimatibus palam gloriarentur, beatosque se ferrent, quod nullam omnino ex IGNATII concionibus omisissent. Agendi autem rationem sequebatur ejusmodi. Fidei præcepta, &
my-

myſteria cognitu neceſſaria primum ad vulgi captum explanabat, iterabatque, ubi opus eſſet, eadem ſæpius; deinde opportunis digreſſionibus certos interim loco tractabat fuſius, non tam ad ingenii, vel doctriſe oſtentionem, quam ad pietatem excitandam, populumque permovendum accommodatos. Idque tam veris, gravibuſque ſententiis, tam ardenti vultu, oculiſque; ut divini amoris ignem undique ſpirare videretur, minime fucatae eloquentiæ vir, nec in ſingulas voces, numeroſque ſolicitæ, ſed ingenti animo, prout impetus tulerat, ſua ſenſa proſequentis. Itaque perorationem ejus non ineptus populi plauſus, aut ſtulta facundiæ commendatio ſequebatur; ſed alta ſuſpiria, gemituſque, & antea actæ vitæ deteſtatio ſalutaris: ut vel defixis humi oculis tristes, ac ſibi met irati diſcederent; vel etiam illico ſeſe ad ſacerdotum pedes abjicerent confitendi cauſa, tanto cum fletu, atque ſingultibus; ut linguam ſolvere, aut vocem in verba formare vix poſſent.

*Societas augetur, distribuuntur
provinciae. Cap. XV.*

INTER hæc Societas majorem in modum crescere, sublatisque Pontificis decreto cancellis, quos initio idem Pontifex (ut dictum est) illi probandæ præfixerat; multi certatim ad militiam spiritualem IGNATIO dare nomina. Quumque novi Ordinis fama, bonusque odor instituti operis manaret quotidie latius; Patres variis orbis terræ locis vehementer expetebantur. Itaque ab Romana domo tanquam a metropoli, disjunctissimas in regiones, civitatum, Regumque invitatu missæ coloniae, domusque, vel collegia ingenti approbatione constituta: primum omnium in Lusitania, atque adeo in ipsamet India, sumtu ac munificentia Regum Lusitaniae; tum aliorum pietate in Hispania, Gallia, Germania, Italia. Sed quum aliæ pleræque nationes avide Societatem amplexæ sunt; tum vero Sicilia & invitavit perhonorifice, & permissu Pontificis maximi acceptam, in primis copiose, ac benigne tractavit: adnitente præsertim Joanne Vega

Hi-

Hispano (qui regnum illud pro Cæsare administrabat) præstanti non minus religione, quam prudentia viro: cujus etiam antea, dum Romæ Legatus Cæsaris ageret, plurima, & maxima in IGNATIUM & socios egregiæ cujusdam benevolentiae documenta constiterant. Itaque tam late jam fusa Societate, non modo collegiis, domibusve rectores præficere, ut antea, sed etiam Provinciales præpositos quos appellant, cum ampla potestate in singulas nationes describere coactus IGNATIUS est. Ac primum Lusitaniæ præposuit Simonem Rodericum; deinde Hispaniæ Antonium Araozium Cantabrum, Italiæ Jacobum Lainem, Indiæ Franciscum Xaverium, Germaniæ Petrum Canisium, Galliæ Paschasium Broetium, aliisque deinceps alios. Nam urbanam provinciam, nisi siquando graviori valetudine premeretur, ad extremum usque ipse administravit. Interea de Societatis universæ progressu mire sollicitus, a singulis Provincialibus per literas pensum exigere; unicuique mandare diligentissime, quæ e re communi essent. Romæ vero, præter domesticæ disciplinæ

næ curam, de qua dictum est, cæterasque functiones, multa, & gravia, quæ ad incrementum, ac defensionem catholicæ fidei pertinerent, partim cum summo Pontifice, Cardinalibus, Legatisque Principum coram, partim etiam cum ipsis Regibus, atque Principibus per epistolas, & interpretes agere. Accedebat ad hæc sollicitudo ingens, atque indefessus labor in sublevandis pauperum difficultatibus; orborum orbarumque educatione, ac pudicitia procuranda, tuendaque; & perditis mulierculis a turpi quæstu ad frugem, & continentiam traducendis.

Varie in Ignatium tempestates excitantur. Cap. XVI.

Quibus ille rebus dum CHRISTI causam agit intrepide, multorum, ut fit, odia simultatesque contraxit. In iis aulicus quidam (cujus nomini parcitur) eo tempore potens, & graciosus, quum abductam a se mulierculam, quam misere deperibat, & in male nuptarum, ut appellant, cœnobio collocatam ferre non posset; sæviore in dies concepta rabie, quàm libido, & amor incendebat,

bat, ita demum exarsit, ut pene furere videretur. Ac primum, facta manu, fenestras cœnobii lapidibus petere, custodes infestare, minari; deinde in IGNATIUM auctorem, & socios in circulis, cœtibusque omnia maledicta conferre: quin etiam ex occurſu probris, & contumeliis eosdem incesſere: denique ad eos funditus evertendos improbissimas in ipsorum vitam calumnias dissipare: quæ domos primum nobilium circumlatæ, celebratæque sermonibus (quos partim prona in deterius persuasio, partim vesani illius artificium, dolorque excitabat) ad Cardinales etiam, atque adeo ad ipsum Pontificem pervenerunt. Igitur vulgus, ut est pluma & folio levius, quos nuper summa cum approbatione suspexerat; eosdem repente contemnere, & acerbiorē in dies odio execrari, & singulorum caput dira imprecatione defigere: prorsus ut jam non modo cum proximis agere, sed ne pedem quidem janua tutto efferre possent. Principes vero, licet magna ex parte fictas criminationes putarent; tamen rati subesse profecto nescio quid, quod tantæ invidiæ flammam foveret; vel immutata, vel certe

K

labe.

labefactata in IGNATIUM voluntate videbantur. At IGNATIUS, quamvis a sua, suorumque consuetudine multos abduci non sine rei Christianæ jactura cerneret; tamen ratus mitigari hominis ferociam posse, primo rem dissimulare, atque adeo officiis cū improbitate certare; deinde ubi malum serpere quotidie latius, & ipsa patientia corroborari audaciam sensit, non tam privato dolore, quam rei publicæ detrimento permotus, ad Summum Pontificem adiit; ab eoque suppliciter impetravit, ut criminum, quæ sibi suisque denuo objicerentur; acre judicium exerceretur ab Archinto Vicario, & Francisco Michaëlio Urbis Præfecto. Ii, citatis omnibus, ad quos criminum vel suspicio, vel conscientia pertinebat; ac per diligentem inquisitionem calumniatoris fraude comperta; IGNATIUM & socios non modo absolverunt lata sententia, sed etiam debitis laudibus, & honore verborum extulerunt, increpito valde adversario, pœnaque proposita non levi, nisi a petulantia, maledictisque desisteret. Nam ne gravius in eum animadverteretur, IGNATIO in primis deprecatore perfectum est. Ita, quod

quod antea semper, tū quoque IGNATII sanctitatem illustravit hominum injuria: & Deo duce, virtus, ac veritas, dum violatur, effulsit. Iisdem fere insidiis postmodum appetitus IGNATIUS est a sacerdote quodam, qui, quum domum cathecumenorum administraret; ferre non poterat in ea regenda familia majorem a loci præsidiis IGNATII rationem haberi, quam sui. Sed miser, IGNATIO silente, ac pro eodem orante, brevi perfidiæ pœnas dedit; atrocibus enim antea actæ vitæ sceleribus justo Dei judicio patefactis, quæ ad eam usque diem astute suppresserat, sacerdotio spoliatus, & perpetuo carceri adductus est.

Regimen feminarum a Societate depellit Ignatius.
Cap. XVII.

INterea Elisabetha Rosella Barcinonensis, quæ IGNATII prima literarum studia foverat; Societatis JESU coalitæ, & confirmatæ fama commota, Romam ex Hispania contulit sese, partim ut IGNATIUM longo intervallo revideret; partim etiã ut una

L 2

cum

cum quibusdā aliis piis feminis ad normam illius, atque præscriptum ageret vitam. Atque IGNATIUS quidem fospitem adventum mulieri de se optime meritæ gratulatus est, & omnia officia detulit, quæ, salvo Religionis instituto, præstare posset: curam vero seminarum suscipere sese negavit posse, plurimis, gravissimisque occupationibus impeditum. At illa nihilominus instare; sanctissima veteris amicitiae jura testari; postulati æquitatem obtendere: denique ubi magis magisque obfirmatum vidit IGNATIUM, ad aulicas confugit artes: atque, ut erat nobili nata loco, per viros principes facile tenuit ut Pontifex maximus IGNATIO munus id ipsum, quod recusabat, injungeret. Sed ea res magnū in Societatis commodum vertit præter spem; ac nostros non solum in præsens, verum etiam in posterum a tam periculosa provincia liberavit. Etenim IGNATIUS, Pontificis jussu ea procuratione suscepta, paucis diebus tantam difficultatem, ac laborem sensit, dum querimonias mulierum audire, superstitiones evellere, inani- bus, & curiosis quæstionibus respondere identidem cogitur; ut pene plus
ei

ei negotii paucae feminae, quam Societas universa facefferet. Itaque licet Elisabethae pro ejus in se promeritis gratificari admodum cuperet; tamen reputans apud se, quantum ex hujusmodi tricus detrimenti res publica pateretur, simul etiam cogitans fore ut harum exemplo aliae deinceps religiosae mulieres, virginesve idem a Societate in posterum expeterent; nequaquam ignarus quam periculosa, & suspicionibus plena sit ea consuetudo, privati officii rationem posthabere communi utilitati, ac totum hoc genus administrationis a Societate prohibere omni ratione constituit. Igitur, adhibita (quod in omnibus gravioribus causis faciebat) praeparatione diligenti, imploratoque per iteratas preces, & hostias coelesti praesidio, ad Pontificem accessit; verbisque supplicibus demonstravit, ex onere sibi nuper imposito, quam exiguo cum fructu, quantum laboris, ac molestiae pertulisset. Ea ipsa re monitum quam aliena sit a Societatis instituto ejusmodi praefectura, petere se, & orare, ut non ab illis modo, sed ab omnibus in perpetuum feminarum collegiis gubernandis immu-

nem Societatem esse jubeat: non defuturos aliorum Ordinum idoneos homines, qui id munus libenter, & cum fide obeant: sibi quidem, & suis provinciam videri minime accommodatam. Neque vero æquum esse, qui sese ad omnium gentium auxilium, sine ulla regionum, aut locorum exceptione, CHRISTI Vicario mancipaverint; eorum operam, & industriam, non sine gravi publicæ rei damno, paucis regendis mulierculis implicari. Quibus rationibus ita permotus est Pontifex, ut supplicanti omnia large, ac prolixè concesserit. Itaque Societati ab ejusmodi munere vacatio in perpetuum data: ejusque vacationis auctoritas testata est trinis deinde literis Apostolicis, quæ tempore procedente magno usui fuere nostris hominibus ad ejus generis pericula, & molestias abigendas.

*Honoribus in Societatem nostram
Ignatius aditum obstruit.
Cap. XVIII.*

ATQUE iis difficultatibus perfuncta Societas, prosperum Dei beneficio cursum tenere videbatur, quum

quum nova rursus in eam coorta tempestas est , eo quidem gravior , & periculosior , quo in speciem lenior , blandiorque . In iis , qui per Germaniam variis locis Domini vineam excolebant , Claudius Jajus e primis Patribus unus , virtutem , & sanctitatem suam quum genti universæ , tum Romanorum Regi Ferdinando ita probaverat ; ut eo Rex nullum prorsus ad curandas animas , atque ad pastorale munus aptiorem existimaret . Is pro sua sapientia quum præclare intelligeret , regni causam cum causa religionis ita esse conjunctam , ut quantum de catholica religione detraheretur , tantum de obsequio multitudinis , & de imperii majestate decederet ; contra sævientem eo maxime tempore Lutherianā pestem , velut unicum remedium , quam optimos animarum pastores , & Episcopos omni diligentia conquirebat . Igitur vita functo per eos dies Tergestinorum Episcopo , quæ civitas est Istriæ , (cui tum provinciæ , quam dixi , lues , propter vicinitatem Germaniæ imminebat) circumspectis diligenter omnibus & personis , & rebus , denique Ecclesiam illam Claudio Jajo

perspectæ sibi virtutis , & doctrinæ viro tradere, ac demandare constituit. Sane , ut vulgo expetuntur hujusmodi sacerdotia , minime timendum videbatur esse , ne delatum ultro præsertim honorem Claudius repudiaret. Siquidem Tergestina cathedra, quum in primis ejus regionis ampla , & honorifica est , tum vero (quod potissimum hodie quæri solet) vectigalibus haud fane contemnendis instructa . Veruntamen Rex , nequid , inscio Claudio , cum Pontifice maximo ea de re transigeret ; primum omnium literas ad ipsum Claudium dat , Tridenti tum forte rei Christianæ causa commorantem , ac nihil cogitantem minus . Quarum erat sententia , Tergestinum gregem orbum spirituali custode , circumquaque frementibus lupis , in maximo versari discrimine : dignam esse vigiliam charitate Jaji , studioque hominum servandorum : petere se , ut , si a Pontifice Maximo id ei muneris , onerisve imponatur , ne recuset subire : & populo utilem , & sibi gratam operam vehementer fore . Percussus inopinata re Jajus . primo cohorrui : non quo detestandum quid sibi oblatum putaret ; sed quod

quod Episcopatus , qua curam gerit animarum, divinam pene virtutem, & omnibus numeris absolutam postulet sapientiam ; qua gradus honoris est (& quidem ad continendam in officio multitudinem ferme cum splendore , opibusque conjunctus) a spiritu humilitatis, ac paupertatis, quem profitetur Societas JESU, vehementer abhorreat. Deinde , ut sese ex pavore collegit, fusus in preces, lacrymasque , etiam atque etiam obtestatus est Deum , ut ab se tantum discrimen averteret : neu se primum quasi janitore, speciosos titulos honoresve in Societatem ad id tempus intactam invehi sineret. Tum rescripsit ad Regem , multis rationibus ei suadens , ut tam honorifico judicio decoraret alium digniorem : longe impari suam imbecillitatem esse oneri : ac demum ita conclusit epistolam, ut omissis ambagibus , quod petebatur, præcise negaret. Quæ res jam satis incensum studium Regis multo vehementius inflammavit : quod ita statueret , tantam in summa virtute, & eruditione modestiam, nequaquam in privatæ vitæ quasi tenebris delitescere ; sed in editissimo fastigio , ut

luceret omnibus, collocari oportere. Ergo quum ex literis Claudii diffideret ullis aut precibus, aut promissis flecti ejus animum posse; per Pontificem ipsum, inconsulto ultra Claudio, rem conficere statuit. Ad eum igitur quam accuratissime scripsit, quanto in periculo Tergestina civitas versaretur Episcopo destituta: se quidem pro sua parte diligenter circumspexisse, quem nominaret aptum ei muneri; nec ullum invenisse aptiorem Claudio Jajo Societatis JESU presbytero, cujus innocentiam, doctrinamque exquisitam plurimis rebus esset expertus: sed frustra per literas tentasse ejus animum in studio Christianæ humilitatis ita defixum, & ab honorum insignibus admittendis usque adeo alienum; ut, nisi pro potestate cogatur, nulla sit spes laborantis illius Ecclesiæ tam opportuno præsidio sublevandæ. Proinde suppliciter se etiam atque etiam orare, & obsecrare, ut Claudium pro imperio jubeat delata sibi gubernacula, munusque sine tergiversatione recipere: quoniam, ut quisque de se ipse minime alta sentiat, ac proinde studiosè lateat, ita Ecclesiasticis functioni-

etionibus , & ipso Episcopatu dignissimus sit . Hæc igitur , & alia id genus multa ad Pontificem : & simul Didaco Lasso mandat oratori suo , ut idipsum & cum Pontifice , & cum quibus opus fuerit , quam diligentissime curet , prorsusque conficiat . Ejus rei fama quum per aulicos quosdam ad IGNATIUM pervenisset ; primo haud ita sane commotus est . Nam & Claudii constantiæ , & Pontificis æquitati , ac sapientiæ confidebat ; & ejusmodi petitiones jam ante Societas , Deo adiutore , non semel eluserat . Veruntamen , ut , quid esset rei , clarius cerneret ; continuo Bernardinum Massejum (qui tum erat Pontifici ab epistolis , ac postea in Cardinalium numerum cooptatus est) ultro convenit ; ac tota de re familiariter pro amicitia sciscitatur . Ille haud sane gravate ipsam epistolam Regis ostendit , ad Pontificem summis cum Claudii laudibus , & vehementi contentione perscriptâ . Quæ lecta , confestim IGNATIUS eadem de causâ ad Regis oratorem Didacum Lassum adit ; qui literas item ad se proprie datas demonstrat , & quidem magna ex parte ipsius Regis chirographo ,

pho, etiam atque etiam postulantis, mandantisque, det operam; ut Episcopatus ab se in Claudium collati primo quoque tempore auctor fiat Pontifex maximus: ejusque auctoritatis diploma rite confectum ad se transmittat. His cognitis, IGNATIUS, ubi tam iniquo loco rem vidit esse, pertimuit; sed ita, uti nequaquam animo caderet: ac licet se talibus adversariis longe imparem sciret esse; tamen fiducia Numinis omni ope sibi contra nitendum existimavit. Atque in præsentia Didaco suadere conatur, ut ab actione rationi Societatis tam aliena desistat ipse, & simul ab ea mente Regem aliquo pacto deducat. Quibus verbis quum nihil proficeret, quin potius ab homine rideretur; domum regressus quam intentissimas preces, & sacrificia de more suis indicxit: deinde nactus opportunitatem, facilemque aditum, Pontifici demonstravit quanto res ea damno esset futura & Societati nostræ privatim, & Ecclesiæ universæ communiter. Non quo dignitatis gradus, ac tituli ipsi per se mali, atque improbandi sint, quippe ad Ecclesiam regendam, & ordinum discrimina retinenda in-

ducti

ducti divinitus : sed quod & perfectos viros requirant , quales pauci admodum omnibus seculis exstiterint ; & insuper ab hujus minimæ Societatis instituto valde alieni esse videantur . Etenim quibus artibus , quoque spiritu excitata , & conflata sit , eodem profecto alendam , & conservandam esse ; non amplitudinis , & splendoris nimirum , sed humilitatis , & parsimonix . Quod si aditus in Societatem honoribus pateat ; multum utique de vera charitate imminutum iri ; quæ nihil omnino habet in vita propositum , nisi unius gloriam Dei . Nam (ut sunt hominum ingenia) & complures fortasse ad hanc Religionem accessuros opum cupiditate magis , quam divini obsequii studio ; & qui nuper adscripti sint , magnitudine laboris , & disciplinæ asperitate defatigatos , ut primum præsentis præmii commodum affulserit , mutato repente cursu , novæ spei velificaturos : atque , ut maxime in officio cuncti persistant ; tamen nisi præsentī jacturæ eatur obviam , sine dubio Societati exitialem (quod Deus averteret) exitum imminere . Id adeo vel inde facile peripici posse , quod paucis illis annis ,

annis quatuor viris ex ea familia præcipuis totidem Episcopatus delati sint; quos nisi fortiter ab sese Patrum virtus, & constantia rejecisset; videlicet alio deinceps atque alio dilabente, brevi miseram Societatem ipsis luminibus carituram fuisse. Atque hæc, quod privatim ad conservationem ipsius Religionis attineat. Jam si communem spectemus utilitatem; nemini dubium esse, quantum ex ea re detrimenti res publica perceptura sit. Nihil enim omnibus ætatibus æque deplorandum fuisse, atque in tanta messis copia tantam operarum inopiam: atque ex ea ipsa paucitate, qui uni cuiusque agro addicti, affixique sint; longe minus utique proficere, quam qui Apostolico ritu soluti, ac liberi omnes Ecclesias pervagentur: ad eamque potissimum Reipublice Christianæ partem sublevandam accurrant, quam maxime laborare cognoverint. Præterea ad faciendam populis fidem, & animos permovendos nihil esse efficacius vitæ, ac morum exemplo. Itaque adhuc Societatem (absit verbo invidia) Ecclesiæ non mediocriter profuisse; propterea quod minime ab ejus dictis facta dissen-

sen-

fenferint. Nunc autem, si ad id fasti-
 gium extollantur Patres; quomodo
 fieri posse, ut apud multitudinem
 infciam arcanorum, ambitionis, ac
 levitatis crimen effugiant? qua porro
 fronte, quo vultu, repente aucti ac
 decorati ipsi honorum insignibus, de
 imitatione CHRISTI, de fugienda
 gloria, de voluntario sui contemptu,
 ac submissione verba facturi sint?
 Hisce, aliisque de causis Pontificem
 Maximum etiam atque etiam obte-
 stari, atque obsecrare, ut quam So-
 cietatem primus auctoritate, & beni-
 gnitate sua confirmaverit, ornaverit,
 auxerit; eandem ab omni suspitione
 incommoda velit esse liberam: sua-
 que in eam beneficia, tam periculoso
 præsertim tempore, tueatur. Audiit
 IGNATIUM Pontifex perbenigne,
 ut solebat: sic tamen, ut integritatem
 hominis admiraretur potius, quam
 consilium approbaret. Itaque collau-
 data initio ipsius fide, ac probitate,
 sensim flexit orationem; & contra sen-
 tentiam IGNATII quum alia multa
 differuit, tum vero ex veteri oraculo:
 Cor, inquit, Regis in manu Domini:
 quasi diceret, in Claudio eligendo
 tantam Ferdinandi Regis contentio-
 nem

nem plane divinitus exstitisse : ac proinde clariorem esse Numinis voluntatem , quam ut obsisti ultra oporteret. Quæ quum IGNATIUS graviter, ac dolenter accipere videretur ; Pontifex , qua erat lenitate, ne Dei famulum tristem , ac mœrentem ab se dimitteret ; ad extremum jubet illum super ea re amplius consultare , precesque ad Dominum fundere : se quoque idem esse facturum . Interea Didacus orator negotium urgebat acerri-me . Jamque instabat dies , quo die in Senatu de Tergestina Ecclesia referendum erat . Qua re IGNATIUS cognita, confestim Cardinalium pene omnium domos, quarum erant multæ longis intervallis inter se disjunctæ ; ingenti diurno, & nocturno labore circumiit, singulis eadem illa fere proponens , que paullo ante Pontifici Maximo . Sed videlicet eorum mentes jam ante occupaverat Orator . Itaque mire obfirmatos offendit in Claudii electione approbanda: partim quod tanti Regis voluntati faverent; partim etiã quod vigiles , & custodes Claudii maxime similes tam formidoloso tempore in Ecclesiæ propugnaculis , atque speculis ipsimet collocandos
pu-

putarent. Hac quoque spe dejectus **IGNATIUS**, unum reliquū videbat esse remedium, si Ferdinandum ipsum Regem a suscepto consilio per literas avocaret: quem pro ipsius pietate, virtuteque ita in se suosque animatum noverat; ut minime dubitaret, quin, cognita re, salutem Societatis Tergestinatorum rationibus antelaturus esset. Sed ne illa quidem ratio habebat exitum; quippe insequentī luce de Tergestina cathedra Senatus erat futurus. **IGNATIUS** igitur exclusus angustiis temporis, nunquā intermissis ad Deum precibus, quasi ad extremum in rebus humanis perfugium, sese contulit ad Margaritam Austriacam Cæsaris filiam, de qua supra dictum est, feminam per id maxime tempus gratia, & opibus florentissimam. Hanc pro spiritali necessitudine (erat enim illi a confessionibus) edoctam quanto in periculo Societas esset, infimis precibus obsecrat, uti Societatis causam in se recipiat: & imminentem relationem auctoritate sua interposita tandiu differat, quoad Regem ipse per epistolam alloquatur, & ab eo responsum accipiat. Fecit illa, quod rogabatur

tur: & illico datis ad Pontificem codicillis, optatam dilationem impetravit. Ea demum res aliquid laxamenti dedit IGNATIO: etenim spatium nactus, ad Regem scripsit literas deprecationis, & querimoniarum plenas, illum etiam atque etiam per CHRISTUM obsecrans, ne Societatem nuper ad gloriam Dei tanto labore conflata, sine causa perditum iret: non ita de ipsius maiestate, regnisque & se, & socios esse meritos, ut ab eo nulla eorum existimationis, famæ, salutis denique ratio habenda esset. Non de fore idoneos viros, qui rem Tergestinam capebant: fineret modo sui Ordinis homines, qua cœpissent paupertatis, & humilitatis via, ad CHRISTI gloriam, & salutem animorum sine offensione pergere: id si (ut sperabat) permetteret, sese, & socios immortalis beneficio Regi obstrictos fore: precesque pro ipsius maiestate, saluteque nunquam intermissuros. Hisce, aliisque id genus incensis officii religione rationibus, precibusque minime restitit Rex: & quanquam invitus, tamen suis rationibus amicorum utilitati posthabitis, quod vix fieri videbatur posse, per

per epistolam jussit Oratorem suum ab instituta, vel potius pene confecta actione desistere. Quæ res vulgata & Pontificem Maximum facile in IGNATIUM sententiam adduxit; & IGNATIUM ipsum, ac socios affecit ingenti lætitia. Itaque & in posterum supplicationes decretæ, & in præsentia solennis hymnus in gratiarum actionem publice persolutus est. Ac pari deinde constantia sese IGNATIUS idem opposuit, quum nostris hominibus pingua sacerdotia, quibusdā vero Cardinalatus etiam deferretur, ac nominatim Francisco Borgia Hispano dynastæ: qui amplissimis in eo regno perfunctus honoribus, divino instinctu post uxoris obitum rebus mortalibus valere jussis, & sponte deposito Gandiensi Ducatu, magna hominum admiratione Societati se addixerat. Quanquam in Æthiopica legatione, quæ postmodum Lusitanæ Regis rogatu a summo Pontifice nostris injuncta est; quum ad eam functionem Ecclesiasticæ dignitatis insignia, & honorum tituli necessario quærerentur; imperanti pro potestate Vicario Dei resisti non potuit. Præsertim quum periti rerum æstimatorēs

argute

argute coniicerent, novam hanc manum non ad opes, & copias, verum ad labores, & aperta vitæ pericula destinari. Neque eos fefellit opinio. Siquidem ex iis, qui in illam expeditionem abiere, aliqui multis incommodis agitati ex itinere mortui sunt. Andreas vero Oviedus Æthiopiæ Patriarcha, qui talem titulum rejicere ab sese omni ope contenderat; in ea loca summo labore delatus, inter Æthiopica bella captus a Turcis, ac mire vexatus, Lusitanorum denique benignitate redemptus est. Idemque deinde, ut exiguas in iis regionibus catholicorum reliquias tueretur, in summa rerum omnium egestate, paratis bobus, agro suis ipse manibus colendo tolerabat vitam.

Confirmatur a Julio III. Societas Cap. XIX.

POST hæc Paullus III. Pontifex Maximus, senio, curisque confectus, se vita migravit: comitiaque novo creando Pontifici in magna studiorum, ac voluntatum varietate in aliquot menses extracta sunt. Quo ipso tempore quum Urbs, ut in diuturno

no

no interregno , annonæ difficultate vehementissime laboraret, nostrisque numero in dies auctis extrema fames adesse videretur; **IGNATIUS** quum aliorum, tum præcipue sacri Collegii Cardinalium eximiam in se, suosque benignitatem expertus est. Quippe in summis occupationibus Patres augustos pia nostrorum hominum recordatio subiit: communique consilio ad eorum inopiam sublevandam non levis pecuniæ summa ex ipso Conclavi transmissa est: enixe in primis favente, atque adjuvante Rodulpho Pio Carpenfi: quem **IGNATIUS** jam ante sibi sociisque patronum, ac protectorem, ut appellant, e summi Pontificis auctoritate delegerat. Ac rebus diu multumque agitatis, Pontifex denique declaratur Julius eo nomine tertius: qui, quod in Synodo Tridentina Legatus, Fabrum, Lainem, & Salmeronem Theologos Apostolicos familiariter noverat, multaque tum ex iis, tum ex aliis de Societatis instituto didicerat; **IGNATIO** supplicanti multa in Societatis incrementum, ac rem admodum liberaliter tribuit. Nec enim solum prioris Pontificis de Ordine nostro judicia, & acta,

acta firma, rataque voluit esse; verum etiam eundem Ordinem novis insuper ipse testimoniis, atque decretis ornavit. Cujus rei publica diplomata exstant verbis amplissimis.

*Magistratu sese abdicare conatur
Ignatius Cap. XX.*

HISCE rebus ita peractis, quum satis in præsentia communi rei consultum esse videretur; IGNATIUS, qua erat humilitate, vigiliam suam alteri tradere, seque Generalatu omnino abdicare constituit. Igitur Patribus, quotquot communis rei commodo potuit, Romam evocatis; quum in consilium convenissent; ne, ut olim, sibi forte coram dicenti reclamaretur, per epistolam disertis verbis exposuit, se, qui vitia nosset sua, & initio invitum, atque adeo coactum, Societatis gubernacula recepisse; & nunc graviore etiam valetudine, ætateque, multo minus idoneum esse tanto muneri. Proinde per CHRISTI Domini sanguinem petere, atque obtestari sese, ut sine ullo sui respectu communi utilitati prospiciant; & quamprimum sibi sufficiant virum & animo,

mo , & corpore firmiorem . *Id quo
liberius faciatis*, inquit, *Ego in nomi-
ne Patris , & Filii , & Spiritus Sancti ,
unius Dei , ac Creatoris mei , depono
Generalatum simpliciter , & absolute ,
meque ab dico hoc munere , privoque:
& omnibus animæ meæ viribus obsecro
tum professos omnes , tum , si quos pro-
fessi adhibere ad hanc deliberationem
volent ; ut huic meo tam iusto deside-
rio faveant : piamque oblationem liben-
ter admittant .* Hæc epistola recitata ,
magnus animorum motus est factus :
quum partim viri modestiam ac sub-
missionem satis admirari non possent ;
partim etiam pro se quisque metueret ,
ne quis alius fortassis **IGNATII**
voluntati assentiretur . Verum ut
ad suffragia ventum est , idem plane
consensus omnium in eo retinendo
exstitit , qui olim fuerat in eligendo :
& enixe petenti præcise negatum .
Denique per internuncium iussus
IGNATIUS alia omnia cogitare :
etenim se quidlibet potius , quam aliū
gubernatorem , ipso vivente , passuros .
Atque hæc communiter . Dimisso
deinde cœtu , privatim singuli cum
eodem expostulare , quod ab inceptis
desistere , quod vixdum constitutam
Socie-

Societatem, omnique custodia egentem, quasi durus pater teneram adhuc filiam, deferere conaretur. Pergeret porro, & publicam rem ordinaret, legesque perscriberet: Deum, *cujus* manus alligata non sit; in posterum quoque, sicut antea, piis ipsius conatibus adfuturū. Itaque IGNATIUS, quanquam invitus, & religiosæ quietis, vitæque privatæ avidissimus, tamen ne minus dicto audiens videretur esse, Patrum auctoritati, ac precibus denique cessit: seque ad institutum opus legum scribendarum quam diligentissime retulit. Ac primum, unius Dei gloria, saluteque animorum sibi proposita, Societatem universam, quo facilius administratio tota constaret, certas divisit in classes: providitque quantum ingenio, & cogitatione assequi valuit, quum ut cæteris vitiis, tum vero ut ambitioni, & avaritiæ, quæ duæ perniciosissimæ sunt mortalium pestes; omnino obstrueretur aditus: veræque humilitati, & paupertati quammaximus, & maxime diuturnus honos ab omnibus haberetur. Ad hæc, rationem Præpositi Generalis creandi, nec non privatam, ac publicam disciplinam,

nam, quæque alia cœtibus hominum regendis usui solent esse, præscripsit. Nec modo majora, sed minora quoque ministeria, curationesque certis legibus, ac præceptis quam accuratissime persecutus est. Has deinde leges, quanquam longo tempore, summaque cura elaboratas; & conditas, non tamen continuo pertulit; sed per idoneos homines tota Societate promulgandas curavit: ut usu ipso, & magistra rerum experientia probaretur, satisne ad Societatis propositum, atque ad Apostolicam instituti formulam convenirent. Neque ante ratas, fixasque voluit esse, quam in proximo conventu Patrum tota re agitata, & plane perspecta, legitime sancirentur. Iisdemque Patribus deinceps addendi, moderandi, immutandi, ac demendi, prout expedire videretur in Domino, plenum jus, ac liberam potestatem reliquit.

Societati in Hispania valde laboranti succurrit.

Cap. XXI.

PER idem tempus Societas, videlicet ne lætiore successu intumesceret,

L

sceret,

sceret, vel ad otium, ignaviamque delaberetur, variis in Europæ regionibus divino permisso vehementer exercebatur. Idque partim ab invidis, & obtreſſatoribus, partim etiam ab iis, qui temporibus ita periculosis tam insolitam concionum frequentiam, tam assiduam Sacramentorum administrationem, & reliqua instituti nostri munera, genusque doctrinæ suspectum haberent. Quo in numero in aliis Prouinciis alii, sed *in* Hispania vel acerrimus nostrorum insectator exſtitit Joannes Siliceus Archiepiscopus Toletanus. Is quum a cæteris Societatis nostræ ministeriis valde abhorreret; tum Exercitiorum spiritualium, quibus nostri eo tempore vel maxime in erudiendis hominibus utebantur; nomen ipsum pati non poterat. Compluti vero, in sua diœcesi, piorum civium liberalitate Collegium Societatis JESU repente excitatum, quo Academia illa pene tota conflueret, ita ægre ferebat; ut de nostris e sua ditione pellendis, toto animo dies, noctesque cogitaret. Sed quum in ipsos palam impetum facere vereretur, partim spectata vitæ innocentia, partim etiam virorum prin-

principum gratia , & summi (quod caput est) Pontificis auctoritate subnixos ; iracundiæ suæ fulmina in populares suos, familiares nostros, aperte contorquet . Ac primum , quod e suo clero complures nostra disciplina ac meditationibus imbutos esse cognoverat ; edicto minaci juris in Ecclesia Toletana dicundi potestate privat sacerdotes eos , qui e nostra formula spiritualibus Exercitationibus operâ dedissent . Deinde præsentis anathematis pœna proposita , vetat in Academia Complutensi omnino quenquam a nostris hominibus Ecclesiæ sacramenta suscipere . Quæ res, utpote insigni infamia , varios illico rumores hominum Hispania pene tota commovit : quum alii nostrorum acta, mores, instituta defenderent ; alii contra non sine gravi aliqua , certa que ratione tantum Antistitem ita de Societate statuisset disputarent . Nostri , quamvis Dei clementia , & conscientiae testimonio freti , re tamen tam atroci , tamque inopinata perculsi , angebantur animo : neque tam ignominia sua , quam Ecclesiæ damno permovebantur , quod ex tanta ho-

minum alienatione , tantisque calumniis imminere necessario videbatur. Itaque quum obsecrationibus, & sacrificiis, & voluntaria corporum castigatione cœleste Numen de more propitiassent; per communes amicos Archiepiscopum docent, nihil ab se vel contra Ecclesiæ rem, vel contra ipsius Archiepiscopi dignitatem esse commissum; cur in rebus divinis occupati, & nihil, nisi Dei gloriam, & proximorum salutem, ex Apostolica auctoritate quærentes, tantis injuriis affici, præsertim indicta causa, debuerint. Si quid secus ab inimicis ad eum delatum sit; se ad purganda crimina, atque ad omnem satisfactionem in Domino paratos esse: tantum ab eo suppliciter petere, uti conceptam iram ad causam usque cognitam pro sua sapientia, ac pietate sustineat. Quum ille nihil idcirco de acerbitate remitteret, satisque appareret, nostri nominis odium altius in ejus animo insedisse, quam ut evelli, aut mitigari ulla ratione posset; IGNATII voluntatem, atque consilium per literas quamprimum exquirunt. Ille, circumspectis rebus omnibus, Deumque per se; suosque enixe precatus, ut ca-
res

res ad ipsius gloriam, salutemque animarum bene, ac feliciter eveniret; sine ulla dubitatione, si Archiepiscopus in incepto persistat, jubet nostros ad consilium Regium provocare; literas Apostolicas proferre; Societatis causam cum CHRISTI causa conjunctam æque moderate, ac fortiter agere. Ipse interea ad Pontificem adit supplex; Archiepiscopi factum exponit; summi tribunalis opem, & auctoritatem implorat: sine ulla tamen graviore querimonia, vel exaggeratione verborum. Ac nostri quoque in Hispania ex IGNATII præcepto rem ad consilium deferunt; Pontificia diplomata, & jura Societatis legitima ostendunt; obseptum sibi aditum ad proximos adjuvandos exposculant. Quæ quum nulla ipsorum culpa ab Archiepiscopo acta esse constaret; eum denique exitum habuit res, ut & Regii consilii decreto, & acri Pontificis objurgatione Archiepiscopus edicta sua revocare, nostrosque omni molestia, atque ignominia liberare coactus sit. Quæ res lætitiâ bonis omnibus attulit eo majorem, quo magis ad eum diem de nostra existimatione, ac fama solliciti fuerant.

Arque haud ita multo post, Archiepiscopo vita functo, nostri a Toletana civitate benigne invitati, & in iis ipsis ædibus publice collocati sunt, quas idem Archiepiscopus paullo ante clericis quibusdam ædificaverat. Ut ab iis, qui divinam providentiam ex rerū humanarum eventis observant; non sine causa animadversum fuerit, omnes tanti Præfulis in Societatem impetus, & conatus eo denique recidisse; ut quum maxime nostros, opinionis errore deceptus, ex universa Hispania pulsos cuperet; tunc ipse in sua Toletana metropoli domum illis exstrueret, ornaretque. Ejusmodi fuit igitur Hispaniensis illius procellæ transitus. Ac pari felicitate in aliis quoque provinciis coortæ in nos tempestates, IGNATII lenitate, prudentiaque sedatæ sunt: ac Dei beneficio ubique fere Societas majora in dies incrementa capiebat.

De Julii III. obitu, & de Marcelli II. in Ignatium, nostrosque benevolentia.

Cap. XXII.

INTER hæc Julius anno Pontificatus quinto demoritur: cui Marcellus

cellus Cervinus Politianus ingenti bonorum omnium gaudio suffectus est. Quidquid enim erat spei de publicis rebus, id pene totum ejus Pontificatus annis vulgo desponderant. Ad hunc IGNATIUS pro veteri familiaritate quum adorandi, & gratulandi causa venisset; arcte amplexus hominem Pontifex, & suavissime exoscultatus, multa cum eo inambulans de fidei Christianæ propagatione, deque restituenda Ecclesiastica disciplina serio contulit: atque ob id ipsum nonnullos ab eo petiit viros, quos haberet apud se consilii causa. Cæterum in primis dilexit Jacobum Lainem, & Martinum Olavium: quorum videlicet utriusque virtutem, ac sapientiam optime noverat. Nam de Francisco Xaverio, cujus fama rebusque gestis valde permovebatur; jam ante exoraverat, ut illum omnino Romam ex India revocaret: quod tanti viri videndi, ruendique in ejus amplexum miro quodam desiderio teneretur. Quin etiam nostros, quotquot ea tempestate Romæ versabantur, ad se in palatium adduci jusserat; quod hæc copiolas recensere, & singulos coram, quasi bonus Imperator milites, vellet

inspicere. Denique multis de nostra Societate verbis ultro citroque habitis; Tu bellatores (inquit Pontifex) confice; nos utemur. Quum ab eo congressu, aliisque deinde colloquiis lætus admodum discessisset IGNA-TIUS, & optima spe Societatem impleisset; brevi ea lætitia cunctis evanuit. Siquidem Marcellus altero & vicesimo die, quam Pontifex declaratus fuerat, febris extinctus, ingenti omnium luctu Christianam Rempublicam orbam, ac debilitatam reliquit.

Ignatii obitus . Cap. XXIII.

SUCCESSIT Marcello Paullus eo nomine quartus: qui, quum propter nonnullas interpositas offensiones accerimus nostri Ordinis inimicus fore putaretur; hominum opinionem longe fefellit. Nam & in IGNATIUM ipsū, cunctis admirantibus, perhonorificum sese præbuit; & Societatem multis rebus decoravit, auxitque; & nostrorum hominum opera maximis in rebus Ecclesiæ plurimum usus est; & de fundando collegio, seu Academia, quam in Urbe IGNA TIUS magno Reipublicæ Christianæ bono institue-
rat,

rat, serio cogitavit. Hunc Pontificem inter, & Philippum Catholicum Regem exorto gravi, & periculoso bello, quod brevi deinde compositum est; cuncta misceri; compleri armatis Urbs; tympanorum, ac tormentorum horrifico strepitu omnia personare; pacis artibus parum admodum loci esse. Quocirca IGNATIUS pertæsus temporum, & Societatis rebus utcunque compositis, contemplandi studio secessit in villam, quam non longe ab æde sanctæ Balbinæ, ad Thermas Antonianas, in usum præcipue Romani Collegii, amicorum benignitate nuper exstruxerat. Ibi vel tectorio novi operis male acceptus, vel urgente jam senio, lethalem in febrem incidit: sic, ut quum ejus intima urerentur præcordia; nullus in facie pallor, nulla in toto corpore signa mortis exsisterent. Tantum insolita quædam lassitudo in membris, ac motu apparebat. Itaque domum relatus, in lectulo collocatur. Accersiti confestim medici bono animo jubent nostros esse. At ille quum sibi ultimum diem instare sentiret; mirantibus cæteris, misit, qui a summo Pontifice sibi decedenti salutarem expiationem,

tionem, & indulgentiam ritu catholico precaretur. Deinde quum ad multam noctem de more vigilasset, quin etiam nonnulla cū domesticis in rem Collegii transegisset; sopori se dedit: itemque qui aderant, cubitum discessere, nihil admodum periculi suspicantes. Atecce mane postridie duo e fratribus, ejus vitæ quotidianæ administri, cubiculum visendi Patris causa introeunt; ad lectulum sensim accedunt; ac præter omnium opinionem vitali spiritu pene defectum offendunt. Accurritur illico ad socios: alii ad medicum advolant; alii interea ad refocillandas vires) ut assolet) jusculum porrigunt: quibus ille quum nihil jam opus esse dixisset, IESUM intermortuis vocibus identidem appellans, placidissime efflavit animam, hora post solis ortum prima, feria sexta, pridie Calendas Augusti, anno post Christum natum M. D. LVI. Qui vero ad Pontificem pridie sub vesperam fuerat destinatus; quod nihil tale metueret, re in proximam lucem dilata; quum, quod volebat, statim impetrasset, libète Pontifice, & verbis amicissimis IGNATIUM prosequente; graviter deinde semet incu-

fans,

fans, tempori non occurrit. Defuncti corpustum inspiciendi, tum exenterandi causa dissectum, summam viri abstinentiam, & sobrietatem liquido comprobavit. Siquidem & stomachus venterque prorsus inanis, & præ sic-
 citate diuturna mire contractus apparuit; & jecur ea ipsa de causa ita obduratum, aridumque, ut pene lapidesceret. Sane Realdus Columbus, egregius ea tempestate Sector, qui aperiendo interfuit; in hepatis vena, quæ Porta dicitur, lapides tres, sese invenisse testatur in suo de Anatomia libro: ut pro miraculo non levi habitum sit, vitalibus adeo affectis, ac propemodum exustis, hominem tandiu vivere potuisse, præsertim hilari semper, eodemque vultu exsequentem Prepositi Generalis officia & munera. Mortuus est autem anno ætatis quinto & sexagesimo, suæ conversionis ferme trigesimo quinto, confirmatæ vero Societatis sextodecimo. Quam ille tam exiguo temporis intervallo, tam longe lateque propagatam reliquit; ut jam tum ab ipso constitutæ numerarentur provinciæ duodecim, & in iis varia nostrorum domicilia fere centum. Vulgata ejus morte,

ingens confestim hominum concursus visendi causa, domum est factus: atque hi manus, hi pedes certatim exosculari; alii rosaria, quæ vocantur, applicare corpori; multi etiam pilei, vestiumve, quibus uti consueverat, frustulum, aliquod enixe rogare: quibus tamen modestiæ gratia nihil a nostris est datum. Corpus in eodem cubiculo, ubi exspiraverat, biduo ferme servatum, sabbato sub vesperam inclusum arcæ, post exsequias miræ populi frequentia celebratas, in templo nostro ad dextrum latus aræ maximæ humatum est. Ac statim præsentem opem ex IGNATII patrocínio nostri sensere. Non enim, ut multi putarant, orba tali Parente Societas mærori se dedit, aut concidit: quin immo steterè animis Patres: perque omnes ordines insolita quædam suavitas spiritus, & mentium vigor ad subeundos Christi causa labores, & cæpta strenue promovenda, pervasit.

Libri Secundi Finis.

DE



DE S. IGNATII

LOJOLÆ

VITA, ET MORIBUS.

LIBER TERTIUS.

HActenus IGNATII toto vitæ cursu proposito, nunc præcipua quædam de ipsius factis, dictis, ac moribus, & quidem quo magis in promptu sint, per species exsequemur. Ac primum de studio precandi, meditandique, qua laude in primis IGNATIUS floruit.

*De Orandi assiduitate, & studio
Pietatis. Cap. I.*

INITIO conversionis, ut ante diximus, precandi contemplandique causa magnam sibi vim intulit, partim in rerū caduca-

earum, quibus assueverat, vitanda recordatione, partim etiam in scrupulorum molestiis abigendis. Procedente deinde tempore, quum magis in dies a contagione corporis, Deo adjutore, se abstraxisset; tantam ejus generis facultatem adeptus est, non modo ut e cœli, siderumque adspectu, quo maxime capiebatur; sed etiam ut ex intuitu floris, aut herbæ, aut levissimæ cujuslibet rei confestim in Dei cogitationem, amoremque suavissime raperetur. Idque nostris hominibus cupiebat esse familiarissimū, ut in singulis creatis rebus, quoad ejus fieri posset, Creatoris potentiam, sapientiam, bonitatem agnoscerent. Eisdem monebat, ut contra quotidianas Dæmonum insidias, ne circumventi repente in fraudem inducerentur; vel instructo, quod ajunt, agmine semper incederent; vel certe dissipatis in varias curas, & negotia viribus animi tanquam receptui canerent statis horis diei: & in semetipsi descenderent: suaque omnia dicta, facta, cogitata coram Deo quam diligentissime reputarent, adhibito etiam monitore, si opus esset, vel memoriæ, vel etiam notitiæ

titiæ causa : denique omnia probe
 contemplati, contra id vitium ma-
 xime pugnam capefferent, quo vitio
 se præcipue urgeri, & laborare sen-
 tirent: nec ante desisterent, quam
 Deo duce debellatum esset. Sane
 ipse, quanquam se habebat semper
 in potestate, & ex Divi Bernardi præ-
 cepto non se rebustradere, sed com-
 modare consueverat; tamen, qua erat
 diligentia, in singulas horas ultro
 inquirebat in se: idque, propter diu-
 turnam exercitationem, nullo nego-
 tio: magisque, ac magis in spiritu
 proficere nitebatur, diem cum die,
 ut supra diximus, hebdomadam cum
 hebdomada conferens: qui cursus ad
 candorem animi, ac perfectionem
 certissimus est. Neque id solum; sed
 etiam statis quotidie temporibus ere-
 pto ex summis occupationibus otio,
 contemplationi vacabat: quam ad rem
 aliquoties a domesticis clam observa-
 tus est hoc maxime modo se compa-
 rans. Ut enim superiorem ascenderat
 ædium partem, unde liber esset pro-
 spectus ad sidera; stabat aliquantisper
 oculis in cælum defixis; tum provo-
 lutus in genua, totius hujusce pul-
 critudinis Conditorem suppliciter
 ado-

adorabat; deinde propter imbecillitatem, humili scabello simul atque confedisset, continuo ex oculis uberes lacrymarum rivuli profluebant: idque nullo prorsus vel singultu, vel strepitu. Atque in hunc fere modum æque animo, & corpore immotus excipiebat divini luminis radios: ac Patri cœlesti mira quadam spiritus dulcedine jungebatur. Neque vero ad beatos hosce congressus tantummodo sub orationis horam componebat ille sese; verum in perpetua quadam erat vigilia contra omnes rerum mortalium illecebras, & otiosam mentis evagationem: nec minus accurate animum ab omni labe tuebatur, quam qui pretiosis ornati vestibus, via lutulenta coguntur incedere. Intenta erat custodia sensuum; quotidiana cujuslibet omissionis confessio; jugis recordatio beneficiorum Dei; in aliorum factis dictisque interpretandis nulla temeritas: denique summa observabat cura, quidquid ad Christi gratiam vel tuendam, vel augendam quoquo modo pertinere intelligeret. Mortalium rerum curas, ac præcipue quæ ad affines cognatosve pertinerent; omnino

omnino refugit, illud Apostoli dictum reputans apud se : *Nemo militans Deo implicat se negotiis secularibus* . Erat ei proneptis ex fratre virgo , quæ deinde Joanni Borgiæ nupsit, hodie Philippi Regis apud Cæsarem Legato . De hac in matrimonio collocanda quum ad eum subinde referretur ; totâ ille rem semper ad cognatos rejecit : nec adduci unquam potuit , ut vel minimam ejus negotii partem attingeret . Oranti aliquando per hyemem clauso cubiculo , allatas e Guipuzcoa literas janitor festine reddidit, ratus gratissimas fore , quod nimirum longo & locorum , & temporum intervallo afferrentur : at ille fasciculum , ut erat ligatus , illico in ignem abjecit, re ipsa janitorem admonens, qui sese cœlesti militiæ addixerit , huic esse mortalia negligenda . Peregrinis hominibus conditionem ipso interprete (quod multum apud Principes auctoritate valeret) in aula quærentibus, negabat sibi, nisi cum summi Regis aula, rem esse : ad eam si aditum optarent ; daturum se operam , quantum labore, ac precibus assequi posset , ut essent in intimis Regis amicis , ac familiaribus . Quo
re-

responso vulgato, minus multi jam
 in eo genere molestiam illi exhibe-
 bant. Nihil majoris momenti aggre-
 diebatur unquam, nisi attente con-
 sulto, ac propitiato Deo: nec ullum
 quamvis leve religionis obibat offi-
 cium, quin ejus animi ardor ex toto
 corporis habitu, ac præsertim ex fron-
 te, atque oculis emicaret: ex quo
 facile existimari potest, qualem ille
 se in horaria precatione psalmisque,
 & in sacrificio Missæ præstiterit.
 Sane, quum initio sacerdoti in medio
 Lateranensi templo Christi natalitia
 celebraret ad aram sacris Apostolo-
 rum Petri, Paulli, & Andreæ reliquiis
 inclytam, tanta est repente spiritus
 dulcedine delibutus; ut inter divinam
 rem peragendam lacrymas tenere
 nulla unquam ratione potuerit. Quo
 tam insolito spectaculo commotus e
 circumfusa multitudo quidam, ac
 rem longe secus interpretatus, Fran-
 ciscodeinde Stratæ IGNATII admi-
 nistro in aurem insufurrans: facino-
 rosum nempe virum, inquit, sacerdo-
 tem istum tuum, & omnibus flagitiis
 coopertum, qui conscientiae stimulis
 agitato, crimina sua toto pene sacro
 defleverit. Visionum præterea exstat
 li-

libellus, ac luminum, quæ illi ferme sacrificanti obvenire, quo maxime tempore Societatem ordinabat: quas visiones ipsemet pietatis, & memoriæ causa in ephemeridem retulit. Eum libellum qui attentius legat, clare perspiciat qua præparatione, quo spiritu ad Sacramentum altaris accedere consueverit. Septem etiam Urbis templa & religione, & Pontificum indulgentiis celeberrima certis anni temporibus diligenter, & caste visebat pedes, & quidem per hyemem lacernatus, haud sine mantello: nec ulla corporis lassitudine aut cæteros exemplo suo destitui, aut se tantorum bonorum cōmunionē fraudari patiebatur. Piacularia vero grana quæ dicuntur, & cereas Agni cœlestis effigies, pictasque Sanctorum icunculas, & alia id genus, quæ ab impiis iridentur; ita studiose tuebatur, & charas habebat; ut in ejus scrinio post mortem nihil fere aliud apparuerit. Pro Ecclesia catholica, ac nominatim pro Christianis Regibus, atque Principibus quotidie ardentem orabat: pro summo vero Pontifice nunquam sine uberrimis lacrymis. Et quoniam denuo lacry-

ma-

marum incidit mentio ; non omit-
tenda videtur hoc loco res memoratu
digna . In cæteris ornamentis, ac be-
neficiis donum etiam lacrymarum
IGNATIUS a Christo Domino ac-
ceperat, sic, ut in singulas preces illico
fletus erumperet : qua consuetudine
eo denique adductus est ; uti propter
acrimoniam humoris paulatim exesa
luminis vi , aciem oculorum pene
amiserit . Hac ille jactura, quod ad
ipsum privatim attinebat , non sane
movebatur : quinimmo triumphabat
se in obsequio Christi oculos perdere .
Sed quoniam id fieri sine magno com-
munis rei detrimento non poterat ;
suorum præsertim accedente impulsu,
precari Dominum institit, ut sibi li-
ceret interdum a lacrymis tempera-
re : nec frustra ; siquidem ex eo tem-
pore tantum in lacrymas jus, & ar-
bitrium obtinuit ; ut earum quasi
~~habenas, prout vellet, adduceret idem,~~
atque remitteret . Quæ res cuiquam
fortasse veritatis fidem excedere vi-
deatur : sed nobis utique in tam re-
centi memoria mentiendi causa non
est .

Quod

*Quod ejus fuerit de perfectione
judicium. Cap. II.*

AC licet precationi usque adeo deditus esset; tamen eo studio se vel a publica re administranda, vel a charitatis, cæterarumque virtutum officiis minime patiebatur abduci. Et quanquam certum unicuique spatium temporis quotidie necessarium esse dicebat ad se colligendum, viresque divinitus impetrandas; tamen eos non ita laudabat, qui dulcedine solitudinis, & divinæ familiaritatis illecti, in arenam descendere, & sua primum vitia evellere, deinde etiam proximos adjuvare negligerent. Quinimmo, pluribus doctus experimentis, agebat, qui minus in eo genere sibi temperant, eorum plerosque (nisi periti cujuspiam ductum sequantur, vel præcipuo Dei fulciantur auxilio) partim dæmonum illusionibus obnoxiosos esse; partim etiam contumaces & sibi placentes, & in sua sententia nire obstinatos ac perversos evadere: qua peste nulla propemodum esset hominum cœtibus capitalior. Itaque horum ille profectum non tam ex
con-

continuata precatōne, vel diuturno secessu, quam e solidæ virtutis officiis, ac præsertim ex mansuetudine, atque animi æquitate spectabat. Quum e familiaribus nescio quis fratrem præstanti religione collaudans, ad IGNATIUM cum admiratione dixisset: en hominem jugiter precatōni vacantem: immo vero, mutata voce, en, inquit IGNATIUS, hominem sibi met acriter imperantem. Alium quempiam, quod stomachosior esset natura, & subinde in amara verba prorumperet, sese fratrum consuetudini alieno tempore subtrahentem, IGNATIUS blande compellans: quin te, inquit, statutis horis in fratrum consuetudinem das? quum ille iracundiam naturæ, bilemque prætenderet; næ tu vehementer erras, ait IGNATIUS; etenim hæc, & huiusmodi vitia non fugiendo, sed resistendo vincuntur. Denique, licet piæ precatōnis laude præcelleret ipse, ut dictum est; semper tamen spiritum; quem vocant, mortificationis, spiritui speculationis antetulit. Nam ut in eloquentiæ studio, quum & ars, & usus ipse sit necessarius; longe plus tamen a sapientibus viris usui, quam præceptioni

tri-

tribuitur ; sic in parandis virtutibus quum & commentatio , & actio requirantur ; multo plustamen agendo , & pugnando , quam speculando , vel cogitando proficitur .

De Charitate ipsius in Deum . Cap. III

Charitate in Deum fuit , quanta par est eum esse , qui ipsius Dei gratia rebus humanis nuncium sponte remiserit : neque solum eatenus Dominum amabat , ut præ illo reliqua omnia nihili duceret (quæ virtutis hujusce præcipua est pars) verum inerat in amore voluptas mira : prorsus ut quantislibet pressus curis , ac nolestiis fatigatus , in unius Dei recordatione , & quasi amplexu , per summam delectationem acquiesceret . **CHRISTUM** vero Dominum , ac liberatorem videndi sicuti est , tanta flagrabat cupiditate ; ut eam ipsam ob rem solvi corporis vinculis vehementius in dies optaret . Itaque , si quando graviorem incidisset in morbum ; concepta migrandi spe , abstraheretur illico a sensibus , non sine magno valetudinis detrimento : quocirca mentem a cœlestibus rebus interim avocare etiam atque etiam jubebatur .

batur a medicis. Et quoniam acerbissima Christi mors pro salute humani generis obita **IGNATIO** semper obversabatur; vicissim ille pro **CHRISTO** per summos cruciatus quotidie cupiebat emori millies. Quoties vero ingesta in illum convicia, & ludibria reputaret apud se, non modo rei atrocitate permovebatur, ut multi; sed etiam accendebatur generoso quodam imitandi studio: atque in semetipsum, quasi tanti sceleris auctorem, acerrime exardescebat: ac nisi eum cohibuisset existimationis ratio propter salutem aliorum; simulata dementia, ad plebem in se concitandam, nudus, onustusque cornibus, aut alio fœdo corporis habitu prodire non dubitasset in publicum: & incessentes cœno, vel stercore pueros, vocesque improbas, & sputa, & omnes alias insanæ multitudinis contumelias libentissime pertulisset. Sed quoniam ejusmodi nulla se dabat occasio; certe quod erat proximum, sedulo faciebat, ut immortalia Domini beneficia in se, memoria coleret sempiterna: & in ejusdem vel indaganda voluntate, vel gloria quærenda suas omnes curas
cogi-

cogitationesque consumeret: cujus rei vel hoc satis magno argumento sit. Inter ipsam negotiorum molem, perditas meretriculas tanto studio conabatur ab impuritate avocare; ut siqua ex iis resipisceret, seque intra pudicitiae septa recipere vellet; grandis jam natu vir, & Præpositus Generalis, antecedere ipsemet, ac perductoris quodammodo munere fungi CHRISTI causa non erubesceret. In quo quum admoneretur a quibusdam, frustra tempus, ac laborem insumi; quippe insanabiles esse ejusmodi feminas; ac licet in præsentia poenitentiam ostenderent, brevi tamen ad ingenium redituras; ego vero, inquit ille, cujuslibet istarum unius duntaxat noctis impedisse flagitia, & injurias in Deum omnis operæ, ac vigilantiae pretium duxerim.

*De charitate in Proximos.
Cap. IV.*

EX hoc tam incenso in Deum amore egregia nimirum illa charitas in homines redundabat. Quos quoniam pretioso ejusdem sanguine redemptos, ac proinde charissimos illi

M scie-

sciebat esse; quidquid in Deum non poterat nullius egentem rei; omne id ipsius gratia in proximos conferebat. Ut primum e peccatorum cœno emerſit, confestim ad cæteros ex eodem cœno extrahendos incubuit: atque ob id ipsum (uti supra dictum est) ingenti labore, & incommodo literis operam dedit: & in Societate instituenda nihil spectavit aliud, nisi ut errantes animos ad rectum salutis iter omni ratione reduceret. *Barcino*, quum in grammaticę studio versaretur, eodemque tempore animorum quoque salutem acerrime procuraret; virginum quoddam collegium, cujus nomen consulto reticeo; soluta admodum disciplina, corruptisque moribus, ad veterem sanctimoniam, ac sobrietatem omni studio revocare nitebatur: suadebatque illis præcipue frequentem usum sacrę Confessionis, & Eucharistiæ. Quam ad rem, temporibus illis insolitam, quo facilius eas adduceret, præire ipsemet illis palam decrevit, adhibito ad id *Moyſe Pujalto* sacerdote, quo ipse ad confessiones utebatur, spectatæ virtutis, ac sanctitatis viro. Igitur ex ejus manu corpus Domini quum

subin-

subinde sumsisset, feminis ex oedeo spectantibus; tam præclaro exemplo, & assiduis orationibus incitatae ple-
ræque, ad salutarem pœnitentiam of-
ficiumque traductæ sunt. Quod ne-
farii quidam amatores ubi sensere,
aditumque sibi ad optata flagitia ma-
gis in dies obseptum videre; in extre-
mam efferati rabiem, **IGNATIUM**,
& **Pujaltum** ex insidiis adoriri consti-
tuunt: ac die quodam e templo red-
euntem utrumque fustibus ita male
acceperunt; ut **Pujaltus** paullo post e
vulnerum dolore sit mortuus; **IGNA-
TIUS** vero dies aliquot in lecto jacue-
rit. Sed vixdum receptis viribus, nec
alterius nece, nec suo malo perterri-
tus, ad instituta charitatis officia rediit
alacer. Quumque eum vulgo mone-
rent, ac per Deum obtestarentur
amici, ne denuo in capitis discrimen
daret sese; quid mihi optatius, in-
quit ille, quam pro **CHRISTO**
Domino, meisque proximis emori?
Parisiis amicum a turpi cujusdam
feminæ consuetudine frustra sæpe
revocare conatus, cujus ille flagitii
causa vicum subinde petebat, non
longe ab urbe positum; denique
egressus hominis, & itinera dissimu-

lanter explorans, deterrendi ejus consilium tale commentus est. Stagnum erat propter viam, qua transeundum erat illi de more: eo mature prævertens IGNATIUS, tempestate perfrigida sese nudus aquis collo tenus immerfit; ibique salutare amico tetendit insidias. Nam, ut appropinquantem adspexit, Deum precatus, ut ea res utrique feliciter eveniret, horribili repente in adversum intonuit voce. Quo, quo miserrime properas? non intelligis in quanto versere periculo? nonne intentum in te divinæ justitiæ gladium vides? Perge porro, perge nefariam istam explere libidinem. Ego me hic tandiu tua causa macerabo, quoad cœlestes iras meo malo avertam abs te. At ille subita voce perculsus, atque ad IGNATII adspæctum veluti deprehensus, obstupuit: demiratusque charitatem viri, nec dubio pudore concepto, retulit pedem: & in posterum, Deo adjuvante, sese ab illa pestifera familiaritate continuit. Alius quidam IGNATII alumnus, præstanti vir ingenio, magnos in virtute processus effecerat; ac deinde (quæ humana fragilitas est) labore victus, dæmone sollicitante, cir-

circumspiciebat fugam. Quod ubi sensit IGNATIUS, variis ad eum retinendum hortationibus, monitisque incassum adhibitis, eo denique descendit; ut pro discipuli sanitate totum triduum omni cibo, potuque abstineret, precesque cum lacrymis ad Superos funderet. Qua poena, tanquam remedio languenti animo applicito, resipuit ille, suumque errorem gemebundus agnovit: ac deinde in suscepto genere vitæ cum laude perstitit. Parisiis, ut antea dictum est, deposita pecunia fraudatus a contubernali, sic, ut ad sese alendum stipem emendicare deinde cogeretur magno studiorum detrimento; non modo iratus amico non est; verum etiam insigni beneficio rependit injuriam. Quum enim fraudator ille postea Hispaniam repetens, gravi morbo ex itinere implicitus, Rhotomagi substitisset (quæ urbs tridui ferme iter distat Lutetia) ingravescente valetudine paulatim ad omnium rerum inopiam est reductus; quumque, ut ignotus in alieno solo, spem nullam subsidii cerneret; licet præterita meminisset, ac præclare sibi esset conscius, quam male de IGNATIO meritus,

fuisset; tamen tantam opinionem de
 eximia viri bonitate conceperat, ut
 non dubitaverit illum de suo casu per
 literas facere certiores: & aliquid
 opis ab eo suppliciter petere. Tum
 IGNATIUS, quasi hæreditas aliqua
 sibi obvenisset, sic alacer, nulla inter-
 posita mora, se in viam dat, Deum
 pro amici salute etiam atque etiam
 obsecrans: quin etiam (quod longe
 mirabilius est) ad propitiandum illi
 Numen, iter illud totum pedibus,
 nullo prorsus cibo potuque, ingenti
 celeritate confecit. Urbem ingressus,
 conquistum hominem amicissime in-
 visit; affectum, semianimemque se-
 dulo ministerio recreavit. Atque ubi
 morbo levatus est, literas ei com-
 mendatitias ad amicos in Hispaniam
 dedit: & mendicato ab se viatico in-
 structum in navem imposuit, quum
 ille simul pudore, gaudioque confu-
 sus, dexteram IGNATII tenens,
 Deum, Superosque omnes invocaret
 ad gratiam illi pro se referendam:
 satisque mirari non posset, senescente
 jam mundo, tantum charitatis exem-
 plum in terris existere. Per idem
 studiorum tempus tametsi multum
 de spirituali functione remiserat; nun-
 quam

LIBER TERTIUS. 271

quam tamen potuit se continere, quoninus ereptum ex literariis occupationibus quotidie tempus aliquod in proximorum salute consumeret. Itaque & condiscipulos ad virtutem, ac pietatem ex occasione incitabat; & ex conlatitia pecunia multorum suble-
vabat inopiam; & ægrotos visendo, recreandoque humanissime solabatur. In iis quum ad quendam adiisset gra-
vi, & contagioso ulcere laborantem; & ministrandi causa, ut fit, decumben-
tem subinde attrectasset; in discessu netus IGNATIUM subiit, ne ex eo
contactu dextera pestilentiam contra-
xisset; quæ suspicio quum sollicitaret hominem vehementius, eumque ab
huiusmodi charitatis officio in poste-
rum avocaret; ille cognita fraude, con-
estim in semetipsum exarsit: dex-
tramque in os identidem inferens in-
reperuit ultro: qui de una manu tam
anxius es, quid universo corpori fa-
cies? Atque hac fortitudine, & præ-
sentem depulit metum, & ad eadem
porro exsequenda pietatis opera sese
vegetum, atque hilarem præstitit.
Atque hanc ægrotos adjuvandi con-
suetudinem non modo privatus, ubi-
cunque terrarum fuit, verum etiam

Societati Præpositus diligentissime tenuit. Nam e nostris ut quisque in morbum inciderat; cujuslibet esset ordinis, extemplo acciri medicum imperabat: ac nihil prorsus omitte eorum, quæ is præscripsisset, oppigneratis etiam, divenditisque, si opus esset, lancibus, stragulisque, & cætera supellectili. Sane, quum ex laicis adjutoribus quidam sæva conflictaretur febri; ad eumque refocillandum delicatiori cibo opus esset; quidquid nummulum domi erat, denarios tres eam unam in rem infumi jussit: ac resistenti paullisper obsonatori, nihilque præterea pecuniæ ad cæteros alendos superesse dicenti: atqui nos quidem, inquit ille, valemus: arido pane contenti esse poterimus. Atque ita languenti coëmum obsonium est. Ipsos vero decumbentes invisebat subinde ipsemet, confirmans unumquemque verbis plane divinis, atque cœlestibus: dabatque operam, ut, omni deposita sollicitudine, superioribus esse curæ se suamque salutem, sine ulla dubitatione sentirent. Homines vel de se ipso privatim, vel de Societate communiter bene meritos diligentissime coluit: nullumque in eos

eos neque vivos, neque mortuos grati, ac memoris animi officium prætermisit. Quippe non modo pro ipsorum salute Dominum per se, suosque precabatur assidue; sed etiam, dum viverent, sæpe domum veniebat salutandi causa: eisdemque adeuntes ad se quanquam alieno tempore, accipiebat in primis hilariter: deque Societatis progressu, ac rebus præsertim Indicis, quarum ipsa longinquitas habet delectationem; pergebat amicissime facere certiores: atque etiam, quum opus esset, quibus rebus poterat, benigne adjuvabat. Hieronymo quidem Arzio, Hispano doctori (quicum erat ei magna necessitudo) non modo graviter ægrotanti frequens adfuit ipsemet; sed etiam fidelibus famulis destituto, probos, & industrios e Societate viros ministrandi gratia submisit. Andreas Lipomanus Patricius Venetus, quem Trinitatis Priorem appellabant, vir non pietate minus, quam genere nobilis, Collegio nostrorum hominum constituendo Patavii opimum sacerdotium ejusdem urbis addixerat, dimidia tantum parte vectigalium sibi, quoad viveret, reservata. At vero

IGNATIUS, ne se vinci pateretur officio ; patentibus literis eum ultro perpetuum sacerdotii administratorem declaravit : neque e vectigalibus attigit quidquam , nisi quod ab ipso Priore quotannis ad paucos e nostris alendos per eleemosynam præberetur. Quin etiam ejus fratris filio pensionem decrevit annuam aureorum ad quadringentos : quam tamen bonus ille Prior nequaquam admisit . Ac cæteros item , quorum beneficiis provocatus esset ; eximio quodam studio, & observantia prosecutus est.

Mansuetudo ejusdem , & comitas . . . Cap. V.

AB omni fastu , & moribus imperiosis vehementer abhorruit . Vectigium in eo contumaciæ cerne- res nullum . Et , quod difficillimum est , lenitatem ita cum gravitate miscebat ; ut neque facilitas de auctori- tate , neque severitas quidquam de suavitate detraheret . Parisiis per jo- cum invitatus a nobili quodam, vellet- ne trudiculis ludere (quibus in ob- longa mensa per angustum fornicem, eburnea pila trajicitur) ego vero lu- dam ,

dam, inquit IGNATIUS. At enim qua sponsione, subjicit ille, qui pecunia careas? Tum IGNATIUS: hac sponsione, respondit, ut certo utique dierum numero tibi deserviam: veruntamen arbitrato tuo, si viceris tu; meo, si superior ipse discessero. Quum ea conditio placuisset; age sane: in certamen descenditur. Quumque nihil minus calleret IGNATIUS; divinitus factum est, ut in singulos omnino trajectus victor evaderet: subinde exclamante adversario, se merito plecti, qui IGNATIUM provocasset: seque divinum judicium prorsus agnoscere. Peracto deinde certamine, victum victor ab inanibus curis, & occupationibus in aliquot dies abductum e sponsione, spiritualibus exercitationibus diligenter excoluit: torpentemque situ, ac deliciis animum ipsius ad salutarem Dei metum, æternæque vitæ cogitationem excitavit. Venetiis Patavium pedibus quum iter haberet, domestica, eaque admodum attrita lacerna ob inopiam indutus, Jacobo Lainecomite; pecuarius quidam puer, qui a via non longe armenta pascebat; conspectis eminus peregrinis, ad

eos repente propius advolat; habitus-
 que fortasse novitate permotus, defi-
 xis procaciter in IGNATIUM ocu-
 lis, cachinnos tollere, eidemque licen-
 tius cœpit illudere. Quumq; IGNA-
 TIUS vultu placido substitisset; con-
 versus ad eum comes: quin, ait, acce-
 leras gradum pater, teque istius pueri
 petulantia subtrahis? Immo vero, in-
 quit ille, cur puerum oblata sibi præ-
 ter spem hac tanta oblectatione frau-
 demus? Itaque consulto etiam diutius
 hæsit in iisdem vestigiis: ac se curio-
 sius intuendum, ridendumque affatim
 protervo adolescentulo præbuit: plus
 nimirum ex hoc qualicumque sui con-
 tentu, ac ludibrio hauriens volu-
 ptatis, quam alii ex vulgi plausu,
 fausta que acclamatione percipiunt.
 Atque hunc mansuetudinis tenorem
 diligenter in omni vita servavit: ac
 satis constat, annis ipsis triginta qui-
 bus CHRISTUM secutus est;
 neminem prorsus ab eo fuisse non
 modo contumeliose tractatum, sed
 ne appellatum quidem acerbius. Si
 quid præciperet; roganti erat pro-
 prior, quam jubenti. Alloquendi vero
 eius causa, nihil erat necesse tempus
 opportunum, aut molles captare adi-
 tus:

tus: qualibet adiisses hora, five corpore melius haberet, five deterius; prosperis æque, atque adversis in rebus, & accipiebat benigne, & patienter ad finem usque sine interpellatione audiebat. Ac nullum quamvis infimæ fortis hominem stare coram se, nedum aperto capite patiebatur esse. Nec modo ex destinato congressu, verum etiam ex occurſu fortuito fratres ita lætis intuebatur oculis; ut vel ex hoc, insitam animo in omnes benevolentiam satis ostenderet. Amicos præterea tum domesticos, tum externos interdum ad prandium, aut cœnam, five ut appellabat ipse, ad pœnitentiam invitabat: nec repudiabat si quis ultro se offerret: quin etiam intervenientes cœnæ, vel in ipso jam exitu, nihilominus jubebat accumbere: & frustula panis ipse carpendo, & simulanda appetentia, convivium consulto extrahebat, quoad novissimus quisque sine rubore, aut sollicitudine, per otium absolveret. Si quis ab eo quidpiam sibi aliifve peteret; vel dabat hilare, verbis etiam, quod ajunt, munus exornans; vel si abnueret, causas afferebat ejusmodi; ut ille sese con-

contentum nullo modo existimare posset. Ac tanta ipsius erat in eo genere vel efficacia, vel suavitas, ut qui ad eum legati a quopiam venerant; quum id, quod volebant, minime impetrassent; IGNATII rationibus interdum ita victi, pacatique discederent, ut ultro ipsi mutata ratione, apud eos, a quibus missi fuerant; ipsius causam pertinacissime tuerentur.

*Gravitas ejusdem, & in custodia
disciplinæ severitas.*

Cap. VI.

AB hac porro comitate, quemadmodum austeritas, sic etiam levitas omnis aberat, & ineptiæ. Ita enim compositus fuit moribus; ut neque manum, neque oculum, membrumve aliquod sine causa, & ratione moveret: & in statu, incessu, accubatione, sessione decorum teneret. Jam in loquendo fuit adeo confideratus, & parcus; ut nullum plane verbum, nisi consulto, ac meditato, proferret. Neque figuris vel amplificationibus utebatur: sed rei gestæ seriem, & rationum momenta sine fuco exponebat. Qua simplicitate
plus

plus valebat in persuadendo, quam alii calamistris, & lenociniis. De se ipso, deque suis rebus, nisi necessitas cogeret, vel Dei gloria postularet, nihil dicebat unquam. Ab aliorum vero factis, dictisque exquirendis, nisi ad suam curam spectarent, omnino abstinebat. Consueverat etiam eos reprehendere, qui de soluta Ecclesiæ disciplina, deque emendandis Principum moribus temere disputarent: quam tentationem se fugasse dicebat consideratione extremi judicii, & eorum, quæ tali tempore a semetipso proprie exigenda forent. Quæ si pro se quisque reputaret, haud ita facile homines in aliorum vitam inquisituros. Denique tanta inerat in ejus fermone provisio, tarditasque longo usu parta; ut quum biliosus, ac præservidus esset natura, pituitosus ob id ipsum, ac lentus haberetur a medicis. Atque hi mores cum admirabili vitæ Sanctitate conjuncti incredibile est, quantum illi conciliarent venerationis. Nam ut quisque intimus erat **IGNATIO**, ita suspiciebat eum maxime. Ludovicum quidem Consalvum Lusitanum, qui domus Romanæ minister aliquandiu vixit, magno rerum usu

usu, magna prudentia virum, dicere solitum accepimus, antequam cum **IGNATIO** coram egisset, præclare sese utique de illo existimare solitum, qui tali Societati præesset. At vero, postquam ipso familiariter usus est; Societatem magni facere cœpisse, quam Deus tali præside, ac moderatore donasset. Jacobus vero Laines, qui proximus ab illo Societatis gubernacula tenuit; cæterique Patres, quamvis humanissime cū illis **IGNATIUS** ageret; tamen eximiam viri virtutem ita reverebantur; ut bene moratos vel parenti liberos, vel magistro discipulos adstare diceres. Quod si quando (quod tamen perraro fiebat) rei necessitate coactus, vultum indueret severiorem, & aliquem increparet asperius; tanta erat vis, pondusque verborum; ut contra ne hiscere quidem auderet quisquam. Idque præsertim in causa viri cuiusdam insignis apparuit; qui quum turbulentior esset, quam ut eum diutius ferri oporteret; quumque ejus animum **IGNATIUS** blandis monitis, præceptisque nequiquam sanare tentasset; ad extremum oratione conversa, divinam testatus justitiam, ac
 cœle-

cœlestis iræ minas intentans, tantum ardorem spiritus præsetulit; ipsi ut parietes, testæque non dubio motu nutare, & concuti viderentur. Quo terrore perculsi qui aderant, illico procumbentes Dei pacem precibus, ac votis exposcere. Ipse vero qui accusabatur, exanimis ad pedes IGNA-TII sese confestim abiecit: ac supplex confusa voce culpæ veniam petiit: seque posthac in officio fore pollicitus est. Continebat autem in disciplina quum ceteros omnes, tum eos maxime, qui vel insigni eruditione, vel generis nobilitate præstarent: quippe quorum dicta, factave ad exemplum in omnes partes valeant plurimum. Otium vero, ut omnium vitiorum fomitem, ac seminarium, in primis oderat. Itaque duos tresve rei familiaris adiutores quum ad januam alieno tempore confabulantes e superiore loco adspexisset; illico iussit acervum lapidum in proximo situm, in summam ædium contignationem sine cunctatione transferre. Eosdem tertio post mense quum ibidem iterum otiantes animadvertisset; illam ipsam lapidum congeriem ut in eundem locum referrent, unde asportaverant, im-

imperavit, amice insuper admonens, nihil in Dei famulatu periculosius esse desidia. Quum quendam in tradito sibi munere valde remissum, atque oscitantem invenisset; quæsiuit ex eo, cuinam in tali ministerio daret operam; Deone, an hominibus? quum ille se Deo utique deservire dixisset; plecteris igitur, inquit IGNATIUS; nam in rebus humanis minus accurate versanti jure forsân ignoverit quispiam: at immortalî Deo ministrari negligenter; id vero nullo pacto ferendum est. Spectaculis publicis, quamvis alioqui licitis, vel etiam sacris, adesse nostros non ita facile permittebat. Quod siqui, facta potestate, se ad ea conferrent; eos etiam atque etiam jubebat sine ullo arrogantiae, seu levitatis indicio modestiam, ac submissionem tenere, cedere omnibus, & infimum semper locum (nisi aliter a circumstantibus cogerentur) eligere. Quum e Romano ab se nuper instituto Collegio adolescentes quosdam solutius in publico ambulantes vidisset; castigandos curavit palam; hortandosque gravi oratione, ut quem haberent insitum animis pudorem, ac verecundiam,

eum

eum externo item corporis habitu præferrent: & quoniam, Apostolo teste, spectaculum facti essent omnibus; caverent etiam atque etiam, ne supervacanea locutione, curioso oculorum obtutu, aliove incondito gestu, motuve corporis quenquam offenderent: præsertim quum eo de genere toto multa cum precatione, lacrymisque conscripta pulcerrima ipse præcepta paullo ante edidisset. Nihil novi moris in Societatem induci se incio est passus: principiisque vigilanter, & acriter obstitit: quippe qui exempli vim nosset, & rerum incrementa fallentia. Quosdam, qui ad vineam injussu luserant pila, laicum etiam sapone manus lavantem haud impune abire permisit. Seditiosos vero, & alienæ laudis obtrektatores, & rerum novarum cupidos non diu tulit: sed omnia expertus, quæ ad revocandam dubiam indolem, & pejore loco positam facere viderentur; si parum proficeret, ad extremum e Societate pellebat. Nec unquam carcerem, compedesve in Societatis mores induci permisit, negans, qui vinculis constringendi forent; eosdem esse ad nostrum institutum idoneos.

neos. Itaque custodiæ loco januam ostentare consueverat. Acciditque aliquando, ut iusta de causa complures adolescentes exauctoratos una dimiserit. Atque huiusmodi fere (quod silentio prætereundum non est) e Societate pulsi homines exitialem exitum sortiti sunt: satisque constat alios inter symphoniam lascive saltantes repente occidisse, alios contracta rixa interfectos, alios denique alio miserabilis lethi genere periisse. In puniendo autem id sequebatur in primis, ut noxæ responderet animadversio, & in suo quisque vitio plecteretur: supervacanea verba silentio, ignaviam labore, honoris cupiditatem ignominia lueret. Ac ferme animadversionum IGNATII genus erat illud: circum humi describere, ex quo noxii ne in iussu excederent; colloquiis certorum hominum nominatim interdicare; verberationes ad præfinitum temporis spatium injungere, & alia ejusmodi. Noxas autem leviores, & quotidianas intelligo, cuiusmodi in homines etiam studiosos perfectionis cadunt: nam graviores IGNATIUS minime tolerasset. Solebat etiam fontibus, ad humilem men-

mensam in triclinio accumbentibus, objurgatorem inducere, infimæ ple-
runque conditionis hominem, sed in-
geniosum & acrem; qui cunctis au-
dientibus, vitia reorum increparet,
exprobraretque religionis annos, &
negligentiam: idemque cæteros car-
ptim nec opinantes repente perstrin-
geret: nimirum edomandæ super-
biæ causa, mentisque e pigritiæ ve-
terno excitandæ. Sed qui delique-
rant, priusquam ex consuetudine
punirentur; quam lenissime operam
dabat, ut suam ipsi culpam agnosce-
rent; atque ultro sibimet multam ir-
rogarent: quæ tamen si gravior vide-
retur, confessione contentus, ita mo-
derabatur, ut multum sæpe de acer-
bitate minueret.

*Ejusdem animi submissio: & quid
de virtute Obedientiæ
senferit. Cap. VII.*

NEgabat, suo quidem judicio,
quenquam probe intelligere
quam vehementer in se quisque di-
vinæ bonitatis operationem impe-
diat: quantavè illius beneficia, &
dona per socordiam, ignaviamque
cor-

corrumpat. Quo crimine sese accusabat in primis. Atque ita de suis rebus demisse, & humiliter sentiebat; ut se mortalium omnium infimum, & opibus divinæ maxime egentem putaret sibi que cæteros omnes ad virtutem, pietatemque & exemplo, & incitamento fateretur esse. Privatæ vero vitæ quanto desiderio teneretur, & initio declaravit in recusando magistratu; & deinde, quum ut redigeretur in ordinem, aliusque sibi succederet, omni ope contendit. Quod tamen si consecutus non est; tamen obedientiæ studium quibuscunque rebus potuit, semper ostendit. Romano quidem Pontifici, cujus in verba præcipuo sacramento juraverat, ita erat præsto; ut ad ipsius nutum sese paratum exhiberet, confecta jam ætate, unius baculi adminiculo, pedibus quocunque opus esset, peregre proficisci: vel etiam navigium ascendere plane exarmatum, seque eodem Pontifice jubente, mari, ventisque sine ulla dubitatione committere. Quem ipsius animum vir quidam primarius quum haud satis probaret, & in ejusmodi re consilium, prudentiamque requireret; prudentiam quidem non

obedientis, verum imperantis esse respondit **IGNATIUS**. Et sane, quum in Societate nostra virtutem hanc cæteris omnibus anteferret; tum nihil huic laudi tam contrarium dicebat esse, quam in superiorum jussis, & consilio examinando moram, vel potius arrogantiam: negabatque obedientis nomine dignum haberi oportere, qui legitimo superiori non cum voluntate judicium quoque submitteret. Id enim demum esse Deo gratissimum holocaustum, quum omnes animi vires, ac præsertim intelligentia & mens, quæ summum in homine obtinent locum; in obsequium Christi coguntur. Qui vero inviti, ac dissentientes, actu exteriori duntaxat jussa præpositorum exsequerentur; hos inter vilissima mancipia, vel pecudes potius numerandos agebat. Exstat ejus epistola ad socios Lusitanos in hanc sententiam scripta, qua nihil ego quidem in eo genere vidi subtilius: quam qui accurate perlegerit, facile intelliget, quam jure **IGNATIUS** tantum huic uni mentis, & rationis obsequio tribuendum putarit. Quin etiam in sermone quotidiano sæpissime usurpare consue-

verat, qui ad superioris nutum, voluntatis propensionem solummodo, non etiam iudicii consensionem accommodarent; eos altero tantum pede intra Religionis septa versari. Neque vero ejusmodi præcepta verbis tantum explicabat ille; sed, quantum ei res, & persona concederet, etiam factis. Medico quidem, quoties ægro- taret, ita se dicto audientem præbe- bat; ut ejus monita pro oraculis du- ceret: ac quodammodo prudentiam penitus exuisse, & omnem suæ salu- tis curam, & sollicitudinem in eun- dem projecisse videretur. Quum sto- macho gravissime laboraret aliquan- do, ex nimio videlicet hepatis calore, ut supra diximus; adhibitus medicus, quo domus eo tempore utebatur ado- lescente, nec peritissimo; frigida corporis constitutioni causam illico tri- buit. Nec mora, quidquid excogitare potuit ad corpus, & præcordia cale- facienda, præscripsit. Ac primum fenestras, foresque cubiculi, nequid afflaret auræ, obserari diligenter jus- sit; deinde languentem multa sub veste continere sese; postremo quam calidissimo cibatu, & exiguo mero, sed quam austerissimo refici. Quæ

omnia

omnia IGNATIUS licet sibi non levibus argumentis minime accommodata sentiret; ac medicum ipsum nec literatissimum, neque exercitatissimum sciret esse; tamen, ne cum extremo quidem vitæ periculo, contra ejus edicta nihil unquam effatus est. Æstas erat summa; calores, ut in Urbe, maximi; ingenti stromatum pondere premebatur IGNATIUS; manabat e membris omnibus tanta sudoris copia, ut culitræ, ac vestes maderent; ac nihilominus ex præcepto se intra calida fomenta cohibebat ægrotus. Ardebat siti; nihil omnino poscebat: discruciabatur doloribus acerbissimis; nullam edebat vocem; linquebatur animo interdum; neque tamen significabat: denique perversa curatione eo adductus est; ut quum ultimum sibi discrimen adesse intelligeret, Societatis administratione Patribus delegata, aditu cubiculi domesticos prohiberet omnes, uno excepto valetudinarii curatore: atque id demum exstitit signum, desperata jam valetudine, se ad vitæ exitum comparantis. Itaque Patres, in re tam subita consilio habito, quum non deessent qui medici præsertim junioris

N pla-

placita reprehenderent; Alexandrum Petronium, ætate provectum virum & medicæ artis laudè præstantem extemplo acciri jubent. Is ut inspe-
xit IGNATIUM, genusque & ordi-
nem adhibitæ medicinæ cognovit; per
summam indignationem vociferatur,
hominem calore necatum esse: pandi
confestim fenestras & ostia, levare
stragulis lectum, frigidæ haustus af-
fatim dari æstuanti imperat: quæ res
prioris medici inscitiam plane coar-
guit; siquidem refrigerato hepate,
ventriculi tormina quievere: & obe-
dientiæ meritis Pater auctus, pristi-
nam insuper valetudinem brevi rece-
pit. Rursus quum jejunia cineralia,
seu Quadragesimam, quamvis affecto
corpulculo, perseveranter nihilomi-
nus observasset; ipsa denique feria
quarta sanctioris hebdomadæ, febris
correptus est; nec dubitavit idem
Alexander, quin totum id ex imbe-
cillitate nimia proveniret: quocirca
pulli gallinacei esum ad vespertinam illi
præscripsit: abiitque admodum incer-
tus animi, utrum IGNATIUS tali
tempore iussa facturus esset. Redit
deinde postridie; quæritque sollicitus
num se refecerit pullo. Quum annuis-
set

set IGNATIUS; fatebor, inquit Alexander, ingenue id, quod res est. Compures, non custodita solenni abstinencia, nihilominus hoc triduo in morbum incidere. Quibus ego quum accersitus carnum cibatum indixerim; vix, ægreque ab iis impetravi, ut obtemperarent: propterea quod per hos dies carnibus vesci nimis grave piaculum ducerent. Tu contra, peracto jam pene curriculo, ad ipsas metas meo monitu non recusasti desistere. Hoc ego, Pater, satis mirari non possum. Ad ea IGNATIUS serena frõte, quæ animi tranquillitatem indicaret; atqui obediendum est, inquit. Neq; plura in eam sententiam effatus est. Quo responso mirifice delectatus Alexander, & sanctitatem viri magis magisque suspiciens, totam rei gestæ seriem ipsemet mihi deinde narravit. Atque ad sapientem hanc, sanctamque stultitiam cæcæ, ut ipse appellabat, obedientiæ suos, ut essent ad subita, ac seria promptiores, interdum fictis etiam in rebus erudiebat. Sacerdos quidam, edito jam signo, paratus ad sacrificium, & calicem tenens, quum e vestiario pedem efferret; per nuncium ab IGNATIO, qui

totam rem e propinquo observabat; repente jubetur, sacro deposito ornatu, pallium sumere prodeundi causa. Paruit ille sine tergiversatione: ac palliatus Patri confestim apparuit. Tum IGNATIUS quærit ex homine; sitne ægre passus, in procinctu jam ad immolandum, subito se juberi sacra deponere vestimenta, remque divinam omittere. Quum ille se ne tantulum quidem esse commotum affirmaret; atqui me scito (inquit IGNATIUS) non quo te in præsentia opus habeam, sed periclitandi tui obsequii gratia id fecisse de industria: & sic habeto, plus te sacrificio deferendo esse meritum, quam si id ipsum, ut destinaveras, illico peregisses: nam etsi altaris mysterium tanti apud Deum est, quanti profecto est; tamen, ut scriptum legimus, melior est obedientia quam victimæ. Quendam etiam, quum maxime confessionem nobilis cujusdam exciperet, consulto vocari ad se jussit: quum ille se peracto mysterio mox affuturum dixisset; accersit eum denuo: at ipse nihilominus contentis rogatu hæsit paullulum: ac venienti demum IGNA-
TIUS, itane vero iterum, inquit,
evo-

evocandus es? Et gravioribus verbis accepit hominem: non quo illius tum quidem opera egeret; sed observantiam, & agilitatem experiri voluerat. Sic enim agebat; cupere se quemadmodum cæteræ Deo dicatæ familiæ, ex instituto aliæ paupertatem, aliæ silentium, aliæ psalmodiam, aliæ denique aliud præcipuo studio colerent; sic in Societate nihil haberi prius, aut potius alacritate, amoreque parendi: & maxime proprium insigne nostrorum hominum esse Obedientiam: quippe quæ, Divo Gregorio teste, virtus una cæteras omnes animo virtutes inferat, insertasque custodiat. Hisce ergo artibus, & hujusmodi subinde alumnos exercere consuevit: ut ad quamlibet præfecti vocem, aut significationem parati, vel inchoatum apicem in scribendo relinquerent: seque expeditos, ubi opus esset, illico sisterent.

Paupertas ejus, & castimonia.

Cap. VIII.

Voluntariam paupertatem (quam ille Religionis murum appellabat) ad extremum ubique constantissime

N 3

sime

sine coluit: nec modo ipse proprium
 habuit: nihil; sed ne alios quidem
 quamvis genere nobiles, ac deliciis
 olim affuetos, quidquam habere per-
 misit. Quin etiam quenquam e pro-
 fessa domo apud Germanicum, Ro-
 manumve Collegium, nisi admodum
 raro, & iusta de causa, prohibuit vesci:
 quo nimirum, si opus esset, jurare
 verius posset, nihil omnino ad ipsam
 domum ex Collegiorum fructibus per-
 venisse. Pauperem autem spiritu eum
 sibi denique aiebat videri, qui erga
 ea, quibus uteretur, sic esset affectus
 animo; ut instar statuæ cuiusdam vi-
 deretur esse; quæ nullo pacto resistit,
 recusatve, quominus omni quamvis
 pretioso amictu, & ornatu confestim
 exuatur. Castitatis vero laudem Dei
 beneficio tantam adeptus est; ut ex
 quo die sese in Beatæ Virginis fidem,
 ac patrocinium contulit voto; nul-
 lam, ut initio dictum est, deinde,
 quamvis præfervidus natura, carnis
 tyrannidem senserit. Porro in Socie-
 tate nobilissimam hanc virtutem
 tanto studio custodiri volebat; ut
 nihil omnino neque in dictis, neque
 in factis lascivum, aut petulans ap-
 pareret: ac quoad fieri posset, nostri

coelestem vitam in terris agerent, ab omni corporis contagione sejuncti. Quin etiam in scholis Terentium explicari (ni perpurgatus esset) quam optimum Latinitatis auctorem, & Romanæ comœdiæ principem, vetuit nominari: quod eum videlicet parum verecundum, ac parum pudicum arbitraretur. Noluit igitur ea lectione puerorum animos imbui; ne plus moribus noceret, quam prodesset ingeniis. Ex quo facile existimari potest, in cæteris rebus quam acer, & vigilans custos pudicitiae fuerit.

*Æquitas animi, & constantia
ejusdem. Cap. IX.*

ADversus ea, quæ videntur acerba, & contra omnes varietates, quæ in vita versantur; animo fuit semper ita præsentis; ut nunquam vel a statu naturæ, vel a religiosi dignitate discederet. Romæ quum apud nobiles quosdam, ut solebat, de rebus divinis familiariter ageret, instituto jam sermone, trepidus ab domo nuncius ei repente in aurem insusurrat, lictores in domesticam supellectilem a creditoribus immisos, cuncta misce-

re, & evertere: vix ab eis impetratum sustinerent tantisper, dum ipse tota de re certior fieret. His auditis **IGNATIUS**, bene habet, inquit: & inchoatam disputationem admirabili tranquillitate animi absolvit. Quærentibus dein amicis quid subitæ rei accidisset, noster, inquit, æconomus ad necessariam ædificationem ære alieno contracto, in præsentia solvendo non est. Impatientes moræ creditores ad auferenda pignora ministerium forense miserunt. Si perturbare dicuntur omnia: sed me res non movet. Nam strata si abstulerint; humi pro nostra paupertate cubabimus. Unum vereor, ne inter tumultum commentarii de Religione pereant magna cura, & labore confecti. Hos ego sane velim salvos: cætera negligo. Tum ii, qui aderant, Patris patientiam admirati, facinus indignum exclamant; domum nostram advolant; prædesque pro **IGNATIO** facti, satellitum protervitatem magno convicio cohibent. Neque ea res cuiquam amicorum fraudi fuit; siquidem aureis ducentis ab Hispano Doctore, cujus modo meminimus, Hieronymo Arzio, & quidem quid accidisset

diffet ignaro, postera die submissis, nullo ipsorum incommodo æs alienum est persolutum. Suscepta negotia in finem usque perseveranter urgebat: neque vero, quos sibi socios expeditionum assumserat, torpere patiebatur. Ubi necessarium iter, vel quid aliud gravioris momenti destinasset in diem certam; præsertim si postularet occasio, nulla vi tempestatis, aut alia quavis difficultate deterrebatur, quominus ad constitutum tempus cogitata perficeret. In adeundis principibus viris, quod ille necessario, & sæpe faciebat; cunctas aulae molestias, & indignitatem, & aulicorum contumaciam, deliciasque vorabat alacritate mirabili. Acciditque aliquando ut aditu exclusus, commodam admissionem horas ipsas quatuordecim jejunos obsederit. Si quid, re bene perspecta, consiliariis etiam adhibitis, decrevisset; haud ita facile se ab eo deduci patiebatur. Ad Ecclesiasticam disciplinam pro sua parte adjuvandam, statuerat nequis ex aliis Ordinibus transfuga, quamvis eruditione, aut eloquentia, aut alia qualibet laude clarus, in Societatem admitteretur.

Obtulere se multi; nec prece, nec gratia unquam adductus est, ut quenquam reciperet. Quin etiam si quis per nostrorum imprudentiam irreperat, qui vel diem unum in alienis castris fuisset; contra nitentibus interdum advenæ propinquis, amicisque gratiosis, remittebat ad pristina signa: vel si minus pareret; certe e Societate pellebat: ne cæteri nimirum Ordines de nobis conqueri possent: aut Societas quasi quoddam perfugium desertoribus esse putaretur. Neque minorem animi fortitudinem præstitit in iis tuendis, quos, probato ipsorum spiritu, & vocatione, in Societatem adscripsisset. Quorum constantia quum a parentibus (ut fit) per amplissimos etiam viros acerrime interdum oppugnaretur; **IGNATIUS**, ubi opus fuit, coram summo ipso Pontifice suorum causam contra opes & gratiam, divino fretus auxilio, sine ulla dubitatione metuve, non solum defendit, sed etiam obtinuit. Itaque principes etiam viros **Julius III.** Pontifex maximus festive admonebat, ne cum **IGNATIO** contenderent, utique ni vellent e certamine victi discedere. Quum lege cavisset, ne quis

e no-

e nostris vel exsequiarum, vel sacrificii, vel cuiuspiam omnino ministerii nomine pecuniam, aut eleemosynam ullam acciperet, nedum cogeret; eam ipse legem diligenter, sancteque in omni vita fervavit: neque commisit unquam ut fidem suam, in rebus præsertim sacris, temere obligaret: vel (quod vitandum est maxime) specie pietatis quæstum facere videretur: quo in genere illud insigne memorant. Graviter ægrotabat, ætate jam devexa, idem Hieronymus Arzius. Ad hunc, visendi causa (fuit enim in colendis amicitiiis diligentissimus) quum venisset IGNATIUS, hominemque benigno, & spirituali alloquio recreare conatus esset; ille de futura vita sollicitus, aureos ducentos ad piacularia sacra pro se facienda sudario involutos institit IGNATIO obtrudere. Quos quum obfirmato animo rejecisset Pater, quod diceret se alieno periculo doctum, ab huiusmodi conventis jampridem abstinere, neque plus oneris velle suscipere, quam quantum præstare cum fide posset; admiratus ille sanctimoniam, & integritatem viri, eam ipsam summam paullo post ad eundem sine ulla

conditione transmisit. Tum IGNA-
TIUS sponte complures hostias ad
expianda amici peccata decrevit: ne-
que in officii, & charitatis certami-
ne vinci se ab laico passus est. Pacem,
& concordiam (quoad officium, &
Dei gloria pateretur) non modo cum
suis, verum etiam cum alienis omni
cura, studioque retinuit semper: &
cavit, ne aut per se, aut per suos
facto dictove quenquam offenderet.
Quum Martinus Olavius, qui Colle-
gio Romano annos aliquot magna
cum laude præfuit, excellenti vir
ingenio doctrinaque, theses aliquot
de more proposuisset, in quibus erat
caput de Immaculato, ut appellant,
Conceptu B. Virginis; licet ea de re
IGNATIUS pro sua egregia in
Deum, & Virginem pietate minime
dubitaret; tamen ne Fratres Domini-
cani, qui ad disputationem invitaban-
tur, id ægre ferrent, seque nominatim
provocari putarent (contrariam
enim sententiam auctore D. Thoma
tuentur eorum plerique) eam thesem;
quanquam ingemiscente Olavio, in-
duci, tollique omnino imperavit.
Anno CHRISTI nati M. D. LIII.
quum Societas in Hispania, Deo adju-
van-

vante, majorem in modum cresceret; gravia in nostros crimina repente conficta ab iniquis: & Exercitiorum spiritualium præcipue liber in suspectionem apud sacros Inquisitores magno apparatu, artificioque vocatus est. Quo nuncio Romam allato, multi auctores IGNATIO fuere, ut se, suosque omni ope tueretur: accusatorum calumnias, & improbitatem, in tanto præsertim suæ existimationis, ac famæ periculo, redargueret. At ille conscientiae testimonio, ac Dei bonitate subnixus, nihil extimuit: remque totam sine ullo tumultu Magistratibus cognoscendam reliquit. Quorum opera & veritas brevè patuit omnibus; & ex eo tempore Societas in iisdem provinciis feliciores in dies habuit progressus. Nec minor anno insequente in nostros, qui in Gallia versabantur; procella defævit. Siquidem gravi ab aliquot illustribus Theologiæ doctoribus decreto proposito, usque adeo lacerata, ac tantam in invidiam adducta Societas est; ut eam non modo profanum vulgus; verum etiam concionatores ipsi quotidianis probris, & conviciis e superiore loco profunderent. E

de-

decreto, criminibusque scripto refutandis quum se aliquot e nostris **IGNATIO** paratos offerrent; ac res indigna, minimeque toleranda cunctis videretur esse; verbis ex Evangelio desumptis **IGNATIUS**: Pacem, inquit, do vobis: pacem meam relinquo vobis: neque certamen cum adversariis ullo pacto suscipi est passus: quod diceret, procul dubio fore, ut ipsa dies & nostrorum innocentiam satis probaret, & inimicorum cogitationes, & consilia frangeret. Id quod non ita multo post Dei beneficio est factum; nam & accusatio tota brevi consenuit, & ipsis criminationibus illustrata Societas radices in iis regionibus egit altiores. Admirabilem vero facilitatem, vel potius animi altitudinem Romæ ostendit Pater in acerbissimis vicini cujusdam injuriis perferendis. Nanque is, ut nostros in proximam sibi domum, quæ Petri Codatii fuerat, immigrasse cognovit; quum **IGNATIUM**, sociosque, ut alii multi, sine causa pessime odisset; una re valde lætatus est, quod vendendi suas ædes, quippe nostris valde opportunas, & conficiendæ pecuniæ præclaram sibi occasionem oblatam putaret. Ergo
ut

ut peregrinum ad conditiones quamlibet iniquas cogeret ; variis artibus patientiam hominis exercere constituit. Ac primum in atrii cujusdam interjacentis , quod finibus nostris contineri constabat, possessionem impudenter invasit: neq; tamen **IGNATIUS** eam rem judicio persecutus est. In id atrium deinde pavones, & alia demisit altilia , quæ obversis in eam partem cubiculis nostris molestissimo clangore diu, noctuque obstreperent: nequaquam expostulavit **IGNATIUS**. Eidem triclinii parietes in eam partem luminis causa perforare volenti, per summam contumeliam restitit ille: nihilominus quievit Pater, atque ob id ipsum cæco aliquot annos triclinio est usus. Quum hæc maxime ageret vicinus, ultro **IGNATIUM**, ac socios tota Urbe institit criminari, bipedumque nequissimos & cupidissimos dicere: qui in alieno solo, non contenti male parta ingenti pecunia, domibusque per falsam religionem occupatis, possessiones in dies continuare , seque ipsum patriis ædibus pene per vim exturbare contenderent. Quæ res quum delatæ ad **IGNATIUM** essent; non modo sedato ani-

mo

mo tulit, ut cætera; sed etiam ex eo die Dominum deprecari pro adversario cœpit ardentius. Denique quum ille diuturna importunitate nostros ad quamlibet iniquum pretium perduxisset; & piorum subsidiis domus tandem esset coëmta; ita ex ea migravit, ut, quasi mox æquanda solo esset, sic omnia inde ferramenta, fores, fenestrarum obices, atque adeo elaborati lapidis quidquid potuit, secum asportaverit. Neque tamen gravius ea de re questus IGNATIUS est. Neque tali homini, aut ulli omnino mortalium ullo unquam nomine litem intendit. Neque vero ab hominibus tantum, sed etiam ab ipsis pene temporibus invictum animum præstitit. Siquidem nulla unquam vel domestica inopia, vel publica annonæ caritate adduci potuit, ut contra Christi consilium de crastino sollicitus esset: aut, qui nomen Societati profiterentur; modo ad institutum idonei forent, eos, quanquam ingenti pressus familia, repudiaret. Atque hoc eo magis homines mirabantur, quod eo ipso tempore viri locupletes, ac principes, inopiæ metu multos e domesticis convictoribus non sine rubore dimitterent.

Ita-

Itaque quum ex IGNATIO quidam e familiaribus pro amicitia sciscitaretur, quid ita alii divites, & pecuniosi, in tantis annonæ difficultatibus familiam, sumtusque minuerent: contra ipse nullis vectigalibus, nullo certo redditu fultus, eandem auget; non satis attendis, inquit ille, quæ sit vis, ac natura virtutis illius, quam in Theologicis virtutibus secundam Apostolus numerat: cui certis & exploratis in rebus locus esse qui potest? Spes enim, ut idem ait, quæ videtur, non est spes: nam quod quis videt, quid sperat? Neque vero timendum esse, ne qui aves cœli pascit, & agri lilia splendidissimo vestit ornatu, quæ neque ferunt, neque nent, neque in horrea congregant; idem suis operariis in Ecclesiæ vinea nullo stipendio laborantibus, necessaria ad exigendam vitam alimenta deesse patiatur. Quod ille videlicet quum jam inde ab ipsa conversione multis documentis præclare didicisset; tum vero post suscepta Societatis gubernacula, magis magisque experiebatur in dies. Quo in genere, ne sim longior, nonnulla subnectam. Quum in sumtus quotidianos aliquando esset

set opus præfenti pecunia; atque ad-
nescio quid coëmendum Joannes Cru-
cejus rei domesticæ curator exisset;
incerta etiam tum luce quidam ei re-
pente sacculum auro plenum obtulit:
ac nihil effatus illico sese e conspectu
proripuit. Joannes vero, qua erat
simplicitate, ut auri speciem vidit,
illusionem, ac præstigias diaboli su-
spicatus, in proximam ædem Beatæ
Mariæ supra Minervā sese recipiens,
divinam opem suppliciter implora-
vit. Domum deinde regressus, pecu-
niam inspectam & forma, & mate-
ria probam reperit: Deique clemen-
tiam, ac benignitatem admirans, in
ea, quæ destinaverat, sine cujusquam
damno, vel molestia insumsit. Idem
quum in magnis rei familiaris angu-
stis Deo, Superisq; in Laterano suppli-
casset; in reditu ad Colosseum thea-
trum illi subito vir quidam ignotus
aureos centum in manum dedit, ac
statim apparere desit. Qua re Joannes
non tam lætitia, quam horrore per-
fusus, pecuniam domum attulit.
IGNATIUS vero gratias quidem
egit Domino; sed talibus jampridem
assuetus, nihil rei novitate commotus
est. Rursus nostris pecuniæ inopia
la-

laborantibus, quidam e Patribus dunt-
 nescio quid exquirat in arcula tomen-
 to, scrutisque vilissimis plena; nihil
 minus opinanti venit in manus char-
 taceum involucrium aureis refertum
 ita nitidis, atque micantibus, ac si
 tum primum ex officina prodirent:
 quo tam insperato subsidio præsentis
 egestati peropportune subventum est.
 Quodam die sub vesperam quum
 domi panes, vinum, ligna penitus
 defecissent; postridie mane præter
 omnium expectationem a nobili ma-
 trona vehes lignis omnia submittitur.
 Ea ligna dum in cella vinaria, ut fit,
 condit janitor, januam domus in Ca-
 pitolum eo tempore obversam, pa-
 tentem reliquit imprudens: recorda-
 tus deinde, quum ad occludendum ac-
 currisset; repente modios aliquot fru-
 menti, & vini cados in ipso vestibulo,
 reperit: neque, adhibita quantavis di-
 ligentia, unquam rescire potuit quis
 ea dona misisset. Hæc igitur, & alia
 ejusmodi subinde accidebant, quæ
 politico supercilio rem æstimanti fri-
 vola cuiquam fortasse videantur: sed
 certe & paternam in famulos Dei
 providentiam satis declarant; &
 IGNATII securitatem, atque fidu-
 ciam

ciam ab omni stultitiæ, vel temeritatis infamia vindicant.

Ejusdem ratio gubernandi.

Cap. X.

IN consilio capiendo, & rebus gerendis, quum Deum semper, ut dictum est, accurata supplicatione consuleret; tum vero (quod mirum fortasse cuipiam videatur) non pietatis gustum, sed rationis ductum præcipue sequebatur: ut non rationem spiritus dulcedo præiret, sed dulcedinem ratio. Hoc enim agebat uno maxime belluis homines antecellere, quod hi ratione utantur, illæ nequaquam. Idem ad exsequenda consilia, quoad fas esset, omnes artes, & humana præsidia sic adhibebat; quasi omnem spem in iis repositam haberet: rursus ita Deum orabat, & ex eo pendebat uno; ac si nihil omnino in rebus humanis opis, aut perfugii collocaret. Atque hoc pacto (quod longe optimum, ac perfectissimum est) prudentiam cum pietate jungebat: ipsaque negotia, tanquam onera paribus examinata ponderibus, quamvis difficili, ac lubrico itinere ad opta-

optatos plerunque exitus perducebat. Ad consultandum autem, illud observabat in primis, ut in quaque re semper ejus rei peritissimos adhiberet: qua communicatione, ac lenitate nimirum assequebatur, ut & rationes iniret optimas; neque in arte sua se quisquam ab eo vel præteritum, vel contemptum, jure conqueri posset. Ac cæteris etiam in rebus videbat etiam atque etiam, ut uniuscujusque dignitatis, ætatis, ac meriti ratio haberetur. Petronius erat Pisarenensis, qui ante aliquot annos mortuus est, egregia pietate & virtute presbyter. Is quum tres minores natu germanos fratres ad Societatem suis adhortationibus perduxisset; eum semper **IGNATIUS** adolescentulis loco parentis, ac præsidii voluit esse: neque de iis gravius quidquam, nisi ex illius auctoritate, ac sententia statui passus est. Ad officia, vel negotia, quæ per se obire non posset, cum viris principibus transigenda, viros eligebat rerum usu, ac dicendi copia præditos: atque iis ita vel scripto, vel verbis mandata dabat; ut liberum iis omnino relinqueret, quum in rem præsentem venissent, sine ullo ipsius respectu

Et cuncta ex re, & ex tempore moderari. Idemque sub vesperam ad se redeunti cuiusdam ex iis, quum rei gestæ rationem ab eo reposceret, primum omnium: satin' (ajebat) ex animi tui sententia? quæ liberalitas hominis & ipsi causæ multum proderat; & suorum illi mire devinciebat animos; & eosdem ad exsequenda negotia perquam alacres, promptosque reddebat. Anno post Christum natum M. D. LIII. quum ad res in Lusitania componendas Michaëlem Turrianum legaret, haud ita pridem in Societatem admissum; licet ei varias præceptiones, ac monita ediderit consignata literis; tamen quum probe nosset fidem, ac prudentiam viri; non modo permisit, ut quum in provinciam pervenisset, suo arbitratu consilia rebus aptaret; sed etiam permulta ei dedit folia pura suo munita chirographo, quibus ille, prout opus esset, quidquid videretur, inscriberet: ac deinde obsignatas epistolas cuicunque expediret, ipsius nomine redderet. Atque hanc consuetudinem laxè cum procuratoribus, ac nunciis agendi semper magno cum emolumento retinuit. Quin etiam præfectis inferioribus

ribus minime maligne suum cuique
 jus, ac potestatem impertire consue-
 verat: cavebatque diligenter ne, quæ
 per eos agenda forent, usurparet ipse:
 vel ea re quidquam omnino apud sub-
 jectos de illorum auctoritate, vel
 existimatione minueret. Verunta-
 men iis ita laxabat habenas; ut eas-
 dem adduceret quoties vellet: nec
 non in eorum instituta, moresque,
 & administrandi genus dissimulanter
 inquireret. Exstat epistola ipsius ad
 Præpositum provincię Lusitanię, in
 hanc sententiam scripta; cujus mihi
 partem hoc loco inserere visum est:
*Neque vero Provincialis, aut Generalis
 Præpositi officium est, inquit, minuta
 quæque, ac temporaria præsertim, in
 administrando seclari: sed quum ad
 personę dignitatem honestius, tum ad
 tranquillitatem animi tutius est ea
 præfectis inferioribus delegare: & res
 confectæ rationem ab eis deinde repete-
 re. Equidem in meo fungendo munere
 id ipsum sequor; atque hujusce consilii
 majorem in dies fructum capio: quippe
 quum & labore, & sollicitudine levati
 me magnopere sentiam. Ac tibi quoque
 valde sum auctor, ut curas, & cogi-
 tationes tuas desigas in commodis, &*
salute

salute potissimum universæ provincie:
 & in rebus quidem singulis ordinandis,
 ac disponendis, quum opus est, & ipse
 versare, & hominum tuo iudicio peri-
 torum sententiam exquiras: cæterum
 ab iisdem rebus per te curandis, transi-
 gendisque ut plurimum abstineas: sed
 instar excelsi cujusdam motoris orbes
 tibi subiectos æquabiliter, & cum gra-
 vitate ciere pergas: a quibus deinde,
 ut a proximis causis, propria cujusque
 effecta proveniant: quod si feceris, &
 plura, & magis tuo muneri convenien-
 tia, sine tumultu, ac trepidatione con-
 feceris. Præterea illud est in hac ra-
 tione commodi, quod, si quid in agendo
 peccetur; ejus peccati præstat in tuis
 ministris, quam in te residere cul-
 pam: ac multo magis decet, quidquid
 ipsi deliquerint, corrigi abs te, quam si
 tu erraveris (quod perfacile est singu-
 la curiosius persequenti) te ab inferiori-
 bus emendari. Quod reliquum est, nobis
 Dominus JESUS CHRISTUS ad ip-
 sius voluntatem & clarè intelligendam,
 & rite exsequendam pro sua benigni-
 tate lumen, ac vires impertiat. Romæ
 XI. Kal. Januarias M. D. LII. Hanc
 igitur Societatis gubernandæ regu-
 lam instinctu plane divino tenebat
 IGNA-

IGNATIUS: eamq; in omnes partes plurimum aiebat valere. Primum, quod inferiores præfecti, quo plus credi sibi, & quo liberalius tractari se vident, eo libentius, ne videlicet humanitate vincantur, ultro ipsi cum superiore communicent. Deinde, quod multo acrius, ac studiosius versentur in opere: nam ut quisque maxime suum habet negotium, ita summam in ejus procuratione vigilantiam præstat. Accedit, ut major sit in dispiciendo, ac statuendo claritas, majus auxilium Dei; quippe sicut in rebus communibus cum universali Præposito Numen cœleste præcipuo favore conspirat; sic idem propriis cujusque præfecti muneribus suo quodam, ac peculiari munere adssistit. Quorum si facultas, & auctoritas a superioribus nimis arcte circumscribatur; & quæ per hosce tractanda sunt, illi suscipiant; primum ipsa diffidentia odiosa est; & ut in alienis quodammodo rebus, continuo languescit industria. Deinde per eam cupiditatem, & ambitionem peculiaris ille, de quo dictum est, divinæ gratiæ quasi concursus amittitur. Præterea, quum ad rem

O bene

bene gerendam & facultas, & scientia necessario requirantur; scientia plerunque inest ei, qui rem ipsam ex officio tractat, habetque subjectam oculis. Huic si minuatur jus, & superior ipse, causa non æque bene cognita, rei transigendæ se immisceat; ingenti prorsus malo potestas a cognitione sejungitur: atque hinc nimirum in omni cœtu suspiciones, discordiæ, rixæ, quum rectores, & curatores non contenti suo munere, alter in alterius partes invadunt: perque summam confusionem tollitur discrimen officiorum, & ordo ille, quo nihil est in hac rerum universitate præstantius. Ad hæc, ubi is, qui destinatus est quopiam, certis alligatur præceptis, rarum est, ut quidquam e sententia possit efficere. Magna enim consilii pars est in tempore: & novis quotidie casibus interdum ipsa negotiorum species immutatur: quibus in rebus dum religione occupatus animus hæret, dum fluctuat apud se, dum cogitur ad absentes referre; interim, irreparabili sæpe damno videlicet, occasionis prætervolat opportunitas. Quæ quum præclare IGNATIUS nosset; cum suis adju-

adjutoribus, procuratoribusve, nisi res aliter postularet, ea, quam dixi, facilitate utebatur. Itaque & in magnis, & arduis plerunque actionibus voto respondebat eventus; & tanta erat, ipso regente, concordia, is ordinum consensus; ut Societas tota uno eodemque spiritu, ductuque agi videretur. Benevolentiam, & charitatem suorum erga se, non solum affabilitate, mansuetudine, cæterisque virtutibus, verum etiam industria quadam alebat: cavebatque diligentissime ne quid admitteret, cur eorum quispiam ab illo se minus vel diligere, vel probari putaret. Quod & in creando primum Generali Præposito servavit, ut dictum est; ac deinde retinuit in sufficiendo sibi, quum ægrota-
ret, Vicario Generali: necnon in eligendis, qui Marcello Pontifici Maximo, ut item supra dictum est, Pontificis ipsius jussu, in Palatio adsisterent. Quam nominationem ad ipsorum Patrum consilium rejecit; ne certos ipse appellando, cæteros ad ejusmodi munera minus idoneos judicasse videretur. Præterea, si quid pro imperio asperius exsequendum esset; ejus invidiam ad inferiores ad-

ministros rejicere solitus est, ipsis videlicet non invitis, communemque parentem pie, ac religiose tuentibus. Qui hominibus cum potestate præfuit; hos quum aliæ fraudes, & mala circumstant, tum illud in primis, de quo sanctus Bernardus ad Eugenium: *Est item vitium, inquit, cujus si te immunem sentis; inter omnes, qui Cathedras ascēderunt, sedebis me judice solitarius: quia veraciter, singulariterque levasti te supra te juxta prophetam. Facilitas credulitatis hæc est: cujus callidissimæ vulpeculæ, magnorum neminem comperi satis cavisse versutias.* Ab hoc igitur scopulo, sicut a cæteris, magnopere IGNATIUS declinabat: quippe satis ad omnem animadversionem ipsa varietate suorum temporum eruditus: ac delatoribus ita unam aurem præbere consueverat; ut semper alteram reo reservaret absenti. Quin etiam accusatoris ipsius inter dicendum gestus, oculos, vultusque omnes attente observabat: crebrisque, ac minutis interrogationibus, veritatis eliciendæ gratia fatigabat hominem: totam deinde rem, si opus esset, per se & per idoneos viros omnibus vestigiis indagabat leniter, ac
sine

fine tumultu. Cavebatque non modo ne quenquam damnaret indicta causa; verum etiam ut ne quid omnino præjudicati ad causæ cognitionem afferret. Illud etiam, in rebus præsertim gravioribus, observabat interdum, ut accusatorem juberet sua manu scribere, quæ deferret: primum quod hominum naturam pronam esse ad maledicendum intelligeret, & stylum, quam linguam longe facilius contineri; tum etiam, ut, si quod mendacium, ut fit, tempore procedente exstiteret; id ipso delatoris chirographo teneri, & coargui posset. Atque hoc temperamento fiebat, ut neque, si quid gravius accidisset, ignoraret **IGNATIUS**; neque innocentes per calumniam, aut per factionem circumveniri, vel opprimi sineret. Idem omnes reipublicæ partes vigilanter curabat: neque committebat (in quo graviter a magistratibus fere peccatur) ut dum unam amplecteretur, desereret alteram. Veruntamen præcipua quadam fuit observatione in hominibus ad Societatem adscribendis: quam ille rem tanti momenti ducebat esse; ut quum alioquin e custodia corporis evolare quamprimum optaret; hanc

unam ob causam in aliquot annos propagari sibi vitæ spatia cuperet: quoad nimirum tyrocinii formula, ac disciplina ad Societatis usum, & institutum probe constituta foret. Tyrones autem ille non a naturali quadam bonitate, vel potius tarditate, sed a vigore magis ingenii, & rerum gerendarum adjumentis legebat: negabatque, qui ad populi negotia factus non esset; eundem esse ad ministeria Societatis idoneum. Quod si quis bardum quempiam eo nomine obtruderet, quod ipsum utique e seculi naufragio diceret evasurum; nihilominus recusabat IGNATIUS, neminem affirmans e Societate JESU dicendum esse, qui ad suam unius, non etiam ad aliorum salutem & acriter, & scienter posset incumbere. Quos autem ad probationem admiserat; eorum spiritum dabat operam ut quam plurimis experimentis cognosceret penitus: neque illos tantum ad suavem quendam sensum pietatis (quo imperiti omnia metiuntur) sed ad veras ac solidas virtutes erudiebat: ac præsertim (quod sæpe jam diximus) ut ad nullius rei, quamvis cæteroqui laudabilis, amorem, tanquam ad scopulum, adhærere-

scerent: sed ab omni alia cupiditate, vel etiam propensione soluti ac liberi, ex uno tantum superiorum nutu, ac voluntate penderent: neque assuescerent abditos eorum sensus exquirere, vel imperia sciscitari, vel quem, quibusve de causis iidem aut supra cæteros tollerent, aut etiam infra suo arbitratu deprimerent: sed illis omne iudicium, & consilium a superis datum, sibi simplicitatis, & obsequii gloriam esse relictam putarent: essentque proinde ad omnia quamvis ardua, & absurda, & subita paratissimi. Omnes omnium querimonias perbenigne audiebat: ac solabatur verbis humanissimis. Atque etiam diligenter curabat, ut, salva Religionis disciplina, & præfectorum dignitate, unicuique satisfaceret. Neque vero minori vigilantia, & severitate præfectos ipsos, quam reliquos omnes in officio continebat: quin etiam tanto plura, maioraque ab illis, quam ab his exigere solitus est; quanto superiores inferioribus, gradus, & virtutum insignibus antecellunt. Idem in respondendo, agendoque simplicitatem ita cum cautione coniunxit; ut satis appareret alteram alteri non modo im-

pedimento non esse, verum etiam ornamento, atque præsidio. Suspensa, vel ambigua, vel obscura verba, perplexum de industria, incertumque sermonem, uti barbaras artes, & subdola mendacii tegumenta, fideisque ac societatis humanæ perniciem, semper est detestatus: ac suo monstravit exemplo veritatis cultor eximius, quantum inter prudentiam, & caliditatem intersit.

*Ejusdem ratio proximos
adjuvandi. Cap. XI.*

MIræ fuit solertiæ in sollicitandis mortalibus, & a diaboli servitute ad CHRISTI Domini obsequium traducendis. Ac quibus artibus dæmon ad animarum perniciem utitur; easdem ipse (quoad liceret, ac fas esset) ad hominum salutem, ac beneficium transferebat. Voluntates, ac naturas eorum, quibuscum ageret, festine odorari; ambitiosis splendida, avaris utilia, voluptuosis jucunda proponere; & suo, quod ajunt, hamo vel esca quemque piscari. Jam in congressu, maxime Principum, id ob-

observabat in primis, ut sermonis initia illis daret, extrema reservaret sibi: cavebatque ne de rebus etiam divinis inepte, vel ad satietatem, ac fastidium ageret. Tristem vero, & horridam sapientiam (utique postquam in lucem hominum prodiit) semper vitavit: quumque Philosophiæ nomen ipsum intelligeret, etiam si modeste tractetur, tamen satis odiosum esse per se; nihil in habitu suo, vel in genere vitæ rarum, aut notabile conspici voluit: ac semper sese, quibus rebus honeste, ac religiose potuit, ad communem consuetudinem accommodavit: neque commisit, ut, quod ipse non faceret, id in aliis reprehendere putaretur: prorsus ut ejus mores prima fronte, vel eminus intuenti unus aliquis e populo videretur esse: verum quo propius illum inspiceres, quo diutius, ac familiarius uterere; eo magis præstantiam, virtutesque viri, tanquam odorem ex affricu, sentires. Atque id ipsum est causæ, cur nostris nullam in vestitu ornatu Religionis injunxerit notam: sed quo facilius in hominum cœtus, & consuetudinem irreperent; ac tempestivis colloquiis unumquemque

adjuvarent; ubicunque gentium versarentur, quam modestissimo ejus gentis habitu jussit incedere: neque ullum dare signum animi a sensu communi, vel ab humanitate abhorrentis. Idem valde vituperabat moderatores animarum eos, qui vel una eademque via, ac ferme quam ipsi tenuissent, cæteros etiam ad studium virtutis conarentur adducere; vel, duntaxat si quis ad pietatem esset sua sponte propensus, formandum, regendumque susciperent: sed ipse nimirum vel feros, & barbaros homines non dubitabat aggredi, sic, ut a singulis quod dabatur, acciperet: & quos ad consilia CHRISTI provehere non posset; certe ad præcepta sensim alligere nitebatur. Atque ut bonus agricola non tantum rectas, & fructuosas arbores, sed etiam depravatas, neque ita fertiles colit; easque vel adminiculis erigit, vel circuncidendo castigat, vel sub aliena latentibus umbra cælum aperit, vel telluris vitio laborantibus mutat locum; sic ille, rerum difficultate nequaquam exterritus, dispiciebat in primis quod ingenium qua ratione tractandum esset: iisdemque sæpe morbis, pro varietate natu-

naturæ, non diversas modo, sed etiam contrarias inter se medicinas adhibere consueverat. Quod si quem, omnia expertus, tamen e cœno peccatorum extrahere nequivisset; non ideo contrahebat animum, vel se angori dabat, quasi oleum, & operam perdidisset; sed conscientiæ, & officii fructu contentus, acquiescebat in alto Providentiæ divinæ consilio. De spirituum discretionem (quam ille scientiam habuit maximam) deque moderandis affectibus multa præcepit egregie: quæ quoniam exstant scripta, quemadmodum initio diximus; nihil est, quod a nobis hoc loco ingerantur.

Vita ejus quotidiana, & domestica. Cap. XII.

SOcietati Præpositus, de vexa jam ætate, vivendi privatim hanc ferme normam tenebat. Mane, ut primum evigilasset, certum tempus dabat precationi, & contemplationi bonorum cœlestium; deinde, si sacrificandum illi esset (quod munus propter summam animi attentionem, & corporis imbecillitatem sæpe in-

terminare cogebatur) sacro sub vesperam pridie ad Urbis consuetudinem ordinato, & accurate præcognito, rem divinam faciebat: quæ recitanda forent, vel in privato sacello, nemine præter administrum adstante, contra morem Hispaniensem elata pronuncians voce: usque adeo Ecclesiæ Romanæ ritus omnes, & cæremonias adamaverat. A psallendo, quanquam invitatus, abstinebat: quod ei propter vim lacrymarum, & frequentem ecstasim, qua corpus mire affligebatur; ejusmodi officio summus Pontifex nominatim interdixerat. A sacro, si cuius negotii causa prodeundum esset, comite uno prodibat: si minus, admittendis, audiendisque vel domesticis, vel externis operam dabat, serena, parique semper, ut diximus, fronte: minime suspiciosus ille quidem, aut timidus; attamen apprime circumspectus, ac providus: ut illi non facile quisquam posset imponere. Actiones autem omnes e D. Basilii præcepto condiebat tacitæ precationis sale: seque ipsum, ut dictum est, excutiebat subinde, ne quid labis ex quotidiano mortalium rerum usu contraheret. A prandio post gratiarum
actio.

actionem, remissionis causa, de rebus haud ita feriis, molestisve sermones habebat jucundos: qui tamen ut plurimum ad agendi, & gubernandi scientiam facerent. Inde vel actibus publicis, vel subscriptioni, lectionique epistolarum tempus dabat: ac multa etiam, prout res exigeret, sua manu exarabat ipse. Tum si hora suppeteret, suorum acta recognoscebat. A cœna vero, insequentis diei negotia disponebat: accersitisque administris, vel procuratoribus, sua cuique separatim dabat mandata: deinde cum eo, quem sibi a secretis elegerat, per otium agebat: eo dimisso, ad multam noctem solus inambulabat innixus baculo, majorem in modum attentus, meditantisque apud se: postremo quod supererat temporis, necessariæ tribuebat quieti: id erat spatium horarum circiter quatuor. Cubiculo usus est perangusto, ac tenebricoso: cujus formam ne successores quidem adhuc religionis, ut puto, causa mutarunt. Cibi, potusque fuit adeo parcus; ut gustatum funditus perdidisse videretur: nisi si quando pauculis vesceretur castaneis; quibus patrio more puer olim assueverat.

verat. Nulli unquam ferculo, quamvis famelicus, ac jejunus, arrisit; nullum edulii, vel condimenti genus cuiquam indixit; nihil unquam inter edendum est questus; licet per adiutorum inscitiam, incuriamve cibaria male cocta, conditaque, vinum etiam fugiens, aut acidum præberetur. Nihil denique sibi proprie apponi unquam est passus: & graviter administrum aliquando punit, quod uvæ racemum uni sibi præter cæteros attulisset. Quæ sane peritus rerum æstimator haud ita levia duxerit, si hominis vel ætatem ipsam, cui multa dantur, vel infirmitatem valetudinis plura imperantem, vel denique summam inter suos potestatem, & licentiam, ut ita dicam, suo arbitratu vivendi consideret. Munditias in victu, cultuque dilexit; sed faciles, & nequaquam exquisitas: cujusmodi & viatorem, & Christi famulum decent: placuitque ei semper, ad alliciendos præsertim homines, ut dictum est, non incompta frugalitas. Ac de IGNATIO quidem (quod me non fugit) alia id genus multa narrantur; verum singula persequi necesse non est. Tantum ad vi-

ri

ri mores, virtutemque intelligendam, hæc pauca libavimus.

Pietatis opera publice per eum instituta. Cap. XIII.

INter ipsam Societatis administrationem, cui potissimum interveniebat; non exiguam partem curarum aliis quoque rebus impertiit: atque iis maxime, quæ ad salutem, & commodum populi, atque ad splendorem, ac dignitatem Sanctæ Romanæ Ecclesiæ pertinerent. De curandis ægrotis, & pœnitentiæ Sacramento Innocentii Tertii Papæ lex est: Ægrotos; nisi peccata rite confessos, a prima inspectione medici neve adeunto, neve curanto. Ea lex quum ipsa destituta propemodum antiquata esset; perfecit IGNATIUS ut salutaris illa consuetudo longo intervallo revocaretur, visendi tamen spatio in alteram usque vicem extracto: qua moderatione videlicet simul & publicæ existimationi, & singulorum animis, corporibusque consultum est. Mulierculas a maritis cum pudicitiae, captivæ periculo dissidentes, matronis ditioribus in officio continendas, ac
sus-

sustentandas dividere consueverat : sed quum cresceret numerus ; necui gravior esset impensa , locum iisdem recipiendis , alendisque publice parare constituit : suumque consilium impertiit primoribus civitatis . Quibus rem ita probantibus , ut nemo tamen se profiteri vellet tam gloriosi operis principem ; hanc rationem **IGNATIUS** iniit rei ad exitum perducendæ . Ex area templi nostri Petrus Codatius procurator lapides ingentes effoderat , cuiusmodi multi ruinis veteribus continentur . Hos igitur lapides in magna rei familiaris inopia vendi , & summam ex iis confici aureorum centum **IGNATIUS** imperavit : eam pecuniam quum ad opus inchoandum primus in medio posuisset ; tantum reliquis ardorem iniecit (insita mortalibus natura propere sequendi , quæ inchoare piguit) ut ex voluntaria conlatione institutum sit cœnobium , quo ejus generis feminæ sese reciperent : ibique secure tandiu delitescerent , quoad compositis controversiis in gratiam cum maritis redirent : atque idcirco cœnobium (ut supra diximus) Male nuptarum vulgo appellatum est . Ad ejus autem loci custodiam ,
atque

atque administrationem **IGNATIUS** piorum hominum sodalitatem adhibuit, prudenti sane consilio. Etenim in communem utilitatem intentus, ne uno duntaxat munere implicitus teneretur; ut quodque opus absolverat, confestim ejus operis procuratione certis, atque idoneis hominibus demandata, ipse animum, & cogitationem ad alia deinceps, atque alia transferebat. Parthenonem etiam Sanctæ Catharinæ, cui a Funariis, vel a Rosa cognomen est; **IGNATIUS** idem instituit. Quo in Parthenone puellæ forma eleganti, quarum pudicitia periclitaretur ob angustias rei familiaris; magna præfectorum diligentia conquisitæ, interdum etiam pro potestate, si res exigat, e complexu parentum abreptæ, hodie ad centum & quinquaginta sub claustris, & sanctimonialium feminarum disciplina, magno labore, & impensa educantur: eædemque, simul atque maturum est, vel perpetuæ religioni, & castitati sponte se consecrant; vel idoneis viris dantur nuptui, dote a loci præsidibus persoluta. Non minus laudabile, quod sequitur. Quum plurimi bonæ interdum indolis pueri, & puellæ,

læ, (ut in Urbe plena peregrinis & advenis) destituti, vel orbi parentibus, miserandum in modum per plateas, & compita seminudi, & egentes errarent; utriusque sexus & commodis, & salutis, eodem IGNATIO suadente, provisum est. Itaque ex eo tempore duabus in ædibus, hoc est sanctæ Mariæ in Aquiro, & sanctorum quatuor Coronatorum, masculi seorsum, ac feminae & gratis aluntur; & rudimentis Christianæ Fidei, ac partim literis, partim etiam necessariis ad usum reipublicæ artibus, atque opificiis imbuuntur. Utriusque autem sexus est hac tempestate numerus capitum amplius ducentorum: quorum illi præter domesticas exercitationes ad funera quoque prosequenda psallentes, & candidati procedunt; hæ, ubi adoleverint, vel maritantur; vel in sacratarum virginum collegia sese conferunt. Quin etiam, quod olim in patria sua perfecerat, id ipsum Romæ quoque molitus est, ut ulcerosi, ac mendici per compita misere quiritantes, unum in locum coacti, publica impensa ex censu, & conlationibus alerentur. Eamque rem ingenti civitatis approbatione ad exitum

tum perduxisset; ni pauci potentes, nescio quo spiritu impulsī, huic tam præclaræ actioni obstitissent. Ad hæc, et quisquiliis Hebræorum si cuiquam Evangelii lumen affulserat; hunc hospitio confestim acceptum IGNA-TIUS pro sua tenuitate liberaliter, ac benigne tractabat, quoad Christianis præceptionibus eruditus baptismatis fonte renasceretur. Neque a procurandis neophytorum commodis ante destitit, quam ex auctoritate summi Pontificis ædes paratæ sunt, quas Catechumenorum appellant: quibus in ædibus hodie masculos seorsum, ac feminas, quum aliorum, tum præcipue Gregorii XIII. Pontificis Maximi munificentia large sustentat. Atque etiam (quod expressius charitatis argumentum est) baptizati ex eo loco non ante mittuntur, quam aut literarum præsidio, quas interim edocentur; aut artis cuiuspiam, necessaria sibi in reliquam vitam adjumenta paraverint. Quo pietatis officio multi ex eadem secta permoti, magno bonorum gaudio, sese quotannis ad Christum adiungunt. Illud vero optimum, quod ad Catholicæ Fidei reliquias in Septentrionali plaga fovendas,

das, augendasque, auctore, atque
 adjutore in primis Joanne Morono
 Cardinali amplissimo, Seminarium
 Clericorum in Urbe condidit, dato
 negotio nostris hominibus, qui con-
 quisitos bonæ indolis adolescentes
 Romam ex iisdem regionibus mitte-
 rent. Atque id Seminarium, sive
 Collegium Germanicum, ut appel-
 lant, acerbissimis deinde tempestati-
 bus, ingenti labore, ac perseverantia
 tutatus IGNATIUS est, præstantissi-
 mis e tota Societate doctoribus ad eam
 juventutem & literis, & moribus
 instruendam adhibitis. Quod opus
 & Ecclesiæ Romanæ ornameto, &
 Germaniæ magno adjumento & fuisse,
 & esse hodie vel maxime constat,
 quum in ejus pene collapsi instaura-
 tionem, & amplificationem idem
 Gregorius XIII. pro sua præcipua in
 eas nationes clementia, & voluntate
 vehementer incubuit. Nec Germani-
 cæ modo, sed cæterarum quoque gen-
 tium pueros, & adolescentes IGNA-
 TIUS piis, ac liberalibus disciplinis
 imbuendos (quam unam expeditissi-
 mam emendandi generis humani ra-
 tionem ducebat esse) per se, suosque
 admonitu plane divino suscepit. At-
 que

que ob id ipsum gymnasia , quibus æque infimi , ac summi gratis erudirentur ; non Romæ solum , sed etiam toto pene terrarum orbe constituit , summa adhibita cura , ne quid professores nostri , quamvis acutum , & plausibile , afferrent peregrini , vel novi dogmatis , nedum ab orthodoxa fide abhorrentis : verum in singulis quæstionibus celeberrima quæque , & probatissima doctorum placita sequerentur .

*Quædam de Ignatio mira ,
Cap. XIV.*

PRÆTER ea , quæ superioribus libris **IGNATIO** divinitus accidisse retulimus ; non pauca de eodem admirabilia prædicantur : quorum aliqua nobis hoc loco exponere visum est . Recenti conversione , Hierosolymam petens , dum Barcinone transmissionem expectat , interea divinam rem , sacras conciones , & alia religionis officia quam accuratissime obire non destitit . Accidit autem aliquando ut , quum in templo verbum Dei audiret ; conspicata hominem femina princeps , peregrini habitu sæci plebis

im.

inmissum, videre sibi visa sit ejus caput, ac faciem eximio quodam fulgore splendentem: idque tanta suacum animi voluptate; ut quanquam invita, ac repugnans modestiæ causâ, tamen ab eo adspectu oculos nulla ratione posset avertere. Igitur concione dimissa, nihil ei fuit antiquius, quam ut mariti permissu peregrinum per idoneos homines oppido conquistam hospitio acciperet. Qui domum ingressus, percunctantibus illis quis, aut cujas esset, peregrinari se Hierosolymam dixit; neque de se ipso verbum ultra addidit: verum enim vero sermonem de rebus divinis instituens, omnes, qui aderant, cœlesti quodam solatio lætitiaque perfudit. Qua re vehementius etiam permoti, operam dedere, ut nobilis quidam vir ipsorum propinquus, in Italiam trajecturus, una cum IGNATIO conscenderet, rati navigium utique tali vectore perire non posse. Neque eos fefellit opinio; siquidem alia navis quum eodem fere tempore vela fecisset; non longe a portu vi tempestatis absorpta est: at vero, qua IGNATIUS vehebatur; celerissimo cursu Cajetam incolumis tenuit. Post reversionem vero, dum Bar-

ci-

cinone, ut initio dictum est, Grammaticæ rudimentis operam dat, res accidit ad viri sanctitatem illustrandam haud levis momenti. In parœcia Beatae Mariæ, cui a Mari cognomen est, ad plateam Lullianam, Lyssani duo fratres de patrimonio diutius litigaverant. Ac denique a iudicibus lata sententia, is, qui causa ceciderat; præ nimio dolore ad ultimam desperationem reductus, impulsu dæmonis e cubiculi trabe laqueo se suspendit. Ea re cognita, vicini ad tetrum illud spectaculum confluunt mirantes hominis facinus, miserantes insaniam. Id simul atque IGNATIUS audivit, confestim advolat; pendentem ex infelici tigillo restem præcidit; hominem, vel cadaver potius collocari jubet in lectulo. Deinde seorsum nixus genibus pro salute ipsius Deum orare non sine lacrymis institit. Res mira! Deprecante IGNATIO, cunctis, qui aderant, in lectulum obversis, & expectatione suspensis, miser ille repente sustulit oculos: vocisque usum eatenus duntaxat recepit, quoad vocato celeriter in id sacerdoti peccata rite confessus est: ac demum expiatus, animam e Tartari faucibus ere-

creptam, Domino, reddidit. Cujus rei fama totam urbem, finesque illos magna cum omnium admiratione pervasit: & supersunt hodie, qui meminerint: a quibus ego id ipsum Barcinone diligenter quæsi. Ac multo post Romæ, constituta jam Societate, aliud non minus mirum IGNATIO contigit. Cum Alexandro Petronio, cujus ante meminimus, & Medico, & Philosopho insigni magnum usum, amicitiamque contraxerat. Ad eum ægrotum aliquando vicissim ipse visendi causa quum adiisset; quanquam alieno tum tempore, tamen pro familiaritate a domesticis introductus, occlusis fenestris in lectulo quiescentem invenit; & ex tenebris ratus hominem sopori sese dedisse, suspensio vestigio tacitus adrepens, pulvino sensim affedit. Ac nihilominus Alexander e somno excitatus, & repente Felicitatem uxorem inclamans: quis novus hic splendor, quæ tanta, inquit, lux cubiculum complet? At illa simpliciter, id quod erat, unum IGNATIUM introisse respondit. Tum Alexander, homo gravis, & prudens, non dubio argumento viri sanctitatem interpretatus,

ex

ex eodie IGNATIUM, tanquam humano fastigio celsiorem, magis, magisque suspexit; totamque deinde rem ipse mihi, aliisque serio exposuit. Parisiis Michaël quidam Hispanus, quem Romæ deinde falsæ criminationis ministrum in Patres fuisse diximus; impatienter ferens patronum suum Franciscum Xaverium e medio honorum cursu ad studium humilitatis Christianæ traductum fuisse, ira percitus, IGNATIUM, utpote ejus rei auctorem, interficere omnino constituit: quumque in hospitium ipsius ultro invasisset, strictoque jam gladio scalas furibundus ascenderet; divina repente voce perterritus: *Quo tendis infelix?* retulit gradum: totamque rem conscientia victus postmodum ipse confessus est. Anno a Virginis partu M.D.LIV. Rodulphi Pii Cardinalis opera Societatis collegium ad Lauretanam ædem institutum est: acciditque ut domus nostris ad habitandum attributa lemurum terroribus, & faunorum ludibriis admodum esset infesta. Quumque, noctu præsertim, modo hi, modo illi, detractis e cubili stragulis, vel insolito quodam cachinno excitati;

per cæcas tenebras trepidarent ; ad eam pestem avertendam multa nequam experti, denique per epistolam ad sacrificia, & preces IGNATII, tanquam ad sacram anchoram, communi consensu confugiunt. Ille, re cognita, Deum attente precatus, rescripsit sociis, bono essent animo; ac divino præsidio freti (quod in tali re fecerat ipse non semel) dæmonum terricula-menta nihili ducerent. Mirum dictu! Recitatis literis, omnes confestim ea molestia, spectrisque non modo in præsens, verum etiam in posterum liberati sunt. Quum IGNATII defuncti corpus exsequiarum causa jaceret in feretro; Bernardina quædam Romana filiam diuturno morbo laborantem, quam arte nulla medici sanare valuerant; ad osculandas mortui manus admovere vehementer optabat, certam ex eo contactu filię valetudinem sibi pollicita: sed quum præ turba, impetu sæpe capto puella nunquam ad feretrum accedere potuisset; denique mater, quippe quam filię charitas valentiolem, audacioremque reddebat; non ante destitit, quam ex IGNATII vestimentis frustulum abscidit. Id frustulum virginis collo
simul

Simul atque alligatum est; tanquam
 præsenti Numinis ope morbus evanuit:
 cujus miraculi rumor, cunctis, ut par
 est, admirantibus, longe lateque ma-
 navit. Ac ne prophetiæ quidem in-
 signi dono caruisse putandus IGNA-
 TIUS est; siquidem aliqua partim
 abdita aperuit; partim longe a con-
 spectu remota monstravit; partim
 etiam multo post futura sine ullo
 errore prædixit. In iis, qui Barcinone
 IGNATIUM maxime coluere, ac
 præcipuum ex ejus consuetudine, &
 monitis fructum, utilitatemque cepe-
 re; vidua quædam fuit nomine Agnes,
 e-Paschala familia. Hæc quum cætera
 charitate IGNATIUM adjuvit, ejus-
 que sustentavit inopiam; tum Parisios
 proficiscentem, ad usque templum S.
 Andreae tria millia ab urbe passuum
 officii causa prosecuta est una cum
 Joanne filio, optima spe summæ virtu-
 tis, ac pietatis adolescentulo. Hunc
 in digressu quum oscularetur IGNA-
 TIUS, eique præcepta in reliquam
 vitam paterna daret; cur, inquit ille,
 quum alii abs te exculti, tuisque moni-
 tis incitati, vel CHRISTI consilia sint
 secuti, vel certe in virtute magnos
 progressus effecerint; me unum, pa-

rens optime, rudem informemque destituis? Quid misero mihi, te absente, futurum est? Atqui bono animo esto fili, respondit IGNATIUS: nequaquam tibi deerit exercendæ patientiæ, deque Deo bene merendi materies. Nanque ubi adoleveris, uxorem duces; multisque incommodis afflictaberis; quæ te solvi deliciis; & in auxilio divino implorando torpere minime patientur. Neque abfuit dicto fides; siquidem post aliquot annos ille, contracto matrimonio, multos suscepit liberos; quumque haud ita dives esset; debitorum fraude, quibus non exiguam pecuniæ summam crediderat; rei familiaris naufragium fecit: hodieque confecta jam ætate senex, seque, familiamque suam quotidianis laboribus ægre sustentat. Ejus deinde Agnetis mortem Barcinone sanctissime obitam, Romæ Dei monitu præsensit IGNATIUS: ut literæ Antonii Araozii, qui morienti viduæ adfuerat; nihil ei super illa re novi postmodum attulerint. Quidam haud ita pridem in Societate versatus, quum ex imposito sibi munere tanta molestia afficeretur, ut somnum capere vix posset,

ac

ac de repetendo seculo cogitaret; **IGNATIUS** rem divinitus odoratus, adolescentem nocte intempesta e lectulo vocari ad se jussit: alioqui fratrum necessitatibus mirum in modum parcere solitus. Is quum animo valde perturbato venisset, ficta persona quaesivit ex eodem **IGNATIUS**, si quis hac, vel illa tentatione sollicitaretur; quidnam ei consilii daturus esset: ac per eam sermocinationem omnes illi obstupescenti sensim ejus animi recessus, ac latebras patefecit simul; & perturbationes admirabili dexteritate sedavit. Eodemque charitatis officio erga alios quoque multos pari perspicacitate perfunctus est: qui quum suos morbos propter inscitiam aperire non possent; ultro iis ipsemet ante medicinam & genus ægritudinis, & causas detegebat. Vicetiae, Fabro & Laine comitibus, dum ex voto finem anni vertentis expectat, cæteris item Patribus ob id ipsum Veneta ditione dispersis; repente affertur, Simonem Rodericum, Bassani gravissima febre correptum, in extremo versari vitæ discrimine. Quo nuncio perculsus **IGNATIUS**, licet ipse quoque febricula teneretur; tamen illico surgit; ac

Jacobi Lainis, qui gravius laborabat, cura piis hominibus demandata, sequente Fabro, se pedes in viam dat: eodemque die passuum octodecim fere millia confecit, ea quidem celeritate, ut præcedentem vix Faber consequi posset. Quumque ex itinere, de Simone sollicitus, orandi causa paullulum e semita divertisset; supplicatione peracta, sensit auditas preces: atque ad Fabrum rediens, pro certo affirmavit Simonem e morbo evasurum. Ad quem ut venit, arcte complexus hominem, læta omnia sperare, & certam sanitatem expectare jussit. Nec fane frustra; quandoquidem Simon paullo post, contra omnium opinionem, pristinae valetudini redditus est: atque id beneficium hodieque secundum Deum IGNATIO se se acceptum referre testatur. Haud longe a Bassani mœnibus loco edito templum cernitur beati Martyris Viti; ex quo in subjectam convallem despectus est, quum cætero cultu visendum; tum crebris aquarum e Medoaco amne derivationibus. Id templum eo tempore tuebatur solitarius quidam, Antonius nomine, vir doctrinarum expertus, & idiota quidem ille, verum-

tamen

tamen severus, & gravis, & ipso totius corporis, atque oris habitu venerabilis: ac proinde apud illas gentes magna virtutis, & sanctitatis opinione. Is IGNATIUM nihil insigne præse erentem, elato supercilio (ut ipse postea fatebatur) contemnere apud se cœpit, ac parvi facere; quoad intentius aliquando supplicanti demonstrare dignatus est Dominus qui vir, & quantus esset IGNATIUS: quamque multorum adjumento, & saluti divina providentia destinatus. Ex quo suam ille temeritatem dolenter accusans, IGNATIUM studiose dein colere, atque observare instituit. Per eosdem forte dies quidam ex IGNATII sociis, partim anachoretæ consuetudine, partim etiam ipsius loci a mœnitate captus, ita cogitare cœpit apud se: hem, IGNATII comites, vexatis tanto labore, tanta rerum omnium difficultate corporibus, de animorum insuper salute periclitamur. Raro, quam extulimus domo, mentem, spiritumque referimus: nimium pulveris, sordiumque campestri, hoc opere, & exercitatione colligimus. Ac cæteris quidem major forsan gratiæ divinæ fiducia, plus viriam fue-

rit ad obvia quæque superanda ; mihi vero meæ infirmitatis præclare conscio, nonne conducatur procul negotiis, tumultibusque cœlestem in terris vitam una cum hoc sancto eremiculture transigere; & abjectis multiplicibus curis, uni Deo vacare? Hæc apud se identidem reputanti, occurrabant ex altera parte IGNATII charitas, dulcedo sociorum, cœpta communia, datæ dexteræ, & deferendi nefas. Ejusmodi cogitationum æstibus quum aliquandiu fluctuasset; denique consultandi causa ad anachoretam ipsum adire constituit. Sed nequaquam cessit illi res e sententia. Quippe vixdum extra oppidum extulerat pedem, quum ei unispectrum esset objectum, armatus vir, trucibus oculis, stricto gladio minitans. Exterrui primo ea species hominem; dein impetu capto quum nihilominus pergeret; iratus ille ac furens in obvium irruere visus. Tum vero peregrinus haud dubie terga dat: ac sine respectu in oppidum avolat, mirantibus incolis, quod tam effuse fugientem adspicerent, nemine persequente. At ille a præcipiti cursu non ante destitit, quam in ipsius IGNATII diversorium

rium sese cum infana trepidatione coniecit. Cui subridens Pater (totam quippe rem Deo revelante cognorat) sicine titubas? inquit. Modicæ fidei, quare dubitasti? Quæ ille interrogatione & in præsentia valde compunctus, & in posterum, ne ab instituto deficeret, magnopere confirmatus est. Quum Joannes Codurius, e primis Patribus unus, e gravi morbo in ultimum vitæ periculum esset adductus; ad rem divinam pro socii salute faciendam **IGNATIUS** ædem sancti Petri in Monte aureo petiit: cujus & loci, & Apostoli, ut supra diximus, præcipua quadam religione tenebatur. Quum ad medium fere pervenisset pontem Janiculensem, qui Sixti pons hodie dicitur; sublatis, intentisque repente in cælum oculis, retulit pedem attonito similis: ac deinde conversus ad comitem (is erat Baptista Viola Parmensis, ex quo hæc ipsa cognovi) domum redeamus, inquit: Codurius noster migravit e corpore. Creditus est **IGNATIUS** ex illo stupore, & fiderum intuitu, & repentina reversione, ut olim Hozii, sic tum Codurii animam vidisse cælum intrantem: licet justis fortasse de causis de hoc celave-

rit, quod iustas item ob causas de illo non reticuerat. Nam & id ipsum alius adspexisse ferebatur; & ex horarum ratione compertum est eo ipso temporis momento Codurium exspirasse; & alioqui non fuit, cur, amicissimi viri cognito excessu, domum extemplo reverteretur; vel ad piaculare sacrum ejus causa de more faciendum recta pergere omitteret. Id autem accidit anno post Virginis partum M. D. XLI. quarto Cal. Septembris. Eodē fere loco deinde quiddam aliud accidit non absimile. Quum Stephanus Baroëlius Novocomensis, qui vivit adhuc, periculoso morbo implicitus teneretur; & cunctis de illius vita sollicitis, IGNATIUS pro viri valetudine in eadem illa, quam diximus, æde Sancti Petri in Monte aureo perlitasset; in reditu comitem læto vultu compellans (is fuit Petrus Ribadeneria Toletanus, qui hæc ipsa mandavit literis) non moriturum ex eo quidem morbo Stephanum constanter asseveravit. Nec vana fuit prædictio; siquidem haud ita multo post, ægrotus non sine magna omnium admiratione convaluit. Quum Patavii nostris ad gymnasium, & reliqua

liqua Societatis munera , Sanctæ Mariæ Magdalænæ templum , & ejus templi vectigalia tribuisset Andreas Lipomanus egregia pietate vir, cujus mentionem antea fecimus; de adeunda loci possessione grave certamen a nobilissimis viris injectum est. Venetiis tum Laines, & Salmeron Societatis causam agebant. Ii ad rem perficiendam omni conatu nequiquam adhibito, quum adversariorum potentia valde premerentur, ac pene ab incepto desistere decrevissent; postremo (quod unum reliquum videbatur esse perfugium) per literas totam rem IGNATIO commendant. Ille quum quinta circiter feria literas accepisset; postridie (qui dies erat natalis Deiparæ Virginis) re divina peracta, respondit, CHRISTI causam ne defererent; eodem adjuvante, voti compotes fore. Nec vana fuere promissa; quippe, re in Senatu diu multumque agitata, denique possessio nostris adjudicata est cunctis ferme suffragiis: atque a peritis rerum æstimatoribus non leve miraculum est habitum, in ejusmodi civitate, a duobus ignotis, & peregrinis hominibus clarissimorum civium opes, & gratiam superatam

fuisse. Paulo IV. Pontifice Maximo, quum inter bellicos tumultus vir quidam princeps, qui nuper est mortuus, Collegii Germanici tutelam, ac patrocinium, oneris, & impendii gravitate defatigatus, abjicere cogitaret; idemque auctor esset IGNATIO, ut ne in re jam desperata, ac pene lapsa diutius operam, & oleum perderet; sane fortiter IGNATIUS illi respondit, faceret ipse, quod vellet; se quidem, quoad viveret, eam procurationem nunquam esse depositurum: neque vero dubitare se quin tam præclare inchoatum opus divina providentia conservatura esset: ac datura aliquando Pastorem, qui non modo necessariis, verum etiam copiosis ad victum, cultumque vectigalibus id Collegium instrueret. Per eadem fere tempora vir quidam pecuniosus, templi nostri miseratus angustias, ædem nobis ædificare voluit laxiorem; sed quum is descriptionem quandam suam sequeretur, cum dignitate quidem illam, & elegantiâ, verum tamen ad Religionis nostræ usus parum idoneam; IGNATIUS piam viri voluntatem utique accepit, egitque, ut debuit, gratias: rem vero ipsam
ani-

animo fidenti rejecit; quod sibi compertum esse diceret, non defuturum olim, qui templum nostris muneribus accommodatum exstrueret. Quarum duarum præsentium alteram Gregorii XIII. Pontificis Maximi summa, ut dictum est, pietas, atque benignitas; alteram Alexandri Farnesii Cardinalis amplissimi eximia religio, & regia plane magnificentia comprobavit. Alia item de IGNATIO miranda narrantur; quæ, quia mihi haud satis explorata sunt, necesse non habui adscribere: præsertim quod clarorum hominum sanctitas non tam signis, atque miraculis, quam charitate in Deum, & vitæ innocentia continetur.

Ejusdem forma, & statura corporis. Cap. XV.

STatura fuit modica; grato, & pleno dignitatis adspectu; colore inter album, & aquilum; exporrecta, lataque fronte; vivacibus oculis; oblongo, & incurvo naso: quam vel in primis certam prudentiæ notam Metoposcopi existimant. Claudicavit non nihil e vulnere olim in propugna-

gnatione Pompelonensis arcis accepto: sed citra ullam deformitatem: ut nemo fere nisi curiosus animadverteret. Effigies circumfertur illius non admodum ad vivum, ut familiares affirmant: siquidem ex mortui demum facie gypso imaginem exprefere plastæ: quoniam ipse dum viveret, quanquam multorum precibus fatigatus, neque pingi, neque fingi se passus est, omnibus in rebus humanæ gloriæ contemtor egregius, ac dignus profecto, cuius vitæ sanctimoniam, præstantissimasque virtutes pia posteritas, tanti parentis memor, in omne tempus imitetur, & celebret.

F I N I S .





INDEX

CAPITUM OPERIS.



LIBRI PRIMI.

- O**rtus Ignatii , & educatio .
Cap. 1. pag. 1.
Conversio ejus ad Christum .
Cap. 2. 6.
Ad Montem serratum religionis causa
proficiscitur . Cap. 3. 17.
Acta ejus in Monte serrato . Cap. 4. 24
Ardores ejusdem in studio pœniten-
tiæ . cap. 5. 27.
Molestiæ scrupulorum , & tentatio-
num ejusdem . Cap. 6. 31.



I N D E X

<i>Ignatii profectus in spiritu. Cap. 7.</i>	
<i>pag.</i>	39.
<i>De studio collato ad proximos ad-</i>	
<i>juvandos. Cap. 8.</i>	44.
<i>E gravi morbo periclitatur. Cap. 9.</i>	
<i>pag.</i>	47.
<i>De inanis gloriæ vitio superato.</i>	
<i>Cap. 10.</i>	49.
<i>De profectiōe Hierosolymitana.</i>	
<i>Cap. 11.</i>	51.
<i>Navigat in Italiam. Cap. 12.</i>	53.
<i>Navigat in Palæstinam. Cap. 13.</i>	
<i>pag.</i>	61.
<i>Palæstinæ loca sancta perlustrat.</i>	
<i>Cap. 14.</i>	64.
<i>In Hispaniam redit. Cap. 15.</i>	70.
<i>Barcinone ad studia literarum ag-</i>	
<i>greditur. Cap. 16.</i>	78.
<i>Ejusdem commoratio Complutensis.</i>	
<i>Cap. 17.</i>	85.
<i>Lutetiam proficiscitur. Cap. 18.</i>	103.
<i>Extremæ inopiæ incommoda superat.</i>	
<i>Cap. 19.</i>	106.
<i>Varie propter Christum exercetur.</i>	
<i>Cap. 20.</i>	111.
<i>De sociis ad Ignatium adjunctis.</i>	
<i>Cap. 21.</i>	118.

I N D E X

LIBRI SECUNDI.

A ger Hispaniam repetit .	
Cap. 1.	128.
Venetias ingenti labore contendit .	
Cap. 2.	135.
Venetias ad Ignatium socii veniunt .	
Cap. 3.	141.
Sacris initiatur Ignatius : & de rebus ab eodem , & sociis in Veneta ditione gestis .	Cap. 4. 149.
Ignatio Romam appropinquanti Christus apparet : & unde Societati JESU nomen inditum fuerit .	
Cap. 5.	156.
Ignatius Romæ Christianæ rei dat operam : in Casinati monte animam Hozii cælum intrantem videt .	Cap. 6. 160.
Romam Patres universi conveniunt : veterem plebis erudiendæ morem , & frequentem usum Confessionis , & Eucharistiæ restitunt .	
Cap. 7.	166.
Falsis criminibus circumvenitur Ignatius , & absolvitur .	Cap. 8. 168.
Ignatius , & cæteri Patres de constituenda Societate deliberant .	
Cap. 9.	182.
	Patres

I N D E X

<i>Patres in varia loca Pontificis jussu discedunt. Cap. 10.</i>	187.
<i>Ignatius plebi fame periclitanti succurrit. Cap. 11.</i>	194.
<i>Confirmatur a Pontifice maximo Societas. Cap. 12.</i>	198.
<i>Præpositus Generalis creatur Ignatius. Cap. 13.</i>	201.
<i>Generalis Ignatius devoto Catechizæ munere fungitur. Cap. 14. pag.</i>	211.
<i>Societas augetur, distribuuntur provincie. Cap. 15.</i>	214.
<i>Varie in Ignatium tempestates excitantur. Cap. 16.</i>	216.
<i>Regimen feminarum a Societate depellit Ignatius. Cap. 17.</i>	219.
<i>Honoribus in Societatem nostram Ignatius aditum obstruit. Cap. 18. pag.</i>	222.
<i>Confirmatur à Julio III. Societas. Cap. 19.</i>	236.
<i>Magistratu sese abdicare conatur Ignatius. Cap. 20.</i>	238.
<i>Societati in Hispania valde laboranti succurrit. Cap. 21.</i>	241.
<i>De Julii III. obitu, & de Marcelli II. in Ignatium nostrosque benevolentia. Cap. 22.</i>	246.
<i>Ignatii obitus. Cap. 23.</i>	248.

I N D E X

LIBRI TERTII.

D E <i>brandi assiduitate, & studio pietatis. Cap. 1.</i>	253.
<i>Quod ejus fuerit de perfectione judicium. Cap. 2.</i>	261.
<i>De charitate ipsius in Deum. Cap. 3. pag.</i>	263.
<i>De charitate in proximos. Cap. 4. pag.</i>	265.
<i>Mansuetudo ejusdem & comitas. Cap. 5.</i>	274.
<i>Gravitas ejusdem, & in custodia disciplinæ severitas. Cap. 6. pag.</i>	278.
<i>Ejusdem animi submissio : & quid de virtute Obedientiæ senserit. Cap. 7.</i>	285.
<i>Paupertas ejus, & castimonia. Cap. 8. pag.</i>	293.
<i>Æquitas animi, & constantia ejusdem. Cap. 9.</i>	295.
<i>Ejusdem ratio gubernandi. Cap. 10. pag.</i>	308.
<i>Ejusdem ratio proximos adjuvandi. Cap. 11.</i>	320.
<i>Vita ejus quotidiana, & domestica. Cap. 12.</i>	323.
Pie-	

I N D E X

Pietatis opera publice per eum in-
stituta. Cap. 13. 327.

Quædam de Ignatio mira. Cap. 14.
pag. 333.

Ejusdem forma, & statura corpo-
ris. Cap. 15. 350.

FINIS INDICIS.







